

**NINTH MIZORAM LEGISLATIVE ASSEMBLY
(SECOND SESSION CUM BUDGET SESSION)**

LIST OF BUSINESS

FOR TWELFTH SITTING ON THURSDAY, THE 7th MARCH, 2024
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

FINANCIAL BUSINESS

DISCUSSION AND VOTING ON DEMANDS

2. **PU C. LALSAWIVUNGA**, Minister to submit to the vote of the House various Demands under his charge.

Demand No.	Purpose	Amount (in ₹)	Demand for Grants Page No.
19	Local Administration	2,08,31,40,000.00	178-185
23	Art & Culture	14,59,20,000.00	229-238
27	District Council & Minority Affairs	6,12,17,14,000.00	288-292
34	Animal Husbandry & Veterinary	70,10,78,000.00	366-379
TOTAL		9,05,18,52,000.00	

3. **PU P.C. VANLALRUATA**, Minister to submit to the vote of the House various Demands under his charge.

Demand No.	Purpose	Amount (in ₹)	Demand for Grants Page No.
31	Agriculture	2,03,17,96,000.00	336-354
37	Co-operation	15,16,74,000.00	395-399
47	Irrigation & Water Resources	1,03,18,23,000.00	497-503
TOTAL		3,21,52,93,000.00	

4. **PI LALRINPUII**, Minister to submit to the vote of the House various Demands under her charge.

Demand No.	Purpose	Amount (in ₹)	Demand for Grants Page No.
24	Health & Family Welfare	8,39,53,60,000.00	239-270
29	Social Welfare	2,47,68,05,000.00	300-328
43	Tourism	13,92,80,000.00	452-457
TOTAL		11,01,14,45,000.00	

VANLALTHANTLINGI
Commissioner & Secretary

HON. SPEAKER : “*Rorelna vawng tha te chu an eng a thawl e, englaipawha fel taka titu nen.*”

-Sam 106:3.

Hei, vawiinah kan Member zahawm tak Pu Lalchhuanthanga damlohna avangin kan zingah a lo tel thei dawn lova. Tin, kan Member zahawm tak Pu Lalthansanga pawh damlohna avangin damdawiinah te hun eng emaw chen a awm hnuah, hei, vawiinah a hmel kan hmu a, a lawmawm hle a ni.

QUESTIONS & ANSWERS:

Le, zawhna leh chhannaah kan kal nghal ang. *Starred Question No. 181*-na zawt turin Champhai South bialtu zahawm tak Lt. Col. Clement Lalhmingthanga i lo sawm ang.

Starred Question No. 181 - Champhai District Hospital chungchang.

LT. COL. CLEMENT LALHMINGTHANGA: Pu Speaker, ka lawm e. Health & Family Welfare Department chungtu kan Minister zahawm tak min chhan atana ka zawhna chu hei hi a ni e –

- a) Champhai District Hospital tihchangtlunna tura hmalakna kal mek a awm em?
- b) Specialist leh doctor indaihlohna puhrukna tura hmalakna a awm em?
- c) Trauma Centre din tawh hi eng vanga la function lo nge a niha, function vat thei tura hmalakna a awm em? Ka lawm e.

HON. SPEAKER : Chhang turin, Health & Family Welfare changtu Minister Pi Lalrinpuii ilo sawm ang.

PI LALRINPUII, HON. MINISTER: Champhai South Bialtu MLA zahawmtak Pu Clement Lalhmingthanga zawhna chhanna chu –

- a) Champhai District Hospital tihchangtlunna tur hi project lian pahnih a awm a, chungtte chu - Pradhan Mantri Ayushman Bharat Health Infrastructure Mission (PM-ABHIM) hnuaiah laboratory phuisui zawk Integrated Public Health Laboratory (IPHL) sak mek niin, khawl leh bungrua dang pawh dah tura ruahman a ni Tin, Emergency Covid Response Package (ECRP)-II hnuaiah Critical Care Block (CCB) - Intensive Care Unit (ICU) leh High Dependency Unit (HDU) awmna tur pawh sak mek a ni.
- b) Specialist leh doctor indaihlohna puhrukna tur hian hmalak mek a ni.
- c) Trauma Centre din tawh hi manpower neih loh avangin a la function lo a ni. Trauma Centre hi a function vat theih nan Central Sorkarah thlen a ni. Ka lawm e.

HON. SPEAKER : *Zawhbelhna - Zawhna neitu, Lt. Col. Clement Lalhmingthanga ilo sawm ang.*

LT. COL. CLEMENT LALHMINGTHANGA: Pu Speaker, ka lawm e. Ka zawhbelhna chu - Specialist leh doctor-te indaihlohna post hi hnawhkhat tura hmalakna a awm a nih chuan, eng hnate nge, eng hnate nge hnawhkhat tum a nih?

HON. SPEAKER : *Zawhbelhna* - South Tuipui Bialtu zahawm tak Pu Jeje Lalpekhlua.

PU JEJE LALPEKHLUA: Pu Speaker, Health & Family Welfare Deptt. changtu ka zawhbelhna chu - Ka bial chhung South Vanlaiphai Damdawi-in hi sak zawh tawh ang chu a ni a, changtu minister nen hian kan han tlawh tawh a. He damdawi-in hi khum 10 awm tura tih a ni a, amaherawhchu, khum 7 pawh kha a tawt ang reng viau mai a. Hei hi khum 10 leng tura sak that tumna a awm em?

HON. SPEAKER : *Zawhbelhna* - Lawngtlai West Bialtu, Member zahawm tak Pu C. Ngunlianchnunga.

PU C. NGUNLIANCHUNGA: Zawhna Starred Question-a ka zawh Unstared Question-in a lo chhuak a, a vanneithlak khawp mai a. Ka zawhbelhna chu – ‘Bungtlang South PHC hi sorkar hmasa khan CHC-ah a upgrade niin ka lo hria a, hei hi engtikah nge CHC angin a function theih ang?’ tih chhanna chu – ‘Hma lak mek a ni a, hun a la duh deuh ang’ tih a ni a. Kha kha, CHC-ah upgrade a ni a, pakhatmah CHC anga kal tir kha a awm chuang lova, ‘PHC’ kha, ‘CHC’ tiha thlak ringawt kha a ni mai a. Hei hi, tun sorkar kum chhung hian CHC angin function tir theih a ni ang em?

HON. SPEAKER : *Zawhbelhna* - Pu Lalmuanpuia Punte, Hrangturzo Bialtu.

PU LALMUANPUIA PUNTE: Pu Speaker, Lawngtlai West Bialtu zawhna ang chiah khan, ka zawhna chu - North Vanlaiphai PHC hi inthlan dawn khan CHC-ah hlankai a ni a, engtikah nge CHC puitlinga function tir theih a nih ang? Ka lawm e.

HON. SPEAKER : A theih ang anga chhang turin Health & Family Welfare changtu Minister Pi Lalrinpuui.

PI LALRINPUUI, HON. MINISTER: Zawhbelhna hmasa ber, Pu Clement Lalhmingthanga zawhna kha - Specialist post hi 7 fill up turin MPSC-ah recruitment dilna kalpui mek a ni. Pu Ayush Doctor hi tunhnai maiah khan 5 kan la thar a, chu chu offer of appointment kan pe mek a. Tin, GDMO post 9 dilna MPSC ah hian kan thawn pheih tawh a, recruitment kalpui theih thuai beisei a ni. Tin, Specialist - post 3, GDMO - post 1 leh Dental Surgeon - post 1 fill up turin phalna DP&AR ah kan dil mek bawk a ni.

Zawhbelhna pahnihna, Pu Jeje Lalpekhlua zawhna kha - South Vanlaiphai Damdawi-in hi Pu Speaker, PHC ah hian khum 10 a awm tawh a. February thla khan Pu Jeje-a nen hian kan han tlawh a, Damdawi-in thar an lo sa a, amaherawhchu, khum 10 awmna turah khan khum 6 chauh a lo leng ta a, a buaithlak thin khawp mai a. Khum 6 pawh hi a tlin loh lutuk avangin a chep deuh a, ngaihtuahna thar kan siam a. Kan official-te bulah pawh ti ti phung chuan ka sawi tawh a; a building hlui la tha tho si khi chei thar dan te a awm chuan, chutah chuan khum dang 4 te kha dah theih dan awm se tiin ngaihtuahna kan seng mek a ni.

Tin, Pu C. Ngunlianchnunga, Lawngtlai West Bialtu leh Pu Lalmuanpuia Punte Hrangturzo Bialtu ten an zawhna, PHC, CHC-a hlankai chungchang kha hmanni pawh khan zawhna ka dawng tawh a. Inthlan dawn khan PHC 7 lai kha CHC ah hlankai a lo ni a. Hei hi sorkar hmasate thiltih a ni a, han tihpuitlin thuai thuai pawh a chakawm rualin, thawktu indaihlohna nasat avangin engmah kan la ti thei lova, a function hun tur chu - 'thawktu indaih hunah' tih a ni e. Ka lawm e.

HON. SPEAKER : *Starred Question No. 182*-na ah kan kal anga, zawt turin Siaha bialtu Member zahawm tak Dr. K.Beichhua i lo sawm ang.

Starred Question No. 182 - Siaha CMO office building sak chungchang.

DR. K. BEICHHUA : Pu Speaker, ka lawm e. Health & Family Welfare changtu Minister hnena ka zawhna chu –

“Siaha CMO office building sak tumna a awm em? Awm ta se, engchen nge hma lak a nih tawh?” tih a ni e.

HON. SPEAKER : Chhang turin, Health & Family Welfare changtu Minister zahawm tak Pi Lalrinpuii.

PI LALRINPUII, HON. MINISTER: Pu Speaker, hei, ka system hi a nuar tlat; Pu Mathlantea khawl hi ka hmang mai ang a. Dr. K. Beichhua, Siaha MLA zawhna ka chhanna chu –

“Siaha CMO office building hi sak that tumna chu a awm a, proposal pawh siam tawh thin a ni a. Amaherawhchu kan la hlawhtling lo a ni” tih a ni.

HON. SPEAKER : *Zawhbehna - Zawhna neitu Dr. K. Beichhua.*

DR. K. BEICHHUA : Pu Speaker, kha, sak tumna a awm a, lawmawm khawp mai a.

Ka question hi nitin deuhthaw mai hian a chhuak a; Pu Speaker, min lo nin palh ang te pawh ka hlau a, ka inthlahrung ang reng a. Mahse, hei hi ballot chhuah a ni miau a, mi-vannei tak ka ni te pawhin ka hria a, a lawmawm hle a ni.

Tuna kan CMO Office hi, a nihna dik takah chuan, warehouse atana sak a ni a. A rei tawh a, CMO Office thar kan neih hi a tul hle a ni. Chutih rual chuan, CMO quarter leh Medical Superintendent quarter pawh kan nei lova, hei hi hma min laksak thei ang em?

Tin, Phura leh Chhaolo PHC-ah khian Medical Officer kan nei thin a, tunah hian lakchhuah an niin, a dang dah an ni lova; kan mamawhna khi a nasa viau mai a. Hengahte hian Medical Officer min dahsak thei ang em? Tun thut thuta a theih loh pawhin, lak thar turah hian min dahsak thei ang em?

Tin, preventive measures lak hi thil pawimawh tak mai a ni a; *“prevention is better than cure”* tih a ni a. Tuna kan sub-Centre ruak tam takah te hian sorkarin a rang lama Health Worker dah tumna a nei em? Noaotla hi khilai district-a khaw lian pawl tak a ni a. Hetah hian health-worker, male leh female te a pahnihin kan neilo ve ve a, chu chu min dah sak thei ang em?

Tin, surgeon hi, ENT kan nei a, Eye kan nei a, Gynaecologist kan nei bawk a; mahse, Anesthetist kan nei tlat lo mai a; Silai tha tak, a mu nei lo ang deuh kan ni a. Chuvang chuan, emergency case-ah te Lawngtlai emaw, Lunglei emawah te kan refer zel a ngai a; life-saving tak tak emergency turah pawh hian anesthetist tel lo chuan a theih si lova. Pu Speaker, Anesthetist hi thla ruk train chhuak tawh te pawh an awmin ka hria a, chung ho chu minrawn dah sak thei ang em? A theih loh a nih pawhin, medical officer tu ber emaw hi training turin min thawn sak thei ang em?

HON. SPEAKER : *Zawhbelhna* - Champhai North Bialtu Pu H. Ginzalala.

PU H. GINZALALA : Pu Speaker, ka lawm e. Sorkar hmasain Mizoram Healthcare atana an lo buaipui ADBA loan crore 1,000 lai mai kha a awm a, a lawmawm ka ti a. Tuna kan sorkar hian kha kha kan chhunzawm em; engtingge hma kan lak dan?

HON. SPEAKER : A chhang turin Health & Family Welfare changtu Minister Pi Lalrinpui ilo sawm ang.

PI LALRINPUI, HON. MINISTER: Pu Speaker, Dr. K. Beichhua zawhbelhna - Phura leh Chhaolo Medical Officer chungchang kha - Zawhna tlanglawn a ni a, thawktu indaih lohna kha kan sawi nasa em em tawh a. Tichuan, vawiinah demand te kan sawi dawn a, khangah te pawh khan sawichhuah a ni leh ngei ka ring a.

Tichuan, “ZMC-a zirlaite hi (kan sawi tawh ang khan) April thla tawpah hian an graduate dawn a; engvangin nge MO lak tur in hmuh zawh loh thin?” tih kha - A nghet tur a nih loh chuan, MO lak tur hi NHM atangte hian han nei ve bawk thiin, a sum te lo awm mahsela, thingtlanga awm hi an duhlo em em thin a. Tuna ckan student graduate

mai tur ho hi chuan an duh emaw, an duh lo emaw bond an sign tawh avangin two years tal government-ah an serve a ngai a; chutah chuan an hlawh a tlem emaw, tlem lo emaw thingtlang hmun hrang hrangah kan post thei tawh dawn a ni. Chuti hunah chuan MO kan neih tawh loh, hmannah pawh khan ‘assurance min pe’ an ti a, MLA tam tak kha an lawm em em a. Khangho kha sorkarin a ngai pawimawh em em a, kan policy-ah pawh hian a awm a. “*Prevention is better than cure*” tih kha, a tak tak a ni a. Chuvang chuan, Sub-Centre te, PHC-te hi tih changtlun kan tum em em a, khang hun kha keini pawhin kan nghakhlelh hle a ni.

Siaha-ah anaesthetist a awmlo hi an bialtu hian a vei hle mai a, keini pawhin a veiawm kan ti a. Siaha hi (kan sawi ang khan) refugee-te an tam a, an food fall te pawh a sang a. Mahse, lak tur hi an la awm tlat loh avangin, tunah chuan ka sawi mai thei lo a ni. Tin, ‘thla ruk train chhuak tawh’ a tih ang te kha a lo zawng hmu thei anih chuan, ngaihtuah dan te pawh a awm maithei a ni.

Pu H. Ginjalala, MLA Champhai North Bialtu zawhna, ADBA loan chungchang kha - Sorkar hmasa kha an fakawm em em mai a; corpus fund atan ADBA loan crore 1,000 an lo be fel vek tawh a, bawhzui reng a ni a. Hmanni lawk pawh khan healthcare-a kan hotunu ber Dr. Bawihte Delhi-ah a zu kal a, an zuk inbia a. Chutah chuan, inthlanpui kan hmachhawn dawn avang hian June thla velah agreement sign turin an tifel a ni. Ka lawm e.

HON. SPEAKER : A lawmawm e. *Starred Question No. 183*-naah kal ila, zawt turin Lawngtlai West bialtu member zahawm tak Pu C. Ngunlianchunga ilo sawm ang.

Starred Question No. 183 - Tuipui Ferry Lei dawh chungchang.

PU C. NGUNLIANCHUNGA: Pu Speaker, Public Works Department Minister chhan atana ka zawhna, *Starred Question No. 183* chu -

- a) Tuipui Ferry, Lawngtlai to Siaha inkalpawhna Lei (Bridge) dawha hmalak tumna a awm em?
- b) Awm ta se, a hma lama hmalak hram dan a awm thei em? Sawlai saw tunah phei chuan kawng a tha tawh a; Kawlchaw lam atanga darkar hnih kal ni thin kha, minute 45-ah Siaha kan thleng thei a ni. Tunah hian wooden brige-a dawh kai a ni a, a awlsam em em mai a; sawlai saw a ngaihpawimawhawm ka ti a. Hemi atan hian (ka lo hriatdan chuan) kan House Leader hian a campaign-na velah pawh, ‘leihlawn dawn turin hma kan la ang’ tih te kha a sawiin ka hria a. Sorkar hian hetah hian hmalak tumna a nei em?
- c) Nei ta se, engnge a chhan?

HON. SPEAKER : Public Works Department changtu, Minister Pu Vanlalhlana ilo sawm ang.

PU VANLALHLANA, HON. MINISTER: Pu Speaker, ka lawm e. Member zahawm tak Pu C. Ngunlianchnunga, Lawngtlai West Bialtu zawhna chhanna chu -

- a) Tuipui Ferry, Lawngtlai to Siaha inkalpawhna ni 8th February, 2023 ah khan MoRTH ah DPR submit a ni a, tun thleng hian sanction hmuh a la ni lo.
- b) Sanction hi nghah mek a ni.
- c) Hmalak mek a ni. tih kha ka chhanna a ni e.

HON. SPEAKER : *Zawhbelhna* - Lunglei South Bialtu, Pu Lalramliana Papua.

PU LALRAMLIANA PAPUIA: Pu Speaker, ka lawm e. Tlemin zawhna hmasa nen a in relate lo deuh hlek a; ka inthlahrung viau na a, min chhan theih ang angin min chhang sela - Luangmual to Vaisam PMGSY Road hi hun eng emaw chen thawh a ni tawh a; a thawh chhung rei tawh ngaihtuahin, tunah hian zawh a la ni lova. Hei hi eng huna zawhfel tur nge?

Tin, a kawnglaih laih tur chin ang chu kut an thlak tawha hriatna te pawh a awm a; khawchhung lut lovin, khaw daiah a tawp ringawt mai a. A khawchhung law law thleng tura tih a ni lo em ni? Laih theih dan a awm em?

HON. SPEAKER : *Zawhbelhna* - Zawhna neitu Pu C. Ngunlianchnunga.

PU C. NGUNLIANCHUNGA: Pu Speaker, ka zawhbelhna chu -

- i) Tuipui Ferry piahah sawn Tuisumpui-Lui a awm a, saw pawh saw furah a buaithlak khawp mai a. SASCI atang khan sorkar hmasa khan pawisa a dah niin ka hria a, a lawmawm ka ti a. Kha kha engtingge hmalak anih tawh?
- ii) Vathuampui to Chamdurtlang PCC pavement hi thawhna a rei tawh khawp mai a, tunah a zatve vel thawh a ni a. Engtikah nge thawh zawh theih a nih ang?

HON. SPEAKER : *Zawhbelhna* - Tuichawng Bialtu Pu RM Chakma.

PU RASIK MOHAN CHAKMA: Pu Speaker, Hon. Minister PWD changtu ka zawhbelhna chu - PMGSY kawng, Lalnutui to Ugudasury South laih a ni a. Tichuan, Ugudasury South thleng tur chuan Tuichawng Lui kan a ngai a, amaherawhchu, Thanzamasora ah kawng kha a tawp ta ringawt a. A chhan chu, Ugudasury South connect turin Tuichawng Bridge sak hmasak a ngai a. Kha kha engtikah nge a sak theih ang?

Hei hi nimina ka sawi ang khan, road planning an tih dan a dik lova; Chawngte atangin ral lehlam kai nga lovin a kawng kha sial theih a ni a, thui pawh a thui lova. Mahse, tuna an sialna hi chu engtikah mah kan sak zawh a rinawm lova. Ugudasury lam connectivity kha Thanzamasora thleng zawh a ni tawh a. Leilawn sak a la ni lo hi connectivity daltu a ni a. Mahse, kha kha PMGSY atang tih thei a ni lova.

Chuvangin, Pu Speaker, Chawngte atang hian kawng hrana kal tir theih dan chu awm se, leilawn ngai miah lovin a tih theih dawn a ni. Tin, nimina kan sawi ang khan, Chawngte to Ajasora road-a bridge pali sak ngaite hi, engtikah nge hmalak theih a ni ang? A kawng chin laih zawh tawh a ni a; mahsela, heng bridge-te hi a awm siloh chuan, kawng la nei lo ang kan ni a. Hei hi tih theih dan awm em?

HON. SPEAKER : A chhang turin PWD changtu, Minister Pu Vanlalhlana.

PU VANLALHLANA, HON. MINISTER: Pu Speaker, Pu Papuaia zawhbelhna, PMGSY kawng, Luangmual - Vaisam road kha - tunah hna thawh mek a ni a, kumin thal chhung hian zawh hman tura beisei a ni a; a deadline hi chu a pel tawh a ni. Amaherawhchu an dil angin extension pek an ni a, March ni 31, 2024 thleng hun pawhsei sak an ni.

‘Khawchhung lut lovin a tawp tawp mai’ tih kha chu, kan hre ve chiah lova. Engpawh ni se, kawng chu mihring tan tangkai a, hman tur a ni a. Mihring ten tangkai thei ang ber tura an hman theih loh kha chuan, kawng siam pawh kha awmzia a awm dawn lova. Chuvangin, hei hi chu kan lo en turah te ngai ta ila.

Tin, zawhna neitu zawhbelhna – “Tuisumpui lui kha furah a lian thin a, problem a siam deuh a; an dai kai thei lova, ruah tui a tam a, tui a lian a; thalah erawh chuan kan daikai thei a” ti kha, a statement a ni mai lo em ni, kha kha chu? (**Pu C. Ngunlianchunga:** SASCI ah lakh ₹300 dah a ni a, sawrkar hmasaah khan. Kha kha, ‘engchen nge hmalak a nih?’ tih kha a ni e.) Hmalak a nih dan kha chuti mai chuan ka sawi thei lo, Pu Speaker.

Tin, Pu RM Chakma zawhna kha - bridge pali pawimawh tak leh kawng, Chawngte atanga kal darh leh tur te kha a ni a. Khaw hming i sawi hrang hrang kha ka hre chiah lova, amaherawhchu, bridge an mamawhna kha nakinah a hranpain min la hrilh mai se, Chiang deuh zawkin. (**Pu Rasik Mohan Chakma:** Udalthana lui a ni a, Jamersury, a mizo tawngin, ‘Serlui’ kan ti, Ulusury leh Bandiasora inkarah a ni a.) Nakin recess hunah Chiang deuhin a map nen min kawhhmuh dawn nia; Chiang deuha hriat ka duh hrim hrim. Theihpatawpin infrastructure te sawti lamah te pawh hma kan la chho ang chu. Kha zawng kha ni mai awm mang e. (**Pu Rasik Mohan Chakma:** Lalnutui leh Ugudasury South, PMGSY kawng an lai zo tawh a.) Lalnutui-Ugudasury kawng, Tuichawng Lui kam maw? Hei hi lei dawh tumna PMGSY scheme ah a awm rih lo; a

hranpaa ruahman deuh a ngai ang. (**Pu Rasik Mohan Chakma:** A paw em em chu, Pu Speaker, Ugudasury South connect angin recordah khan a awm dawn a ni. A chhan chu, kha kawng kha an zo tawh a, mahse a connect miah lo; Tuichawng Lui ah khan leilawn sak phawt a ngai.) Pu Speaker, Chawngte atanga kawng laih tumna tun dinhmunah a awm rih lova, remchangah ruahmanna te neih kan lo tum dawn nia.

HON. SPEAKER : Aw le; kha, Member zahawmtak kha, kan PWD Minister kha a inhuam a, nakinah kan minister nen recess hunah te pawh lo inhrilh chiang deuh taula. Tin, Tuipui Ferry Lei, SASCI-a lakh ₹300 dah tawh tih member zahawm tak Pu C. Ngunlianchunga zawhna kha, nakinah ziaik te pawhin la inhrilh kha a tha ang a. ‘Ka chhang thei mai lo’ tiha kha, nakinah memberte’n kan hriat duh chuan, inhrilh hram hram tum hi a tha e.

Tunah chuan *Starred Question no. 184* ah kan kal ang. Vawiin chu Health leh PWD an inchhawk zak zak dawn a ang khawp mai. An rim deuh dawn a ni kan Minister pahnihte. Le, Health concern a ni a, a zawt turin Mamit bialtu, member zahawm tak Pu H. Lalzirliana i lo sawm ang.

Starred Question No. 184 - *Health Clinic insak tawh kalpui zel dan tur chungchang.*

PU H. LALZIRLIANA : Pu Speaker, Health Minister zahawmtak chhan atan –

“Mizoram khaw hrang hranga sawrkar hmasain Health Clinic hawn tura a ruahman khaw thenkhat, a in lo sak fel tawh ho kha sawrkar hian engtia kalpui zel nge a tum?”

HON. SPEAKER : Chhang turin, Health & Family Welfare Department changtu, Minister Pi Lalrinpuii.

PI LALRINPUII, HON. MINISTER: Member zahawmtak Pu H. Lalzirliana zawhna chhanna chu -

Mizoram khaw hrang hranga sawrkar hmasain Health Clinic hawn tura a ruahman kha, khaw thenkhatte chu zir chian mek a ni. Ka lawm e.

HON. SPEAKER : *Zawhbelhna - Zawhna neitu Pu H. Lalzirliana.*

PU H. LALZIRLIANA : Pu Speaker, ka zawhbelhna te chu -

i) Lengpui-a kan health infrastructure neih khu CHC nge PHC?

Kan Health Minister zahawmtak kha lehkha pawh ka pe tawh a. Health Clinic awmlohna ka bial chhungah hian khaw 15 teh meuh mai kan nei a, eng emawti tiin sawrkar hmasaah khan SEDP in kan han tan a, health-worker te kan han dah a, a helper

te. Tichuan, ‘Assam type in sakna tur a awm dawn’ an ti a, risk ten kan lo sa a, MLA Fund hmang te khan kan lo ti nawk nawk a. Amaherawhchu, eng emaw zah chu sak loh a la ni tho a. Tichuan ka zawh duha chu –

ii) Kan Health Minister hian kha kha SEDP ang zawng pawhin kal lo mahsela, health clinic mamawhna kha a la ngai reng a ni. Chuvangin, hei hi min ennnawn sak leh thei em? A hmunah zir chiang tur department te pawhin an propose-te pawh zir chiang tura han tirha, kha kha an neih ve theih ngei tura ruahmanna min siam pui turin kan ngen a. Chu chu hma min lakpui thei ang em?

iii) Tin, ANM School, Mamit District-ah 2021-2022 bawr velah khan kan han tan a; Health Worker first batch-te pawh an training chhuak ve hial tawh a. Kum tin lak belh ve zel a nih avangin, an hostel capacity hian a tlin tawh lo hrim hrim a. An academic block, an room lai kha engtin tin emaw an ping a, chutichuan an ti chho nawk nawk a ni. Hei hi khawngaih takin a rang thei angin, batch thum awmna, 20 zela 60 awm theihna tur kha a ni a. Tunah chuan an awm theihna khu 40 bawr vel chauh a ni a, 20 dang awmna tura kan la nei hlei thei lova. Khu khu a rang lamin min ngaihtuah sak thei ang em? Tin, manpower in daihlohna, vawiin ni thleng hian MLA fund in mi 5 - driver te, LDC te, peon te grade-IV te kan la ruai a ni, a tirh atangin. Khung te khu min relief theih dan a awm em? Ka lawm e.

HON. SPEAKER : *Zawhbelhna* - Aizawl South-III Bialtu, Pi Baryl vanneihsangi.

PI BARYL VANNEIHSANGI: Pu Speaker, Health & Family Welfare Department changtu Minister ka zawhbelhna chu -

i) Sialsuk PHC saw thuamthata tihchak a ngai khawp mai a; a chhan chu, helai hi kan hriat angin zinkawng a ni a, vanduaina tawk bial hrang hrang, Zoram hmun hrang hrang atangin an awm tawh a, report te pawh a thahnem viau mai a. Chuvang chuan saw laiah sawn doctor attached kan nei a, a ngheta dah theih dan awm se kan ti khawp mai a. Hei hi a theih dan a awm em?

ii) Tin, X-Ray technician kan nei lova, chubakah lab. technician post 2 awmah pakhat chauh a awm a, pakhat a ruak reng mai a, indaihlohna a na khawp mai a. Hei hi khawngaih takin tih dan tur, ruahman dan a awm thei em? He hi hma min lakpui ngei tur pawhin ka ngen nghal baw k e. Ka lawm e.

HON. SPEAKER : *Zawhbelhna* - East Tuipui Bialtu, Pu Ramthanmawia.

PU RAMTHANMAWIA : Pu Speaker ka lawm e. Kan Health Minister hnenah pawh ka sawi thin a, Sesih PHC chungchang hi. Kan doctor neih tha tak mai hlate-khuaah min sawn sak ta si a, a ai min rawn pe leh thei ta si lova, chumi chungchangah chuan, ‘min lo ngak se’ min ti a, thlamuang takin kan lo ngak a.

Amaherawhchu, tuna kan dinhmun tak hi he House-ah, nangmah kaltlangin kan sawi duh chu, sorkar hmasain SEDP hmangin staff nurse leh technician te min rawih sak kha, tun sorkar hian min bansak tak avangin kan nei ta lova. Tichuan, staff nurse pakhat leh Grade-IV kan nei a; kan staff nurse kha loh theihlohna avangin maternity leave a la leh a, August thleng. Tuna kan dinhmun chu, Grade-IV chiah kan nei a, damdawi-in khar ngai hial khawpin kan awm a ni. Chuvang chuan, khawngaih takin staff nurse leh lab technician te hi a rang lamin min dahsak thei em? Tun dinhmunah chuan Grade-IV chiah kan nei a ni.

HON. SPEAKER : A chhang turin Health & Family Welfare Department changtu, Minister Pi Lalrinpuii ilo sawm ang.

PI LALRINPUII, HON. MINISTER: Pu Speaker, a hmasa berah chuan, zawhna neitu Pu H. Lalzirliana, Mamit Bialtu zawhbelhna kha - Pu Zira hi a mimal tak pawhin fakawm ka ti a. Kan policy-ah khan healthcare a tluk chhiatna leh kan chaklohna chi hrang hrang hi ‘zirschian ni rawh se’ tih avangin, MLA zawng zawngte request ka siam a; chutah chuan an rawn theh lut vek a, an efficient em em a. Tin, Pu Zira hi, amah pawhin a sawi tawh a - MLA fund atang hian health worker te, ANM school a tangkai tur ang chi e kha a lo chhawr tawh thin a. Tunah pawh hian a la chhawr reng a, han relief te pawh hi a chakawm hlein ka hria a.

Amaherawhchu, (kan sawi leh sawi hnu) kan state sum harsatna avang hian kan duh angin thil hi a tih bawrh bawrh theih lova. Kan Chief Minister zahawm tak hnenah kan harsatna hi ka sawi a; tunah hian post vacant fill up turin hma kan la mek a, DP&AR-ah te thehluh hnu ah Finance-ah te min lo pass sak phawt chuan, kan harsatna tam tak hi min sutkian sak dawn a ni. Tin, Lengpui hi, ‘CHC a ni’ tih kha ni bawk sela.

Tichuan, Health Clinic chungchang hi - Tun hmain Health & Family Welfare Department hnuaiah hian Health Clinic 161 lai a lo awm tawh a. Sorkar hmasa, (tun sorkar kal ta) ah khan 235 hawn thar a ni a. Tunah chuan, Mizoram pum puiah Health Clinic 396 a awm a. Mahse, an vai hian (kan hriat ang khan) a function lo a ni. SEDP hun laia hawn clinic te kha Project SASCI, 2022-2023 hnuaiah hmuh a ni a, a project hming kha, ‘*Strengthening of Primary Health Infrastructure through Partnership with Local Communities in Mizoram*’ tih a ni a, crore 8.40 a ni a, project riruang kha a awm thluah a, ka chhiar chhuak vek lo ang a. Hetah hian Clinic 58 kha sak tan hman a ni a, 177 kha sak loh a ni a. Mizoram sorkar thar a lo pian khan, Council of Ministers rel angin, ‘works la tan loh te kha stay rih tur’ an ti a. Tichuan, kan zir Chiang ve zel a, Clinic te kha avaiin 235 a ni a, heng Clinic te hi Govt. of India, Ministry of Health & Family Welfare hian a lo recognise miah lo mai a. Chuvang chuan, ‘manpower pek te hi a harsa dawn a ni’ tih kha kan zir chhuah avangin, Finance Minister te nen inrawnin, sum leh pai kan mamawh em em, kan tih theih si loh, MO quarter chhe tak tak te sakna turin kan hmang dawn a ni, tih kha Pu Speaker, nangmah kaltlangin kan hrilh a ni.

Tichuan, Mamit District-a Health Worker Training School te pawh kan hre reng a. Tun Session zawhah hi chuan Pu Papua bialah hian kan kal phawt dawn a, Sesih te pawh kan va en dawn a; chumi zawhah Pu Zira bial te, Pu Famkima bial te a hmunah va endik turin kal kan tum leh a ni. Kan theih ang angin hma kan la chho ve zel a ni.

Hostel chungchang te pawh kha kan hria a, Nursing Dy. Director pawhin min hrilh thin a ni. Kan mutan ber chu, manpower bawh kha a ni a; kha kha min lo hriatpui turin ka'n sawm tak meuh meuh che u a ni. Tichuanin, Grade-IV pakhat chauh PHC Sesih, Pu Papua biala a awm hi pawh ka ti hle mai a, Pathian zarah kan nei thuai turah ngai ila.

Tin, Pi Baryl Vanneihsang zawhna - Sialsuk PHC-ah doctor nghet an neihloh pawh hi kan problem ngai tho, manpower kan indaih loh vang a ni a. Lab. technician te, Dialysis technician te, X-ray technician te, Pharmacist te, Physiotherapist te, health-worker te bakah Grade-IV te pawh za tam tak a ruak a. Chuvang chuan, heng zawng zawng hnawhkhahna turin theih tawpin tan kan la a ni. Ka lawm e.

HON. SPEAKER : A lawmawm e. Chalfilh bialah te pawh a a hmasa lamah lo kal u la maw le; kan sawm teh ang che.

Tunah, *Starred Question no. 185*-naah kan kal ang. Zawt tur hi member zahawm tak Pu Lalchhuanthanga a ni a. Amaherawhchu, damlohna avangin kan zingah a awm thei lova. Chuvangin, a aia zawt turin, Pu W. Chhuanawma, Tuichang Bialtu ilo sawm ang.

Starred Question No. 185 - Aizawl to Vairengte National Highway chungchang.

PU W. CHHUANAWMA : Pu Speaker, Pu Chhuanthanga zawhna - Starred Question No. 185 chu hei hi a ni –

“Aizawl - Vairengte National Highway tha thei reng reng lo hi siam tumna kan sorkar hian a nei em? Nei ni se, engtikah nge hna tan a nih ang?” tih a ni e.

HON. SPEAKER : Chhang turin Public Works Department changtu, Minister Pu Vanlalhlana ilo sawm ang.

PU VANLALHLANA, HON. MINISTER : Pu Speaker, Member zahawm tak Pu Lalchhuanthanga zawhna ka chhanna chu hetiang hi a ni e –

Aizawl - Vairengte National Highway hi Ministry of Road Transport & Highway ta niin, a hnuaiah PWD thawh a ni a. Kawng chhia siam that a nih erawh chuan Mizoram sorkar hian theihtawp chhuahin, kawng hi siam that reng a ni a, fur hmaa theih ang ang chin siam zel tum a ni.

HON. SPEAKER : *Zawhbelhna* - Pu W. Chhuanawma ilo sawm ang.

PU W. CHHUANAWMA: Pu Speaker, ka lawm e. Pu Lalchhuanthanga zawhbelhna chu –

i) Aizawl - Vairengte National Highway hi Mizoram sorkar enkawl a ni em?

Khawzawl hi khawpui pawimawh tak mai a ni a. Khawzawl khawpui thang mek khi (**Hon. Speaker:** Pu Chhuanawma kha ka sawm a, Pu Chhuanthanga ka sawm chiah lo a sin maw le. A pawilo ve; chhunzawm rawh le.) VC enkawl mah ni sela, Aizawl ai hian an rilru sukthlek khi a changkang zawk em aw tih mai tur a ni a. Aizawl-ah hian in sa reng reng hian, kawngpui hian an huatthu a sawi emaw tih mai tur hian an nek vak zel a. Khawzawl-ah khi chuan in sa reng reng hian kawng hi an hlat dah zel a ni. Chutiang khawpa khawpui zia pu chuanin khawpui chhung kawng an nei chhe em em mai a.

Kan hriat theuh angin SASCI sum khan hna thawh a ni a. Amaherawhchu, Model Code of Conduct-in a rawn bar hnu ah khan an thawk chhunzawm thei ta lova. A thawh theih hnu ah an han thawk tan leh a; he tah hian, party atangin percent ei a lo tam lutuk a ni ang, a thawktu khan a thawk tha thei lova; thawkho theuh theuhah khan, ‘a chhe lutuk’ te an ti a, a tawpah chuan, SE, PWD in a rawn endik a, a that loh lutuk avangin, an chawlh tir phah a ni.

Tichuan inremsiamna te an nei a. A thawhna tur sum hi percent ah a kal ral nasa lutuk a, nuai 51 vel chiah a awm tawh a ni. Pu Speaker, i remtihna, contract leichhawngtute nena an inremna, chanchinbua lo chhuak hi ka han chhiarchhuak ang a –

“Khawzawl khaw chhung cheina atan hian nuai 51 vel chiah a awm tawh dawn a. Chu chu contract lo lei tawhtu Pi Nutei, bitumen supplier leh Khawzawl PWD ten an thawk chhunzawm ang; kawng hi tuna pawisa awm sa chuan a daih thui dawn chuang lova, an thawh tawh sa Vengthar Bazar atangin an rawn siamtha nawn leh ang; A bak, a daih chin chu hna tharin, sum sanction-in a hmasa berah thawh chhunzawm leh ni se” tih a ni a. A zawhna chu -

ii) PWD Minister zahawm tak hian Khawzawl khawpui chhung kawng chhe lutuk, kawng zau tha nuam bawk si khi Pu Chhuanthanga hian a vei em em a, ‘lo zawt ngei ngei ang che’ min ti a. Chu chu, titha vat turin PWD Minister hian hma min lak sak thei ang em? Ka lawm e.

HON. SPEAKER : *Zawhbelhna* - Tuirial Bialtu, Member zahawm tak Pu K. Laldawngliana.

PU K. LALDAWNGLIANA: Pu Speaker, ka lawm e. PWD Minister zahawm tak chhan atan ka zawhbelhna te chu –

i) National Highway Kawnpui to Hortoki kawng hi engtikah nge siamthat a nih ang?

- ii) National Highway tho Mualkhang kawng hi siamthat tumna a awm em?
 - iii) Four-Lane Road laih tur tih hi engtik hunah nge laih tan a nih ang?
- Ka lawm e.

HON. SPEAKER : PWD changtu, Minister Pu Vanlalhlana chhang turin i lo sawm ang.

PU VANLALHLANA, HON. MINISTER: Pu Speaker, Pu Lalchhuanthanga zawhna, Khawzawl chungchang kha chu, han tih vak ngaihna pawh ka hre lo; *report* ni deuh berin ka hre mai a. Chingfel ngai kha chu, Bialtu MLA a ni a, a chingfel thei turah te pawh ngai ta ila.

Tin, Aizawl to Vairengte kawng dinhmuna zawhna kha - Vairengte to Bilkhawthlir inkar hi NHIDCL – ‘National Highway Infrastructure Development Corporation Limited’ kan tih thin enkawl a ni a; anni hian independent deuhin an enkawl a, Mizoram PWD hian kan va hriatpui em em lo a ni.

Tin, Bilkhawthlir to Kolasib inkar kawng hi Mizoram PWD enkawl a ni ve thung a, Mizoram PWD chuan contractor kaltlangin heng hna hi a thawk a, *Sath Guru Engineer & Allied Services Private Ltd.* hnenah mawhphurhna pek a ni a. Anni hian ni 2.6.2024 thleng chu an enkawl dawn a ni. Defect liability period kha ni 2.6.2024 ah a tawp ang a, tunah hian contractor te’n repair hna an thawh thuai kan beisei a ni.

Kolasib to Kawnpui inkar hi *National Highway Infrastructure Development Corporation* hnenah hlan a ni tawh a, Mizoram PWD-in kan hriatpui lo. Kawnpui to Khamrang inkar kawng hi PWD enkawl lai a ni a. Amaherawhchu, he hna hi contractor - *Sath Guru Engineer* te hnenah pek a ni. Anni hian ni 15.6.2025 thleng hi an enkawl hun chhung, ‘defect liability period’ kan tih chu a ni a, tunah hian contractor ten kawng repair hna hi thawh thuai an tum thu kan dawng.

Khamrang to Buichali inkar kawng hi Mizoram PWD-in NHIDCL hnenah ni 16.11.2021 khan a hlan tawh a. Nimahsela, a hma hian PWD-in a enkawl laiin RATNA Company hnenah kawng siam contract hna hi a pe a. Amaherawhchu, an thawk tha vak lova, tunah contractor RATNA Company te hi terminate an ni a, an bank guarantee lakh 73 pawh man sak niin, NHIDCL hnenah hlana, kawng siam nana hman kan tum mek a ni.

Buichali to Sairang inkar kawng hi NHIDCL kawng a ni a, Mizoram PWD ten kan va hriatpui vak lem lo baw. Sairang to Aizawl inkar kawng hi PWD kutah a awm a, resurfacing turin Ministry of Road Transport & Highway ah thehluh a ni a, sanction nghah mek a ni.

Kha kha Aizawl to Vairengte inkar kawng dinhmun a ni a. Vai Company-te hian an siam a, defect liability period a zawh hma chuan an kawng siam kha a lo chhia a awm a nih chuan, a repair leh leimin a awm a nih pawhin, a siamthat leh a sengkawi kha an mawhphurhna a ni a. Amaherawhchu, chung chu an titha lo em em mai a, an kawng siam mek laiin kawng chhe lai a lo awm a, tunah pawh chutiang kawng chhia chu kan problem a ni a. Truck Owner Association te pawhin minister pawh hmu in, ‘motor-a kal ngam loh’ tih te an rawn report thin a. Heng Vai contractor company te hi a hmunah hruaiin, a tihdan te kan zawnpui a, tawngkam tha takin kan inthlah a.

Amaherawh chu, thil tih a harsa khawp mai a. Hmanni lawkah truck te a tlu a, Truck Owners Association te’n, ‘kan kal ngam tawh lo e’ an rawn ti a; chutiangah chuan sorkar a che lo thei lova. A theih ang ang sum sawm khawmin tunah hian department-in motor kal theihna turin a buaipui mek a ni. Boulder te hmun hrang hrang atangin kan la a, chutiang chuan motor kal thei turin; furpui a lo thlena kawng a tlang loh hi kan hlauh ber chu a ni. Chumi atan chuan kan rilru leh kan taksa pawh inpuahchaha, a chhe lai apiang, fura min dang thei tu tur kha chu chui chuah zel kan tum a, chutiang chuan department pawh tan a la chhok mek zel a ni.

Tin, Pu K. Laldawngliana zawhbelhna – ‘National Highway atanga Hortoki panna kawng engtikah nge siam anih ang?’ tih kha, tunah hian ruahmanna a awm em em lem lova. Tin, National Highway Mualkhang kawng te pawh hi ruahmanna awm dan kha han sawi mai theih ka nei lo. Four-Lane Road laih chungchang thua kha chuan, Four-Lane Road hi engkim peih a ni tawh a, amaherawhchu, Forest atangin clearance ala awm lova, chu chuan harsatna a siam a ni mai a. Tunah hian NHIDCL hian an contractor tur te pawh an select ve tawh a, hna tan thei mai turin an inpeih vek tawh a ni. Amaherawhchu, hetiang minor problem an neih avang hian hna an la tan thei lova, an than theih thuai kan beisei a ni. Pu Speaker, ka lawm e.

HON. SPEAKER : A lawmawm e. *Starred Question No. 186*-na zawh turin Hachhek bialtu zahawm tak Pu Robert Romawia Royte ilo sawm ang.

Starred Question No. 186 - PWD hnuaia hna Contractor hna cancel chungchang.

PU ROBERT ROMAWIA ROYTE: Pu Speaker, ka lawm e. PWD Minister zahawm tak chhan atana ka zawhna - *Starred Question No. 186* chu hei hi a ni e –

“Kum 2018-a sorkar a tawpa, sorkar thar a lo pian khan, PWD hnuaia sorkar hmasain tender hmanga dan ang thlapa contractor a lo thlan tawh sate hna, sorkar tharin cancel sak emaw, chhuhsak emaw, chhuh thensak emaw a nei em?” tih a ni e.

HON. SPEAKER : A chhang turin, PWD Minister, Pu Vanlalhlana ilo sawm ang.

PU VANLALHLANA, HON. MINISTER: Pu Speaker, Member zahawm tak Pu Robert Romawia Royte zawhna chhanna chu hei hi a ni -
Mizoram PWD hnuaia tender hmanga dan ang thlapa contractor thlan tawh hna pakhat cancel a ni.

HON. SPEAKER : *Zawhbelhna* - Zawhna neitu, Pu Robert Romawia Royte.

PU ROBERT ROMAWIA ROYTE: Aw le, a lawmawm e. A cancel chhan kha helaiah han zawh zel kha tih loh zawk a thain ka hre deuh a; cancel chhan tha tak awm turah te pawh ngai ila. Cancel lova, *entirnan*: Congress-in MNF atangin sorkarna an la a, chutiingin, MNF-in Congress atangin sorkarna an lakna te pawh a awm a; tunah MNF atangin ZPM-in sorkarna an han la a. Dan ang thlapa tender lak cancel tunhmain a awm lo ang tho khan, tun sorkarah pawh a awm dawn lo angin a lang thova; hun hmasa lamah pawh kan Leader pawh khan a sawi tawh tho a. An contract amount ang tho khan an thawh tlan theih pawh ka ring a. Chuvang pawh chuan, Mizoram dung leh vang contractor security deposit/performance guarantee te leh a tul zawng zawng lo pe tawhte an mangang viau niin ka hria a. Hmanni deuh phei kha chuan he Session avang hian an tho huai ni te pawhin ka hria a, a lawmawm hle a ni.

Pu Speaker, ka zawhbelhna chu - Hachhek bial, Kanhmun leh Damchera (Tripura) inkara lei khu siam mek a ni a, an siam chak lova. A lei an siam lai khan, kha lei kha thiah a ngai a. A chhan chu, a lei siamna tur lai takah lei thar dawh a ni a. Tichuan, a lei dawh laia tlanna tur chu suspension bridge pangngai Borai leh Bahdur inkar (Kanhmun atang km 16 dawn) ah dawh a ni a, a tha khawp mai a, an idea pawh a tha a. Tin, tun March thla tawp lampang te hi chuan hawn theih mai te pawh PWD department lam hian an ring niin ka hria a. A lawmawm hle a, tha takin sorkar inthlak pawhin in chhonzawm niin ka hria a, lawmthu te pawh han sawi ka duh a. Mahse, (Kanhmun leh Damchera kal tawh chuan kan hria ang a) khaw-pakhat ang maia engkim inpawh tawn, bazar hmun pawimawh ve ve, Mizoram side-ah leh Tripura side-ah pawh a ni a.

Lei kha thiah a nih si chuan, kea kal kaina pawh kha a buaithlak dawn a. Chuvang chuan, Kanhmun leh Damchera inkar lei pangngai concrete bridge tha tak dawha alternative arrangement siam anih loh chuan, fur lai chuan a kai hleitheit dawn lova. Auto-rickshaw emaw, motor bike emaw tal tlan kai theih nan Damchera leh Kanhmun inkar khu mihring kea kal kai theihna tur; inmamawh tawn tak khaw lian pahnih an ni a. PWD hotute pawh ka'n be rawn a, 'crore 50-60 chuan a tih theih mai ang' an ti a. Chuvang chuan, SASCI project te pawh kha kan nei leh dawn niin alang a, kha kha tih theih dan a awm ang em?

Tin, Zamuang – Hriphaw kawng SASCI atangin crore 500-in sorkar hmasa atang khan siam mek a ni a, an zo dawn hnai tawh te pawhin kan ring a, tha takin an thawk ni te pawhin ka hria a. Kola-Lian khua kha Hachhek tlangdunga khaw tawp ber a ni a, kan border leh Police Post awmna te pawh a ni a, ram venhimna atan pawha khaw pawimawh tak a ni a. Hriphaw atanga hnai tak a ni a, a kar kha a cover tam lo khawp mai a, sum tam pawh a ngaiin ka ring lova. Kan PWD Minister kha, khawngaih takin Hriphaw leh Kola-Lian inkar kha zo tlang law law turin ka ngen a. Kum lokal turah hian, SASCI a nih loh pawhin State priority project lam atang te, annual plan-ah pawh PWD hnuaiah sum tam tak a awm kan hre vek a. Khang atang te khan min tih sak se a va tha dawn em! min tih sak thei ang em?

Tin, Hachhek tlangdung - Kawrtethawveng, Bunghmun atanga Kanhmun thlengin kawngpui tha taka siam a ni a, tunah hian repair ngaia khuar lutuk chu a tam lova, mahse sum tlemte sengin a khawk lai deuhte repair a nih chuan, tun fur hma hian; (nakin fura sum tam tak sen ngai chi te a nih chuan) sum kan save teuh theih ka ring a. Midang pawhin he House ah an sawi tawh a; Khulai Kawrtethawveng, West Bunghmun – Kanhmun kawng khu tih ve ngei ngei ngai a ni a. Sum tlemtein khu kawng khua kan venhim theih nan, khu khu min tih sak thei ang em? Ka lawm e.

HON. SPEAKER : A zawhnaah khan chengin, a zawhna kha zawt mai thei ila a lawmawm ngawt ang; hun kan inrenchem thiam zawk nan. Aw le; *Zawhbelhna* - Lawngtlai West Bialtu Pu C. Ngunlianchungga.

PU C. NGUNLIANCHUNGA: Khata i thu kha, pu Speaker, i hmel a tha a ni; kan melh deuh thup mai che a, helam atang hian; ilo hawi hlan hi kan nghakhlal khawp mai a. Min hmu thin a, kan lawm khawp mai.

Pu Speaker, ka zawhna hi a pawimawh khawp mai a. Unstarred Question-ah a lo chhuak daih mai a; chuta a chhanna chu ka hmu hlauh mai a, lawmawm ka ti a.

KMTTP Road, Lawngtlai – Zorinpui chungchanga zawhna, a chhanna ni 23 June, 2023 ah khan, ‘hna hi thawh zawh tawh a ni’ a ti a. Ka zawhnaa, ‘Zawh ni ta se, a laitu company ten department-ah an hlan fel tawh em?’ tih chhannaah hian, ‘Lawngtlai - Zochachhuah, KMTTP Road hi a kawng laitu company ten department-ah an la hlan lo’ tih a ni a. A company manager te kan biakin, ‘kan hlan tawh’ tih a ni si a. Sawlai kawng saw a pawimawh si a, Pu Speaker.

Hemi NH-54, Aizawl - Tuipang kawng laih hi, a chungah Siaha kawng a ni a, khami four-lane kawng an laihna leivung tamtakin luikawr a hnawh thla a, chu chuan hmun sawm velah kawng a hnawh bawk a; kawngpui tha em em double-lane sia kha kal hreawm takin a awm a. Kan Minister pawh ka hrilh tawh a; ani hi sawlam chanchin a

la hre lutuk lo deuh a. Sawlai saw department-a hlan a la nih loh chuan, tun thal chhung hian clear hram se.

Chutiang a nih loh chuan leimin sawn kawng a hnawh chhe nasa lutuk a; metre 100 vel kawng chhe deuhah kan tlan a, a piah deuhah kawng zau tha em em mai, mam em em maiah kan tlan leh a, khatiang kha hmun 10 velah a awm a ni. Hei hi tun thal chhunga kan tih loh pheih chuan a tlak belh leh ang a. Company te kha department lam hian sawtiang land slip awm ho saw clear turin hma min lak sak thei ang em?

HON. SPEAKER : A lawmawm e. *Question Hour* a tawp a. Kan PWD Minister zahawm tak hian chhang law law rawh se aw. Aw le, PWD changtu Minister zahawm tak Pu Vanlalhlana ilo sawm ang.

PU VANLALHLANA, HON. MINISTER: Pu Speaker, ka lawm e. Kan senior member pahnihte kha, ‘zawhna’ an han ti na a, advice/suggestion a ni zawk mah mahin ka hria a, kan note-ah lo ngai ta sela.

Pu Robert Romawia sawi Zamuang – Hriphaw kawng chungchang kha chu pawisain a daih chin Hriphaw thleng siam mek a ni a, pawisa awm dan a zirin a piah lam Kola-Lian thleng te pawh hma sawn zel tum a ni a. Damchera lei dawh mek avangin Bawrai lamah sub-way Bailey Bridge dawh mek a ni. Tin, Kanhmun leh Damchera inkarah hian autoplyable suspension bridge siam tum mek a ni bawk a, hei hian mipui harsatna eng emaw chen a chhawk theih kan beisei.

KMTTP road chungchang – ‘PWD-in min la hlan lo an ti si a, an niin, kan hlan tawh ti si’ tih kha, tihchian kan lo tum ang a; drain te pawh kha a mawhphurtu zawk zawk te chuan an ngai pawimawh turah i ngai ang. Ka lawm e, Pu Speaker.

FINANCIAL BUSINESS :

HON. SPEAKER : A lawmawm e. Tikhan kan Question Hour kan zo ta a. Tunah chuan, *financial business*-ah kan kal ang a. Vawiin hian Minister zahawm tak tak pathum – Pu C. Lalsawivunga, Pu PC Vanlalruata leh Pi Lalrinpuii te demand kan sawiho ang a, pass nghal kan tum dawn a ni. Hun kal ta a kan lo tih thin angin, minister pathumte demand hi a rualin kan la ang a. Tunah Minister zahawm tak Pu C. Lalsawivunga sawm ila, House dawhkanah heng a demand-te hi move turin i lo sawm ang u. -

- 1) Demand No. 19 - Local Administration Department;
- 2) Demand No. 23 - Art & Culture Department;
- 3) Demand No. 27 - District Council & Minority Affairs Department leh;
- 4) Demand No. 34 - Animal Husbandry & Veterinary Department.

PU C. LALSAWIVUNGA, HON. MINISTER: Pu Speaker, ka lawm e. Hon. Governor of Mizoram recommendation leh i phalna in ka Demand-te -

<i>Demand No.</i>	<i>Purpose</i>	<i>Amount (in ₹)</i>
19	Local Administration	2,08,31,40,000.00
23	Art & Culture	14,59,20,000.00
27	District Council & Minority Affairs	6,12,17,14,000.00
34	Animal Husbandry & Veterinary	70,10,78,000.00
TOTAL		9,05,18,52,000.00

Hengte hi kum 2024-2025 chhunga heng ka department chan te inrelbawlina a hman atan he House zahawm taka sawiho turin ka rawn move e. Ka lawm e.

HON. SPEAKER : A lawmawm e. Tunah chuan Minister zahawm tak Pu PC Vanlalruata, heng a demand-te hi house-ah move turin i lo sawm ang u -

- 1) Demand No. 31 - Agriculture Department;
- 2) Demand No. 37 - Co-operation Department;
- 3) Demand No. 47 - Irrigation & Water Resources Department.

PU PC. VANLALRUATA, HON. MINISTER: Pu Speaker, ka lawm e. Pu Speaker, Governor of Mizoram recommendation leh i phalnain, heng ka demand te: -

<i>Demand No.</i>	<i>Purpose</i>	<i>Amount (in ₹)</i>
31	Agriculture	2,03,17,96,000.00
37	Co-operation	15,16,74,000.00
47	Irrigation & Water Resources	1,03,18,23,000.00
TOTAL		3,21,52,93,000.00

kum 2024-2025 chhunga ka department chante inrelbawlinaa hman atan he House zahawm taka sawiho turin ka rawn move e. Ka lawm e.

HON. SPEAKER : A lawmawm e. Tunah chuan, Pi Lalrinpuii'n House dawhkanah heng a demand te hi move turin ilo sawm ang -

- 1) Demand No. 24 - Health & Family Welfare Department;
- 2) Demand No. 29 - Social Welfare Department;
- 3) Demand No. 43 - Tourism Department.

PI LALRINPUII, HON. MINISTER: Pu Speaker, Mizoram Governor recommend-na leh i phalna in kum 2024-2025 chhunga ka department chan hrang hrangte hman tur atan ka demand hengte:-

<i>Demand No.</i>	<i>Purpose</i>	<i>Amount (in ₹)</i>
24	Health & Family Welfare	8,39,53,60,000.00
29	Social Welfare	2,47,68,05,000.00
43	Tourism	13,92,80,000.00
TOTAL		11,01,14,45,000.00

House dawhkanah sawiho turin ka rawn move e.

HON. SPEAKER : Kan Minister zahawm tak tak ten an demand-te an rawn move ta a, sawihona kan nei ang a. Member-te minute engzatnge kan in pek leh ang le? Nimin khan minute 10 kan inpe a, a tawk mai em? Kan House Leader ngaihndan i lo ngaithla ang u.

PU LALDUHOMA, HON. CHIEF MINISTER: A hmasa ber ni khan dar 4 hmaa kan bang kha ka ui khawp mai a, ka hlauh ang ngei ngeiin niminah khan kha ti kha kan ni a. Vawiinah hi chuan kan hun kha vawng deuh ta ila; dar 5:30 PM-ah zanriah ei chawlh kan neih hma hian sawi tur chuan sawi vek thei ila, zanriah kan eikhamah chuan Minister-ten wind up chauh tawh sela, dar 10 han pelh em em te kha chu a awm lo thei tawh deuh ang a.

HON. SPEAKER : A awm viau e. Ngenna kan member-te atangin a awm a. *Minute 10* kan tih chuan minute 10-ah khan chen hram kan tum ang a, kan inkhap deuh a nih pawhin kan in hrethiam dawn nia. Kan ram kan vei tlang a, member-te thahnemngaihna a lawmawm rualin, hun kan pelh thui lutuk chuan, hriselna te pawh a in chen lova; rei lutuk te kha a fel lo thei e. *Minute 10* kan ti ang a, *minute 8*-ah warning bell kan rawn ti ri ang a, minute 10-ah zawh hram kan tum dawn nia.

Tunge han sawi hmasa ang le? Serlui Bialtu, Member zahawm tak Pu Lalrinsanga Ralte ilo sawm hmasa ang.

PU LALRINSANGA RALTE: Pu Speaker, ka lawm e. Sawitu tur han zawna minute 2-1 han paih ai chuan i thuawiin ka rawn ding nghal vat a, a hmasa ber nih manah i hriatthiamna te pawh ka'n dil nghal duh deuh a, kan lo pel a nih pawn.

Pu Speaker, vawiin kan demand pathumte ah hian sawi tur hi a tam khawp mai a, department te te chuan kan hrut hman lo turah ngai ila. A hmasa berah chuan Demand No. 19 - Local Administration Department hi han sawi ka duh a.

LAD hi department pawimawh tak, thingtlang khua zawng zawng rorelna kengtu leh kan VC-te enkawltu department a ni a. Chuvang chuan, thingtlang khuate enkawltu a nihna ang hian, ngaihpawimawh a tul hlein ka hria a. Tun hma LAD a power leh function ang kha tunah hian an phak ta lo deuh em aw, tih te pawh a awm a. Chuvang

chuan, thingtlang mipuite enkawltu kan VC-te tana hamthatna tam lehzual pek anih theihna'n leh an mahni pawh department ropui tak ni thin kha chawi nun leh a tulin ka hria a, chu chu thuhma ka'n nei duh a ni.

Tin LAD hnuaiia kan VC te hian 15th Finance Commission in a a recommend angin, pawisa an dawn tur an khawchhung development khawihna tur sum direct-in VC account ah a lut thin a, a lawmawm khawp mai a. Tin, VC te pawn khaw tin mamawh leh an harsatna te, tul an tih te hna an thawk thin a ni. Chumi ah chuan population base a kal thin a nih avangin khaw lian deuh nuai 20-30 lo dawng te pawh an awm a, khaw teah chuan nuai 2-1 lek dawng te pawh an awm a ni. Heng avang hian khaw tin dinhmun a inang lova, mipui tam tak, berh tak tak, harsa tak tak khuate pawh an awm avangin, Pu Speaker, khawngaihin kan Finance lam te pawh hian LAD hi duhsak theih deuh se, minor civil works te he department-ah hian pe tam thei deuh se a tha awm e.

(Hon. Dy. Speaker-in Chair a la a.)

Pu Dy. Speaker, minute 1:15 vel a ni a, in inthlak chhung kha. Nang pheii chu kan bial lampang, kan district-a hotupa ber i ni a, i thu kha ka lawm hle mai.

15th Finance Commission-ah sawi tawh ang khan khua te te pawh hian population base a pawisa an dawn hi a awm vek tho rualin, miharsa tam zawkte hi khaw-te ah hian an awm emaw tih mai tur a ni a. Chuvang chuan, an khua han chei vena turte pawh department lam atang hian pawisa inpek hleithei pawh a ni tawh si lova. Hengte hi LAD ah hian sum eng emaw zat civil works-a an han khawih ve tur minor works angte han dahsak ni thei se a lawmawm hle ang a.

Tin, VC House nei lo tam tak Mizoram-ah an la awm a. Hengte pawh hi sorkar hmasa khan theihtawp chhuahin hma a la a, VC house tam tak kan sa a, chungah chuan kan bial pawh a vannei zingah kan tel a. Amaherawhchu, VC House hi Bukvannei hian kan la nei ve lova. Assam ramri kan ni a, a pawimawh khawp mai a; kan ram chhanna'n kan ramri te hi chu duhsak ni ta se. Chuvangin, VC House sakna tur sum a rawn chhuah leh hun chuan Bukvannei hi han dah tel thei la kan lawm ngawt ang Pu Dy. Speaker.

Tin, LAD hnuaiiah hian LAD park te kan nei a, hengte hi tun aia kan chei hnum zawk a tul em aw ka ti a. Sorkarin revenue tam lehzual a lakluh theihna turin, hengte hi thalai, nula leh tlangval, nu leh pa, chhungkua anga kan tlawh chak tur khawpa siam te hi a tul hlein ka hria.

Tin, AH & Vety hi, Member zahawm tak (Congress lam) kha a chhuak hlauh mai a. Tun term-ah hi chuan, 'vawkte mawng-ping' tih lam kha a lan tawh loh kan beisei a. Kan Minister hi mi-tha tak mai a ni a, khang lam kha lang ve lo turah ngai ila a. Tunah hian AMC hian Aizawl khawpuia ran vulhte khuahkirhna dan tur ruahmanna thar a

rawn siam a. Tunah hian vawk vulhte pawh, khawpuiah chuan thenawmte nen feet 100-a inhlata vulh a ngai ta a. Hengah hian khawpui chhung bikah pawh hian vawk vulhah te harsatna namen lo kan tawk chho vatin ka ring a, chungah te pawh chuan department-in ruahmanna kan siama, vawk farm zawngin nge, saa kan intodelh theihna turina department-in tan nasa zawka a lak tul hlein ka hria a ni. Tin, saa intodelh tura hmalakna sorkar hmasaah tam tak kan nei a. Tin, artui awp-keuna ang te pawh kha nasa lehzuala tan kan lak chhova, sa hrisek kan ei theihna turin AH & Vety hian tan han la se.

Tin, Mizoram pumah (term hmasa, hmasa leh atang pawh khan a ni a) AH & Vety hian hmunhma a nei tha lova, building pawh an nei tha lo thin khawp mai a. Staff quarter te, office-te pawh chei hnum nasat a ngai tawhin ka hria a, hengah te hian duhsakna hlan thei ila a tha awm e.

Tin, Pu Dy. Speaker, Demand No. 24 - Health & Family Welfare hi, department pawimawh tak a nih tih sawi vek ngai lovin kan hre awm e. Tunhnaiah healthcare bill ba crore 50 an han clear thei a, a lawmawm hlein ka hria a. Kan Minister a chak a, thahnem a ngai a, a department chan a tuipui a; theihtawp a chhuahnaah lawmpuina ka hlan duh a; tin, kan Finance Minister lakah pawh lawmthu kan sawi tel duh a ni. Mirethei leh harsa zawkte an inekawlna tur mi pawisa tam tak lo ba te an ni a, an rulh theihna tura ruahmanna sorkarin rang taka a han siam thei hi a lawmawm tak zet a ni.

Tin, Pu Dy. Speaker, kan Health Minister hian min hriatsak atana ka duh chu - ZMC hi society a luhpui tumna ruahmanna kal mek a ni a, a thleng sang viau tawhin ka ring a. He thilah hian ZMC non-teaching staff-te dinhmun hi kan ennawn a tulin ka hria a. Health & Family Welfare Department hnuai sorkar-hna nghet pangai a lakluh, a dinhmun sang deuh, a chunglam ho hi chu tlemin a zia pawh a ni mahna. Amaherawhchu 'non-teaching staff' kan tih, a hnuai lam ho dinhmun hi kan ennawn a tul hlein ka hria. Option nei tala kan siam loh chuan, sorkar-hna nghet anga luta Mizoram sorkar hnuai hna nghet thawk anga inngai chhungkua hlim taka lo awm tawhte society hnuai an luh khan, an mahni hrilh hriat lehrawn an ni em, ka hre lova. Chutianga nih loh phei chuan, an luhna society-a kal duh nge an niha, sorkar department lamarawn kal duh zawk tih ngaihtuahna nena kan non-teaching staff te hmakhua hi kan ngaih pawimawh a tul hlein kan hria a ni.

Tin, NHM doctor te hi post ruak awm thin mahse, thingtlang lama thawh a ngaih thin avang leh a hlawh a tam loh avangin, a tam zawk hi chu an thawk duh lo thin a. Chuvang chuan, kan Health Minister hian a thiamin ka ring a; doctor kan lak leh turah te pawh tuna tlawmngaia sorkarin kan ngen anga kal hram hram te hi, a nghet kan lak hunah pawh hian duhsak theih dan awm se. Tin, an ni hi practice sa reng an ni bawk a, dah luh ngei theih dan awm se; chu chu, Pu Dy. Speaker, kan Health Minister hian a tihngaihna a hriain kan ring a ni.

Tin, health-worker, health clinic centre-a kan dahte ban an nih takah hian, keini bialah pawh health clinic centre ramri-dep Saihapui-V te, Thingthelh te, North Thinglian te; hmun 5-6 velah hian hmun pawimawh tak tak mai kan nei a, hengte hi min ngaih pawimawh sak se. Health sub-Centre an panna a lo hla ve deuh a; churang chuan, 'clinic centre hi an mamawh tak zet a ni' tih hi kan sawinawn leh duh a ni. Tin, Vairengte CHC-ah hian x-ray khawl min pe dawn tho va, lawmthu kan sawi nawn leh hrim hrim a ni.

Tichuan, Demand No. 29 - Social Welfare Department hi; Pu Dy. Speaker, Anganwadi workers leh helper-te lawmman an lak hi a tlem em em mai a ni. Kan fate, naupangte te an han ni a, A-B-C, A-AW-B te an rawn zirtir thiam a, mihring nun phung rawn zirtirtu pawimawh ber mai pakhat an ni a. Hei hi central sorkar atanga an hlawh tur ang kan dawn te, chutiang zel chuan state hian lo tihpun ve dan hi sorkarin ruahmanna a siam theih chuan a lawmawm hle ang a.

Tin, Article 275 hnuai hian a theih hram chuan constituency tin, bial tin hian bial chhunga kan mamawh hi a MLA-te hian kan hriat ber vek ka ring a. I veilama thu te hian, Pu Dy. Speaker, a hna kha kan rawn chuh lem lo; amaherawhchu, kan bial hmasawna tura ruahmanna kan siam te erawh hi chu rem min tih sak thei chuan a lawmawm hle ang a. Kan official tam tak ai hian a bialtute hian kan chiang a., churang chuan, ruahmanna proposal kan rawn theh luh ve theihna tur hian kawng min hawnsak theih chuan a lawmawm hlein ka ring.

Tin, term hmasa ah khan PMAYG kha kalpui a ni a, Mizoram pumpuiah khan khaw 240 chuang kha approve tawh a ni a. Tin, chungah chuan khaw tam tak kha, khaw khatah lakh ₹20 bawr vel hnathawh theihna lo kal a awm a. Tin, tunah hian an approved tawh hnu la kal lo additional-a kha a la awm bawk a. Hengte hi chak zawka kalpui theih a nih chuan, khaw tin, bial tin, a bikin thingtlang tan a lawmawm hle ang.

Pu Dy. Speaker, thuawih ka tum a, mahse minute khat vel chu hun pek belh a ngai hrim hrim a ni, in inthlak avang khan.

Demand No. 43 - Tourism-ah hian han sawi ka duh chu, SDRP-ah ZPM-ina sorkarin a tihtum an ziahnaah hian thil tha deuh mai – Homestay siamna atan khaw tam zawk thlan anih tur thu leh, thingtlang khaw tam zawkah riahbuk tam thei ang ber siam a nih tur thu te kan hmu a. Hetah hian tourism nena kalpui kan tum dan hi a fuh hlein ka hria a. Infrastructure ropui leh lian, building hi a tul vak lem lo, Mizoram-a tourist kan hip theihna tur hian; hei aia building ropui hmun dangah a tam lutuk; kan culture, kan society anga tourist-te kan hip theih hi a tha zawkin ka hria. Chungah chuan Mizoram hmun tourist hip theihna tur leh keimahni local, Mizoram chhunga mite pawh ina kan tlawh chak ber pakhat tur hi ka bialah a awm hlauh mai a - *Serlui Tuikhuah* khu a ni. Serlui Tuikhuah khu chei ila. Tunah khuan *Chawngkhupa Island* a awm a, a hmun a

nuam a, boruak a thengthaw a, kan riak fo mai a. (**Hon. Dy. Speaker:** I zo thei dawn tawh em aw?) Pu Dy. Speaker, tikhan ka hun pangngai ka zo t̄epa, khawngaihni minlo nghak lawk la, a theih hram chuan. Khumi Serlui Tuikhuah khu kan chei theih chuan water-sports leh eng eng emaw kan han ti ang a. Tourist lodge pangngai a awm tawh bawk a, circuit house ang deuh. Tin, *Chawngkhupa Island*-ah In, riahna hmun tur a awm bawk a. A riahna lam ai kha chuan, a hmunhma han chei bawl khan mi tam tak kan hip luh theih ka ring a ni.

Tin, Pu Dy. Speaker, Agriculture Department chauh hi ka sawi tawh ang. Agriculture Department hi kan sorkarah hian a pawimawh ber a ni dawnin ka hria a. Sorkarin kan kalpui tur, hand-holding policy kengtu an nih avang hian, kan ngaih pawimawh hle a t̄ulin ka hria. Kan Sorkar hmingthat/hmingthat loh inngahna tur chu he department hi a ni dawn a. Chuvang chuan Agriculture department hi kan duhsak viau a ngai niin ka hria. Chutih laiin, hand-holding policy atan crore ₹200 dah a ni erawh hi chu a tlem ka la ti fan a. Hei aia tam hi hun laklawhah pek belh theih dan te a awm a nih chuan, pek ni thei se.

Tin, thil pakhat - hmunphiah chungchang hi Soil Deptt. chan mah ni se, hand-holding policy-a pawisa kan dahna agriculture a nih avangin sawi ka duh a. Hmunphiah ro rate kan siam hian, hmunphiah rate kan tichhe vek a ni. Hmunphiah hring rate hian a ro rate a siam thin. Hmunphiah hring kg 3-ah hian a ro kg 1 a chhuak a. (**Dy. Speaker:** Duhtawk dawn tawh ila.) Pu Dy. Speaker, hei hi a pawimawh lutuk, I bial tan pawh ka han sawi kep ang che. Hmunphiah ro kg 1 ah ₹100/- kan tih chuan a hring hi ₹30/- aia to hian an lei dawn lo reng reng. Chuvang chuan, hmunphiah hring rate siam ila, ₹40/- ah dah ila, sorkar hian; a roa chu amahin ₹120/- ah a rawn in up mai ang. Chuvang chuan, tuna kan buaina tam bera pawh, a rate kan siam zawk hi a ro ni lovin, a hring siam ila kan buai lo ang.

Pu Dy. Speaker, pakhat chiah khawngaihni, a pawimawh em mai a. Mizoram-ina kan leilet enkawl dan hi a fuh tawk lovin ka hria a, buh chin hi a hlawk thlawt lo mai a ni. Chuvang chuan, a tam thei ang ber mechanised khawl - power tiller te, water pump te, brass cutter te hi a tam thei ang ber subsidy-a pek tum ila, chutiang chuan hma kan sawn leh zual ang. Term hmasaah khan Supply Department khan mizo-thar ngei buh lei a tum a. Chutah, a han zawnng kual a, ka bial Bilkhawthlir-ah quintal 23 chiah leitur Mizoram ah kan hmu a ni. Chuvang chuan, buh chin hi a hlawk lo tlat a; hei aia hlawk leh zuala kan chin theihna turin theih tawpa hma rawn la turin ka'n ngen bawk a ni.

Pu Dy. Speaker, heng kan Minister pathumte demand hi t̄ha ka ti a Kka rawn thlawp a ni e. Ka lawm e.

HON. DEPUTY SPEAKER: Tunah chuan, Lunglei South Bialtu, Pu Lalramliana Papua ilo sawm ang.

PU LALRAMLIANA PAPUIA : Pu Dy. Speaker, ka lawm e. Hun kan ren ang reng si a, a tawng pelh nghal loh theih loh a. Vawiinah hian demand pathum bawk kan sawi dawn a ni a. A hmalam ah kam hnih-khat leka han sawi ka duh chu - kan thiante, i veilama mite an performance a lawmawm em em a; bik takin kan senior Member te, keini heti laia thu tante tan chuan inzirtur tam tak anmahni lam atangte pawhin kan hmu thin a, a lawmawm ka ti hle a ni. Hei, department zawng zawng kan sawi hman dawn loh avangin, ka ngaihpawimawh zual, Health leh Agriculture emaw hi han tarlan ve zuai zuai ka duh a.

Agriculture Department mamawh zual bik bial kan ni a; keini thingtlang lam hi chu kan nih dan a ni tlat si a. Kan hmuh leh a lan danah chuan lo neitute, kut hnathawktute hi an production leh marketing chungchangah hian kan ram hi dinhmun laklawh takah kan dingin ka hmu ve thin a. Hemi kawngah hian thlai thar chhuah tam ngawt ni lovin, manhla takah tihral dan zawnpuoi an ngaih ziate pawh hi a takin an khawtualah ngei, kan veivahnaah te pawh kan hmu ve a. A then chu thahnemngai taka an tharchhuah, an buaipui leh si te pawh kan hmu fo thin a ni a, 'production lian tham kan la tlin lo em ni aw' tih te rilruah chuan a awm rum rum thin a. Amaherawhchu, hmasawn tur chuan production tam tham law law kan neih a tulna a awm bawk si a. Hengah te hian kan dinhmun hi, loneitute leh kuthnathawktute laklawh deuha kan awm chang te pawh awmin ka hre thin a ni.

Kum liam ta ah khan ka bial chhung Buknuam-a ka kal tumin ka leng kual a, chhungkaw khat ka luhnaah chuan, an pa chuan, vaimin chi bag, SEDP atanga an dawn kha a tlawh ang renrawn a; chutah chuan, ani chuan, "Ka pu, hei hi ka ching anga, ka thar teuh anga, engtin nge ka tih ang?" a ti a, chhan ngaihna ka hre lo a ni. Khatiang deuh kha kut-hnathawktu thanhnemngai tak takte pawh hian kan hmachhawn a ni fo thin a, thurawn pek ngaihna ka hre lem lo a ni.

Tunah chuan kan ngaihdanah kut-hnathawktute kan tinzawn lo thei lova, agriculture-ah chuan. Ram dang thlaitharte pawh hi khuahkhirh ngam tan ila, kan thlai tharture pawh hi fuih phurin, an production neih angte pawh a lo thlawnin a awm lo ang a, 'manhla takin a awm ang' tia assurance pe thei tur hian department pawh hi kan inbuatsaih chhoh a tul hlein ka hria. Hei, hmun dang atanga kan chawkluh thin, kan rama loneitute pawhina an thar ve eng emaw zat a awm a ni. Heng ang chite hi chu restriction siama, keimahni tualchhunga kan thar hmanga intodelh thei tura tan kan lak te pawh hi a tul ka ti a. Chutih rualin thlai thenkhat - alu, purun, dal tih te hi chu loh theih lovin kan mamawh reng tur a la nih hmel a. Khatiang nilo, mahni intodelh theih kan tum te hi chu intodelh tura sorkar pawh hian kan loneituteah hma laka, dan leh dun te pawh siam a tha em aw, te ka ti a.

Hei, *The Mizoram Agricultural Products Prohibition of Movement Order, 1999* kha kan la hmang em aw ka hre lova, kan la hmang turah kan ngai a. Kan la hmang a nih phei

chuan, heng Dan te pawh hi tihtawp vat a tulin ka hria a. A taka kenkawh theih chuan si loh Dan kha a ni a. Kan tualchhung loneitu leh kut-hnathawktu ten an thali tharte pawh an duh anga an phur vel theih lohna Dan, phuar tlattu kha a ni a. Mahni thar ngei pawh ni sela, kg 50 aia tam an keng kual thei tlat lova. Tin, khualzin pawhin kg 10 aia tam an teihawipui thei tlat lova; khatiang Dan te kha kan nei a. Khang ang chi te pawh kha a letlinga siama, keimahni kut-hnathawktute khuahkhirhna lam ni lovin, phai lam atanga lo kal thin khuahkhirhna zawk Dan te hi kan siam tawh a tulin ka ti hle mai a. Hengte hi rilruah kan Sorkar lam hotute pawhin min hriat sak sela a tha hlein ka hria a. Mizoram loneitute restriction leh prohibition lam kawh lova, pawn lam atanga thlai hrisel lo kan chawklulte inkhapna atan zawka Dan kan siam te hi a tulin tawh zawkin ka hria a ni.

Tin, thlai thar - agriculture lam hi ka tui laklawh a. Thlaithar a rate hre sain hetia kan lo sawi thin ang hian kan market assurance fund hnuaiah thlai thlan bik palite chauh lovah pawh hian kan ramah hian sorkar hi kan inrawlh tam deuh a tulin ka hria a. Thlai leh thei tlanglawn ang chite hi chu a rate te pawh hi tuka, duh zat zat tela, khanghu hmer khat ₹5/- tih ang chi te, hmer ringawt, tehkhawng ni lova mumal taka a tehkhawng kan siama, a kg-in a rate te pawh kan fix saka, thlai thartute heti laia an lo kala an duh zat zat an chhiar loh nan te; tin, a hlawkpuitu ber nia kan sawi thin - a khar chhawng hote ai pawha a thartu tak ten an lo hlawk ve theihna tur atan te, khati laiah te pawh khan rate mumal tak siama sorkar pawh kan inrawlh a tul em aw, ka ti a ni.

Tin, agriculture tihmasawn tur chuan thingtlang lampanga agriculture link road te hi kan ngaihpaawimawh a ni lo thei lova. Ka bial chhung bik kan zir chinah hian (bial dang chu ka zir chian hman loh avangin ka sawi kep thei lova) kan mamawh em em 'he khua hian link road hi chu nei sela chuan, chhungkaw tam tak hi an leikan phah ang' tihna tur link road laih ngai kan ngah em em a. Tin, Sairep hi kan tui tlan ber Tlawng-hnar awmna a ni a; khilai khi a bua loh nan leh hmun dang an bawh theihna turin Bawktlang-zau link road khi an mamawh em em a. Chu chu laih sak vat a nih loh chuan, kan tui tlan Tlawng-hnar khi an chen bua zo ang a, tui hnain a tuar dawn. Chuvang chuan, khilai khi kan sorkar lam hotute pawhin min hriatsak se la, kan minister pawhin. Sairep-ah hian tuihna humhalh nena ken kawp a ngaih avangin Bawktlang-zau link road laih a tul em em mai a.

Chutiang bawkin Khawmawi te pawhin ram tha tak bawh tur an nei a, chhipa phurh thlen phak tawh si loh Hmeithai-tlang link road te laih a ngai a, Tawipui South-ah Serva link road te, Khangpui-zau lamah ram tha tak, an pan phak si loh laih tur te kan nei a. Tin, Bualte-ah sawn NH atanga Ngengpui leh Vansang infinna thleng sawn link road nei sela chu, sawlai kawng Ngawimual - Pangmual an tih ang chi mual kawi, 'Thing-thlangra' an tih ram tha tak tak pawh tur tam tak an nei a ni. Sawng te saw an mamawh lutuk a, kut-hnathawktu te hian. Sawlai tlangdung leh Lunglei khawpui tan pawha min chawm thei tur khawp thlai tharna tur hmun kha an nei a ni. Link road an mamawh tak

zet a, Mualcheng South-ah te pawh Bungmual - Ngengpui link road te an mamawh em em a, Tlangsang thleng khan sorkar hmasa leh a hmasa leh ah te khan laih sak an lo ni tawh a, chumi atanga a ram tha bawh tur Ngengpui thleng law law tura han tih sak leh te saw a tul tak zet a. Chutiangin, khawpui chhung Lunglawn-ah te pawh ram zau tak nei an ni a, Berawkawn atang khuan MAP hnuai lampangah te khuan link road lai ta se la, Kanghreng ram chhunin chutiang chuan Puakchhuah thlengin va lai ta se la, saw laiah te sawn ram tha bawh tur an va la ngah em; kan survey nual tawh a ni.

Heng zawng zawngte pawh hi, agriculture tihmasawn tur chuan lo neitu ten; heti hian ka tehkhin thin a – officer-te, sorkar-hnathawkte, school naupangte pawh building tha an mamawh kan ti a, an office kaina tur leh an sikul kalna tur building tha ngaihtuah sak an phu kan ti a. Chutihrualin, ‘kan ngai pawimawh’ kan tih kan kut-hnathawktute, lo neitute hian an office-na hmun, an thlawhhma panna kawng nuam te hi an mamawh ve a ni. Chuvang chuan, hei hi thlahthlam lova, an nitin chettlatna leh hnathawhna hmun nuam tak an neih ve a ngai a ni. Chutiang chuan kan minister-te hian ngaihtuahna min put sak se ka duh em em a ni.

Health & Family Welfare lam hi - Mizote hi ‘*hrisel lo ber hnam*’ tia chhiar theih tur hial khawpin kan insawi tawh thin a; ‘*Cancer tamna ber*’ ti pawhin kan inchhal thin a ni. Ka rilru a lang lian ve em em mai chu - inenkawlina lam kan mamawh rual hian, an inven theih chin inven dan tur te pawh kan zawn tam a tulin ka hria a, health lamah hian; ‘*zuk leh hmuam kan uar vang a ni*’ tiin kan mawhpuh fo thin a, dikna chen pawh a awm a; kan ei leh in te pawh hi kan fimkhur zual a tul hlein ka hria a.

Ka rilrua ka vei em em pakhat chu, (kan kalpui thin em ka hre lo va, kan hriatna a la zau vak lova) department hmalakna ah te hian mi tam takin kan mawhpuh leh social media-ah te pawh rinhlelhawm tak taka kan hmuh thin - phai lam atanga thlai leh thei kan chawkluh te hi laboratory test te kan nei em? Heng te hi Zoram-mipui nawlpuiin kan taksa chhungril tana tha kan pai theihna tur hmanrua rawn kenglut tu a ni em, tih te pawh hi zir chiana, Health Deptt. lam hian hma min lak sak a tul hlein ka hria a ni.

Tin, chhim lam district pali-te kan inngahna ber Lunglei District Civil Hospital hian tihchangtlun a mamawh em em a. ICU hman thuai thuai te kan nghakhlel ve a; cancer patient te tan Aizawl pan ngai lova sawti laiah eng emaw therapy tih theih hrang hrang te pawh ngaihtuah ve kan beisei a ni. Tin, ka bial chhung Thingfal-ah pawh Health & Wellness Centre building sak a tul em em a; Chawngte, Lunglawn, Sairep leh Thangte ah te sub-Centre luah tlak loh deuhthaw kan nei a; Tawipui North-II leh Mualcheng South-ah te health-worker pawh kan nei lo a ni. Heng ka bial chhunga Health Deptt. hmalakna tur tul tam tak, hmunhma leh thawktute pawh hi khawngaih takin kan hotute’n min zir chian sak sela tha ka ti a. Ka MLA fund atang pawh hian tanpui a tul chuan, minister pawh theihtawpa puih ka inhuam a ni.

Awle, sawi tur tam tak nei mah ila, hun pelh thui loh kha a thaa ka hriat avangin, ka'n khar dawn ang a. Vawiina kan sawiho - Minister pathumte - Pu Lalsawivunga, Minister, Demand Nos. - 19, 23, 27, 34 te; Pu PC Vanlalruata, Minister, Demand Nos. - 31, 37, 47 te bakah Pi Lalrinpuui, Minister, Demand Nos. 24, 29, 43 te hi lungrual taka pass tha ka ti a. Heng an mamawh sum demand-te hmang hian Zoram hmel thar min hmuh tir ngei pawh ka beisei tlat a ni. Ka lawm e.

HON. DEPUTY SPEAKER: Hun vawn dik kha a tum hmel riau a; Thorang Bialtu Pu R. Rohmingliana ilo sawm ang u.

PU R. ROHMINGLIANA : Pu Deputy Speaker, ka lawm e. Hei vawiinah Minister pathumte demand kan sawi dawn a ni a. Khawngaihin minute 10-a ka zawh loh pawhin, i hriatthiamna kan beisei lawk ni sela.

A hmasa berin, Demand No. 19 – LAD hi, khawngaihin LAD Minister-in min chhinchhiah sak se, LAD a nih rual hian kaihhnawih a ngah riau mai a. Point pakhat lek ka sawi turah hian kan Agriculture Minister pawh a kaihhnawih theiin ka hria a. Tin, kan House Leader hi a lo awm lo tlat mai a, a ni pawh hian min chhinchhiah sak se ka duh teh reng nen. Niminah a thusawi lain ka chhuak a, vawiinah ka thusawi lain a lo awm lo ve leh a, pawh ka ti khawp mai. Nakinah i ding lama mite khan an hrih thei tho turah ngai ta ila.

Ani hi, nizanah ka ngaihtuah a - kan House Leader hi ka lo zui nasa hle mai a, ka hriat miah lovin, ka ti a. MNF atanga a chhuah chiah khan MNF-ah ka lut a; helai i vei lamah hian a thu fo thin a, i vei lam atanga a chhuaha i ding lama a thut ve chiahin, i vei lama a thutna hmunah kan thu ve leh chat a. Nakin lawkah i ding lama a thutna a chhuahsan ka la ring deuh a, chumi hunah chuan kan rawn thu ve turah pawh kan ngai deuh a. Pu Deputy Speaker, hun reilote neih chhung hian ka point sawi hi chu min ngaihpawimawh sak se, tih kha ka'n sawi hmasa ni sela.

LAD, Agriculture leh kan House Leader ten min chhinchhiah sak se. A point khatna a kan sawi duh chu - Lo, leipui, huan kan vat thin a; hei, a hal hun a ni leh dawn tan chho a. Heng te hi record kan nei em Mizoram pumpuiah hian; kum tin engzat nge kan hal chhiat? A forest thleng pawhin a ni ang. Heng te hi website-ah kan zawng thin a, ka hmu miah lo mai a. Chuvang chuan, eng angin nge kan hman, kan hal chhiat a te hi? Eng anga tangkaiin nge kan hman; kum tin hian record kan nei em? Kan nei lo a nih chuan, han nei chho zel tawh ila. Tichuan, kan ram hmasawna atan kan kalna turah kawng tam takin rahbi a tuk chhoh theih pawh ka beisei a.

Pu Dy. Speaker, a dawt leh a ka sawi duh chu, Demand No. 34 - Animal Husbandry & Veterinary hi point tlem te han tar lan leh ka duh a. Ranvulh hi Mizo-in kan ngaina a, kan hre vek a; a bik takin thingtlangah phei chuan kan ngaina em em a ni. MLA ka nih

hma lawk khan tuna ka bial ni ta, Thorang biala Lungsen khuaah vawk pul hri nasa takin a leng a. Vawk pul hri a leng chiah tih khan, Lungsen khuain vawk an vulh hnem zia kan hria a ni. Amaherawhchu, vawiinni thleng hian, a hri a len khan doctor an kal a, an awmchilh a, rei lote; mahse vawiinniah chuan an awm leh tawh lo. Thingtlang lam hian ranvulh kan uar a, kan ngaina a, doctor te hi kan mamawh a ni. Chuvang chuan, thingtlang lamah te hian Vety doctor te hi dah teuh teuh thei ila a pawimawh khawp mai; kan ram tan sa lamah te pawh kan intodelh phah theih ngei pawh ka ring. A bik takin international boundary velah te phei hi chuan kan mamawh zual a ni. A chhan chu, ram dang atanga vawk lakluhte atang khan kan ramah hri tha lote pawh a lut ve thei fo a. Chuvang chuan, kha lamah khan tun kan sorkar hian an ngaihtuahna uluk deuh hlek hian min hman sak thei sela. Hei, an demand pawisa dah lah hi a tlem ka tih sak khawp mai a, ‘an khawngaihthlak dawn mang e’ ka ti a, Vety Deptt. lampang phei chu.

Tin, Aizawl-a ‘Ar lian chi’ kan tih, kan naupan laia la awm ngai reng reng lo, *broiler-ar* ang hi chi hrang hrang a awm ang a. Khang te pawh kha a chaw hi vairam atangin kan chah lut fo mai a. Tunah hian Vety Deptt-in a chaw herna pakhat an nei ve a, chu chu Mizoram-in an intawm mek niin ka hria a. An archaw her quality khu a tha a nih ka ring a, an inchan lo tlat a ni. Pu Dy. Speaker, he ar chaw herna te pawh hi Vety Deptt. hian han ti lian sela; mithiam an ngah a, tunah pawh mithiam tak takin an thut chilh a ni a. Khawl ni se, engineer pakhat emaw ruai mai sela, khawl chhiat chungchangah te pawh kan ram hian a hlawkpui ka ring a. Kan pawisa vairama lut thla leh thin hi kan tih tawp theih pawh ka ring a ni.

Chuti rual chuan, Pu Dy. Speaker, Agriculture bawh kha a kaihnhawih leh a, ar chaw herna khawl han siam tur khan. Vaimim a lo ngai a, vaimim tharchhuah theihna potential area kan ngah lutuk Mizoram-ah hian; ka bial ngeiah pawh sawn a tam lutuk; hralhna an hmu lova. Chuvang chuan, Pu Dy. Speaker, *Bana-kaih policy* in han tih atang hian vaimim minimum support price-a leina tur a malthlak sa kg-ah ti tein, tha tek tawh khan han siam sak sela, tichuan, vaimim an ching sup sup mai ang. Ka bial chhung Zawlpui te sawn an thlaithar saw Lunglei-ah an supply thin a, Lunglei-in an lei hneh si lova, an tichhe nghek nghuk a ni a. Vaimim te han tih tir tak tak sela; tichuan, ar chaw siamna khawlah te khuan han supply sela a that ngawtin ka ring a ni.

Tin, Pu Dy. Speaker, Demand No. 31 - Agriculture chungchangah hian, Mizoram pumpuia chengte (ti mai teh ang) kan hriat ve phak chin mai ni lo, pi leh pute atangin buh leh bal lo neia tharchhuak chi kan ni a, vawiinni thlengin kan la thlahthlam thei lo, hei hi. Chuvang chuan, kan thlaitharte pawh man man zawka hralh chhuah theih dan te helaihan kan mawmawh a. Covid-19 hri a lo len khan a chiang viauin ka hria. Kan rama kut-hnathawktu tena an tharchhuah tam tawh zia hi; vairam atanga kan la lut lo chung pawhin, thingtlanga mite’n Aizawl min rawn chawm thei kha; an ti tha a sin! Chuvang chuan, helai hi kan ngaihtuah a ngai. Nichin lawka ka sawi ang khan, ka bial chhung potential area lutuk mai atanga an thar saw a tam lutuk. Sawng Zawlpui-a an thar te saw

vawiinah hralhna an hmu lo a ni a. Inkalpawhna kawng hi tha se, Aizawl-ah hian rawn phur sela; cold storage tha deuhthe hi kan mamawh. Tunhma congress sorkar lai khan cold storage pakhat ang deuh chu an lo dah ve a, building pakhat tereuhthe mai a awm a, a chhungah balu a awm a, chu zawng chu a la awm; engmah khawl pakhat pawh a la awm lo a ni. Chuvang chuan, thlathar han dahkhawmna te pawh kan mamawh tak zetin ka hria a ni.

Pu Dy. Speaker, tun dinhmunah Hmunphiah ah kan buai hle mai; Mizoram hmun tin kan buai. Tukin zingah ka bial chhung Thenhlum-ah chuan kg ah a ro cheng 25/- in an hralh a, nimin piahah a hralh thain cheng 35/- in an hralh a ni. Ka khawngaih lutuk, Pu Dy. Speaker. Chung chu MNF te an ni lo, ZPM te an ni; sawi tur an hre lo. Party ka thliar ve lo kei pawhin, an khawngaihthlak tak zet a ni. Engati nge kan lei sak mai loh, minimum support price cheng 100/- kan tih chuan? Tukin zingah a leitu vai, (an hming pawh ka hre ve lo) chumite chu VCP leh YMA ten an han luhchilh a, ILP an lo nei lova, an hnar haw dawn lehngal a ni awm e, ka rawn kal dawn khan. Chutiang chu a ni. Chutiang a nih si chuan, khawiah nge an hralh tak ang khang ho khan, cheng 25/- pawhin? Chuvang chuan, Pu Dy. Speaker, vawiinah hian agriculture-a an tharchhuahte kan lei sak loh chuan, *'thinglanga kut-hnathawktute kan ngaihtuah'* tia sawi ringawt hian awmzia a nei lo niin ka hria a.

Pu Dy. Speaker, point dang leh, Demand No. 37- Co-operation ah hian, Apex Bank te, MIZOFED te leh State-level society tam tak a awm, primary level pawh a awm. Heng state level ah pawh hian Apex Bank te kan nei ve; i dawr teh ang u. Sorkar ang te pawh hian kan ram bank awmchhun te hi kan dawr hian, kan ram tan a tha a ni. MIZOFED te hi i dawr teh ang u.

Pu Dy. Speaker, Demand No. 47 ah hian point khat chiah ka sawi duh leh chu - thlathar tam tur chuan tui, boruak, ni eng kan mamawh. Pathianin boruak leh ni eng tha tak min pe tawh; tui pawh kan nei. Amaherawhchu, a hmun takah Pathian-in min dah sak vek bik lo; chumi dah tura hnathawh chu keini mihringte kutah a dah a ni. Chuvangin, Pu Dy. Speaker, Irrigation & Water Resource-a solar tui pump central lamina PM-KUSUM an rawn tih project te pawh hi, state hian theih tawpin tan ila teh ang u. Central in an rawn ti tawh a, state lamin kan la ti thei lo fo hi a zahthlak pawh ka ti. Kut-hnathawktute'n an mamawh ngawih ngawih a ni.

Pu Dy. Speaker, minister pathum laite demand a ni mai bawk si a, point pawhin a daih mah mah zawk a ni. Point pawimawh lian pakhat Health Deptt-a han sawi leh lawk ka duha chu, MNF sorkar liam ta khan Nursing Directorate thar a dah a, lawmawm ka ti. Pu Dy. Speaker, tun sorkar hian hetah hian hma lain, chak zawkin thuam tha sela ka ti khawp mai. Doctor ringawt hi awmzia a awm lo, nurse a tel a ngai; Lab. technician a tel a ngai; khawl a tel a ngai. An zavaia tankhawmna atangin Mizoramin Health-ah pawh hmasawmna kan neih ngei ka ring a ni.

Pu Dy. Speaker, *The Economic Times* hmanna ka chhiar, vawiin niah hian ka quote chhuak duh lawk a, hei hi kan Health Deptt. changtute hian ‘eng angin nge hma an lak’ tih ka hre chak bawk. Nakinah windup ah khawngaihin min hrilh thei se ka duh a. TATA Institute Mumbai lamin, ‘cancer venna tur leh cancer damdawi tur kan hmuchhuak e’, an ti a, chu chu *The Economic Times* pawhin a rawn ziak a ni. He an hmuhchhuah hi Food safety & standard Authority of India-in a approve an nghak a, kumin June-July vel hian a approve theih hman an beisei a; ‘market-ah a awm hman kan ring’, an ti a. Chuvang chuan, Pu Dy. Speaker, helai chungchangah pawh hian, Covid-19 hri a len khan Mizoram-a kan Health Deptt. te ka fak a. Thil tul zawng zawng Covid venna - damdawite leh mask te, sanitizer thlengin engkim maiah chak lutukin hma an la a ni. Vawiinniah (hei hi rumour pawh a ni chiah lo ang a, chanchinbu liante pawhin an ziak nasa tawh a) hetiang thil a thlen hian, market-a a luh theih ve leha Mizoram-a a luh ve theihna turin, kan Health Deptt. ho hian vawiinni atang hian tan la se ka duh takzet a.

Pu Dy. Speaker, Social Welfare hi point hnih-khat lek, Demand No. 29 hi (**Hon. Dy. Speaker:** Kan bang tlai leh ang e) .. Aw, Pu Dy. Speaker, kan hlawh te pawh a tam alawm maw le; engah nge ban tlai kha kan huphurh em em ni? Mizoram tan kan inzir ve a lawm maw le. Chuvang chuan, minute khat lek, Pu Dy. Speaker.

Ministry of Tribal Affairs lamah te pawh sum a tam viau niin ka hria a, kan Social Welfare te pawhin hma an la chak a. Hma la chak lehzuat thei tur chuan, engineer an mamawhin ka hria a. Engineer hi ngah sela, Mizoram hian hma kan sawnpui takzetin ka ring a ni. Tin, thingtlang lamah social welfare - Nu raipuar an nih atang leh naupangte an pian hlim chenin hma an la a, a lawmawm em em a. Amaherawhchu, post awm sa pawh an hnawhkhat hlei thei lo, Pu Dy. Speaker. Hengte hi tun sorkar hian hnawhkhat phalna pe sela; thingtlang lamah te pawh tam sela, nutrition supply te pawh hi tha sela; tichuan, kan ram hian hriselna kawngah pawh health thleng khan a effect chho zel turah ka ngai a ni.

Tin, Pu Dy. Speaker, Tourism-ah hian pakhat chiah ka’n sawi leh duh chu - ka bial chhung Tuikawi khua khu - *Mizoram-a krismas hman hmasak berna khua* a ni a. Hei kan Tourism Minister hian a tilawmawm ka ti khawp mai a, bial tinah khatiang ang chi kha thlang turin MLA zawng zawng kha a pe niin ka hria a. Pu Dy. Speaker, thil pawimawh lutuk mai, ka bial chhunga ka sawi, Tuikawi khua - Mizorama Krismas hman hmasak berna khua khu tun sorkar pawh hian min en sak sela, Mizoram thalaite leh thalai lo te pawh, Kristian tan chuan hmun hlu a ni a. Khulai khu natural deuh mai a ni a. Vawiinniah hian khulaiah khuan phone pawh a la hman theih loh reng reng; ngawte a la tam lutuk; sava leh ramsate hmuh tur a la tam lutuk; sangha te pawh a la tam lutuk a ni, khulaiah khuan. Amaherawhchu, harsatna tam tak chu a awm a. Buhfai an lak dawn pawhin tlangah km 2 vel an han lawn a, an kutzungpui an han nem a, an haw thla leh a, ration an la thei chauh. Chutiang hmun te chu kan nei a ni, Pu Dy.

Speaker. Tourism hmalakna te pawh hi a lawmawm ka ti a, hengte hi min ngaih pawimawh sak sela.

Tichuan, Pu Dy. Speaker, Demand Nos - 19, 23, 27, 34 te, Demand Nos - 3, 37, 47 leh Demand Nos - 1, 24, 29, 43 te hi, wawiinniah hian pass ka remti e. Ka lawm e.

HON. DEPUTY SPEAKER: Ban hma theih dawn chuan, a bul tan that a ngai a nia; kan pel deuh zeuh zeuh mai a. Tunah Aizawl South-III Bialtu, Pi Baryl Vanneihsangi ilo sawm ang u.

PI BARYL VANNEIHSANGI: Pu Dy. Speaker ka lawm e. Hun a tam si lova, churang chuan Demand ah lut mai ila. Minister Pu C. Lalsawivunga Demand No. 19 hi bul tan nan ka'n hmang ang a.

Local Administration Department a ni a. Hei hi rural area huam china awmte tan chuan kan inpui dik tak a ni a. Politic tawngkama kan hman thin, '*kan ipte pui banna*' tia kan hman thin tak tak kha a ni a, a pawimawh khawp mai a. Hetah hian crore ₹2,08, 31, 40,000 rawn dah chhuah a ni a, a awm khawpin ka hria a. A chhan chu, nichina kan ngaihthlak ang khan, khawtlang nu leh pa engkim ngaihtuaha thawktu kan VC te'n VC House te an mamawh em em a, khaw thenkhat la nei miah lo te pawh anni a, a thenah chuan tlabal em em siamthat ngai te a ni a. Rampum en hian helaiah hian thawh tur leh pekchhuah tur a tam dawn tih a lang reng mai a.

Tin, LAD building hmun hrang hrangah a awm a, kan bialchhungah te pawh khi Hmuifang Park nuam tak chhungah khian building kan nei ve a, khingte pawh khi a awngrawp tawh khawp mai a. A enkawltute pawh nizan lamah an dinhmun te kan han zawt Chiang a, siam thata chei that (rennovate) a ngaih zia te pawh kan han hria a, chung atan te pawh chuan a rawn chhuak zel turah ngai ila.

Tin, 15th Finance Commission atanga hemi RLB direct-a lut kha chu kan hre tho nain, a bak zawng, ka sawi ang khan thingtlang bialah chuan hei hi kan inngahna pakhat a ni a, a chhan chu, minor works kan tih - step siam te, railing siam te, retaining wall siam te leh side-drain siam te, khang kha tih tur hi a la tam khawp mai a; ka bial chhung chauh ni lo, ram pum en hian hmabak kan ngah hle a ni tih hi a Chiang a. Chung atang chuan minor works hi kan rilruin a lo duhthawh deuh nge ni, a tlem lam a ni ang tih kan lo hlau khawp mai a. Mahsela, bul tan tur chauh kan ni a, churang chuan, kan han hmang tak tak ang a, mamawh angin nakinah a figure te pawh a pung chho turah ngai ila a tha awm e.

Tichuan Demand No. 23 - Art & Culture ah hian crore ₹14, 59, 20,000 an rawn demand a ni a. Hei pawh hi, Art & Culture hnuai a kan enkawl ho hi ka'n ngaihtuah vang vang hian, ram hmel lanna a ni a, mikhual kan neih changte leh ram chhung mi vekte pawh

ina hmunhma han tlawh tur kan neih chhunte enkawltute an ni a, helaiah pawh hian rilruin thahnem a lo ngaihpuoi khawp mai a. Ka bial chhungah te pawh Falkawn-ah sawn Zo-khua a awm a, sawng te pawh saw a nihna te, a nih phung te tibo chuang si lova han develop a chakawm em em a. Tin, chu lovah pawh, *Zawlpala leh Tualvungi Thlan-tlang* te pawh kan nei a, sawng te pawh saw a hmunhma han cheibawla, ka sawi ang khan a originality bo chuang si lova hma han lak theihna tur tam tak a awm a; sawng kutthlak nan te pawh sawn kan it khawp mai a.

Tin, khaw hrang hrangah hmun hma hlu tak tak, 'historical place' kan tih ang chite tam tak a awm ang; chung tan te pawh chuan he demand hi a tha tawk viauin ka hria a. Tichuan, hei bakah hian, *Sibuta Lung* te pawh a la awm a, rawn tlawhtute pawh an la awmin ka hria a, Tachhip lam te pawh saw. Khawngaihni kan Minister pawhin min lo hriat sak sela.

Demand No. 34 - Animal Husbandary & Veterinary ah hian Pu Dy. Speaker, hei hi sawi tur a tam khawp mai a, crore ₹70,10,78,000 a ni a. Hei hi a pawimawh hlein ka hria a, a bikin ran vulhtute kan rilruah a lo awm a. Vawk a ni emaw, bawng-vulh a ni emaw, ar-vulh pawh nisela hma lakpui ngai, tan lakpui ngai a ni a. Tin, a thawktute an quarters te pawh a hma kha sawilan ani tawh a, khangte pawh kha tan lak a ngai khawp mai a; a chhia te leh siamthat ngai te, sak thar ngai te tam tak a awm a ni. VFA awmna tur leh a hrang hrangte pawh a ni ang a, hei hi a pawimawh khawp mai a. Tin, ran vulhtute, a bikin ar vulhah hian harsatna kan nei nasa khawp mai a. Hei, thlahnih chhung, reilote ka'n awm ve chhungin kan han chhui chiang a, a chaw te leh a rawn lakluh dan a te, a helna gate te nen lam kan han chhui a ni a.

Tin, Trade & Commerce a nih lai khan khata thawk tawhte leh pensioner-te thlengin kan va be pawp ve a, tan lak a ngai khawp mai a. Hemi kawngah hian kan Minister pawh ka ngen duh a; amah hi kan ring tawk a, heng technical te leh dan hmanga hmalakna zawng zawng phenah hian *political will* a awm a ngai a, chumi tura tan chuan kan Minister-ah hian a bialte leh ram pumin rinna kan nghat a, beiseina sang tak kan nghat a ni. Theihpatawp min chhuahpuoi turin ka ngen duh a ni.

Tichuan, Pu Dy. Speaker, *'The Mizoram Agriculture Producer Prohibition of Movement Order, 1999'* hi a awm a, hemi hmang hian kut-hnathawktute leh ran-vulhtute pawh a huam tel ang chu; an hamthatna turte ngaihtuahpuoi theih a ni a, he Dan tlawhchhan leh behchhan te pawh hian kan Minister concern leh department te pawh hian hma min lakpui se kan duh tak zet zet a ni.

Tichuan Minister, Pu PC Vanlalruata demand ah ka lut ang a. Hetah hi chuan ka sawi vak lo ang a; Demand No. 31 - Agriculture chungchang hi han sawi ka duh a, crore ₹2,30,17,96,000 a ni a. Hei hi kan ram ina 'Ram-hnuk' kan tih te pawh a ni ang chu, kan inngahna a ni a. Chuvang chuan, a pawimawh tak zet zet a. A demand hi a awm

viauin ka hria a, duhsak theih phei chu ni sela, duhsak leh zual te pawh a phu a. 'Link road' kan tih, economic road anga kan ngaih theih te pawh ram pumah hmalakna te pawh a awm thei a ni tih kan hria a, kan bial chhungah pawh (a hmingin kan sawi seng lova) a khaw hming kan lam seng lova, '*hma lakna tur tam tak a awm*' tih hi a ni tawp mai. Chung atan te pawh chuan rilruin ruahmanna ka lo nei a.

Tin, thlathar lei turte pawh rilruin a lo awm a, hei a hun a rawn ni tan chho mek a; khang atanga kan hman tur te leh thildang hrang hrang pawimawh, agriculture chuan a huam thui si a, kan rama eizawngtute kan inghahna ber a ni a. Tin, a hma pawh khan, Pu Dy. Speaker, zawhna te pawh ka lo zawt tawh a; hemi wholesale hmunpui tura kha, khang te pawh kha kan sawilang tawh a nih kha. A theih phei chuan kan bial South-III lam saw thali tharchhuak tamte kan ni a, kan potential en pawhin kan phu ve viauin ka hria, sawlaiah sawn. Aizawl lama bazarna hla lutuk lo a nih avangin, a whole sale-na hmuna kha min rawn ngaihtuah sak se kan duh khawp mai a. A theih ang tawkin bialtu pawhin hma ka lo la ang a, a hmunhma te pawh ka lo enpui ang e. He Demand hi a pumpui en hian Agriculture, Co-operation, Irrigation & Water Resources te hi a awmin, 'a tha tawh hle a ni' tih lai kha ka'n sawi duh a ni.

Tichuan, Pu Dy. Speaker, Demand No. 24 - Minister Pi Rinpuii chanpual hi ka'n sawi ang a, hei hi Health & Family Welfare a ni a. Sawi tawh a awm dawn lova, amaherawhchu, kan minister-ah hian rinna kan ngath a, ani hian a tak takin a thawh kan ring a. churang chuan, vawiinniah hian sawi vak ngaiin ka hre lova. Amaherawhchu, thil pahnih-khat lek ka'n sawi teh ang. Post Graduate course leh hemi ND leh MS seat Mizoram-in kan neih hi Manipur-ah exam thin a ni a. Amaherawhchu, hei, ram te a lo buai a, eng chen nge a buai dawn, engtikah nge a fel dawn kan hre lova, henge te pawh hi kan minister te hian ngaihtuahna an seng tawh turah ka ngai a. PG course te pawh hi tihdan awm zel thei se kan duh khawp mai a.

Tin, kan Minister hnenah hian ka thlen ngun a, ani pawh hian ka ngai pawimawh tih hi a hria a. Hei, engti zia nge ka hre chiah lova, Pathian rel dan te pawh a ni maithei a, keimahni thiamloh te pawh a ni maithei a. Naupai harsat te hei Mizoram-ah kan pung zel a, IVF tia ram danga insengsoa kal chhuak tamtak kan awm a ni; chung chu kan ramah ngei hian IVF specialist te pawh kan nei ve a, an tan hmunhma buatsaih hi kan duh khawp mai a. IVF hi level 2 a ni a, a sang lutuk deuh emaw; kan la tlin lo deuh a nih pawhin IUI te tal pawh ni sela. Chumi zawhah IVF-a chhoha, ICSI-a chhoh leh te pawh kha kan duh a, kan lo zir ve nasa viau mai a. Hei pawh hi kan theihtawpin kan minister hi kan lo back up ang a. Ani pawhin ruahmanna a neiin ka hria a, eng eng emaw min hrilh tur a nei turah ka ngai a. Nakinah pawh rawn react se kan duh khawp mai a.

Kum 2023 - 2024 ah khan RTI zawhnaah chuan - IVF ti te (sorkarin a refer chin chauh) MR an rawn bill zat hi ₹70,50,882/- a tling a, chu chu, a kum tel hian a pung emaw tih mai tur a ni a, 'sorkar hian sum kan seng nasa em em a ni' tih lai kha tawitein, Pu Dy.

Speaker, ka'n tarlang leh duh a ni. Tichuan, he IVF Centre - 'RT Laboratory' an ti mai a, hei hi din theih a nih chuan, sorkar tana sum lakluhna tur tha tak a ni a. Tin, RKS fund atan te, hospital atan te 'fund generate-na tha tak a ni' tih laite kha ka'n belh leh ni sela.

Demand No. 29 leh 43 hi ka sawi zawm mai ang a. Hetah pawh hian kan hmu a; hei, crore 247 leh crore 13, vaibelchhe chuang ve ve a ni a, hei pawh hi tangkai taka hman a nih ngei ka ring a. A chhan chu, Anganwadi lampang te siamthat ngai kan ngah a; Women & Child Development leh ruihhlo do ni se, tih tur kan ngah, hmabak kan ngah si a. Chuvang chuan, a sum hi zai taka hman a ngai dawnin ka hria a. Tourism ni se, Deptt. in ram kan neih enkawl tur tam tak a awm bawk a, tin, hmalak thar ngai - lodge han sak thar ngai te leh thildang tam tak a awm a. Hei hi chu nichina kan sawi ang khan, Art & Culture ang tho khan kan ram hmel lanna a nih avangin kan cheimawia, kan thuamthata, potential kan neihna bial chhungah pawh ni sela kan sawi tawh Lungleng Lal-In te, Hmuifang tlang te, Sialsuk tlang te leh hmun hrang hrangte pawh saw develop nan hman theih ni se kan duh tak zet zet a ni.

Aw le, engpawh nisela, Demand tha tak tak mai a lo lut a, hengte hi a pawimawh em em vek a; a awm em em vek mai a. Chuvang chuan, tangkai taka hman a nih theih nan pass ngei turin ka rawn thlawp a ni e. Pu Dy. Speaker, ka lawm e.

HON. DEPUTY SPEAKER: Nichin khan Opposition nen khan kan thudun a, a ban phar kha, 'a langsar bik a ni ang' a ti deuh a; hei, a lo langsar deuh a niang.

Aw le, tunah Pu Rasik Mohan Chakma, Tuichawng Bialtu ilo sawm ang.

PU RASIK MOHAN CHAKMA: Pu Dy. Speaker, ka lawm e. Hei, kan Minister zahawmtak pathumte Demand sawihonaah hian a hmasa berah chuan Pu C. Lalsawivunga, Minster chan Demand No. 19 - Local Administration Department hi - 15th Finance Commission recommendation-ah khan Excluded Area Grant a awm a, vawikhat chauh sanction a ni a, a recommendation en chuan pawisa kha a la awmin kan hre ve si a. Engtikah nge kha kha a chhuah theih ang? Ka hriat duhna chhan chu, Finance Commission Recommendation pawh ni se, ngaihven deuh loh chuan tihchhuah loh chang pawh hi an nei a thin a. Tin, VC House sakna tur sum awmin kan hria a, khang te kha a tam lova, mahse, Mizoram pumpui cover thei turin rualkhai deuha sem ni se. sawlam chhim lam te pawhin chang ve thei ila. Pakhatmah chan loh ringawt te chu, Central Sorkar scheme a ni bawk si a.

Tin, Pu Dy. Speaker, Art & Culture ah hian kan hriat theuh angin Mizoram-ah hian Mizote bakah hnam dang - Chakma te, Bru te, Lai te, Mara te, *Mizo-hnahthlak* kan tih Pang leh Bawm te pawh an awm a, culture hnan nei vek a ni. Hengte hi kan preserve a tha a. Min timawitu an ni a, culture hrang hrang neia huap zau deuh hlekin scheme te hi

implement dan awm sela. Sawi leh sawi hnu, keimahni ah chuan *Biju Festival* hi kan hlut em em a, khaw an hmang thin a. Mahse, state huapin *Chapchar Kut* ang deuh hian hman kan duh ve a. Hei hi kan tih theih chuan kan culture te kan inhriattawna a ni ang a, kan inauna te a tinghet dawn a ni.

Eng emaw lai khan Chawngte - Kamalanagar-ah kan artist lam thiamte hnenah ka sawi a, “Mizoram-ah kan awm a, Mizote lam pakhatmah kan thiam lo hi a dik lo” ka ti a, ngenna ka siam a ni. Hmanniah Baptist Boarding School-in Golden Jubilee an hmannaah khan an show ve a, an thiam khawp mai a, sawlai Mizo awmte pawh khan thiam an ti khawp mai a. Khatiang deuha kan tih kha a thain ka hria a. Tun tum Chapchar Kut-ah pawh khan min sawm ve sela chuan Pu Dy. Speaker, khangte kha show ve kan chak khawp mai a; mahse, a remchang lo a ni ang e. Kum dangah chuan kan artist-te min sawm a nih chuan, talent kan neih te show kan chak ve a ni a. *Cheraw-kan* thiam te pawh kan awm a nia Chakma zingah pawh; Cheraw kan te pawh kan duh ve a ni.

District Council & Minority Affairs-ah hian lut ila. Budget general discussion-ah pawh ka sawi a, District Council pathum kan awm a, kan subject a inang vek a ni, department zawng zawng kha. Chutiang chuan, administrive kha a inang vek a, mahse, sum inpek thu ah chuan a intam hleih lutuk a, a let aia tam tein kan tlem a ni. Anniin an hmuh kha tha takin an enkawl a, a tha a; mahs, a inanglo lutuk kha hrutruual dan a awm em? khatiang em ema CADC tlem bik lutuk kha chu, a lan danah pawh a mawi lo deuhin ka hria. Chuvangin, kha kha min ngaihtuhsak theih dan awm hram se. Mahse, finance thil a ni a, 7th Finance Commission-in a tum chuan tih dan chu a awm ka ring a, Pu Dy. Speaker.

Tin, District Council pathumah te hian hian Dan siam thua harsatna tam tak a awm a. Vawikhat chu Minister leh Governor hovin meeting kan nei a, kan harsatna ber chu - Dan kan pass a hetah gazette tifel thei lovin kum 10 - 15 te kan awm thin a ni. Kha kha a nih dan tur niin ka hre lova, khangte kha kan Minister zahawmtakin min enpui sela. *Law vetting* kan ti a, an pass a, Session-ah khan; khami hnuah kha chuan sawisel a rem tawh lo a ni. Tin, kan Dan pass tam tak kha vetting turin District Council-ah pek a ni a, kei chuan hei hi tha ka ti lo; State sorkar Law Deptt. ngei hian vet sela a thain ka hria. A chhan chu, Law ah khan constitutional ni lo deuh deuhah pawh Dan pass te a awm thin a. Chuvangin, state-sorkara Law Deptt. ngei hian vetting ti sela, khatiang tur khan ngaihtuahna pawh sen nawn leh ni se a lawmawm hle ang a. *Entirnan*: Tenth Schedule provision te pawh eng emaw lai khan thahnemngaihna thilah kan lalut ve ringawt a; khami base khan MDC-te kha anti-defection law hmangin kan disqualify a; amaherawhchu, court khan 10th scheduled kha 6th scheduled-ah hian ‘a applicable lo’ an tih avangin thiam an chang zel a, member-te’n an tuar thin a ni. Hetiang bawk hian *office of profit* thilah pawh dan an siam ringawt a; District Council-in dan siam theihna a neilo reng reng; State-sorkar chauhin a siam thei a ni. Mahse, Court-a an kal chuan,

‘hetiang thil hi district council tihtur a ni lo’ an ti daih thei. Chuvangin, Law Department hian *Vetting* ti sela a tha berin ka hria. Hetianga kan kal reng chuan, anti-constitutional law siam palh te pawh a awm thei a ni.

Pu Dy. Speaker, Demand No. 37 - Agriculture Department chungchanga ngenna ka neih chu, Agriculture Deptt. leh Irrigation, Land & Water Resources Deptt. hian a huam zau khawp mai a. Mahse, wet-rice cultivation-a Mizoram sorkar sum hi potential area base-a hman ni thei hram sela; wet rice cultivation hi mi tupawhin eng pawh ti ila, hei hi culture-a kan neih chuan, zirtir hran kan ngai lova. Western belt ah chuan kum 100 kal tawhah khan wet-rice cultivation hi an lo ching tawh a ni. Mizoram-ah hian khawi hmunah pawh henga production a tam chuan, kan over-all production a tam tihna a ni. Chuvang chuan, potential area base in scheme hi implement theih dan awm se. Kan lo implement a nih pawhin, ‘khawiah hian nge hlawk ber ang’ tih hi ngaihtuahna nei bawk ila a tha hle ang a. Chu chu kan Minister zahawm tak hian *policy matter*-ah min neih sak thei hram sela, tichuan kan state pumpui hi ei leh bara kan intodelhna atan awmzia thui tak a neih ka ring a ni.

Tin, Pu Dy. Speaker, Health & Family Welfare Deptt-ah chuan *Zawhna & Chhanna* hunah khan kan sawi tam a, harsatna chu kan nei a, kan minister pawh khan min ngaih pawimawh sak in ka hria a.

Social Welfare-ah hian *Gender Budget* kan nei a, khawi khawiah emaw chuan mipui educate-na, general discussion ah pawh ka sawi a, mipui kan educate loh chuan khangte kha chhawrna chang an hre lova, an harsatnaah khan sorkarin thil a tithei tih an hriat tlat loh chuan khangte pawh kha dilna chang an hre lo thei a. Chuvangin, *awareness programme* hi nei uar ta ila. Miharsa ten eng eng emaw sorkar tangin an mangan lai leh an mamawh changin ‘tanpuina engtia dawn theih nge anih’ tih an hriat chuan, dilna chang te an hria ang a. Chuvangin, ‘awareness programme uar ila’ tih hi ka rawtna a ni e. Tichuan, kan Minister pathumte demand hi a tha tlangpui a, ka thlawp vek e. Pu Dy. Speaker, ka lawm e.

HON. DEPUTY SPEAKER: Member zahawm tak Pu T. Lalhlipua, Lunglei West Bialtu ilo sawm ang.

PU T. LALHLIMPUA : Pu Dy. Speaker, ka lawm e. Vawiinah hian kan Minister pathumte demand kan han sawi leh thei tur hi a lawmawm hlein ka hria a. Mahni lamah ngaihtuahna Mizoram hmasawna tur ang chite leh bial mipui aiawh kan nihna sawilang vek tur hian minute 10 chhung hian hun hi a awm si lova; chuvang chuan, tihian kan sawi tawp tawp mai dawn a ni.

Ran chaw hi kan sorkarah hian AH & Vety leh Agriculture tang dun hian convergence hian indigenous production hi kan nei theiin, ram chhunga tharchhuah hi kan nei theiin

ka hria a, hengah hian hmalak a duhawm hle a ni. Kan pawisa kalral tur, state danga thawnchhuah tur hi mahni ram chhung ngeiah pawh kal kual tir ve theih niin a langa, hei hi department lamte pawh khan min lo ngaihven sak ta sela.

Kan Finance Minister, kan CM speech-ah ngei pawh khan Agriculture Department hi non-tax revenue contibution nei pawl a ni a. Chuvang chuan, Agriculture production-a kan contribution-ah hian hma kan sawn chuan, kan state hi khitah kan awmthei dawn niin alang a; chungte chu rilruah a awm a.

Ka bial, Lunglei District hi sorkar hmun pawimawh 90% deuhthaw hi a awm a, tarlan tur hi ka ngah bik em em a, kan Minister-te pawh hian chu chu min lo hriatsak sela. Kan House Leader-in *intihsiakna tha* bei turin MLA-te nimin tlaiah khan tournament min buatsaih sak a, a puang tawh bawk a; Opposition-te pawh a enhrang chuang lova. Kan duhna te, vision te awm mahse, hun a tlem si a; ti hian kan sawi tawp tawp ang a.

A hmasa berah chuan, Demand No. 31 – Agriculture, Minister Pu PC Vanlalruata chanah hian ka'n tarlan duh chu - Ka bialchhung Bazar Veng-ah sawn market shed construction kha District Agriculture Office pawh kaltlang chiah lova Aizawl lam atanga sak tur kha nikum kum tawp dawnah khan a rawn awm thut mai a. A hmun hi Forest Office thlang, Lunglei - Aizawl Road lun lai tak mai kha a ni a. Khawtlang tana thil tha a nih lai khan, estimate leh drawing mumal pawh awm chiah lo chungin hna hi tan niin an sawi a. Hei hna hi tan tawh a ni si a, hmalak chhunzawm a ngai hle a; kopang feet sawmthum vel laih tlak a ni a, a bul hi Seventh Day School, naupang te te awmna a ni a, chetsual theihna a ni. Chuvang chuan, department hian hma min lakpui sela. Tin, a chung zawl hi Forest Staff-te parking a ni bawk a; lei ko hi a san avangin, fur hma pawh hian a min hlek hlek a ni. 1st installment-ah nuai 24 vel pek a ni an ti a, fur hmian hei hi kan chet vat a ngaiin ka hria. Hei hi department leh minister te hian min hriatsak se.

Tin, Agriculture link road sial te hi ka bial chhungah hian a tling lo leh kual lutuk, two-wheeler pawha kual hrehawm hi a awm nual mai a. Lunglei khaw chhunga Bazar Veng Para-III hnuaite saw chhunzawm a nih loh chuan, tuna kan hmalakna te hi engahmah tangkaiin a chhuak dawn lova; hengte hi department hian hma la thar leh ta sela.

Tin, a dawt leha chuan, Demand No. 37 - Cooperation chungchang hi tawite han tarlan ka duh a. Kan tette atangin pa te hnathawhna a nih avangin 'Cooperative Union, Cooperation' tih te hi chu kan hre lar khawp mai a. Lunglei Office saw thawktu an indaihlo hle mai a, HA pakhat, UD pakhat an nei a. Tin, DC residence thlang, Circuit House thlangah sawn quarter a awm a, fur lai pheih chuan kohhranah ka bial thin a ni a, ka zuk kal a, ruahtui hi a far nasa em em mai a. Hengte pawh hi enthat a tul hle tawhin ka hria a, ka'n tarlang hram duh a.

Tun sorkar-ah hian society hmanga thlathar lei turte kan ni a, chungah chuan he department hi thum chaka, a thawktute pawh mumal zawka dah a tul hle a. Tunah hian ka bial chhungah awareness campaign nei turin society chungchangah hian department te pawh kan dawr mek a. Chungah chuan staff indaihlohna avanga an buai ru hle thu te pawh an sawi a. Chung anghah chuan heng kan department - Co-Operation te, Agriculture te, Irrigation te hi mumal zawka kal turin department hian min hriatsak se ka duh bawka a ni.

Tichuan, kan Minister Pu C. Lalsawivunga Demand No. 19 - Local Administration Department (LAD) ah hian ka'n tarlan duh chu - LAD office hi chu VC, *Local Council nu leh pa* tak tak a ni a, member zahawm tak takte pawhin an sawi tawh a. Lunglei bikah hian Field Inspector post 5 a awm a, 3-in office an luah a; pakhat hi zin thei a ni ringawt mai a. Village Council body form that ngai leh boundary chungchangah buaina tam tak kan nei a, Chungah te pawh chuan hna an ngah em em mai a; hengte pawh hi min ensak se la ka duh a. Tin, LAD Lunglei-ah hian JE post 1 awma JE regular chu pension avangin a chhuak a, JE an nei ta lova. Sum awm remchang apiang hmangin an pawt khawm a. Chutah chuan contract MR pawh ni lovin office expenditure in 2017 atang khan an ruai mek a. Vawiinah hian chungte chu department hian min han hriatsak ta se la ka duh bawka a.

Tin, Lunglei West chhungah hian Village Council House a awm ve fur a, mahse internet connection hman tlak hi a awm lova. Tun tumah hian computer te pawh hi department lam hian pahnih min pe dawn ni awmin ka hria a. Computer system mumal an nei lova, hengah te pawh hmalak kan ngai hle. Buarpui leh a chheh vela hman tangkai tur hian Common Service Centre hi Lunglei LAD Department tan 'recommend-na pek ngei ni se' tih hi ka ngen sak bawka a ni.

Tichuan Demand No. 23 - Art & Culture ah hian, district hrang hrangah *Chapchar Kut* kan hmang theuh mai a. Chuta kan sum hman tur hi, kan hriat danin kan dawng tlai ziah mai a. Heng te hi Lunglei-a kan thiante leh Lunglei-mi chuan vawi tam tak an sawi tawh thin a. Tunlai hian kan hria a, kan pawisa inthawn dan chu cashless vek a ni tawh a. Hmeh keuh a thleng mai thei a nih avangin, hengte pawh hi inensak ni ta se la. Cashless transaction kalpui a nih tawh laia, Chapchar Kut pawisa hmanna, a cash anga inpek ngai awm nia lang pawh hi solve theih ni se tih hi ka'n aupui duh bawka a ni.

Demand No. 34 - Animal Husbandary & Veterinary-ah hian Rural Animal Health Centre, Rahsi Veng hi an nei ve a, a in hi a la ding hram hram a ni. Kum 1993 bawr vela sak kha a ni a; 'a thlalak min rawn thawn teh u' ka ti a, tukin zingah khan min rawn thawn a. Renovate pawh a awm tawh miah lova, a chhungah hian engmah tih theih pawh a awm lova, bungraw mumal pawh a awm tawh lova. Kuminah hian thli han thawk se, tlu mai thei dinhmunah a ding tawh a ni. Chuvang chuan, hengte hi min ensak se ka duh a.

Kan Minister Pi Lalrinpuii chan Demand No. 24 - Health & Family Welfare ah hian, Sub-Centre awmlohna khua, Lungdai South leh West Bungtlang kan nei a. Tin, Health Sub-Centre te phei hi chu a building a chhe lutuk a. Tin, chutah chuan Pu Lalramliana Papua, Lunglei South Bialtu zahawm tak biala Hauruang leh Runtung khuate pawhin an pan a. Tin, khawper, pachangte pawhin an pan a, thuamthat a ngai hle a. Thenkhat pension avangin health worker te kha peon an ni pah bawk a. Chutiang chu an ni nuai a, heng kan harsatnate hi House zahawm takah hian ka han tarlang duh a.

Tin, Lunglei doctor indaihlohna pawh kan sawi thin a. Hei, MPSC lam atangin ka zawhna an rawh chhanna ah hian, kum 10 chhunga MPSC in hna nghet a lak hi, MO ringawt pawh 180 a ni a, AYUSH doctor 11, Dental Surgeon 7, Specialist 31, Health Worker 3, Specialist 1, Public Health atan hian 3 ka tihna zawk a ni e; a total hi 233 a ni a, a lehlamah chuan a tam khawp mai. Vawiinah hian, 'office lama thu an tam deuh lo maw' tih hi ka zawhna a ni a. Kan Minister pawh a department a ni a, district lamah hian office lama thu tam zawkte hi sawn darh ni ta sela, heng kan harsatnate hi a phuhruk lo ang maw, tih kha ka'n tarlang duh a. Tin, nurse chungchangte chu kan sawi tawh a.

A tawp berah chuan, Demand No. 29 - Social Welfare hnuaiah hian, ka bial chhungah khuan Bethel Centre hi a awm a, Bethel Centre-ah chuan naupang 100 leh tleirawl rual, khatiang kha eng emawzat an awm a; an dinhmun hi ngaihtuhsak an ngai hle a. A nodal chu Women & Child Development, Social Welfare hnuai tho a ni a. Staff te hian salary hi an la regular ve viau nachungin, non-salary hi an mutan mek chu a ni a. Naupang 100 chuang nitin ei tur hi a hautak tham a ni. Kan sawrkar hmasa khan grant lo kal hi nikum June thla thleng kha an pe tawh a, July atanga tun March hi an la la lo a ni. Heng harsatnate hi khawngaihin min chin felsak theih chuan a lawmawm hle ang.

Tourism ah te pawh kan bialah hmun tha tak tak a awm a, kan Minister hnenah thlen a ni tawh a. Hei hi chu ka tarlang lo mai ang a.

Tichuan, vawiin a kan Minister pathumte - Pu C. Lalsawivunga Demand ₹9,05,18,52,000/- te, Pu PC Vanlalruata Demand ₹3,21,52,93,000/- leh Pi Lalrinpuii Demand ₹11,01,14,45,000/- te pawmpui an rawn ngenna hi ka thlawp e. Ka lawm e, Pu Dy. Speaker.

HON. DEPUTY SPEAKER: Hei, han lak leh dawn hian a laklawh riau mai a; dar 1 rik nan minute 2-3 vel a la awm a. Kan chawl tawh mai dawn nge? Dar 1 kha kan hunbi chu a ni a. (*House-in chawl a remti a.*) A nih leh, kan chawl ang a, dar 2:00 ah kan chhonzawm leh dawn nia.

2:00 PM

HON. SPEAKER : Discussion kha, member pasarih (7) in kan sawi tawh a; tunah tunge han sawi leh ang le? Aw le; Champhai South Bialtu, Member zahawm tak Lt. Col. Clement Lalhmingthanga ilo sawm ang.

LT. COL. CLEMENT LALHMINGTHANGA: Pu Speaker ka lawm e. Tunah kan Minister zahawm tak pathumte zingah hian, LAD Department changtu demand atangin ka'n tan ang a, Demand No. 19 – LAD hi.

Ram chhungah mihringte kan pung zel a, kan khawsak dante a lo changkang zel a. Tichuan, bawlhhlawh lampangte pawhin pun lam a pan chho zel a, waste management lam hi kan nitin nunah subject pawimawh deuh mai a lo ni ta a ni. Ka bial Champhai South lampangah khian heng waste management - bawlhhlawh paihna tur dumping ground buatsaih mek a ni a, Ruantlang ram chhungah. Tunah khian final stage a thleng chho mek a, zawh tep ani tawh a. Hei hi function tura a awm thuai thuai hi kan nghahhlel tawh em em mai a. Khing lai leh a chheh velah te mumal zawka waste management neih a nih theih nan leh, bawlhhlawhte mumal zawka disposed-off a nih thiehna tur atan khing te khi function tir thuai turin a changtu kan minister-in hma min laksak tur leh min hriatpui turin, hemi House kaltlang hianin kan ngen a.

Tin, Zotlang by-pass road ah khian *slaughter house*, term hmasa lam kan sorkar atang khan sum tam tak senga sak a ni a, amaherawhchu hman a ni lova, khi khi. A chhan chu, a hmam survey mumal a ni lo nge, slaughter house sakna lai khi a dik lova, an tui tlan ber hnarah ran talhna thli a luan dawn avangin mipuiin hman an rem ti lova. Chuvangin, hman lohin a tawngtawl ringawt a ni. Tichuan, tuna ran talhna hmun atana an hman mek Champhai Vengthar chhungah khian temporary shelter-a sak chu ran talhna'n an hmang thin a ni. Amaherawhchu, chulai ran talhnaah pawh chuan mumal taka arrangement a awm loh avang leh, temporary arrangement thil a nih avangin, a thli luan khawmna blood-pit emaw, a waste han paihkhawmna tur engmah a awm lem lova. Tin, phai lampang Silchar atanga te, tun hmaa savun phai lampanga an process lehna tur atana rawn la thin te pawh khan an la tawh lova. A chhan chu, central lampangah bawng talh dodalna te a tam avangin, bawng vun rawn latu tur an awm tawh mang lova, chungte pawh chu a sir velah te khian an paih vel mai mai thin a ni. Chu chu mumal taka disposed-off a nih loh avangin, a bul vel a ti rimchhiain, hriselna a tan pawh a tha lo em em a. Ran talhna thli leh ran talhna a chuangbang an paih thin te pawh, khi lai mite hriselna tan pawh a tha lo em em a ni. Chuvangin, slaughter house mumal zawk kan neih thiehna tur atana a minister concern pawhin min lo hriatpua, hma min lo lakpui turin ka ngen nghal duh bawk a.

Tin, Veterinary & Animal Husbandry lampanga kan sawi leh duh chu - Vety-ah chuan, Mizo pipute atanga '*kan ranpui*' ti mai ang, kan lo chhuan thin, ransa zingah chuan ran-

ropui, ‘Sial’ kan tih, hengte hi khing lampangah khian a vulhna khaw 14 zet a awm a. Hei hi kan Mizo-culture a bet tlat, kan pipute’n an lo ngaihsan em em mai, an hunpuiah chuan *sial* hi an talh thin a ni; Sial talhna khawpa chaw-eikhawmna chu ropui tak a ni a. Tin, tuin emaw, ‘sial pathum ka talh ang’ a tih te pheih kha chu, ropui tak a ni. Chuvangin, hei hi Mizote’n kan chhuanvawr, kan ran pui ‘sial’ vulhtute hian kan Mizo tradition an la tinung hram hram a, anni hi ngaihtuahna senpui an ngaiin ka hria a.

Sial hi a mak khawp a; ran zingah hian *ran-pui* anih angin, a chak a; tin, a nghal em em mai baw a. Grazing ground, an tlatna tur ram te chu ruahman a ni a. Amaherawhchu, a sir vela huan leh lo ah te luh an hrat a, a ram thenawm vela mite tan harsatna tam tak a thlen phah thin avangin, khing an grazing ground khi hungna tha tak nena hung a, sorkar atangin subsidy emaw te pek theih ni se, tih kha kan Minister-in min lo hraitpui se ka duh baw a.

Tichuan, khing lai vela Vety quarters te khi a hluiin, a chhe tawh em em a ni. A zavai deuhthaw khian luah tlak tawh mang loh anni a. Chutiang khawpa a upat tawh hlawm avangin, khingte pawh khi thawmthat a ngai a. Tin, Veterinary Office leh staff awmte khi an indailoh em em avangin harsatna tam tak an taw a. Ka bial Champhai South lampang khi border area a nih avangin, khita tang khian Mizoram chhunga kan ei tam ber ransate rawn tawlh luh a ni a. Khita tanga vaw leh bawngte a rawn luh nasat avangin, ran hri laka an him leh him loh lo check zel turin laboratory leh staff indaih taw an awm a ngai a. Chu indaih lohna - staff leh quarters lam tea an indaihlohna khi min phuhruk sak turin kan Minister hriatpuina ka’n ngen duh baw a ni.

Tin, Demand 31 - Agriculture lamah hian, New Champhai-ah khian agriculture godown 1988 daiha sak tawh a awm a; a hlui tawh em avangin, khilai tan khian an khawp kham tawh lova, khi godown khi sak len deuh a tul a. Khi lam khi Mizoram-ah chuan *Agriculture leh Horticulture hmunpui* a tih theih ang a. Khinga an thlatharte leh a dahthatna tur atan warehouse lian zawk tunah khian kan mamawh a. Khilaila lonei-mite leh an thlai tharte tha zawka an vawn theihna tur atan warehouse lian zawk leh cold storage thlengin kan mamawh a ni.

Tin, agriculture link road te hi khilaila khian kan mawmawhna a sang bik a. Mizoram hmun dangah pawh hei hi kan mamawh vek nain, hmun dangah chuan kum tin lo neihna sawn kual a ni thin a; feh kawng an sial a, a kum lelah hmun dangah an pem san leh mai a; kha feh kawng kha chhawr zui vak a ni tawh lo thin a. Khi lamah erawh chuan kum tluanin leileta ei zawng leh fish farming te, terrace te, tiang zawnga eizawngte kan nih avangin, link road pakhat a kuak chuan, chu chu khua leh khua inkalpawh nan te leh kumtluana hman thin a nih avangin, link road te hi khilaila khian kan mamawhna a sang bik a ni.

Chuvangin, link road mai piah lamah leilet, a zaua zauin leilet a awm a; a then tan chuan mahni leileta kal tur pawhin midang leilet kal tlang te a lo ngai thin a ni. Chumi a nih avangin, an thlai tharte lachhuak turin leh phur chhuak turin head load an hman a ngai nasa a. Chungah te chuan a leilet neitute pawh an inhrethiam em em a, midang leilet pawh turin an leilet zawla kaltlang te an phalsak a, kawngte an sial a. Awlsam zawka an thlaitharte phurchhuak turin, motor kalna tham a ni si lova. Chuvangin, heng leilet leh leilet inkar kal pawhna hi motor kal theihna tura min ruahman sak turin, Agriculture changtu Minister pawh kan ngen duh bawk a.

Pu Speaker, minute 10 chu a va tlem ve. Min lo hrethiam la, tlemin hun han bawhpelh ve deuh hlek ka dil che a. N

Nichinah khan ka sawi tawh a, hospital lam requirement-ah khan kan Health changtu Minister-in min lo hriatpui tura ka duh chu – Kan district hospital-a OPD ah khian nikum January - December 2023 inkara record-ah hian mi 46699 an awm a. Tichuan, delivery case te hi a sang em em mai a, Mizoram Govt. Hospital-ah chuan delivery rate sang ber dawttu record a ni a. Chutiang chuan, khilalah khian gynaecologist tunah hian pakhat chiah kan nei a, (Hon. **Speaker** : minute khatin a pel ta e) khingah khian staff indaihlohna a nasa em em a ni. Tin, DMS (District Medical Superintendent) khian motor Gypsy kum 20 aia upa tawh, chhe tawh em em a kawl ve a, a khawngaihthlak awm a. Khi khi ama duty-na a tan a tangkai si a. Chuvangin, motor remchang dang han release sak ve theih ni se.

Tichuan, Pu Speaker, kan Minister pathumte Demand hi keipawhin ka pawmpui a. Tichuan, he House zahawm tak hian lungrual takin han pass sak thei se, tih ka ngen bawk a ni. Ka lawm e.

HON. SPEAKER : A lawmawm e. Tunah chuan, Hrangturzo Bialtu, Member zahawmtak Pu Lalmuanpuia Punte ilo sawm ang.

PU LALMUANPUIA PUNTE: Pu Speaker, ka lawm e. Vawiinah Minister pathumte demand kan han sawi ho a. A hmasa berin Demand No. 23 - Art & Culture hi tlemte han sawi ve ka duh chu a.

IMFA (Institute of Music and Fine Arts)-ah sawn instructor ho an pension nual tawh a, post hnawhkah lohin a awm a. Mizo hi music lamah kan talent a tha em em a, IMFA lam chhuak ngat te hi chu khawiah pawh an hmantlak em em a ni. Chuvang chuan, instructor pension tawhte ai hi dahkhah ni thuai se, tih hi kan Minister-in min lo hriat sak se la. Tin, Chapchar Kut kan tih dan luai luai hi thlak hret tha ka ti a. Aizawl-ah hlir a ropui zawng zawng hi tih kan tum a. Manipur-ah khian Zo-hnahthlak ho khian Kut an ti tawp a. Zo-hnahthlak hnam hrang hrangte intawm, sorkar expenditure-in, *sorkar holiday* an puang bawk a. A changin Kangpokpi-ah te, a changin Imphal-ah, a changin

Churachandur leh Moreh-ah te an ti thin a ni. Chutiang baw k chuan a kutpui ber, Chief Minister hoa kan tih thin hi, a changin Lunglei-ah te va ti ve ila, Champhai-ah te; ti hian sawn kual ve ila. Aizawl-ah chuan an lo hmang tho ang a. Engkim a ropui zawng zawng Aizawl-ah tih vek tumna kan nei hi a fuh loin ka hria a. Chuvang chuan, Kan *Chapchar Kut* hman dan te pawh hi ‘thlak a tha awm mang e’ ka ti a.

Tin, Demand No. 34 - AH & Vety ah hian, ran chaw hi kan intodelh mawh khawp mai a. Arvulh ringawt pawh hi han ti viau dawn ila, ar chaw hi ram dang atanga lakluh ngai a ni a. A chaw hi siam ve kan han tum na a, helaiyah raw material lam tharchhuah a lo tam taw k lo leh a. Chuvangin, hengte pawh hi ngaih pawimawh a ngai khawpin ka hria a. Hei hi agriculture lam te nena tan ho chi ng e, horticulture lam zaw k, ka hre lova. Vaimim emaw khatianga han tih kha uar ila, helaiyah raw material duh khawp kan nei h chuan tun ai hian ran chaw man a lo tlawm ang a, kan ar vulhtute leh ran chi hrang hrang vulhtute pawhin an sa man te an titlawm thei deuh hlek baw k ang a; chutiang zawng te chuan tan la ta ila a thain ka hria a.

Irrigation hi, Mizoram-ah hi chuan a district angin han sawi tawp ila, Kolasib leh Mamit District-te khu Agriculture-a buh chin theihna ah chuan potential kan nei thatna a ni a. Amaherawhchu, irrigation lam hi a la chak taw k loh avangin, a la buaithlak a. Chhim lamah pawh Phura leh Chamdur te; Phura pawh saw Palak Dil khuahna an san belh hret a, sawmia tui sem darhna tur saw an la indaih taw k lova, ngaih pawimawh theih deuh hlek ni se la. Tin, ka bial N. Vanlaiphai ah chuan kum khatah buh vawikhat chauh an ching thei a, a bak kha chu chin lohin a awm ringawt mai a, a uiawm lutuk a ni. Chuvangin, tui khawi emaw atanga pump chhuaha, tangkai zawka hman a chakawm hle mai a.

Demand No. 24 - Health ah hian khawl, facilities hrang hrang kan nei chhe khawp mai a, heng khawpuiah te ngei pawh hian dialysis mamawh an tam tawh viau mai a. Sum hmuh awlsamna a nih avang hian Private Hospital hian an nei vak vak a. Sorkar hian district tinah hian tha takin dialysis khawl te hi dah thei se la. Tin x-ray khawl pawh ka bial chhunga khaw pathum - Biate, Lungdar leh N. Vanlaiphai-tea an hman lai chu a chhe tawp mai a ni. N. Vanlaiphai phei chu 2016 khan tek in a denchhiat an ti a, an la thlak thei lova; tihngaihna a awm ngang loh avangin, mipuiin an mamawh si a; MLA fund la bang, last quarter-a kan dawn atang khan khing khaw thum tan khian x-ray khawl hi ka lei ringawt mai dawn a ni. Accident taw k hlek se la, Serchhip lama phurh zel ngai a ni si a, mipuiin an mamawh em em mai si a. Vanlaiphai ami khi 50 MA a ni an ti a; tuna chung khaw-thum tana kan lei thar tur hi chu 300 MA vek a ni dawn a. Biate ami khi an sawi dan chuan Pu Arora, health director a nih laia an pek tawh kha a ni awm e; 15 MA vel a ni. Pu W. Chhuanawma bial Khawzawl ami phei khi chu engmah hi a fiah lova, a fiah viau chuan a thi hman zel a, an ti a. Chutiangte chu kan Damdawi-in te hi an nih avangin, ngaih pawimawh an ngai viauvin ka hria.

Tin, ka bial chhung Bungtlang-ah khian PHC awm ve se ka duh khawp mai a. Pu Malsawmtluanga bial Lunglei North-a Rawpui khua leh ka bial chhunga Keitum khua te, an pathuma an hman tangkai theih tur, a lai takah khua a ni a; Damdawi-in an nei lova. Chuvangin, khi lai khaw thumin an inhmantawm turin Bungtlang-ah khian PHC an mamawh ve khawp mai a; chu chu kan Minister-in min lo hriatsak se ka duh hle a ni.

Demand No. 29 - Social Welfare ah hian, ruang phurhna baw kha ka lo sawi leh ang a. Dik tak chuan ruang phurh chungchang hi politician te'n kan tikhawloh hmasak a ni ve baw kha ni. Kan zo leh si lova, kan sawisel ngam baw si lova. Ruang chu sawi loh, damlo an awm hlekin a intibengvar hmasa sain min rawn hrilh a, pawisa chu kawng khat a ni a, kal loh ngam baw si loh. Ka bialte hi ka han fak leh ang a. Hmanniah pawh Biate-a kan Group Secretary nupui accident avanga ke tliak ZMC ah a lo awm reng a, chu pawh chu min rawn hrilhna chhan chu, an zai har lutuk a, 'zai vat vat turin min rawn hrilh sak thei lawm ni' an tih avang a ni a. Bial thenkhat hi chu YMA leh Unit hruaitute nen an hrilh sup sup a, hrilh thei a piang kha an intitheih leh nghal a. Mizo mipui hian he mi culture hi chu kan sim a tha khawpin ka hria. Nakinah MLA intibengvar zualin mo hruaina tur bus a thawh chuan, kan ti ve leh sup sup ang a, kan inbat leh dawn a ni. Heng te pawh hi i ti lo tlang vek ang u. Heng hi a rit a, tunah hian kan mangan tlan tawh em avangin, 'Minister-in, sorkarin mawh la mai rawh se' tiin budget-a rawn chhawpchuak a ni a, a lawmawm ka ti khawp mai.

Tin, tar-pension hi a lawmawm khawp mai a. Hmannia ka sawi ang khan, kum-upa khawhar tak tak, kawm tur hre tawh lo, an kawppui te'n an thih san tawh, an fa an tute nena ti ti duh zawng inang baw si lo khawhar tak takte tana *Old Age Pension* kan han siamsak thei tur te hi a lawmawm ka ti tak zet a.

Tichuan, Tourism ah hian kal ila. Mizo hian tourist kan hmuh dan leh hip dan tur kan ngaihtuah danah hi kan la blind deuh niin ka hria a. '*Lallianvunga Hmun*' kan tih, Chalfilh - Vanzau phul nuam kan tih em em, keimahniin nuam kan tih viauah te sawn Tourist Lodge kan va sa ngawt a; khawi tourist mah kha sawng te sawn a hip dawn lo; Shillong thlen hma kawng tluan, chawhma thak tlan pel tur phul nuam a tam lutuk; sawtiang en chak sawn tourist an lo kal vak lo ang. Keimahni zawk hian nuam kan va ti a, nuam kan va tawllen ringawt a ni; touirst tan eng vak a ni lo. Tourism tan chuan eco-tourism lam, keimahni hnam-nunzia tihlanna lam chi, khatiang thil danglam kha a ni, tourist chuan an hmuh chak ni. Chuvang chuan, heti lam hawi zawng hian inher danglam thei ila. Kan ramah hian tourism potential chu a tha; kalkawng sira kan hotel chaw-dawr ringawt han en hi chuan, tourist hi chu kan la pha lo viau a ni. Kan ei-in siam dan zawng zawng han en hian, a tihngaihna a awm hlawl lo a ni; improve kan ngai khawp mai.

Tin, Tourism tih tur nge, Education lam tih tur? Kan khawchhak unau hian Aizawlah pawh restaurant an siamin a tui deuh zel a. An nite chu high school pawl 9 -10 vel atangin eisiam hi subject pakhatan an zir a ni awm e. Hetiang zawng te pawh hian kan inherrem deuh chu a ngai a ni. Ui talha, phuihnam nena chhum leh hawng bak hi kan thiam lem lo tlat. Chuvang chuan, tihdan thar deuh hlek kan zir a ngai a ni.

Pu Speaker, sawi tur a tam a, hun bawhpelh loh ka tum a. Minister pathum – Pu C. Lalsawivunga, Pu PC Vanlalruata leh Pi Lalrinpuii te demand an rawn pharh hi pawmpuiin, tlang ngei se ka ti a, ka thlawp a ni e. Ka lawm e.

HON. SPEAKER : A lawmawm e. Tunah chuan Champhai North Bialtu zahawm tak Pu H. Ginzalala ilo sawm ang.

PU H. GINZALALA : Pu Speaker, hun min pek avangin ka lawm e. Hei, keini tlar hian titlang pheih law law ila a tha mai awm mang e, ka ti a; a next ah hian ani hian lo ti ve mai law law sela a tha ang a. Hei, ‘a demand number’ tih vel chu kan hriat vek tawh a ni a, ka rawn sawi buai tawh lo ang a; tha ka tih tih ka rawn sawi pawp pawp mai ang a.

Vety lam hi employment generation atan a tha khawpin ka hria a. A chhan chu, ‘sa’ kan tih hi food (chaw) ah hian grade sang (high grade) a ni a. Sa kg khat kan tharchhuah nan animal feed kg 10 bawr vel a ngai a, khami process ah khan employment tam tak a involve tlat mai a ni. Chu chu anih avangin, kan ram dinchhuah nan hian Vety sector, Animal Husbandry lam hi thil pawimawh tak a ni a. Chuvangin, Pu Speaker, helamah hian theitawp kan chhuah chhoh zel a thain ka hria.

Ka bialah hian, hei, ‘CHAMUL’ kan ti a, Champhai Milk Union Limited a ni a, hei hi a lo pamtul tawh a ni. Minister bulah pawh ka sawi tawh a, khawngaihin min lo hriatpui leh sela; tihnun leh kan duh khawp mai. ‘A hma anga society-a tih nge tha ang, privatize angin’ tih lai erawh chu a hrana la sawiho ngai niin ka hria a. Chuvangin, Champhai Milk Union Limited hi crore eng emaw zat hmanga tih a ngai tawh a; khawlte kha a awm rem-rum mai a ni. Building te a tha a, infrastructure te pawh hman-tangkai theihin a awm a ni. Chu chu min lo hriat sak sela.

Tin, Vety sector hi Agriculture Allied Sector a ni a, Agriculture te nen pawh hian convergence ngai tak niin ka hria a. Convergence kan tih fuh kha chuan chho deuh puat tur hi a awm a ni. Vety hi primary sector a ni lo; Agriculture hi a primary sector a lo ni ang a, vaimim te, animal feed atana raw material kan tih ang chi hi an rawn thar ang a. Tichuan, animal feed ah a lut ang a, ran vulh duh ten bawng a ni emaw, vawk a ni emaw, ar a ni emaw khatia kal chho zel tur a ni a. Chu chu, convergence-a kan kal thiam a pawimawh dawn hlein ka hria a ni.

Tin, a dawt leha ka sawi duh chu, Vety Doctor te pawh an indaih lo a ni. Bial tin hian mahni bial sawi dawn chuan sawi tur hi kan nei vek a; doctor te, VFA te pawh kan indaih lova, chungte pawh chu min lo hriat sak sela. Government anga hmalak hi a harsa a, post ruak te hnawhkhah a harsa a, chuvangin private sector-ah hian organised zawkin Animal Husbandary lamah te hma kan sawn theihna tura tan kan lak hi a pawimawh khawp mai a. *Entirnan*: private vety hopital te pawh hi din sak ta ila, a infrastructure kha kan siam sak ang a, vety doctor zir chhuak, thiam tak tak kan ngah tawh a ni; an ni hovin private clinic te an rawn run theihna tura infrastructure sorkarin kan tih sak theih kha chuan an rawn tih theih ka ring a. Sorkar anga kan tih theih loh tam tak hi private hian tam tak hi an tih theih ka ring a ni. Infrastructure an mawmawh ang equipment emaw, building emaw, *state of the art* khan din sak ila chuan, private entrepreneur a bik takin vety doctor te pawh hian kan ram economy thatna turin role hi an rawn play theiin ka ring tlat a. Helai scope hi kan la explore loh thil niin ka hria a, chuvangin he House hian zau zawkin kan ngaihtuahna kan hman hi a va tul em. Animal feed mai ni lo, a farm ang leh high tech zawng te pawhin ngaihtuahna i nei teh ang u. High-tech animal farm siam tur hian vety doctor thiam tak tak kan nei tawh a, in mobilised ila, sorkar angin tih theih kan ngah khawpin ka ring a ni.

Hon. Minister, District Council & Minorities Affairs changtu leh Local Councils lam pawh a ni ang, min lo hriat sak atana ka duh chu - kan tlangram lo neih hi tunah hian zawi zawia bansan kan tum niin ka hria a, kan policy pawhin a tum ber a ni a, hei hi zirchian a ngai viauin ka hria a. LAD lam chan deuh ah te ka'n dah a, tlang ram lo nei engzat nge kan neih tih te, kumtin engzatin nge lo vata, kan vah zauh zawng te, eng ang thlai nge kan chin, engzat nge kan thar tih te hi data kan neih a ngai a ni. Project Report te kan siam dawn a nih chuan data neih hi a tul khawpin ka ring a, DPR nei tur chuan data tha tak kan neih a ngai ta a. Tlangram lo neih hian environment engtin nge a tih chhiat dan te pawh zir chian a ngai dawn a, carbon dioxide hi kum tin engzat nge kan generate, kan atmosphere-ah hian engzat nge kan inject, tih te pawh chhutchhuah a ngai si a.

Tin, District Council pathumte tan duhsakna kan hlan hi a ropui ka ti a, ka lawmpui khawp mai a. Budget-ah te pawh hian alo lang a; sum tam tak leh zalenna sang tak te pawh kan pe niin ka hria a, an duh ang thala planning te an lo inngaihtuahna ve turin zalenna zau tak te pawh kan pein ka hria a, ka lawmpui khawp a. Anni hi kan unaute an ni a, kan duhsak chhoh zel te pawh a tha a. India ramin North East State ho '7 or 8 Sisters' min tih ang deuhin anni hi kan farnu te an ni a; anni pathum bakah Sinlung Hills Council te pawh kan nei a. Kan sister 5 te hi kan duat hle a tulin ka hria a ni.

LAD lam chanah chuan, street light outsourcing te hi a theih mai ang em, tih te ka'n zawt duh bawk a. Agriculture kaihnawih lamah sawhthing te pawh han sawi ila, sawhthing te kan ching dawn a ni a. Sawhthing hi a sustainable ti hi an awm ve zeuh zeuh ta a, House chhunga sawichhuak te pawh kan awm a. Hei hi 'a sustainable em em

a ni' tih kha ka'n sawi duh a. Tlangram lo neih ah hian buh chin ai hian a sustainable zawk a, tinkhat hmun rau rauvah a sum thawhchhuah a tam zawk a, economy-ah te awmzia a neih zawk avangin, tlangram lo neih ringawt ai chuan a sustainable kan tih zawk avangin.

Tin, sustainable parameter hi pakhat chauh kan hria emaw ni aw, ka ti a, environment parameter chauh hi kan sawi thin a. Environment chauh ni lovin social te, economy te pawh a rawn keng tel a ni. Tuna tlangram kan neih ai hian sawhthing kan chin hian kan farming hi a sustainable zawk a. Tin, development awm tur hian kan environment hi eng emaw chenah kan sacrifice rih a ngai a ni, tih te pawh ka'n sawi tel duh bawk a.

Tin, Agriculture lam hi han sawi zau deuh ka duh a. Tuna tlangram lo neih kan practice-ah bik hi chuan, Pathian-in he ramah hian hnim chi hrang hrang to turin a lo ti tawh bawk si a, chunglam atanga order awm tawh a ni; keini hian khangho kha kan han suat a, kan duhsak kha survive tir kan tum a ni. Khami kan indonaah khan kan hmanraw neih te kha, '*chem kawi technology*' ka ti mai thin a, kha kha ala ni chauh si a, kan hneh lo a ni. Chuvangin, 'permanent farming' kan tih hi thil tul tak a ni a, agriculture-ah hianin *technology input* hi a ngai a ni. Tuna kan kal danah hi chuan kan economy-ah hian kan in sustain thei dawn lo hrim hrim tih hi a ni a. Kan agriculture sector-ah hianin technology tha zawk te intervention kan neih a tul a, Government intervention kan nei hrim hrim tur hi a lawmawm a.

Tin, terrace kan neih theih te hi thil hlu a ni. Development han sawi hi chuan Presbyterian Sunday school-a kan zir te kha ka ngaihtuahna ah a lo lut a, 'Zawlnei Isaia ten an lo puang lawk vek a lawm maw le' ka ti a, ka'n chhiarchhuak lawk teh ang - '*Kawrh tin tih hran a ni ang a, tlang tin mual tin tih hniam a ni ang a, kawng kawite tih ngil a ni ang a*' te a rawn ti a, terrace leh farming technology kha a rawn sawi vek ni khan ka hria a. Israel fate pawh an Babulon sal tanna atanga an rawn chhuah zalenna tura zawlnei Isaia'n thil tul a rawn sawi te hi, tuna kan dinhmun atan hian a relevant hle a ni. Sermon-na hun rei tak nei ila ka duh khawp mai; helai bawr velah hian sawi tur ka ngah khawp mai a.

Pu Speaker, kan Babulon economic sal tanna atanga kan chhuah zalenna tur atan chuan terrace a ngai; zawlnei ten an lo sawi lawk vek tawh. Kawng ngil te pawh niminah ka sawi tawh; 'development awm tur chuan kawng te pawh a ngil a ngai a ni' ka ti a. Hei, '*ram ro ah te pawh lui te pawh a siam a ni*' a ti a, irrigation vek a ni heng te pawh hi. Development awm tur chuan irrigation lamah te theih tawp kan chhuah a ngai ang a. '*Lui te pawh ka awm tir avangin, ramsa te pawhin min chawimawi ang*' a ti. (**Hon. Speaker:** Minute a ral tawh e) Tuna kan policy-ah hian agriculture dam te kan siam a, dil te kan siam dawn a ni. Chutah chuan, '*sava pem chite pawh an rawn lut ang; nungcha chi hrang hrangte pawh an rawn lut ang a, chu chuanin mi chawimawi ang*' a ti. Kan environment pawh a *friendly* dawn viau a ni; 'sihal te, sava nghawngsei

te nen lamin' a ti a ni. Chuvangin, kan Agriculture Policy hi Environmental Policy dik tak a ni.

Pu Speaker, kan Hon. Minister pathumte Demand hi pass-pui ngei ni se ka duh dan a ni e. Ka lawm e.

HON. SPEAKER : A lawmawm e.

PI BARYL VANNEIHSANGI: Pu Speaker, khawngaihni ka lo inrawlh lawk mai. Kan Speaker leh kan Dy. Speaker hi dar 2:30-ah hian telna tur pawimawh an nei a; kan Dy. Speaker phei chu kan zingah a awm tawh lova. Chuvang chuan, *Panel of Chairman* nihnain, kan Member-te leh Speaker-in rem a tih chuan, *Chair* hi khawngin kan inthlak lawk thei em?

(*Pi Baryl Vanneihsangin Chair a la a..*)

HON. CHAIRMAN : Kan discussion kan chhonzawm ang a. Helai hmunah hian Panel of Chairman dangte an thu tawh thin a. Amaherawhchu *hmeichhia* an la thut ve ngai loh avangin, koh dan tur/address kha kan buai lohna turin '*Pi Chairman*' min ti mai ang a. Vawiin chu tifuh kan tam dawn nge, tifuh lo kan tam dawn a hriat loh a; a tifuh turah inngai ta ila. Tihsual palh a awm pawhin helai hmun hi a zahawm avangin, fiamthu nan leh hun khawhral nan hmang lo ila a tha awm e.

List awmsa a awm a, min hrethiam ula; heta mi ang hian kan kal ang a. Ka thutpui a ni bawk a, kan duhsak nghal ringawt mai ang a - Pu Jeje Lalpekhlua, South Tuipui Bialtu kan sawm ang a, a dawt ang zelin kan kal dawn nia.

PU JEJE LALPEKHLUA: Pi Chairman, ka lawm e. Vawiinah Minister Pu C. Lalsawivunga, Pu PC Vanlalruata leh Pi Lalrinpuii te demand kan sawiho dawn a ni a. Keimahah hian ngaih pawimawh zawng a tam ve angreng khawp mai a, kan ngaih pawimawh zawng te minute 10 chhungin han khung len hman tum ila. Chipchiarin ka rawn sawi dawn lo a, demand-te pawh sawi vek ka tum lem lova, ka ngaih pawimawh zawng hi ka rawn sawi lang ve dawn a ni.

A hmasa berah chuan, Demand No. 19 - LAD hi sawilan ve ka duh a. LAD hnuaiyah hian a hmasain lawmthu han sawi hmasak phawt ka duh a. Sorkar kal ta, a bikin hemi lama hma latute chungah lawmthu sawi ka duh a. Ka bial chhung Hnahtial District-ah hian RGSA sum hmangin District Panchayat Resource Centre leh hostel sak mek a ni a, a lawmawm ka ti hle a, kumin October thla hi chuan kan zo fel thei turah kan ngai a. Hetihlai hian, he building enkawltu tur leh khawtlang hruaitu tur, Village Council enkawla viltu tur District Local Administration Officer erawh a la awm thei dawn lo niin kan hria a. Tunah thut thut ni lo; a pawimawhna te hriaa, Minister changtu khan

hma te pawh min lak sak turin ka'n ngen nghal duh bawk a. House member zahawm tak, Aizawl South - III Bialtu, NI. Baryl Vanneihsangih leh Serlui Bialtu Pu Lalrinsanga Ralte te khan an rawn sawi lang tawh a, VC te pawimawhna kha. Thingtlangah phei chuan VC te hi an pawimawh em em a, Mizoram hmun hrang hrangah VC House hi neih lohna khua a la awm nualin ka hria a, hengte pawh hi a changtu, a ti theitu Minister-in a rang lama hma laksak turin kan ngen sak bawk a ni.

Pi Chairman, Demand No. 23 - Art & Culture hi a pawimawh viauin ka hria a. Kan ramah hian pipute sulhnu hmun hlu tak tak humhalh kawngah hian tan kan lak lehzuah a ngaiin ka hria a. A bikin, he House zahawm tak kal tlang hian ram mipuite kan ngen ve duh che u chu, pipute sulhnu kan neih hi nasa lehzuah zawka humhalha, kan ta a nih zia hria a, dimdawi tak leh duat taka enkawl turin kan ngen duh che u a. Ka bial chhungah ngei pawh Thingsai khuaah '*Saikuti Lung Zeh*' tih te, Khawhri Lal huaisen, Mizo hmeichhiate zahawmna hnamdang laka humhimtu, sap-sipaite pawh kap ngam - *Zakapa* hmun hma te, *Dawithiam rawtna hmun* Thingsai leh Muallianpui-ah te, hmun hrang hrang ka bial chhung ringawtah pawh hian kan nei a, hengte pawh hi mikhual/tourists lam kan hipna tur, nakinah pawh kan ram min pholangtu tur a ni tih hriaa, Mizoram mipuite pawhin dimdawi taka enkawl turin ka'n ngen nghal bawk a ni.

Pi Chairman, Demand No. 34 - AH & Vety kha sawi leh lawk ka duh a. A hmasa in lawmthu sawi ka duh a, Hnanthial District saw infrastructure lamah hian hmasawna hmel thar tak tak kan hmu a, District AH & Vety Hospital leh Laboratory sak mek peih mai tur kan nei a, District Veterinary Office sak chhoh mek te, staff-quarters te pawh tunah hian sak puitlin an ni tep tawh a. Heng sorkar hmasa ten hma an lo laknaah lawmthu, district aiawhin he House zahawm tak kaltlang hian kan sawi duh bawk a. Ka hma a lo sawitu Hrangturzo Bialtu, Pu Lalmuanpuia Punte khan a rawn sawi tawh a; ranvulh lama hmasawna intodelh tur chuan, ran chaw kan intodelh hmasak phawt hi a ngai a. A changtu Minister khan hemi kawngah pawh rilru zau zawk lo seng tur te pawhin ka ngen duh a. Thawktu indaihloh tih hi tun sorkar tharah hian rin ai hian sawi tur a tam khawp mai a, ka bial chhungah te pawh a ni a. A bikin South Vanlaiphai te, VFA boral leh pension tawh an hmun hnawhkhahna tur mai awm lote leh thingtlang hmun hrang hrangah te pawh a awmin ka hria a. A bikin thingtlang lamte hi kan Minister leh kan hotu ti thei zawkte hian nasa zawka zir chianga, a rang lama hma min lak saka, kan mite hi duhsakna kawngah pawh nasa zawka tan kan lak ngei ngei pawh kha kan duh a, Minister pawh kha kan ngen nghal a ni e.

Demand No. 31 - Agriculture hi a pawimawh hle mai a. Agriculture-a kan intodelh loh chuan, thil danga intodelh tum hi thil tih chi loh tawp niin ka hria a. Kalphung tharah chuan thlatharte hralhna tur mumal zawk, mipuite tana leina zawn sak te pawh sorkar chuan a thil tum a ni a, a lawmawm viauin ka hria. Ka bial chhungah te phei chuan kan han zin kual a, kalphung thar hi a takin a lang niin ka hria a. Thlawhhma neih tumin kan riak lut a, lo kan vat a, kalphung thar hian Mizoram-a cheng mipuite hi taihmakna

kawngah min hruailut thar leh ni te pawhin ka hria a, a lawmawmin ka hria. Kan thlaitharte man man zawka hralh kan tum a, a lawmawm.

Chutih rual chuan kan thlaitharte kan phurh chhuahna kawngah hian, a bikin kan bial chhung pheih chu link road mumal kan nei lova. Kan thlaitharte hralh ringawt mah ila, phurh chhuahnaah hian sum tam tak, kan thlaitharte hralhna man let chuang hi kan sen a ngai dawn a. A changtu Minister te'n min hriatsak a, kan thlaithar phurhchhuahna tur link road te min ngaihtuahpui turin ka duh bawka a. Kan lui dung, luipui, lui hrang hrang kan nei a, kan ram chhungah; luidung tangkai zawka kan hman theihna turin a panna kawng tha zawka kan nei theihna turin, nasa zawka hma min laksak turin ka'n ngen nghal duh bawka a. Agriculture link road hi balu te, tiau te, lung te kan lak chhuahna piah lamah, kawng hi thlaithar kan phurhchhuahna a tan pawimawh tak a nih angin, ka bial chhungte pheih hi chu 'kut-hnathawktu tamna ber bial a ni awm mang e' ka ti thin. Hei hi a changtu Minister khan min hriat saka, a hmun ngeiah te pawh min lo tlawh turin he House kaltlang hian ka ngen nghal duh bawka a.

Kan hriat angin, Hnahthial District-ah School of Agriculture Science (SAS) leh KVK te kan nei a, hengte pawh hi changtlung zawka leh a nihna tur taka kan hman chhuah theihna turin a changtu Minister hian min lo hriatsak a, a hmun ngei a min lo hmuhpui turin kan ngen nghal duh bawka a ni.

Pi Chairman, Demand No. 37 - Co-operative Department chungchang hi han sawi lan ka duh a. Department lar lo tak a niin ka hre thin a. Amaherawhchu, tun kan sorkarah hian a pawimawh hle dawn niin a lang a, a chhan pawh sorkarin thlai thar chi 4 – sawhthing, hmarcha, hmunphiah leh aieng te hi support price a pe dawn a, co-operative society kaltlang lo chuan hmalak a ni thei dawn lova. Mizoram hmun hrang hrangah hian Co-operative Society kan din dawn a, enkawl tur hian District Co-operative Officer (DCO) kan nei te pawh a ngai dawn a. Tunah hian district thenkhatah chuan nei lohna hmun te kan la nei a, DCO hi a bikin ka bialah pawh kan la nei lova, kalphung thar kan ti tawh a, thlaitharte mumal zawka hralhna turin min ngaihtuah ran sak turin kan ngen nghal bawka a.

Demand No. 47 - Irrigation & Water Resources hi Agriculture & Allied Sector-a intodelh kan tumna kawngah department pawimawh tak a ni dawn tih a chiang hle a, chhawr tangkai ngei pawh kan tum a tul awm e. Nikum June ni 9 khan ka bial chhung South Vanlaiphai leiletah, a chawmtu tur Zaupui - Ground Water Irrigation Project pawh hawn a ni a, solar hmang a nih vangin, tangkai takin zau leilet neitute chuan an chhawr mek a, zau chauh ni lo, South Vanlaiphai leileta zau dang bakah kan bial chhung leileta chhungkaw dangte piah lamah kan ramah hian thali-agriculture-a kan intodelhna tur atan a pawimawh tih hriaa, a changtu Minister pawh zau tam thei ang bera hma la turin ka chah duh bawka a ni.

Pi Chairman, a tawp lam hnaih tawh ila; Demand No. 24 - Health & Family Welfare hi han sawi lan leh lawk ka duh a. Hei hi kan ramah chuan a te ber atanga a lian ber thleng kan chhawr a nih avangin a pawimawh em em a. Kan vannei a, a changtu Minister theihtawp chhuahtu kan nei te hi a lawmawmin ka hria.

Kan hriat angin, sorkar tharah chuan ‘kalphung-thar, mipui-sorkar’ kan tih angin health care bill ba pe tlak vek te, tin, mithi ruang phurhna tur chungchang te pawh kha nimin lawkah kan hria a, khang te pawh kha a lawmawmin ka hria. Tin, kan bial bikah district hospital khum 50 awmna kan han nei mai tur te pawh hi a lawmawmin ka hria a. Tin, Urban Health & Wellness Centre sak mai tur te thleng hian a lawmawmin ka hria a. A hmaa kan lo thlen tawh - dental chair te pawh nimin lawk khan kan district hospital a thleng tih te kan hria a, a changtu Minister chungah pawh khan lawmthu kan sawi leh duh bawka a ni.

Tin, kan hriat angin, Social Welfare chungchangah pawh kan sorkar hian a ngaipawimawh hle a, ‘tar-pension cheng 100/- la thin khan cheng 1000/- a dawng tur a ni’ tih te pawh hi a lawmawm viauin ka hre bawka a. Amaherawhchu, Social Welfare hnuai District Social Welfare Officer hi Mizoram hmun thenkhatah neih kim loh a ni a. Kan sawi ang khan sorkar tharah hianin sorkar-hnathawk indaihlohna a nasat zia a tharin kan hre zel a. Ka bialah erawh chuan District Social Welfare Officer te pawh hi kan la nei lova, a changtu Minister chak tak leh fel tak khan min ngaihtuahsak dawnin ka lo hria a, a lawmawm ka ti a. Tin, tar-pension la mumal lote’n kar hmasa lawk khan ka bulah an rawn thlen a, tunah hian Lunglei lamah kan buaipui mek a. Khatiang khan, lehlamah tar, kum-upa leh chaklo thenkhat te chu mahnia awm te an ni a; mahnia thil ti thei tawh lo, zin pawh thei tawh lote an ni. Heng pawimawhna te hi hriaa, keimahni district-ah ngei pawh District Social Welfare Officer kan neih ngei theihna tura hma min lak sak thei tur khan kan ngen duh che u a. Ka zo a; a tawp ber chiah, Pi Chairman.

Tourism hi sawi lan leh zuai ka duh a. I remtihna, kan hriat angin tourism-ah Serlui Bialtu Pu Rinsanga khan a rawn sawi lang tawh a. Tourism hi a pawimawh viauin ka hria a, Tourism Deptt. ah hian ambassador te paw’n ka lo awm ve tawh a. Hemi kawngah hian kan ram hi hmun hma kan nei tha a, ‘khawvel ram dangina an neih ang hi kan nei ve vek’ ti ila, a sual awm lo e; hengah te hian tan la ila, a ramchunga cheng mipuite’n kan thil neih hlute dim dawiin enkawl ila theihtawp chhuahtu; tunah kan chhawr lo a nih paw’n, kan tu leh fa lo awm zel turte ah hian kan ram sum leh pai lakluhna ber tur a ni tih hria ila. Kan thil neih hlute hi tun atanga duat taka lo enkawl turin he House zahawm tak kaltlang hian ka’n ngen nghal duh bawka che u a.

Tin, kan hria ang a, a changtu Minister hi kan bial chung pawh min rawn luh chhua nasa tawh khawp a, ani hi a hrechiang bertu a ni ang a. Heng hmun hrang hrang, hmun pawimawh tak tak kan neihte pawh hi chak zawkin a cheina tur lama hma min laksak turin ka ngen nghal bawka a.

Tichuan, kan Minister pathumte demand hi a tha ka ti a, ka thlawp a ni. Ka lawm e.

HON. CHAIRMAN : A lawmawm e. A dawta sawi turin, Hachhek Bialtu Pu Robert Romawia Royte ilo sawm ang u.

PU ROBERT ROMAWIA ROYTE: Pi Chairperson, ('Pi Chairman' tih zawk tur em ni kha; in ti deuhin ka hria a?) hun tha tak min pe a, ka lawm hle mai. A hmasain kan Chairman hi, a chairman laia thu ka sawi thei hi ka lawm khawp mai a. 'Mithar' ti mai ila; tunlai naupang, keini putar tan chuan naupang mai a kan ngaih kha a ni a. A nu zai thin lai tea a nu thiannute kha kan hriat kha an ni daih a. Chuvang chuan, a chairman-na hnuaiia thu ka sawi thei hi ka lawm hle a ni.

Vawiinah hian Minister of State anga ka lo enkawl ve tawh department pahnih a tel a, hei hian min tiphur a. A hmasa berah chuan, DCMA Department chungchang hi tawitea sawi ka'n tum ang a. District Council & Minority Affairs Department a ni a; a hma chuan 'District Council Affairs Department' tih thin a ni a, a huam chin pawh district council area mai kha a ni thin a. Mahse, 'District Council & Minority Affairs Department' tih a nih hnu hian, rampum te pawh a huap ve a. He department hi a pawimawh khawp mai a, a chhan chu, Mizoram leh India ramah hian 6th Schedule hnuaiia District Council hi India ramah tlemte chauh, chutah pawh North-east ah chauh a awm tih kan hria a; chu mite enkawltu department chu a nih avangin, a pawimawh ka ti a. Tin, sorkar tharah a changtu pawh Minister mature tak, senior Legislator-in a an chang te hi a inhmeah ka ti a.

6th Schedule chu kan hria a; tribal emaw, hnam tlem zawkte enkawl na dan Schedule 6th hmanga enkawl na dan a ni a; keini State chu Schedule 7th ah kan awm tih kan hriat vek kha. Tichuan hemi hnuaiia hian Govt. of India scheme te pawh implement a ni a, tun hma chuan implement a awm vak ngai loin ka hria a. Tun hnu ah hi chuan Govt. of India programme lian tak takte pawh District Council Affairs Department hnuaiia hian enkawl a ni a. Hemi chungchangah hian 'fimkhur taka kal pawh a ngai a ni' tih erawh hi chu ka sawi duh a. A chhan chu, Schedule hran hnuaiia inenkawl kha an nih ve tlat avang leh, inthlan dan te engkim kha entity hrang deuh an nih avang hian thiam taka, an rilru tina lo zawng te emaw, 6th Schedule India Constitution-in a pek ang chiaha an culture leh tradition te, an identity te vawnhim sak zawng leh promote zawnga inenkawl te pawh an ngai awm e. Policy lam kha chu sawi thui lo ila.

DCMA Department hnuaiia hian PMJVK kha a awm a. DCMA Minister ka nih hnu hian ka hrechiang leh zual ve a. DCMA Department te an lo thawkrim viau mai a. Zawhna & Chhanna kal tawh lama chhuakah khan a awm chiah lo na a, DCMA Department hian Mizoram Department hrang hrangin PMJVK hnuaiia project an lo submit tawh, an lo thawn thlak tawh hi 'engzah hu nge; engzah man nge' tih zawhna

kha nizan hmasa khan ka keu chhuak nawlh a, mahse a amount chiah kha ka hrechhuak zo lova, nuai 2 chuang chu a ni phawt mai a; crore 2000 ai tam hi DCMA hian department hrang hrang project hi PMJVK tan hian sorkar hmasa hun lai khan an lo thawn thla tawh a. Print chhuak vek ta ila pickup trip khat ai hian a rit ang em aw tih tur hi, he department hian project hi a lo thawn thla tawh a.

Session hmasa lamah te, sorkar hmasa hun lai khan, ‘engatinge sports chauh; engatinge phullem chauh’ tih te a awm thin a, khatiang kha a ni reng reng lo tih ka minister ve hnu khan ka hrechhuak a. He department hian hma zau takin, education chungchangah te, health chuangchangah te leh infrastructure dang chungchangah te hma a lo la thin a, a lo la chhuak vek lo mai zawk a lo ni tih kha kan hmuh ve a ni a. Tunah hian kan Minister zahawm tak enkawl na hnuaiah tha zawk, ropui zawk, mumal zawkin thil a kal ang tih te ka ring a, chutiang tur chuan duhsakna pawh kan hlan duh a.

Chutih mek lai chuan, October thla vel em ni aw, PMJVK hnuaia installment crore 10 lo chhuak kha, a tang rei vang vang ta khawp mai a, khawi lai takah nge a tan tih hi ka hre ve chiah lo a; Minister zahawm tak pawh kha, Sports Minister zahawm tak nen khan kan han remind nawk nawk a, Recess Room-ah chuan *chengkawl leng kir tla* an sawi ang vang vang kha a ni deuh em aw? Kha pawisa kha an tih danah chuan, hman nghal mai a nih chuan, crore 40 dang rawn release leh nghal turin leh kumin chhunga approve sa awm thlap kha niin an sawi a. Chuvang chuan, Minister zahawm tak pawh kan ngen ni sela. Tin, kan Minister dangte pawh, Finance te a nih pawhin, kan House Leader zahawm tak a awm a, khami kha sum tam zawk a lo chhuah theih nan, release a ni theih ang em, tih kha kan sawi pah duh.

Helai hi a pawimawh riauna a awm a. Financial progress leh physical progress hi a interesting a, a sawi te pawh hi a nuamin ka hria a. PMJVK-ah hian physical progress hi financial progress hian a umpha lo nasa khawp mai a, hetianga scheme kal hi sorkar thar pawhin a tih zel theih chuan a lawmawm ngawtin ka ring a. India ramin state implement tha 3 an thlan zingah pawh khan Mizoram kha kan tel ve a; sum release tur zinga thlan te pawh kha kan ni ve niin ka hria a. Chuvang chuan, tuna mi hi kan release chuan, a dang kan sum harsat lai hian crore 40 sanction tawh sa kha release tur a la awm a. Tin, a hrim hrimin nuai 19,000/- chuang hi PMJVK hnuaiah hian sorkar thar hian kan rochun a, a sum hman chak chuan lo kal chak zel tur thil a ni a.

Tin, Minister zahawm tak Pu C. Lalsawivunga chanvo tho - Art & Culture Department chungchang hi kan sawi duh a. Budget kan hmu a, cheng nuai 1300 vel a ni a. A Department pawimawh ang huin a tam tawk lo em, tih ka sawi duh a; sum harsatna chu kan hria a. Heng Department te deuh hi chu crore hnih-khat han pek belh deuh pawh hian beng thleng thlenga bawp khai tur department hi an tam mai a. PWD-a crore 50 emaw, crore 30 emaw pek belh hi chuan, thenga thawng ah hian a kal vak mai lova. Chuvang chuan, RE lamah te pek belh deuh khan a department-ah hian impact lianpui

a nei thei dawnin ka hria a. Agriculture department pawimawhna kha chu ka hmaa mite khan an sawi tawh a.

Budget pek belh hi inthlahrung lovin, Supplementary Demand-ah pawh rawn lang sela, a hming sawiselna tur chi ni lovin ka hria a, a lawmawm lam tur te pawh a ni a. MCO - Mizo Cultural Organisation-ah hian a hmingin President te ka ni ve a, kan țang ve khawp a; Art & Culture vawnhim chungchangah hian. Chuvang chuan, a Minister pawh hi kan țan bur a ni. Tiang chuan, ka support-na te ka'n sawilan piah lamah budget tam zawk, kan state budget atanga a theih loh pawhin, Ministry of Culture lam a ni emaw, Tribal Affairs a ni emaw, Minority Affairs a ni emaw multisectoral ministry chi kha tam tak a awm a, khang lam atang khan sum han zawn sak deuh te hi a țha ang em? Tin, hun kal tawha cultural village tur atana minute te pawh kha awmin ka hria a, khang te kha, a tak hi a lo la chhuak chiah lo em ni; umzui a țha ang em?

Tichuan, Agriculture Department chungchang hi tawitea ka sawi duh chu, mechanisation chungchang kha *Zawhna & Chhanna*-ah te khan a rawn lang a. Mechanisation hi a pawimawh khawp mai a; tin, kan mechanization tihah hian tractor leh heng vel ringawt lo deuh hi kan mitthla pawh hi a hun deuh tawhin ka hria a ni. *Insecticide* kan han tih ang chi hi kuta han theh emaw, a nih loh pawhin spray-a han tih vel hi hriselna a tan hian a lo hlauhawm viau ni awm tak a ni a. Ram changkangah phei chuan an duhlo viau. India ramah pawh hian tiang hian an ti nasa a. A hmunin a zir chuan drone hmanga thlai natna hlo han kah te hi a țul tawh hle mai a. Cancer leh eng emaw a tamna chhan te hi, tiang te hi a ni thei ang em, tih te a awm thei a.

Agriculture atana drone pek theihna Scheme hi a awm a, chung te chu kan Agriculture Minister zahawm tak pawh hi ka'n sawi thawi pui tawh a; chutiang zawng chuan han kalpui hi a van țha awm em. Tin, agriculture kan ngaipawimawh a, kan sawi kan sawi a. Agriculture-a beneficiaries 15,000 vel telna, *family-oriented* SEDP-a chhungkaw 60,000-ah khan 15,000 chuang kha agriculture sector-a tanpuina dawng tur an ni a. Agriculture kan ngaipawimawh kan tih laia, khang kan han laksak lawp mai kha chu, a va han fuh lo deuh em! Sorkar hmasa thiltih kha han chhunzawm ni sela, tih kha ka sawi leh țalh duh a.

Pi Chairman, thuhma ka sawi chung kha a rei deuh a, khawngaih takin hun tlemte min pek belh turin kan ngena che. Tichuan, hei healthcare chungchang hi a lawmawm khawp mai a, kan Minister pawh active leh a nachang hre takin a enkawl ni te pawhin a lang a. Hengah hian, Zawlnuam Hospital-ah khuan x-ray building țha tak an sa zo tawh a, x-ray khawl pawh țha tak a awm niin an sawi a. Mahse, technician a awm lova, tin, installation tih loh a la ni a, hei hi min lo chhinchhiah sak hram sela. Tin, Kawrthah CHC-ah khuan an x-ray khawl chu a awm a, technician pawh a awm a. Pu Muanpuia sawi anga fiahlo em em kha chu a ni lo deuh maithei a. Mahse, x-ray a fiah hleithei tawh lova, a pawimawh si a; Khulai khu, a cover area a zau a, chungte chu ka'n sawi

lang ve duh bawk a. Tin, Multi-Speciality Hospital emaw, Cancer Speciality Hospital emaw ADB nena Mizoram Sorkar hmalakna kha chhonzawm zel a ni dawn em, tih te kan zawt pah duh a ni.

Tin, ka department hlui Tourism hi kan sawi leh ang e, Pi Chairman. Tourism department-a hmalakna tam tak a lang tan chho zel hi a lawmawmin ka hria a. SASCI hnuai Thenzawl - Golf Resort, kan Chief Minister zahawm tak biala internal road han tihchangtlunna tur te, Tourist Lodge han tihchangtlunna tura kan hunlaia budget/sum kan lo dah ve kha a kal zelin ka hria a, khang hmang khan engtikah nge hmalak a nih theih ang? Tin, hei, Unity Mall atan crore 127, a tam tham khawp mai, building pakhat sakna atan chuan. (**Chairman:** Minute 2 -in a pel ta e. Zawh tum ang aw.) Central Sorkarin a allocate a, kha kha a takin eng tik nge tan theih a nih tak ang?

Aw le, a tawpna atan chuan, vawiinnia kan Minister pathumte demand hmang hian ramin hmasawna a thlen ngei theih nan duhsakna ka hlan a. Tin, thil tha an tihna kawngah chuan 'theihtawp chhuahin kan lo tawiawm dawn a ni' tih ka sawi duh bawk a ni e.

Ka lawm e.

HON. CHAIRMAN : Aw le, a lawmawm e. Kan Speaker helaia a thut khan a nem viau emaw, kan ti a. Keimahni lam hi thu kan awih lo em a nih hi, ka tia. Tin, warning bell minute 9-a ka'n hmeh khan, kan hmanhmawh dawn emaw tih khan, sawi tur hi kan ngah sauh hian a lang deuhin ka hria. Chuvang chuan, minute 8-ah hian ka rawn hmet ang a, muang-marin minute 2 kha in la nei dawn a ni. Khalaiah khan a conclusion-a pawh kha ngaihtuah tel ula a tha awm e.

Aw le, helaia ka ziah dan indawt hian kan kal ang a - East Tuipui Bialtu, Pu Ramthanmawia ilo sawm ang u.

PU RAMTHANMAWIA : Pi Chairman, ka lawm e. Hei, vawiinah kan Minister zahawmtak pathumte - Pu C. Ngunlianchunga, Pu PC Vanlalruata leh Pi Lalrinpuui te demand kan sawiho thei tur hi a lawmawm ka ti hle mai a.

Demand No. 27 - District Council & Minority Affairs Deptt. hi han sawi lut ila. He department-ah hian, ka hmaa member zahawm takin a sawi ang khan PMJVK hi tunhma chuan district pahnihah chauh hman theihin Central-in min ti a. Nikum 2023 atang khan Aizawl District zawng zawng kha a huap theih tak avangin, Sorkar hmasaah khan state level PMJVK Committee-ah khan min telh ve hlauh a, chuta tang chuan ka bengvar lehzual a. Tiang chuan, ram puma kan mamawhte kha kha Committee-ah khan kan sawi a, tichuan, kan thelut bawk a. Chungah chuan, kan bial atang te pawh theh luh kan nei ve nual a. Tuna kan House Leader, Opposition Leader a nih laia a vei em em, teacher quarter sakna tur te kha kan thelut teh mai a; khaw tinah quarter pahnih theuh sak

theihna turin ka thehluat a. Hengte hi kei pawhina ka ngaih pawimawh, kha Sorkar kal ta ah khan kan pahnih khan kan sawi a, ka hre reng a. A chhan chu, thingtlangah sikul zirtirtu tha tak tak, Aizawl leh hmun dang atang pawhin minrawn pe a, in luah tur an nei lo thin a. In luah turte an zawng a, an hmu lova; tiang khan kum hnih-thum ah chuan an insawn leh nge nge thin a ni.

Hei hi ka vei em em a. Zirnaa hmasawn kan duh a, ram pumin. Eng vangin nge zirtirtu tha kan neih theih loh le, tih hi a ni. Ka hmuhchhuah ve chu, anmahni welfare, hlim tak leh thlamuang taka zirtir hna an thawh theihna tur, chenna tur In kha sorkar khan a lo ngaihtuah ngai vak lo niin ka ring a. Ka han zawt thin a, ka bialah pawh leh-langa Champhai atang a kal te, Zotlang atanga kal te. Khangte tan chuan a ngaihna a awm lo; a bikin furah a tihngaihna a awm lo a ni. Tin, Zirtawp tlaiah hma deuhin an haw a, Thawhtan zingah an lo phei leh a; ni chanve an hmang a.

Chuvang chuan, 'zirna hmasawna tur atan chuan staff quarter/zirtirtu-quarter hi kan neih a ngai a ni' tiin heng PMJVK Scheme-ah hian kan thehluat ve a. Khang te kha entirnan chauh ka sawi a. Thil dang dang, khaw hrang hrangina kan mamawh, thalaite mamawh ang chi, phul lem phanna turte pawh kan telh nual a ni. Heng hi min lo hriatsak se, ram pum, chhim lam leh khawthlang lam ina an hmasawnpui ang chi kha district dangah pawh kan nei ve thei dawn ta te hi a lawmawm a. Hei hi hun kal zelah pawh kan hman tangkai chuan, hmasawna ropui tak kan nei dawn a ni.

Pi Chairman, Demand No. 27 - Vety Deptt. hi; Ka bialah hian Vety Deptt. pathum a awm a, Khawbung-a Mobile Veterinary Unit chiah hian CSS Vety doctor a nei a. A bak Vety doctor kan neih lohna chu, Vaphai leh Khuangleng te a ni. Ran vulh, sial vulh te kan uar em em a, chuvang chuan helai Khawbung-a awm ringawt hi chuan kan indaihloh avangin, Vaphai leh Khuangleng ah hian Vety doctor kan mamawh hle a, chu chu Minister zahawm tak hian min lo hriat sak se.

Tichuan, Demand No. 31 - Agriculture chu kan hria a; kan ram ei leh bar intodelhna tur a nih avangin, kan ngaihven lo thei lova. Kan bial hi Mizoram ah chuan WRC potential nei tha pawl kan ni a, sorkar kal ta ah pawh khan Khuangthing, Khawbung, Vangchhia, Vaphaiah te land development nasa takin min thawh sak a. Tunah hian hmabak kan la nei a, Sesih leilet-zau hectare 60 leh Thekpui rama phaizawl-zau hectare 150 te bakah hmun dangte pawh kan la mamawh khawp mai a. Hei hi kan Minister hian min lo chhinchhiah sak bawk sela.

Tichuan, Demand No. 47 - Irrigation & Water Resources Deptt. hi Agriculture nena inhne tlat a nih avangin, tui a awm loh chuan, buh a phun theih lova. MI project kan tih mai ang kha Phunchawng zau Thekpui ah khian ram hectare 150 vela zau buaipui tur hi kan nei a. Hei hi deptt. lam pawhin anrawn en thin a, an buaipui mek pawh niin ka hria a; survey neih that leh ngai, project siam that leh ngai niin an sawi a. A hmawm

Farkawn a MI project Pumphir-zau nena lo chhuak tura kan ngaih kha, helai Thekpui a mi hi a lo chhuak ta lova. A chhan nia kan hriat chu, a hmunhma lo hriat sual vanga rawn chhuak ta lo niin an sawi a. Tunah hian a changtu Minister hnenah hian ka rawn thlen leh a ni.

Demand No. 24 - Health & Family Welfare Deptt. hi Pi Chairman, kan sawi nasa a. Kan Minister hi kan ring tawh a ni ang, (kan pangchang te pawh a ni ang a) ani pawhin, ‘I bialah ka kal dawn’ a ti a, ka lawm khawp mai a. Ka bialah khian a hmuh chak tak tak tur hi a department chan chhungah hian a awm a, nakinah kan sawi ang a. ‘Mihringte hian engnge kan mamawh ber’ ti ila, mitinin kan mamawh ber chu - *hriselna* a ni. Kan hrisel chuan, engkim hi khawvelah hian huphurh kan nei lo. Mi-hrisel lo tan hausakin awmzia a neilo; retheih pheih chuan a hrehawm leh zual. Chuvang chuan, tun sorkar tharah hian Health Deptt. hi a tlak hniam ka lo hlau a. A chhan chu, sorkar hmasain SEDP hmanga health worker te, nurse te sum harsa tak chung a lo rawiha kan lo kal hram hram kha, ‘engtin nge kan chhonzawm theih ang’ tih aiin, min ban sak nghal rum rum mai a. Health Deptt. chu aikal lak theih pawh a ni lo; mi-nazawngina tih theih pawh a ni chiah lo. Chuvang chuan, ka hlauthawng ru a.

Amaherawhchu, kan Minister hi kan chhuang a, a hnenah beiseina pawh kan nei nasa a. Tha takin hriselna lama kan mamawhte min rawn phuhruk sak ka’n ring a. MLA fund atangin health-worker te pawh kan ruai a ni; FA pahnihte pawh kan lo ruai a ni. Khatianga Sub-Center ah te kan indaih lohna chi angah khan kan MLA fund te pawh kan hmang thin a ni. Chuvang chuan, hriselna chungchangah hian kan Pi hian hma nasa takin a rawn la ang a, SEDP-a kan nurse leh health worker an ban zozaita kha scheme dangte pawhin min rawn tuam sak leh sela. Mizoram pumah SEDP - health worker hi 265 kha an awm a, hei hi rawih chhonzawm an nih tak loh avangin Leisenzo-a health clinic ah pawh health worker kan nei ta lo a ni.

Pi Chairman, Demand No. 43 - Tourism Deptt. hi han sawi leh ka duh a. Kan hriat angin ka bial khi pipute sulhnu hmingthang tak tak tamna a ni a. Kum tin mi thahnem takin kan hmunhma neihte an rawn tlawh thin a ni. Tourism lam tihchangtlunna turin sorkar hmasa hnuaiah khan *Swadesh Darshan 2.0* hnuaiah Champhai leh Aizawl District te’n tourism lama hma an sawnna atan tiin, khualzinte tlawh pawh tur bik - *tourist destination* atan thlan a ni. Champhai District ah pawh a bik takin ka bial khi zofate kan lo thlang-tlakna kawng niin, constituency 40 zingah hian kan pipute sulhnu hmun-hlui tlawh tur tamna ber a ni, ti ta ila, kan sawi sualin ka ring lova. Pi Chairman, Champhai district chhunga *Swadesh Darshan 2.0* hnuaia hmalakna turah pawh hian ka bial khi hmalak nasat ngai ber, cheibawl ngai ber tur a nih ka ring a. Chutiang tur chuan ruahmanna siam a ni tawh em; engtianga ruahmanna kalpui nge a nih, tih te kan Minister zahawm tak hian min react theih chuan a lawmawm khawp ang a.

Tin, ka sawi tel duh chu, Farkawn ah khian Lurh-tlang a awm a, a chhehvel tlang khi Mizoram Tourism tihhmasawna atan potential nei tha berte zinga mi a niin ka ring a. Trekking hmun atan duhthusam a ni a, khaw thian lai phei chuan khawchhak lama Lentlang dung te, khawthlang lamah Mizoram pumpui bakah Bangladesh tuikhuah thlenga lang thei nia sawi thin a ni a, a tlangdung a zauin, a nuam em em a. A hun lai chuan Nauban chi hrang hrang leh chhawkhei par te, tlaizawng par tam takte'n a timawi zual em em thin a ni. Khitah khian khualzin-mite riah theihna tur hmun te siam ila, vei-vahna tur awmze nei zawka han cheibawl chakawm tak, humhalh theih niin ka hria a.

Pi Chairman, chutiang tur chuan Swadesh Darshan 2.0 hnuaiah hian ruahman theih a la ni ang em? Sorkar hmasa khan NEC hnuaiah theh luh turin Tourism Deptt. hnenah *East-end Project* tia theh luh a ni a, mahse, covid khan min tikhaihlak ta a. Tunah hian sorkar thar hnuaiah a remchan dan kawngin hma min han lak sak thei se a duhawm hle mai a, min bawhzui sak theih chuan ka lawm ngawt ang.

Aw le, Pi Chairman, ka zo e. Ka han sawi takte demand kha a vaia sawi a chakawm a, mahse, kan sawi hman lovah min ngaih sak la. Khang demand kan han sawi tak minister pathumte - Pu C. Lalsawivunga, Pu PC Vanlalruata leh Pi Lalrinpuii te demand hi, a vaia pass turin ka rawn thlawp a ni e. Ka lawm e.

HON. CHAIRMAN : Aw le, a lawmawm e. Ni e; khalama han din chuan thahnemngaih a na bawk si, kan speed a inanglo bawk si a; hriatthiamna minute hnih-khat lek kha chu a awm zeuh zeuh lo thei lova. Amaherawhchu, a hun takah zawh tum hram hram ila, kan hnunga sawi tur an la thahnem bawk si.

Le, phar dan indawt zel khan kan ko ang a. Tunah chuan Mamit Bialtu, Er. H. Lalzirliana ilo sawm ang u.

PU H. LALZIRLIANA : Pi Chairman, ka lawm e. Vawiinni ah hian kan Minister pathumte demand sawina hun kan han nei dawn a. Hun hi a limit si a, deptt. pahnih stress nat duh ka nei a; a dang hi chu ka han kal thuk thuk mai ang a.

Nimin khan deptt. thenkhat enkawl nan hian 'corporate culture sorkar hian a adopt a ngai a ni' kan ti a. Vawiinni ah chuan, 'private entrepreneurship hi kan encourage a ngai a ni', tiin bul kan tan ang a. Champhai North Bialtu, Pu H. Ginzalala hi engineer kan zir lai atanga ka roommate a ni a. Ani hi heti lama record nei tha deuh a ni a. Tin, ka chher chhuak tha pawhin ka hria a. Heti laiah House ah kan han awmdun leh te hi a lawmawm danglam ve khawp a ni.

Mizoram-ah chuan, ka thianpain a sawi a, "sorkar inrawlh lohna apiang hi a fel a, a hlawhtling thin; Mizoram-a hlawhtling ber chu - *huau-huau industry*, hei hi vawiin nia la hlawhtling ber chu a ni" a ti thin a, ngaihtuah a ti thui khawp mai a. Vawiinni ah hian

Tourism emaw, Animal Husbandary emaw, Agriculture emaw kan sawi a nih pawhin, he kan private entrepreneurship hi kan encourage loh chuan, a hlawhtlinna tak tak kan hmu lo ang. Tourism pawh han sawi chiam mah ila, a infrastructure leh tourist lodge te, khawi khawiah emaw tourist centre tih te han ti viau thin mah ila, a operate dan tura kha a fel si loh chuan, a hardware ai mahin, a software a hi kan develop a ngai a ni. Tourist Circuit kan siamthat a ngai a, chutah chuan Tourist Operator kan neih a ngai a; tin, khami hip thei tur khatiang zawnga kan lo insiam danglam ve a ngai ta a ni. Vawiinnia kan style ang reng - kan chaw ei dan te, kan bai siam dan te, kan mikhual lawm dan te leh kan room enkawl dan te hi kan improve loh chuan, kan customer-te khan eng ang nge an duh? Chu chu kan target zawk tur a ni a. Chuti a nih loh chuan, heti laiah hian sawi chiam thin mah ila, a tak ram leh hlawhtlinna a hla thin a ni.

Hei, kan Minister duhawm tak Pu C. Lalsawivunga demand hi kan sawi thla leh ang a. *LAD-Park* te kan ti a, hmun hrang hrangah hian kan nei a ni. Amaherawhchu, vawiinah hian enkawl that a awm em? Mamit-ah khuan LAD Park kan nei ve a, kan hawn ni bak kha hmalakna leh han tihchangtlunna a awmin ka hre lova. Tin, hmun hrang hrang ka bial chhungah pawh Lengpui ah te pawh kan nei a, tin, Zoram hmun hrang hrangah kan neiin ka hria a. Hengte hi mumal zawk, a then te chu outsource te pawh a niin ka hria a; revenue earner-ah a hman theih lawm ni? Hei hi Revenue Minister hian rilruah lo hria sela ka ti a.

VC House hi term hmasaah khan kan sa nual mai a, hmun hrang hrangah hian; Hall takngial pawh la neih lohna, VC House te phei chu a la hla a, khang kha kan lo nei nual mai a ni. Amaherawhchu, sorkar hmasaah khan eng emaw zah ka bial chhung hmun riatah kan sa hman a, a lawmawm khawp mai a. Vawiinah hian la sak lohna khaw lian pui pui mai, in zanga-zaruk awmna - Tuipuibari, Damparengpui, Suarhliap, Bawngva, Phaizau te, mihring tamna em em Nalzawl-ah te pawh kan la nei lova. Hengte pawh hi min lo hriat sak turin ka ngen a.

Tin, AH & Vety-ah hian, ka biala Lengte, Nghalchawm te khu vawk vulhna cluster area-a puan a ni a, vawk sangkhat chuang nei farm lian pui pui khu an awm a. ASF a len lai khan kan buai khawp a, kan tuar nasa a, kan buai em em a ni. Mi tam takin an eizawanna an hlauh a, an sum leh pai lo khawl ve tur leh an dreams kha a flop ta vek mai a ni. Tin, chu mai piah lamah hei, Lengpui ramah hian, *Semen Boring Station* a awm a, a hna phei chu 90% zawh tawh an ti a ni. Amaherawhchu, hei pawh Forest lam buaina bawkan tawng a nih hmel a. Kan Minister hian hei hi a hre vekin ka ring a, rang taka min bawhzui saka, a rang thei anga commission tur te pawhin min han tihsak sela a lawmawm hle ang.

Tichuan, Irrigation lam hi sawi ka duh a. Kan Minister zahawmtak Pu PC-a nen pawh hian kan sawi nasa a. Pakhatah chuan, ka'n demand duh a chu, District Irrigation Office Mamit ah khuan kan nei lova. Khumi District-ah khuan Zawlnuam ah, '*chhan loh aiah*

Luka' tih ang deuh, one-man army type ang deuh chu kan nei ve a, chu chu district headquarter pawh a ni lova, khulai khu kan mamawh khawp mai a. Ani nen pawh kan sawi tawh a, “tihdan kan zawng dawn nia” a ti a, ka lawm khawp a; lawmthu ka'n sawi advance te pawh ni sela.

Hei, agriculture hi engkimah irrigation ah te, tourism ah te pawh a pawimawh vek mai a. Hma lian takin kan lo la ve a, kan Minister pawhin min hriatpui a. Mamit Tuidai - *Multipurpose Rain-water Harvesting Scheme* a concept paper Jal Shakti Minister-ah kan zuk thehlut a, chutah chuan nasa takin kan um a. A tawpah NABARD funding turin crore 29.4 tunah hian administrative approval pek tawh leh financial year thara budgetary allocation tih turin a awm a ni. Hei hi ka'n sawina chhan chu – irrigation kan han tih hian a pawimawh em em a ni. A pawimawhna chu, *tuikhuah* kan han tih hi district tin hian hetiang hian practice ah nei ila; he tuikhuah, kum tin ruahtui tha em em kan dawn luang liam hum-hum mai thina hi, a hna pawh nei lo sela, kan lo khuah tlin hrim hrim hian kum khat tling hi tam pem-pawm tak a ni ringawt mai a ni. Tuikhuah (Dam) kan siam hian Rain-water economic activities - horticulture leh agriculture ah a pe dawn a, hei hian ground-water a recharge ang a; tin, ground-water table a ti tam dawn a ni. Tichuan, fisheries atan te, recreational activities atan te, sports activities - boating leh swimming ah te; tin, micro-climatic condition a improve dawn a ni, humidity te a control ang.

Tin, hei hian thingtlang lo nei mite nasa takin a tanpui ang a, thalaite tan employment opportunity a siam bawh dawn a ni. Chuvangin, he resource kan neih that lutuk waviinnia kan la tap lo a hi tih a ngai a, chutiang tur chuan nasa takin hma kan la a. Jal Shakti Minister ah ka kal thla a; amaherawhchu, a lo awl-ai lo khawp mai a. Amah hmuh ringawt pawh a harsa a, kan inhmua min advice chu, ‘a hranpainrawn submit leh rawh; hei hi chu kan purview a ni chiah lo’ a ti a, thil dangte kha kan han kaih pawlh deuh a vangin. Chutiang chuan kan han hawn leh a.

Tichuan, kan Governor hnenah ka tlan a, ka sawipui a, a phur khawp a; lehkha min thawn sak a, chu chu Pu Sekhawat-a hian ni 3th November, 2023 khan a rawn chhang a, “Water Commission, Centre Water Commission, Shillong ah in project hi kan thawn e; i lehkha leh Mamit MLA lehkha VIP reference hi, hei hi in lo bawhzui dawn nia” an ti a. Chu chu Shillong LO-in min lo bawhzui sak a, chutiang chuan Aizawl-ah Irrigation Department khawih turin an rawn ti a. Chutiang chuan department ten survey neiin harsa takin, nasa takin effort kan pe a ni. Kan letter hmasa ber phei chu September, Ni 26 ah he lehkha hi kan thehlut a ni a, Jal Shakti Minister ah chuan a kal a kal a; waviinniah hian a hlawhtlinna kan han hmu dawn hi a lawmawm hle a ni. Hei hi kan Irrigation Minister pawhin a tuipui a. Hei hi district tin tan model tur a ni a, a hlawhtlinna tur hi kan nghakhlel em em a ni. (Minute 10 a ri tep a, minute khat ka'n dil belh lawk ang e, Pi Chairman).

Pi Chairman, Health hi ka'n cover hram duh a, kan Minister zahawmtak hi. Lengpui hi a buaithlak khawp mai a, a thenin 'PHC' an ti a, a thenin 'CHC' an ti a. 'Inspection an rawn kal hian CHC angin min rawn inspect a, a chang leh PHC angin min rawn inspect a' an ti a; tukina ka rawn zawhna pawh kha a ni a. 'Hei hi CHC a ni e' tia min rawn chhang kha ka lawm khawp mai a. CHC atan IPHS norms ah hian minimum requirement hi a tam ve khawp mai a. Heng zawng zawng hi chu thei lo mah ila, tuna kan harsatna zual ka'n sawi duha chu, ministry hmasaah pawh khan ka'n sawi thin a - Airport a ni a, emergency engtiklai pawha tawng thei an ni. Airport ah miin heart attack an nei dawn nge, nau an rawn cheh dawn kan hre lo. Khulai hmun khu a pawimawh a, strategic location a, kan equip a ngai a ni. Minimum requirement, emergency handle thei .. (*Waring Bell a ri a.*) Aw, Pi Chairman, a zo tep; kan thenawm tur i nih kha. (**Hon. Chairman:** Minute khat chauh min dil a, a zo tawh a nia. Dil loh inpek chu har deuh mai ania aw) Ka zo tep e; ka'n zo law law ang e.

Khulai khu hmannah Company, Hindustan Petroleum ka thawhna hlui atangin X-ray khawl leh Ambulance kan pe a; thildang mamawh hi an la nei nual a ni. Manpower chungchangah hian an in daih lo khawp mai. Khulai khu kan House Leader zahawm tak pawh hian min hriatpui se la a pawimawh a. 'Khulai khu *emergency situation* handle thei tura kan equip a ngai a ni' tih lai hi uar takin ka sawi duh a.

Tin, Mamit Dist. Hospital hi a thuphungin kan han hawng a, nikum chho ah khan. Amaherawhchu, la zawh fel chiah loh a ni a. Contractor te, deptt. leh ministry lam pawhin nasa takin min lo pressure sak ula kan duh khawp mai. Zawh tur tlem te a la awm a, zawh fel ni sela kan duh a ni. Tin, manpower indaih lohna hi a nasa khawp mai a, a bik takin Group-D leh Nursing lam hi kan indaih lo zual a ni. Hengte hi Mamit Dist. Hospital - *aspirational district* kan nihna chhan hi health-parameters a kan hniam vang a ni. Khu khu kan neih chhun a ni a, a theih ang ang a min develop sak turin ka duh a. Power Finance Corporation (CSR) atanga khu hospital khu sak a ni a. Anmahni pawh hian thil hrang tam tak - dialysis unit te, ICU te pawh min la provide an la tum a. Company dang atang pawhin CSR kan la beisei a ni. Chutiang chuan, Health Minister in min lo hriatsak se, a theih ang angin, khulai pawh a hova zuk tlawha, zuk chian kan duh khawp mai.

Vawiinniah hian hun min pek belh avangin ka lawm a, Pi Chairman. Kan Minister zahawm tak tak pathumte demand hi kei pawhin ka thlawp a, pass ngei turin kan thlawp e. Ka lawm e.

HON. CHAIRMAN : A lawmawm e. Tuichang Bialtu kha a phar a. Amaherawhchu, kha, a lo chhuak hman chiah a ni awm a. Tunge sawi leh ang? Pu VL Zaithanzama, Aizawl West-III Bialtu ilo sawm ang u.

PU VL. ZAITHANZAMA: Pi Chairman, ka lawm e. A hnuhnunga sawi pawh hi a lo hahthlak tho mai.

Aw le, kan Minister zahawm tak tak pathumte demand, department 10 zet kan sawi dawn a ni a; kan luhkhung thuk hman dawn lo tih erawh chu a chiang sa a. A hmasa berin Demand No. 37 - Co-operation hi kan thlang hmasa tlat teh ang.

Co-operation hi kan hmuh dan hi a dik lo emaw aw ka ti a. Lawmna tur leh lawm lohna tur ka nei a. Thlaithar sorkarin a thlan bikte buaipui turin Society te hman an nih tur thu sawi hian min ti lawm em em a, hetah hian Co-operative Society te pawh hi tel turah ka ngai a. Tin, PACCS - Primary Agriculture Credit Cooperative Society te phei hi chu anmahniin loan te pawh pe chhuak thei khawpa inbun nghet tawh an ni a, an hmantlak dawn em em a. Tin, society dang pawh hmantlak tak tak an awm dawn a ni. A thar an awm lohna hmunah erawh chuan din an ngai ang a.

Chutiang taka tangkai tur department nia ka hriat lain, an budget hi 8.59% zet in a tlahniam a; han pung ve deuh se ka tih teh lul nen. Term hmasa kum 5 chhung khan kum tin mai hian an minus deuh ziah mai a, kum khat bak kha an plus lovin ka hria a; ka hresual lo ang a, ka dinchhuahpui deuh ziah avangin. Chuvang chuan, hmundang atangin tanpui an ngai dawn hlein ka hria a. A chhan chu, nu angah he department hi han tehkhin ila, fa hrin tam tak a nei a ni. A department a hi kan va chawi lar viau lo a nih pawhin, a fa hrin - Mizoram Cooperative Apex bank te, MIZOFED te, MULCO te, PIGFED te, sawm dawn lai leh primary society 1000 chuang enkawla, tlawha, audit statement te siam tur hian paper ringawt pawh an mamawh tam em em a ni. Tunah phei chuan society tam tak a din belh dawn a; chungho enkawl tur chuan he department baka rintlak hi an awm dawn si lova. Chuvang chuan, an budget hetia han tih hniam hi kawngdang atangin kan hliahkhuh leh thei em turah ngai ila, tih te kha kan sawi ve duh a.

Nichin khan *Primary Agriculture Credit Cooperative Society* kha an sawi a. Hetia han en maia awm-ang lo taka lang, thlaithar lei chungchang leh buaipui turin Consumer Society te pawh hi hetia han ngaih mai chuan, a inhmeh vakin a lang lova. Mahse, pawl nung tak, kum eng emaw zat dawrkai thei an ni a, an rintlak em em a ni. Mahni chhungkua pawhin dawr hi kan kai a, eichawp dawr pawh ti hleithei lo hi kan awm a ni. Amaherawhchu, member 20-30 tangrual hoa dawrkai thei, rintlak zet anni, tih te kha ka'n sawi tel duh hram a ni.

Demand No. 31 - Agriculture-ah hian ka'n lut leh ang e. *Agriculture Market Assurance Fund Management Board* din a ni hi lawmawm ka ti a. Hei hian hlawk zawka kut-hnathawktute an tharchhuah hralh leh sawngbawl bakah a man tur bithliah thlengin a buaipui dawn niin ka hria a, State pawn thlenga sumdawnna kalpui turin hma a la dawn a ni. He Board hnuaiah hian crore ₹110 lai dah a ni bawk a. Chuvang chuan, hei hi

Agriculture Department hian thatpui hle turah ka ngai a. Agriculture han sawia ka rilrua lang ziah chu, leilet siam theih tam tak kan neihte kan siam hlei theilo hi, engnge a chhan ka hrethiam lova. Tawngka hi chuan kan duh vek mai a, hma hi kan la tak tak lo deuh em ni aw, ka ti a. Leileta siam theih Mizoram-ah hectare 74,644 laia zau a awm a. Tuna kan siam theih chin hi hectare 17,000 chauh a ni a, hmun 1/4 pawh kan la siam thei lova. Leileta siam theih zahve tal te hi chu han siam ila chu, kan buh-bal tharte pawh hi a kang sawt turah ka'n ngai deuh a ni. Kum 2011 census-a mihring awm zat atanga chhut hian, buh kan mamawh zat hi mt 1,80,000 lai a ni a. Kan mamawh hmun 1/3 vel tunah hian kan tharchhuak thei hram a. Chuvangin, leiletah hian kan in concentrate (nichina ka member-puite sawi ang khan) a tul tak zetin ka hria a ni.

Demand No. 47 - Irrigation & Water Resources Department erawh hi chu ka sawi lo ang a. Ka rilrua awmdanah chuan, agriculture hlawhtlinna kawng pakhat chu, *irrigation* hi a ni a, thawh tlan tlat a ngai a. Chuvang chuan, Agriculture nen hian department khatah awm ta sela hna hi a kal chak zawkin, a inkhuangrual tha zawk ang, tih te ka ngaihtuah a ni.

Pu C. Lalsawivunga Department chan, Demand No. 34 – AH & Vety Department-ah hian kan lut ang e. Department pawimawh tak a ni a, mipuite sa thianghlim leh hrisel min pek te, bawngnhute leh artui hrisel ei tur min pek te hi an mawhphurhna a ni a. Vawiinah pawh artui present kan dawng a, lawmthu kan hrilh nghal nghe nghe teh ang; Kan lawm hle mai. Ran chaw tha leh man tlawm ran-vulhtute chhawp chhuah sak te an hna thawh a ni a. Ran chaw siamna Animal Feed Plant hi Ramrikawn-ah dinin nitin quintal 100 chuang an siam chhuak thin a. Tunah hian kan mamawh khawp ni lo mahse, hma an sawn zel turah ngai ila. Agriculture Department leh AH & Vety hian thawh hona tha tak an nei a, Agriculture Deptt. hnuai Focus Cell nen thawhhona tha tak neiin hma an la ho thin a ni.

An hmalakna pakhat lawmawm deuh chu - Kishan Credit Card (KCC) ran vultute tana loan a pung tlema an hmuh theihna tura an pui thin hi a ni a; an pui zel turah ngai ila. Mi 8113 ten loan hi an hmu tawh a, a pung tlemin; ran vulha eizawngte an pui thin a ni. Nichina kan sawi Co-operative Department te nen pawh khan an la inzawm hnai a. Co-operative Department hnuai MULCO te, PIGFED te kha Vety hian an enkawl thung a, a inkungkaih kual vek a ni.

Demand 33 - Art & Culture. Kan pipute nunphung chawinun leh tihlar te, mizo-thuam, bungrua leh hmanraw vawnhim te buaipuitu a ni a. Mizoram state Museum te, Mizoram State Archive te, Mizoram State Library te an enkawl a. Pipute hmun-hlui vawn that te an buaipui bawka ni. Kumin Budget-ah khan lawmawm tak mai, nichina an sawi, 'Lunglei lamin pawisa *Chapchar Kut* hmanna an hmu tlai' tih ang kha awm tawh lo turah ngai ila. Hei, nuai 100 zet kumin budget-ah kan hmu a, lawmawm ka ti hle a ni.

LAD - Demand No. 19 ah hian ka han lut leh ang a. District 9-a Village Council 532 an enkawl a, anni hi Aizawl-a awm te'n chuti takin kan va hre viau lo nangin, Village Council House te deptt. hian a sak sak thin a, a hlui te a thawm tha a, an hnathawhna tur hmanrua computer set te a pe thin a ni. VC 243 lai computer set an pe tawh a, tunah hian computer set leina tur sum lakh ₹268 zet an ruahman leh mek a ni.

Pi Chairman, Healthcare Bill eng emaw zat pek a han ni tur te hi lawmawm ka ti a. Thil pakhat chiah - Kan Health Minister zahawmtak leh hnathawh taima tak kan nei hi lawmawm ka ti a. Health Minister hmalaknain Shri Sankar Heart Foundation, Chennai leh Mizoram Sorkar tangkawpin lung thalo tan a thlawna inentirna ZMC-ah February thla khan an buatsaih a, lawmawm ka ti a. Damlo 300 lai mai an inen tir hman a, lung zai ngai mi 130 an hmuchhuak a, a hmasaa zai ngai zual 50 a thlawna enkawl zui turin thlan chhuah an ni a. Damlo te'n kal man chiah an intum ang a, a bak chu a thlawnin enkawl an ni dawn a ni. He hmalakna hi a lawmawm ka ti a. Lung thalo an lo tam hle mai a, tang sauh sauh turin ka ngen a ni e.

Pi Chairman, kan Minister duhawm tak takte demand kan sawi takte kha, ka thlawp a, pass ngei turin ka han dilpui a ni e. Ka lawm e.

HON. CHAIRMAN : A lawmawm e. Nichina ban phar kha a la valid turah ngai ila; anni hi chu chairman-neitu kha ani deuh hrim hrim bawk a, hrethiam tlang ila. Tuichang Bialtu, Pu W. Chhuanawma ilo sawm ang u.

PU W. CHHUANAWMA : Pi Chairman, ka lawm e. Vawiin Demand kan sawi tur ho zingah Demand No. 19 - Local Administration lampang hi han sawi ka duh a.

Hei, Khawzawl-ah hian LAD office hi hawn thuai a nih loh chuan, staff pahnih kan nei tih pawh hi kan lo hre miah lova. Chapchar Kut khan Khawzawl-ah ka han zin chho a, tah chuan staff 2 kan neih te kha ka thlennaah an lo kal a, 'Khawiah nge in awm' a ka ti a; 'Champhai-ah attached-in kan awm e' an ti a. Chu chu an hming han sawi lawk ka duh a - mipa leh hmeichhia an ni a, pakhat hi Augustine Lallungmuana, Technical Assistant cum Data Entry a ni. Pahnihna hi Runremsangi a ni a, hei hi nula nge nu, ka hrechiang lova, District Programme Manager a ni a. Ka sawi thin ang khan thawktu chu kan lo nei reng mai a, pahnih chu. Amaherawhchu, khilailah khian inbunna tur a awm lo a ni ang, 'dawr ruak nghak ang kan ni e' ka tih kha. Chuvangin, LAD hi tihchangtlun thuai ka han ngenin, kan Minister hian min lo chhinchhiahsak sela kati khawp mai.

A dawtah chuan, Demand No. 34 - Animal Husbandary & Veterinary lampang hi han sawi ka duh a. Hei, Sial hi Mizote'n kan pipute hunlai chuan hausa leh mi-khawsathei an tehna pawimawh tak a ni a. Kan bial, khawchhak lamah khian, Champhai lamah te pawh a ni a, sial vulh an uar em em a ni. Sial hi an ngaihluin, a vulhtute khian an phurpui em em thin a ni. Nikum khan Riangtlei-ah ka han kal a. Riangtlei te,

Vangtlang te, Tualte te khian Sial 300-250 inkar an vulh a ni; an vulh tam khawp mai. Chutiang chuan an phur em em a ni. Nikum khan zan khat riak turin Riangtlei-ah ka han kal a, sial vulhtute zinga mi pahnih hian thubuai an lo nei a, an inhnial nasa mai a. An thubuai chu - An sial hming phuahah khan an lo intibuai a, ‘*Baryl-i*’ tih hi an phuah ve ve a. Kan hotu senior te’n an thu kha ngun takin an ngaihtuah a, an rem ta a. ‘Ka phuah hmasa zawk’ an ti a, an inhnial nasa mai a; a phuah hnunhng zawk ni ngeia an hriat kha, “nang hi, i phuah hnunhng zawk bawk a, ‘*Vanneihsangi*’ ni mai rawh se” an ti a; chung te chu a ni a, an pui hlawm khawp mai a. Khatieng khan, sial vulh te khi an phur em em a ni.

An sial khi, ‘engtin nge, in hralhna a tha em?’ tiin ka zawt a, ‘khawchhak atanga kawl bawng a lo luh loh chuan kan hralh tha thin khawp mai,’ an ti a ni. Chuvangin, ka ngaihtuahna a kal thui khawp mai a. Thawnchhuah hi thei lo mah ila, intodelh tal hi tum ila; khawchhak lam atanga lo lut turte, phai lam atanga lo lut turte lo luh ngai lovin bawngte, sial te; sial sa pheih hi chu a hrisel tha a, ‘hengah te hian intodelh tal ila a tha awm mang e’ tih te ka ngaihtuah a. Cheng 100/- hi cheng 1000/- a siam a har miah lova, mizo leh mizo zingah kan hman zela vawi 10 kan hman chuan, cheng 1000/- a ni mai. Kawl bawngte, phailam bawngte kan lei loh chuan, kan intodelh a ni mai. Chubak chu a ngai teh chiam hian, a chang chuan ka hre lo thin a ni. Tin, khilaia bawng vulh leh sial vulh tam bawk ate khian harsatna an nei a. An ran tlatna te barbed wire-a hung an duh khawp mai a, tin, nunna nei an ni a, mihring ang thovin tui in tur an duh a, chungte chu dah sak a pawimawh em em a, min lo hriatsak se ka duh khawp mai.

Tin, Demand No. 31 - Agriculture ah hian, phai leileta siam tur te, zau beihpui kan thlak tur zawng zawngte kha kan hre vek ang a, sawi tam a ngai lem lovang. Link Road awmsa te hi PCC a nih loh chuan, loneitute tan furah kawng a hrehawm em em thin a, hengte hi ngaihpawimawh a ngai a ni. Tichuan, Khawzawl hi District Capital a lo ni ve a, tih changlung a ngai khawp mai.

Demand No. 24 - Health Department ah hian, damdawi-in, doctor leh nurse te kan tlachham em em a ni. Tin, kan Medical Officer khian motor a kawl ve pawh nam nun chawp ngai a ni a, ngaihtuah sak a ngain hle mai. Health Clinic Vengthar-ah te, Hmuncheng khua ah te, Neihdawn ah te kan nei ve a, amaherawhchu, a thawktu mihring an awm lova. Chuvangin, hriselna lamah hian thingtlangah kan hnufual em em a ni.

Tin, medical equipments, X-ray khawl te, nichinah Pu Muanpuia sawi ang khan langfiah thei chin khup leh ke te hi, eng khawl ki inbar nge tih tur khawpa lawk lel chin lo hi chu a fiah thei lo reng reng. Ultrasound te pawh hi BADP suma lei, hmana mi tawh kha a ni a hmantlak tawh lova, Endoscopy te pawh chutieng tho chu a ni. Pi Chairman chuvangin, Khawzawl Damdawi-in hian hna tak tak a thawktu thei lova, chuvangin hengte hi min ngaihtuah sak sela ka duh a.

Tin, Tourism lamah hian, Khawzawl-ah hian Tourist Lodge a la awm lova, district-a Tourist Lodge neilo awmchhun kan ni awm e. A in chu an sa zo tawh a, contractor hian department-ah a hlan duh tlat lo mai a. Kan zawt Chiang a, a hna thawktu contractor hian GST a phut a ni awm a, 'kan pek tur a ni hlei nem' tiin an inhnial a. An sak zawhna chu 2019 emaw vel daih tawh kha a ni a, tunah khian luah lohin a thing reng mai a ni.

Tin, tourist hipna tur potential nei tha ber kan ni awm e ka ti a, kan distrcit hi. Khawhai ah khian a changtu Minister Pi Rinpui hi lo kal ve ngei turin kan sawm duh nghal a, a mit ngeiin hmu se ka duh a. Khawhai khaw hlui ah khian kawm rem deuh mai a awm a, chutah chuan mi lu an lak tawpna hmun a awm a. Tin, chulo pawh, kristian hmasate, Lal hian a tiduhdah em em mai a; tlemte an awm a. Chawlhni ah ngei khan an lote a hal tir thin a. Pathian hnathawh nge ni, tichuan Khawhai khua kha a kang ta vak mai a ni. Khatiang khan, kan Pathian hi Pathian-nung a nih zia lanna hmun te a ni bawk a, Khawhai khi. Tichuan, a kang zo mai dawn a. Pu Saiduha an ti a, Kristian ringtu, an chhek-inah khan a tlan lutin a tawngtai a, tichuan, an buhzem kha a him ta a, Khawhai pawh a him phah ta a ni an ti a ni. Tin, dil mawi tak a awm tel bawk a, chung te pawh chu han tuaihnum ta ila, kan thenawm state-a kristiante pawh hian Pathian nung leh setana inbeihna hmun te an rawn hmu ang a. Chutiang chuan hnam dang zinga han sawi turte a awm a, Luka ziak nena han tang tur kan House-ah hian kan nei tha em em mai leh nghal a, chungte chu min hriatsak turin ka ngen e.

Tichuan, he Minister pathumte demand hi ka thlawp a, kal zel turin leh hlawhtling ngei turin duhsakna ka hlan bawk e. Ka lawm e.

HON. CHAIRMAN : A lawmawm e; hun pawh a hmang pelh thui vak lo e. Tunah chuan Pu K. Laldawngliana, Tuirial Bialtu MLA ilo sawm ang u.

PU K. LALDAWNGLIANA: Pi Chairman, ka lawm e. Vawiinah kan Minister zahawm tak tak pathumte demand sawiho thei tura hun tha ka nei hi ka lawm hle a ni.

Minister zahawm tak Pu C. Lalsawivunga Demand No. 23 - Art & Culture Department hi ka'n sawi hmasa ber duh a. Kan hriat angin Mizo nun zemawi leh lamte engkim mai kan zia rang enkawltu department a ni a. March Ni 1 khan Chapchar Kut hlim takin kan han hmangho kha a ni a. Chutianga sum hman tur tun tumah 100 an han dah hi department hotute tan pawh a lawmawm hlein ka ring a. District dangte pawhin hlim taka an hman theihna turin hei aia sang hian kum lehah chuan dah belh beisei ila a tha awm e.

Tin, he department hi kan duhsak hle mai a. Department-a thawktute pawh an indaih lo bawk a, a sang deuh a nih ka ring a, nikum khan salary-ah 892.85 a awm a, tun tumah hian 1,068.24 kan dah a; a inthlauhna hi 175.39 a ni a, ka lawmpui hle mai.

Demand No. 19 - LAD hi, hei department lian tak, lar tak thin kha a ni a. Mahse, vawiiinah chuan kan sawi ang khan RGSA Scheme hi an khawi deuh ber tawh a ni mai a. Chutah chuan keini bial hian lawmthu kan sawi duh a. Sorkar hmasaa VC House kan la neih miah lohna thingtlang hmun - Mualkhang te, Lungmuat te, Zanlawn te, hengah te hian VC House tha tak min sak sak a, lawmthu kan sawi duh a. Tunah hian VC House kan la neih lohnaa dilna kal mek hi min lo chhinchhiah sak sela, Khamrang leh Nisapui te hi an ni.

Demand No. 34 - AH & Veterinary hi department pawimawh tak a ni a, amaherawhchu, kan indaihlo a ni, hnathawktute doctor-te. A chhan chu, Mizo khua hrim hrimah hi chuan kan thiam zawng tak ranvulh leh eng engemaw tal hi kan ti thin a, Aizawl-ah pawh kan han sawi thin a; thenkhat chuan Ui-vulh te hi kan thiam khawp ta mai a, khatiang khan hun kan hmang thin a ni a, private clinic pawh tam tak a awm tawh a. Ka han sawi duh taka chu - kum kaltaah khan block hrang hranga kan hmuh thil tha deuh mai chu - doctor kha an indaih si lova, chutah chuan vety doctor min pe ta theuh a; mobile van, emergency operation pawh neih theihna chi ang kha, khang kha minister-in lo chhinchhiah sela. A bak khaw tam takah khan mamawh avangin, kha scheme kha la tihbelh theih a ni ang em?

Tin, ranvulh chungchang hi inzirtir uar deuh a ngaiin ka hria a. Kolasib District-ah tunah khuan a duhte tan ranvulh inzirtirna tur advertisement te an chhuah mek a, khungte khu a tha ka ti hle mai a. Rante hi pawngpaw vulh ringawt lovin, system deuha vulh hi chuan a hlawk thlak a ni.

Tin. sa thianghlim ei turin department-in uluk leh zuala a check hi a pawimawh hle mai a. Tin, kan Vety doctor-te indaihlo hle mah sela, office-a thu turte bakah khan, field lama kal tur an awmbelh thei em, tih kha lo enzui atan ka'n sawilang tel duh bawk a ni.

Minister zahawm tak Pu PC Vanlalruata chan Demand No. 31- Agriculture hi, hei, kan Minister kaihhruaina hnuaiyah *Agriculture Marketing Assurance Fund Management Board* din a ni kha a lawmawm khawp mai a. Ban-kaih policy kalpuitu tur an ni a, kan sawi ang khan - hmarcha, sawhthing, aieng, hmunphiah lei tur department te an ni a ka lawmpui khawp mai a. Tha takin, dik takin an kalpui ngei pawh ka beisei a. Chuta ka'n sawi duh chu, PMKSY hnuaiyah ah khan water harvesting structure kha mi 605 pek tur kha a ni a. Tin, RKVY Scheme-a solar cold storage siamna tur scheme 16 tender fel tawh a ni a, a bak kha hmalak chhunzawm tur anih ka beisei a. Ka bial chung Thingdawl-ah khuan alu (potato) bika intodelhna tura a tihpunna tur tissue culture kha tihfel vek tawh a ni a. Kan Minister pawh kan hrilh tawh a. Hei hi a hma lama commission a nih theih ngei kan beisei a ni.

Demand No. 37 - Cooperation Department, hengah hian kan vanglai, kan thatlai zawng zawng kan hmang zo a, kum 15, chairman term 3 leh Vice-Chairman term 1 hun ka

hmang a. Hei hi ka sawi duh a, tun tum budget hi ka'n thlir vang vang a; 2023 khan 1,659.29 dah a ni a, tun kumah hian 1,516.74, 142.55 in a tlahniam leh a ni. Kan ngaihsak tawk lo hle mai. He department hi a pawimawh em em mai a, a hnuaia Mizoram State-Level Society Board hrang hrang 10 chuang awmnaah hian mahni intodelh deuh vekin, tin, sawrkar ah pawh chhiah an pe lut thin a ni. Chutiang department chu a ni a. Tichuan, Mizoram Cooperative Development Council pawh din vek tawh a ni a, hei pawh hi a minister-in min lo chhinchhiahsak se la, a nih ang takin min kalpui tawh se a thain ka hria. Tin, Bana-kaih policy ah khan hei, Cooperative Society kaltlangin kan ti a, society in ti ringawt a; Cooperative Society hi a hmantlak a, a rintlak a, khaw tinah kan awm a ni tih kha ka sawi belh duh bawk a ni.

Kan Minister zahawmtak Pi Lalrinpuii chan, Demand No. 24 - Health Department-ah hian sawi tur a tam khawp mai a. Mihringte kan thih kan dam leh a tul pawimawh zawng zawng min enkawltu a ni a. Tunah hian doctor te, health-worker te kan indaihlohna chu kan sawi fo tawh thin a. CHC 16 leh PHC 45 kan nei a; kha, Health Clinic 235 tihtawp a ni tawh bawk si a. Private Hospital hi kan hriat angin 27 sawrkar hriatpuinain a awm bawk a. Heng hi uluk leh zuala kan enkawl hi a tul hlein ka hria a ni. Chutih laia lawmawm em em chu, Healthcare bill hi a ngaih pawimawh awm a, chuta tan chuan sawrkar hmasain ruahmanna a lo siam tawh, kalphung thar a ni berin ka hria, helai hi; Asian Development Bank Atanga loan crore ₹1,000 lak tur chungchangah 'June thla velah agreement ziah tur' tih awm kha a lawmawm hle mai a. Hei hi minister leh sawrkar chungah pawh lawmawm ka ti hle a.

ZMC hi a sawiloh theih loh a. Doctor tam tak kan neih phahna tur leh kan indaihlohna phuhruktu tur zirlaite awmna an ni a. Medical Council of India khan nikum June, 2023-a a recognize atangin kum khat chhung tih kha a ni a. Kumin June hian inspection neih a ni leh dawn tih kha kan hriat tawh vek ni mahse, ka sawilang tel leh duh a. Hei hi a pawimawh khawp mai a, inspection-ah kan tla ang tih ka hlau khawp mai a. Hei hi uluk lehzualin kan Minister ten lo enpui a tul hlein ka hria a ni. Staff leh society chungchang kha chu in chhinchhiah tawhin ka hria a, sawinawn tawh lo mai ila. Staff chungchang kha chu min ennawn sak turah ka ngai a.

(Hon. Speaker-in Chair a la a.)

Pu Speaker, kan bial chhunga Rasdali leh Dilzau ah khuan damlo inentirna tur a awm miah lo mai a; khu khu a hranpa a zu kal a ngai a, mmihring tam tak an awm bawk si a. churang chuan hei hi min lo chhinchhiahsak turin ka ngen bawk che a ni.

Demand 29 - Social Welfare Department hi; he department hi a lianin, a pawimawh khawp mai a; nausen, a nuin a pai lai atanga a tar thlenga enkawltu hi a ni a. Chu mai a ni lova. Hei, a bikin keini bial ah phei chuan sawrkar hian kan enkawl pawimawh deuh mai - Sethawn Jordan Center, Thingdawl VC huam chhungah a awm a. Kan Minister

zahawmtak khan nichin khan a sawi a, Inrinni ah min tlawhsak dawn niin kan hria a, a lawmawm ka ti khawp mai. Hei hi ruihhlo ngaite enkawlina thla 2 course ang a ni a, changtlung zawk - after care hi ka ngaipawimawh khawp mai a, hei hi hma min lakpui turin ka beisei a ni. Tichuan, tar-pension, 100/- atanga 1000/-a tihpun hi la awmawm ka ti a, tin, mitthi ruang phurhna tura ruahman thar te kha a lawmawm ka ti tak zet zet a ni.

A tawp berah chuan, Demand No. 43 - Tourism Department hi. Mizoram hi tlangram nuam, zalen bawk si, boruak nuam bawk si kan ti a, tourist hi kan hip tawk theilo deuh hlek a. Hei hi kan Minister zahawmtak hian a tui khawp mai a, Delhi kan zu training ho khan a sawi a, kei aiin sawi tur a lo ngah daih mai a. A lo tui viau mai a, ka lawm hle mai. Ka bial chhungah eco-tourism sak chhoh mek a ni a, Khamrang ah khuan. Hei hi a nih tur ang, a project ang takin min vilpui se la.

HON. SPEAKER : Khawngaihin. Hei dar 4 a lo ri ta a, kan second session hi a tawp a hun a. Nge, kan chhunzawm ang a, dar 5:00 pm emaw 5:30 pm ah emaw break kan ti dawn em ni ang? (*House-in chhunzawm a remti a.*) Aw le, sawi chhunzawm rawh le.

PU K. LALDAWNGLIANA: Pu Speaker, ka lawm e. Tourism Department-ah hian kan Minister-in min lo chhinchhiah sak atan ka duh chu, thalai rualte eizawmna tur atan tourist lo kal thin hote lo guide tura mithiam training chhuak tam tak an awm a, hengho hi ngaihsak ni se.

Tichuan, kan Minister zahawmtak pathumte demand hi ka support e. Pu Speaker, ka lawm e.

HON. SPEAKER : A lawmawm e. Tunah chuan Lunglei North Bialtu, Member zahawm tak Pu V. Malsawmtluanga ilo sawm ang.

PU V. MALSAWMTLUANGA: Pu Speaker, ka lawm e. Kan member duhawm tak tak te, minute 10 reiloh zia hretute kha kan ni a, ka han lut deuh mawp mawp ang a. Chutih rual chuan leiba tam tak chhawm sawrkar kan ni a. Tunah kei ngei pawhin ka sawi turte, ka vei zawng tlema zawng ka rawn thailan turte pawh hi tih nghal vek, kan Minister duhawm tak tak te, kan House Leader pawhin a duh ngei ang. Amaherawhchu, tih nghal vek tur atana strong tak leh na taka rawn nawr ka ni hran lova; chu chu ka han sawi hmasa duh a ni.

Awle, Health & Family Welfare Department lampang hi han luhchilh ta ila. Ni e, kan hriat theuh angin Lunglei, '02' lam kha kan ni a. Lunglei khawpui saw chhim lamin kawng engkima kan neih hmanrua, hospital thleng pawha a chhawr ber kan nih avangin, wawiinniah hian a sawilan loh theihloh a. Tun dinhmunah hian Civil Hospital Lunglei hian radiologist hi kan neilo niin a lang a. Chu mai piah lamah heng, radiology

exam result te hi vairamah thawn thin niin, pawisa te pawh chawi thin ni awm tak a ni a. Hengte pawh hi kan Minister chak tak leh duhawm tak hian min lo hriatsak ta se. Tin, kan ENT doctor hi ZMC lamah hna a hmuh avangin a phei ta niin kan hria a, tunah hian ENT doctor kan nei lova, heng te pawh hi ka han thailang duh a. Tin, Lunglei Civil Hospital ICU saw tun thlening staff mumal kan la nei loh avangin, a nihna tur anga hman a la ni lo deuh a. Heng te pawh hi he House zahawmtakah hian ka han thailang duh a.

Lunglei Health Department staff-quarters saw tun hma, state kan nih tirha mi kha a la ni a, Assam-type vek a ni a; sawlai Health & Family Welfare hnuai Civil Hospital-a thawkte chenna quarter a ni a. A then phei saw chu fur lai pawha awm hrehawm khawp te pawh ni tawhin a lang a. Hengte hi kan Minister te leh kan House Leader te ngei pawh hian min lo hriatsak turin ka duh bawk a. Chu chang a ni lova, Trauma Care Centre a building ringawt sak zawh te pawh saw tunah hian thawktu an la awm loh avangin, building ruak te pawh a la ni hrih a; saw te pawh saw min ngaih pawimawhsak se ka duh a. Tin, Oxygen Plant lian tak mai kan nei a, a lawmawm hle mai a. Minute 1 ah litre 1000+ siamchhuak thei kha a ni a. Chutih rual chuan current a heh khawp mai a, saw sawn. Chumi a nih avang chuan, hman ngam mang loh te pawhin a awm niin a lang a. Hengte pawh hi min lo hriatsak ta se.

Hei, Health Department hnuai ah hian Mizoram dung leh vangah doctor indaihlohna a nasa em em mai a; kan Health Minister-in nakin a windup hunah min lo chhang thei se, heng kan doctor senior leh experience nei, fel tak tak leh duhawm tak tak te hi Administration Directorate lamah hian engzat nge tunah hian awm mek, tih te kha rilruin a han zawt deuh bawk a. Tin, helai bial mipuite aiawha rawn din takah chuan, bial lampang kha kan hawi lo thei lova. Urban & Health Wellness Centre, Pukpui hi 2023 (nikum lam mai a nih chu) khan hawn a ni tawh a. A tirah doctor-in min rawn hmui a, chutih rual chuan tunah hian a contract te a to avangin, doctor te kan nei ta lova, hengte pawh himin lo hriatsak ta se. Tin, Pangzawl hi kan hriat angin, ka bialah chuan vote tamna ber, '*khawlian ber*' te pawh ti ila, kan sawi soal lo ang a. Tin, tunah hian khilai khua chheh velah pawh kawng hrang hrangah pan khawm thin a ni a. Khilai PHC-ah khian X-ray khawl te pawh kan la nei lova, hengte chu min lo hriatsak ta se.

Tin, chumi piah lamah Bualpui-V leh Ramlaitui te, a bikin ka han sawi duh a, Health Sub-Centre tha tak mai kan nei a. Chutih rual chuan khilaila thawktu staff te, khawpui atanga rawn kal te awmna tur quarter mumal tak kan nei tlat lo mai a. Hengah te pawh hian harsatna kawng hrang hrangin kan tawk a, khangte pawh kha min lo hriatsak ta se, kan Minister duhawm takin.

Tin, Tourism lamah hian han lut ta ila. Kha, ka hmaa member duhawm tak takte khan an rawn sawi tawh a, an bial chhungah tourist spot tur tha tak tak a awm thu te. Tin, Chapchar Kut hman chungchang kan member duhawm tak Pu Lalmuanpuia khan a

rawn sawi tawh bawk a. Chapchar Kut kan hman leh tura hi, a ropui ber Aizawl-a hman thin hi, Leitlang khawpuiah sawn hman kan rawt ve ringawt a ni; kha kha kan Tourism Minister khan min lo hriatsak ta se la. Tin, Ramlaitui-ah hmun nuam em em mai kan nei a. Tlang chhipah ‘Rih Dil Note’ te pawh ti ila, tlangchhipah natural dil nalh tak mai a awm a ni. A hmuna thlen pawhin dam sawng sawng theihna tur kha a ni a, a awmna lai tak erawh chu ka sawi lo ang a, bial dang hian min it ang a, bial danga sawn te an rawn rawt mai ka hlau a. Sawlai hmuna saw tourist spot atan senso ngai tam tak a ni lova. Hei hi min lo hriat saka, engtik niah emaw te chuan project kaltlanga Mizoram sum atang kher lo, Central sum atang tea hailutin min lo ngaih pawimawh sak theih chuan min lo hriatsak ta se, kan Minister duhawm takin.

Tin, Agriculture lamah han lut dawn ta ila. Kan bial chhung tho ka sawi lo thei lova; Serkawn, Khawiva bul Tlawng-ah sawn khaw 4 vel regular taka kawmchar huan siam te, leilet nei tam tak an awm a, saw saw km 6 vel bawr a ni a; a fur a thal a kal theih ni phei se chuan, tun ai sawn Lunglei khawpui pawh hian kan chhawr ngeiin a rinawm a. Covid hunlai ah khan han kir leh lawk ila; khatia pawn chhuah theih loh a nih vel lai pawh khan, kan mamawh zia hi alang chiang em em a ni. Hetiang khawpui chhung atanga hnaite si, kut-hnathawktute leh mipuite-ina kan chhawr theih tur cheibawl hi ka’n sawi lang duh hrim hrim a.

Tin, nimin lama ka sawi lan tawh - Power & Electricity Minister-in min lo hriatsak se ka tih tho kha, Pukpui-Tlawng kamah khuan loneitu, huan nei chhungkaw 100 chuang an awm a, tunah pawh khuan tih belh an tum zel a ni a. A bul lawkah lui tha tak mai a luang a, kan Horticulture Minister duhawm tak pawh hian min rawn hmuh pui tawh a ni. Khungah khuan, ‘Irrigation atang te pawh hian hma lak ni ta se’ tih kha ka han thailang leh duh bawk a ni.

A dawt lelah chuan, LAD lamah hian VC hi an pawimawh em em mai a; khawpuia chengte chuan an pawimawhna tak tak hi a thu chauhin kan hriat a rinawm a. Kawng hrang hrangin hma an la a, nuai hnih-khat lek pawh tangkai takin an hmang thin a ni. Retaining wall siam tul te, disaster thilah te, kawng chhe repair ngaite an repair thin a. Kan Minister te leh, a bik takin kan House Leader pawh hian, tlema sum kan ziaawm hunah te chuan heng VC tana an fund hman ve turte pawh hi han dahpun theih ni se ka duh a.

Tin, VC House te hi khawpui pawn lampang thingtlangah chuan an hmang tangkai em em mai a, ka bial chhungah pawh hian mamawh an awm thluah a, chung zingah chuan -Mualthuam North, *VC-Langtlang Chawimawina* te kha Central atang te pawhin an dawng tawh a, VC tha chawimawina te an ni hian an la nei lova. Hei hi a remchang hmasa berah kan Minister hian min lo hriatsak ta se ka duh bawk a ni.

Tin, Vety lamah hian, kan bial chhung tho - Lunglei Municipal Area, Ward No. I, Pukpui-ah sawn 1974 khan Animal Health Centre din a lo ni tawh a. Saw saw khawpui chhungah ran vulh tam tak an awm a, Animal Dispensary atan min upgrade sak thei dan te a awm ang em, tiin he House zahawm takah hian ka han sawi bawk a. Chutiang bawkin Pangzawl-ah Veterinary Office tunah sawn hawn a ni tawh a, sak zawh tawh a ni a. Hengte pawh hi a la function lova, a rang lama function theih dan a awm a nih chuan tiin ka han sawi lang bawk a ni.

Tin, Sazaikawn lamah District Museum, lakh ₹918-in tunah hian sak zawh hlim a awm a. Hengah hian thawktu hrang hrang - Assistant Curator te, Gallery Attendant te kha mamawh a ni dawn a. Hengte pawh hi min lo hriatsak ta se kan Minister duhawm takin. Tin, chumi piah lamah, Ministry of Culture atangin endik a ni tawh a, Telescopic Centre - telescope lian vuah theihna atan te pawh hian recommend a awm mek ni awm tak a ni a. Heng te pawh hi chak zawkin min bawh zui sak ka duh a ni.

Tichuan, Pu Speaker, a tawp berah chuan.. (*Warning bell a ri a..*) Pu Speaker, ka pel tam lo ang; ruling nih manah min han hrethiam hram rawh). Hei, Agriculture Link Road lampang hi kan hriat theuh angin kan mamawh em em a, (**Hon. Speaker:** Ruling nih manah kan inhrethiam chuang em maw ni chu le? Fiamthu ka'n thawh ve lawk a nih kha.) Chung zingah chuan ka bial ni lo, Thorang hi ka sawi lang lo thei lova. Lunglei khawpuiah saw saw potential area tam berna zinga mi a ni. Chungah chuan Zawlpui te, Densur-ah te sawn hmalakna tur kawng hrang hrang a awm a. Chutiingin, Lungsen to Phairuang-chhuah panna agriculture link road te, khatiang te kha mamawhna a sang em em a. Saw saw kan Minister-in min lo ngaih pawimawh sak theih chuan, a bik takin Lunglei District tan kawng hrang hrangin ei leh barah hma kan sawn dawn a ni. (**Hon. Speaker:** Minute-in a pel ta e.)

Tichuan, kan Minister duhawm tak tak te demand hi a tha hlein ka hria a, tun ang hunah hetiang demand tha kan nei thei hi a lawmawm pawhin ka hria a. 'Heng demand-te hi, he House zahawm tak hian i pawmpui ang u' tiin ka tawpna ka'n khar ang e. Ka lawm e.

HON. SPEAKER : A lawmawm e. Tunah chuan Lawngtlai West Bialtu member zahawm tak, Pu C. Ngunlianchunga ilo sawm ang.

PU C. NGUNLIANCHUNGA: Pu Speaker, vawiinah kan Minister zahawm tak tak te pathumte Demand sawina huna sawi ve theia ka awm hi ka lawm khawp mai. Sawi zung zung ang; vawiin chu thuawih ka tum a nia, Pu Speaker.

A pakhatnaah, Art & Culture Department-ah lut nghal mai ila. Art & Culture Deptt. hi Zoram pum huap a ni a. Hei hi Zoram chhunga hnam hrang hrang chengte pawh min fun khawmtu leh min uap khawmtu a ni thin a. Chutiang chiah chuan vawiinniah hian,

a bikin kan hnam ziarangah lam mite, intihlim mite kan lo ni thin a, Mizo hnam ang pawhin *Chapchar Kut* te kan nei a, chutiang bawkin Lai-in, *Hlukhla* kan nei a; Marain, *Lyuva-Khutla* an ti bawk a, tunah hian an hmang mek a, Siaha-ah. Chutiang chuan, Chakma-in *Biju* an ti a, April ni 13-14 ah an hmang dawn a. Chutianging, Pang te, Bawm te, Paite te, Hmar te, Bru te leh hnam dangte pawh a ni ang a. Hengho hian an Kut an lo hman vena atan hian kan Art & Culture Department hian project te pawh siam sak vein, hlim taka an hmanna tur hi ngaihtuah ve se. Tin, chu mi hnu kum hnih-thum danah te phei chuan cultural exchange te pawh neiin, Aizawl-ah a ni emaw, Lunglei-ah a ni emaw, Lawngtlai-ah emaw, Siaha-ah emaw, district capital ah khang programme te kha hmang thei ila, Zofate, Zoram chhunga cheng kan inpumkhatna leh kan inunauna te pawh a tihnghet zual ka ring a.

India ram Danpui duangtu Dr. Ambedkar-a chuan, “*India ram hi pangpar huan zau tak ang a ni a, chutah chuan pangpar chi tin reng anmahni parin an par ang a*” a tih ang deuh khan, he Zoram-ah pawh hian hnam hrang hrangte kan awm a, mahni awmna hmun theuha kan culture leh kan tradition te humhalha kan chawinun theih nan Art & Culture hian hma la se ka duh khawp mai.

Tichuan a pahnihnaah, District Council & Minority Affairs Department hi lawmthu sawiin bul ka tan duh a. Kan Minister zahawm takin sorkar hmasa-ina hma a lo lak tawhna, District Council ten Pay & Allowances a anmahni thuneihna House a an lo pass ve tawh te rei tak kalpui a ni a, Sorkar hmasain hma a lo lak tawhna te a huna tihlawhtlin theiha a awm hi a lawmawm ka ti a. Chuta tel ve tur zingah chuan, ka tel vena tur chin a awm a. Vawiinah hian District Council pathumte aiawh pawhin, kan District Councils Affairs Minister hnenah hian lawmthu ka sawi a.

Chu tih rualin, a hma lamah kan ngaithla tawh a. PMJVK hi Minority Affairs a nih angin a enkawl a. Sorkar hmasa kan va demna lam ni lovin, a fiah zawk nan, ‘kalphungthar ah chuan kal dan thlak tawh ila a tha mang e’ tih ka sawi duh a. District Council in Minority Affairs a lakna hi sorkar hmasa atang khan a ni a. Chu chuan PMJVK hnuaiyah project tam tak, tun hma chuan, ‘Multi-Sectoral Development’ tih a ni thin a, Mamit District leh Lawngtlai District hi a huam a ni. Chuta tang chuan project tam tak siam theih a ni a. Vawiin nia ka han sawi duh chu, Pu Speaker, project an siamte hi District Council area ami chu District Council-te kutah transfer ve sela, a hnathawhna tur technical wing-ah pawh anmahniin PWD te, PHE te chutiang chuan Agriculture, Horticulture-ah te Head of Department hi District Council hian anmahni subject-ah chuan an nei ve vek a ni. Khang project awm chi kha District Council & Minority Affairs hian project a lo siama, a lo hmu a nih pawhin, helai atanga tihsak mai lo hian, District Council-te hnenah fund transfer ve sela, tih kha ka han sawi duh a. Tin, Sorkar hmasaah khan firm pakhat nen *Deed of Agreement* pawh siam a niin ka hria a. Khang te kha kan sorkar hian kalpui zel a tum em, tih lai te pawh ka han sawi duh a ni.

A pathumnaah chuan, Animal & Husbandry hi, Pathian leh kan hotute bakah mipui duhsaknain kum 5 ka lo enkawl ve tawh kha a ni a, a tui pawh ka tuipui thin a. Department hote nena inmil lohna pakhat kan nei chu, *entirnan*: Ranchaw herna Ramrikawn-a mite leh kan farm lian deuhthe hi chu outsource ila, tichuan, department enkawl nilo hian keini chuan bul hi tan ila a tha ang e, tiin hma kan la a; kan hun kha a liam ta a. Ka bula thu Dr. K. Beichhua hi min thlaktu kha a ni a, a hnenah pawh hian ka sawi a; mahse a ti hman ta lova. Tun kan Sorkar tharah pawh hian kan Minister zahawm tak hian ngaihtuahna hman se.

Mizoram sorkar hi kan hriat angin keimahniin chhiah kan tipung tha ngam bawh si lo, thawh chhuah kan nei tlem em em mai a. Vety Department hi sum lalut thei dinhmunah hian a ding a ni. Kan hun lai khan Ramrikawn-ah ranchaw herna te kan han tilian ve a, tin, ar vulhna an ti a, Society ang deuh ni si mahse, department te enkawl na hnuaiyah ZPTS – ‘Zoram Poultry Society’ tiin, Department Director chairman-na hnuaiyah enkawl a ni a. Khungte khu outsource ila, entrepreneur hovin la ta se la, sorkarah chhiah te pawh pe ve ta sela, hma kan va sawn zawk awm em? Nichin khan bial tin atangin Vety doctor kan indaihloh zia leh kan mamawh zia te kan sawi a. Tin, minister kan nih ve lai khan khawchhak lam China te, Bangkok te kan tlawh a, ram dang Vety Department hian chutianging farm an lo nei lova, private farm kha sorkarin a vil a ni. A monitor a, thlakhat danah emaw te a va enpui thin a. Chutiang chuan a kal a. Keini ramah hi chuan engkim mai department-in tih kan tum hi, kalphung tharah chuan tihdanglam a ngai a ni. Sum kan thawhchhuah vena tur hi kan zawn a ngai takzetin ka hria a.

Tin, Vety Department hi, Liandova te unau thawnthu kha ang ka ti deuh a. A nau Tuaisiala'n rul lian deuh mai a hmu a, an han that a. A sa tha tha kha mipuiin an inlak a, an duh loh a pumpui chu Liandova te unauin lui mawng lamah an kalpui a; Tuaisiala phei chu a tap tap a ni. Mahse, an kal thui tawh tawh a, an han zai chuan, a ri ret ret a, dar leh thi hlir a lo ni a. Liandova te unau, an hmuhsit em em kha, an lo hausak phah ta a, an Lal fanu nupuiah a neih theih phah ta a ni.

Chutiang deuh chuan, UT kan nih atangin Vety Department hi khaw dai pawnah ram an pe a. Tichuan, ram leh khua a lo thang zel a, vawiinah chuan khaw mipuite hian an ram hi kan awh sak tlat mai ni hian a lang a. Khawi khuaah pawh chhuh deuh zel kan tum a, a bikin Kan Chief Minister bial Thenzawl-ah pawh ram tha tak a awm a, ka hun ve lai pawh khan a khaw mipuite hian ram hi min dil min dil thin a. Mahse, “ngawi teh u, he laiah hian thil tha tih kan tum a ni” ka ti a. Thalaite intihlimnan dil te kan khuap a, lawng te kan dah a, sakawr te kan dah a. Tin, kel lian chi, a note tihpun nan te, sial tihpun nan te project kan siam a, khatiang khan hma kan la a. Tin, fodder plant te a awm bawh a. Tunah pawh Sports Complex atan ram eng emaw zat chu lak sak tumna a awm leh deuh em maw ni chu aw, tih kha tlang thangah ka han hre ve a. Pu Speaker, chutiang deuh chuan, Vety Department hi an khawngaihthlak khawp mai a, kan Minister hian veng hram hram se la, hauh tlat se la ka ti khawp mai a.

Tin, Mampui-ah sawn Vety Farm kan nei a, saw pawh saw Undivided Chhimituipui tan a pawimawh leh khawp mai a. Tun hma khan Vawk note leh Ar note te a awm thin a, mipui hnenah pawh hralh a ni thin. Tlemin tunah khian ngaihthah deuh a ni a, saw pawh saw min han tuaithar sak leh hram se ka duh hle a ni.

Pu Speaker, Health & Family Welfare chungchangah hian, kan bial chu sawi ngai lovin, remote area a ni a, session a piang hian ka sawi emaw tih mai tur a ni a. Ka han sawi nawn leh duh chu, Longpuighat ah Congress sorkar lai khan NHM hnuai atangin building pawh sak vek tawh a ni a, mahse, luah a la ni lo tlat lai saw; a cover a zau si a. Saw saw min hawn saka, PHC hawn a nih chuan, thi mai tur tam tak saw min chhan dawn a ni. Chuvang chuan, saw saw ka ngai pawimawh khawp mai.

Tin, Bungtlang South PHC pawh a building a hlui tawh lutuk; thawktu pawh nurse 2 leh doctor 1 a chang changin an awm a, a cover area a zau nasa mai si a. Hei hi kan Minister hian min hriat sak sela. Tin, Health Sub-Center leh Clinic te pawh hi Lawngtlai West-in kan mamawh khawp mai. Research based-a kal tur a nih ang takin, Health & Family Welfare ah pawh hian research bei sela, bial thenkhatah chuan khua, Sub-Centre leh Clinic hi inhnaih te tea an awm laiin, Lawngtlai West-ah chuan a ni lo tlat a; Pu RM-a bial pawh hi a ni.

Pu Speaker, Tourism Department-ah hian hotute'n min hriatsak tura ka duh hi sorkar term hmasaah pawh khan ka sawi zing lutuk tawh a. Congress sorkar laiin Bungtlang South ah Tourist Lodge tur building sak zawh tawh kha, kum 5 chhungin hawn a ni lo tawp mai a; House-ah session a piangin ka sawi a ni. Tunah phei chuan ramhnuai-ah a chang tawh a. Sum leh pai tam tak sengin in kan sa a, infrastructure kan buaipui a, mahse, enkawl zui a ni lo hi a pawl lutuk.

Kan bialah phei chuan Bungtlang South chu khaw-lian a ni a, mikhual vei vak an tam ve a, mi thlenna atan phei chuan a pawimawh a. Tunhmaa sorkarin a lo tih ang deuh khan, outsource tur a nih pawhin outsource tal ila, mimal pawhin tlanin, outsource se; khutianga building sak tam tak chhe mai turte khu, a uihawm a ni.

Pu Speaker, Minister pathumte demand vawiinah kan sawiho hi, ka pawmpui e. Ka lawm e.

HON. SPEAKER : A lawmawm e. I insum hle mai. Kan House Leader khan ngenna a siam a - Tuna kan hun hman mekah hian member ten sawi tur ang ang chu sawi zawh tum ila; 'luh leh chuan kan minister-te khan an demand te sawi thei tawh se' tih kha ngenna a siam a ni a. A sawi tur te kha hun vawng hram hram turin ka'n ngen nawn leh a. Tunah chuan Aizawl West-I Bialtu, Pu TBC Lalvenchhunga ilo sawm ang.

PU TBC LALVENCHHUNGA: Pu Speaker, ka lawm e. Vawiinnia kan Minister pathumte - Pu Lalsawivunga, Pu PC Vanlalruata leh Pi Lalrinpuii te chanpual department 10 demand sawihona hun kan han nei thei a, a lawmawm ka ti a. Reaction pawh a ngaihnawm viau mai a. Budget hrim hrimah hian danglamna lian tham lutuk awm lo mah sela, a danglamna ber chu Pu Nguna, Lawngtlai West Bialtu khan a rawn sawi a, DCMA chungchang kha a ni deuh mai a. A number-ah tam lo mahse, a chhung kan han keu chuan tlem tlema danglamna kan hmuh ka ring a. Object Head-ah te kan sum hman dan tur leh kalphung tur kha a lang deuh vek mai a. An sawi tawh ang khan a mal mal lutuk lova luh chilh lo hian hun a chep deuh avangin ka rawn thlur zawr zawr ang a.

A hmasa berah chuan, Pu C. Lalsawivunga chanpual te hi, inkawp hnai deuh deuh te a awm a, chungte avang chuan a hlawm deuhvin ka han khaikhawm mai ang a. LAD bik leh District Council & Minority Affairs te nimin lama kan chai ho, Rural Development te, Central-a kan line-ministry te nen inhmuh lo a tam khawp mai a. Heng hi chu kan la siam that zel theih pawh ka beisei a. Heng zingah hian, ‘tu chanpual tur nge’ tih theih rum rum awm chi te, Local Administration-ah hian RGSA - Gram Swara Abhiyan tih loh hi chu Central scheme han kenkawh a nei a lem lova. Chutih rual erawh chuan, kuminah hian crore ₹102 lai mai kan la nei a. Central 15th Finance Commission atangin crore ₹76, *tight* leh *untight* grant atangin kan la hmu thei bawk a.

Tin, GIA-ah hian Mizoram Finance Second Recommendation angin crore 17.94 a la awm thei bawk a, hei hi han sawi lan kher ka duhna chhan chu, Rural Development, Local Administration-ah hian VC te lawmman ADC area-a kan pek zawng zawng hi crore ₹170 leh tlem a ni a, ADC area pawn zawng zawngah hian crore ₹280 leh tlem a ni bawk a. Chutiang zah lawmman/ hlawh atana kan pechhuak chungin Zoram-a central scheme kan chawh luh 80% hi heng hlawh tlemte neite hian an enkawl a, monitoring leh relation an kutah a awm a ni. Thlirtute pawhin lo ngaithla ula ka duh chu, chu, kan ti a, Devolution of Power – ‘thunehna sem zai’ kan han tihah hian, a 3F’s lai - *Fund, Function leh Functionaries* hi kan chian zual deuh deuha, heng inhnem leh department pangngaia awm hi dahkhawm leh dan ngaihtuahnaa kan neih a ngai hle a.

Tin, hetah hian, thil fair vak lo pakhat awm thei ta chu, 2nd Finance Commission hi pawm a ni tawh miao mai si a; State Own Tax Revenue atanga 42% verticle-a devolute tur a ni a, heta tanga 42% ah hian tunah hian crore 1,000 kan han beisei a, crore 420 tih vel a ni a; crore 1300 velah chuan crore 500 vel awrh devolution tur verticle-in kan nei a. Chuta tanga 90% chu horizontal devolution-in ADC pathum ten an chang a. Mizoram-a village council 800 dawn, ADC pawna mite hian 10% an insem ta a, hei hi hun lo kal zel turah hian kan tax collection atangin kum nga hi kan daih lo ang tih hi a hlauhawm hle mai a. Kan 2nd Finance Report a justification hi uluk taka ennawn leh pawh a ngaiin ka han ring deuh a. Chutiangin, a backbone a nih miao avangin Ministry of Panchayati Raj hi nei lo mah ila, helai dinhmuh hian kan lo insiamrem deuh deuha,

a dawhthleng hi awmzeneia convergence kan tiha thumrawn tur tak tak chuan, awmzeneia kan kalpui a ngai a. Annual work plan pawh siam thiam mang hlei lo leh ti lote nena kan inenkawl chhung hi chuan eng ang pawhin sawi tha thin mah ila, heng funds te hian a tum tak tak thleng lovin, a dawhthleng te a thleng pha dawn lo a ni tih hi ka sawi tel duh a.

A dawt lehah chuan, Art & Culture ah hian, kan budget pumpui hi Commerce & Industries Board pakhat hnuiaia a enkawl GIA zat vel a ni a, chutiang dinhmunah chuan kan ding mek bawk a. Hei pawh hi ennawn ngai tak niin a lang bawk a. A dawt lehah chuan AH&Vety hi a budget kalphung ngau ngauah chuan danglam teh chiam han hmuh tur a awm lem lova, amaherawhchu, Zoram mipuite'n kan manganpui border ceiling hi kan tih uluk loh chuan, ran-natna avanga loneitu leh kut-hnathawktu tam takin sum leh pai tam tak an chan kha a la rei lo, hei hi kan hmuh chhonzawm leh tur a ni a. Heti lama hmalakna kan neih hi ka'n beisei bawk a.

A dawt lehah chuan, kumina danglam deuh chu, fodder feed development-ah hian sum dah an ni leh bawk a, hei hian 'bana kaih' kalphung tharah khan ranchawa intodelhna tur lam a hawiin ka hria a. A hmaa mite sawi tawh ang khan, ka bial chhung Ramrikawn-ah ranchaw herna khawl a awm a. Heng privatisation tur hian a committee te pawh din niin resource mobilize-na kawngah hian min puih pawh ka ring a. Ka bial chhung atang ngei hian ran chaw herna chungchangah hian hmasawn kan tum tih kha ka han sawi duh deuh bawk a. Vanneiah ka inngai a, minister pawh ka han tlawn deuh bawk a nih chu.

Pu PC Vanlalruata chappual Demand No. 31, 37 leh 47 te hi hlawn khata dah theihna chin a awm rualin, Agriculture bik ngau ngauah hian salaries hi nikum aiin crore 500 teh meuhin a han hniam ngawt mai a, a danglamna hi a sang ang reng viau mai a. Tin, FOCUS hi revamp niin, kuminah hian crore 63 kan han hmu thar leh a. A district kha a huam zau tawh zawk dawn nge ni a, District pangate nge, tunhma ang khan 'thlai tui pekna tur plastic vel kan sem leh ringawt nge' tih laia hi, result oriented kan ni a, kan thlir dawn a ni. Kan mipuite pawhin lo thlir chhonzawm ula ka duh a, sum a awm a ni.

Kumina kan budget-a danglam tak Capital Resources-a kan sawi thin, nikumah 'crore 1,00,000 chia a awm' tih ka sawi thin kha, kuminah a danglamna kan hmu a. Link road atang pawh crore 1384 teh meuh mai capital, hmasawna ruhrel dinna atan agriculture-ah rawn dah thar a ni a. Hemi pia hian FOCUS-ah nen chuan a vaiin capital expenditure atan hian crore 7,704 teh meuh mai agriculture-ah kan hmu a, hei hi thil thar a ni a. Bial chhunglam ka hawl vak hman dawn lova, kan bial chhung tan pawh hmasawn kan duh chuan, vei lama thu te tan pawh hmasawna a nih avangin min lo ngaithlaksak pawh ka beisei a.

Cooperation, kan hand-holding bul tumtu society base a nih miao avangin primary agriculture credit society te tana hmalakna tur kan hmu chho mek niin ka ngai a. Tin,

Irrigation & Water Resources-ah chuan dan thar te kan han nei bawk a. Tin, Water Resources bika thuneitu department palite thuang hranga kan kal hi awmze neia kalpui thei tura hmalak zel turin kan budget-ah hian thlir theih a awmin ka hre bawk a.

A tawp berah chuan, ka ngaih pawimawh deuh kan sawi leh ang a. Pi Lalrinpuui, kan Minister chanpual – Health & Family Welfare, Social Welfare leh Tourism hi a ngaihnaawm angreng a, an hmalaknaah te an thawk thain, a lawmawm ka ti a. Thil danglam tehchiam budget-ah hian kan hmu tur em em awm lo ni anga lang hi structural reform a chhungah hian thlen tir ngai a ni a, hmalakna mipuite'n kan lo thlir theuh turah ka beisei bawk a. MHSPP hnuai hmalakna kalpui mekte pawh hmuh a nuamin, hmasawna hmun tam takah kan hmu a. Thil tam tak ka tih thin hi, E-Government kan sawi thin a, sorkar ruhrel/ruangam langtlang kan sawi thin hi a bul tumtu a ni a. Funding source kan neihna hmun dang atanga rawn lutah te hian agreement-ah a tel ve thin a, chung zinga pakhat chu - digital dashboard MHSSP hnuai pawh beisei a ni a. Han din thar mai hi chu a awlsam, amaherawhchu, maintain zui hi a har a, enkawl zui a har a. Chutiang bawkin, Health & Family Welfare pawhin Google free site atang hian dedicated server-ah an sawn thuai kan beisei a, awmze nei zawkin 2023 update piah lamah update a ni leh ta lo bawk a. Kan OPD status te, infant mortality rate te a ni emaw, mipuiten, minawlpuiin kan lo survey ve theihna, kan lo hmuh theihna a nih avangin, sum sen belh ngai lo, awm sa, infrastructure kan neih sa hi active taka theih tawp chhuah kan mamawh hlein ka hria a.

Sawi zawh hman loh ka hlau si a, tawitein sawi leh mai ang aw. Hmanniah khan sawilan zawk ka nei tawh a. Vawiinah hian kan health infrastructure hi kan inngahna pui chu, Central Sponsor Scheme a ni a. NHM staff te, nursing an ni emaw, staff hrang hrangte emaw pawh hi ngaihtuahna thui tak kan neih a ngaiin ka hria a. Vawiina vacancy kan neihte kan hnawhkhah leh hunah pawh kan Minister hnenah ngenna ka han thlen duh nghal chu, thangthar qualified-a thawk reng, kum 20 dawn thawk tawhte pawh nimina pass chhuakte nena academically-a kan in compete tir fo mai hi a fuh lo em em mai a. Regularization-ah hian duhsakna bik deuh te, *entirnan*: Ratio te pawh hi even 50:50 a nih loh pawhin, 60:40 tal pawh a tih ve theih a. Heng mite hlawh tlem lutuk mai, harsa lutuk mai, hrehawm taka an thawhna hi mitin hian kan feel vek chuan ka ring. Tu hunlai, tu duhsaknaa lut pawh ni rawh se, mithiam qualified-tena an thawhna kha, (Pu Speaker, ka zo tep; khawngaih takin, han bawhpelh loh ka tum a) hei hi ngaihtuahna/ruahmanna a mipui ang pawha ngaihtuahna kan neih a ngai a ni.

Supreme Court judgement-ah meuh pawh minimum wages-ah ₹20,000/- a han ti a, kan Nurse-te kum tam tak training-in an awm a, an rawn chhuak a, sorkar pawhin hei tak hi chu a la zawm ve hram hram a. Amaherawhchu, *Mizoram Clinical Establishment Act* te pawh hi awmze nei zawk leh khuahkhirh zawka kan kalpui a ngai a. Private Hospital-ah te chuan kan Nurse-te hian he Supreme Court ruling hi a zatve pawh phak mang lovin kan la inchhawr mek zel a, sorkar anga awmze neia Clinical Establishment

hnuaiah te private institution – ‘health institute’ kan tih ang chi te leh, heng zawng zawngte pawh hi Aizawl-ah hian ka report hnukung ber neiah hian 74% vel chiah an la in register a ni. Chuvang chuan, khuahkhirh kawngah, quality control kawngah te, frauds-ah te pawh kan invenna pawimawh tak tur a ni, tih kha ka han sawi tel duh a.

A tawp berna atan chuan, (a hlawmin ka rawn sawi mai ang a) tawitein Social Welfare leh Tourism hi. Social Welfare-ah hian ngaihtuah ngai tham tak mai a awm a, (**Hon. Speaker:** I hun a zo ta e) Minute 1 ka hmang lo ang, Pu Speaker, khawngaih takin. Helai tak hi sentence khat chauh. Social Welfare Department hi, Women & Child Development bikah hian crore 16 dawn, nuai sang chuang fe maiin hlawh hi a rawn hniam ta duai mai a ni, nikum aiin. Hei hi ngaihtuah a ngai; Minister khan min lo note sak sela, engnge a chhan ni ta ber? Rin aiin a tlakna hi Women & Child Development *salary*-ah hian a tam em em mai a. Chutih rual chuan, lawmthu ka sawi duh chu - Sorkarin a kalpui tam tak zingah vawiina National Social Assistance Programme (NSAP) hnuaia programme te tihpun a ni hi a lawmawm ka tih rualin, Old Age Home hi Mizoram-a awm chhun Sorkarin a enkawl hi ka bial chhung bawk, Ainawn Venga awm a ni a, a leh pekah chuan rehabilitation leh deaddiction-te kan enkawl danah professional zawk leh awmze nei zawka khawtlang kan kaihhruai theina tur zawkin budget-ah hian a indahin ka hria a. (**Hon. Speaker:** Minute tam a kal leh ta e.) A lawmawm e.

Pu Speaker, khang bakah khan Department pakhat hi chu an la rawn sawi vek a, an sawi tawh dawn avangin kan hmaih tawh mai ang e. A lawmawm ka ti a, hun tawite chhungin vawiina kan Minister pathumte - Pu C. Lalsawivunga, Demand Nos. - 19, 23, 27 leh 34; Pu PC Vanlalruata, Demand Nos. - 31, 37 leh 47, Pi Lalrinpuui, Demand Nos. - 24, 29, 43 te hi pawmawm ka tiin, member-puite hnenah pawh pass-pui ngei turin ka rawn ngen nghal a ni e. Ka lawm e.

HON. SPEAKER : A lawmawm e. Budget Discussion-a kan Minister pathumte demand chungchanga kan discussion kan ngaihtla a, a lawmawm khawp mai a. Member thenkhatte hian bial tana thil demand-na hun emaw hi kan ti em aw, tih mai tur hian kan bial hi kan han chip deuh mah mah thin a. Amaherawhchu, sawi theih loh chu a awm lova. ‘Tun tumah chuan kan Minister-te demand kan discuss a ni’ tih hi hre ta ila.

Tunah chuan Siaha Bialtu Dr. K. Beichhua ilo sawm ang.

DR. K. BEICHHUA : Pu Speaker, ka lawm e. Kalphung-tharah chuan kan Chair inthlak dan te pawh a thar ve zel a, a lawmawm e.

Demand No. 43 - Tourism hi kan sawi phawt ang e, Pu Speaker. Mi ramte en hian rual awh hi a na ka ti a, an ram te a nihna ang angin tourists hip nan an siam thiam a ni. Kan

ram dinhmun ka en hian, ‘engvangin nge vawiin dinhmunah hian kan awm’ tih hi rilruah inzawhna lian tak ka nei thin a; a mipui lam pawh hi kan inen a tulin ka hria. Sorkarin nikum lamah policy tha tak a zam tawh a, chung karah chuan kan han kal chho a. Mipui lam te ka ngaihtuah a, ‘kan conservative lutuk lo a ni lo maw; kan conservative mah mah avang hi a ni ang tourists hi kan hip loh’ tih te hi rilruah a lo lut a. Goa te khu chuan tourists atang khuan revenue tam tak, an revenue lak tamna ber chu - Zu leh tourism atang hian a ni. Sorkar thar hian theihtawp chhuahin hma han la ta se. A bik takin chhim lamah sawn ‘*Castle of Beino*’ kan tih te, *Palak Dil*, Ramsar site-a an puan tawh, khawvel hriat a ni tawh a; Mizoram-a tlang sang ber *Phawngpui* te a awm a, *Mount Mawma*, NEC atangin tunah sawn nasa takin hma kan la bawk a; Mizoram-a lui lian ber *Chhimtuipui* te pawh a awm a, tourists attraction atana siam theih tur an ni a. Tourism changtu Minister zahawm tak hian khangte kha rilruah lo nei se, tih kha pakhatnaah ka sawi duh a.

Pahnihnaah chuan, Social Welfare Department hi, Pu Speaker, nichina kan ngaihtlak tawh ang khan, nausen thla 6 atanga tar (double-pensioner) te welfare ngaihtuahtu a ni a, tih tur hi a tam khawp mai a. A department hi pension-in an chhuak zut zut tawh mai si a, new recruitment a awm bawk si lova. Ka ngaihtuah thin a, kum 4 ka lo enkawl ve tawhah khan, tihian kal chho zel ta ila, ‘engtikah emaw chuan a la collapse ang a’ tih dinhmunah chuan a awm a ni. A chhan chu, a purview a zau si a, chumi piahlamah infrastructure development te pawh a khawih tel vek a. Ministry of Tribal Affairs - Article 275 clause 1 atangin project tam tak kan zuk siam a, 100-a 100 a do tur a awm lo; project tam tak min rawn pe a. Chungte enkawltu atan Engineer, EE emaw te tal hi nei ila, chungte pawh chu a ngheta dah ni se. Tunhma phei chuan PMJVK te pawh hi Social Welfare a awm kha a ni a, ka hun lai khan min chhuh daih a; chutiang chu a ni a. Chuvang chuan, hei hi kan Minister zahawmtak hian lo ngaipawimawh se, khati zawng khan hma la thei se a thain ka hria a ni. Tin, kan Finance Adviser-ina Social Welfare sum leh pai chungchang a zawt ta daih mai kha chu a mak ka ti, Pu Speaker. Finance lama adviser a ni a, amah kha mithiam kan neih a ni a.

Tin, Demand No. 24 - Health & Family Welfare hi tawitein han sawi leh ta ila. Kan rilruah hian, Health & Family Welfare han sawi hian *Damdawi-in* hi a lo lang thin a. Mahse, Pu Speaker, hei hi a ni ber lo. *Damdawi-in* kha ‘a tul lo e’ tihna ni lovin, ‘ram changkang leh ram hrisel’ kan tih primary healthcare ngai pawimawhtute hi, ram hrisel leh ram changkang an ni thin. Chuvang chuan, tuna kan dinhmunah chuan kan Sub-Centre te, kan PHC, henga doctor awmlo, nurse awm lo, health-worker awmlo kan tih ang chite hi heng kalphung tharah hi chuan, awm tawh lo teh se. A nihna dik takah chuan, hengte hi indonaa *frontline worker* - ral-hmatawng an ni. An niin min lo beitu tur an lo dan chah zel chuan, hriselna kawngah hian hma kan sawn ngei ang tih hi kan rilruah awm se. Kan district hospital te a thawl ang a, kan private hospital empanel tam tak awm leh, kan civil hospital tunah hian a lun em em a ni. Heng hi, primary level atang hian tha takin ti ta ila chuan, heng zawng zawng hi kan sukiang ang; heng zawng

zawng hi a ziaawm ang, tih hi kan rilruah awm se. Chutiang zawng chuan kal ta ila, kalphung tharah hian, tih hi Pu Speaker, a chakawm hlein ka hria a.

Tin, budget estimate te pawh hi chuti lutukin a hniam chhe lova, kum kallai ngaihtuahin; chutiang tur chuan hma la chho ta ila a tha awm mange tih hi. Tin, a bik takin ‘non-communicable diseases’ kan tih, tunlai thalai naupangte tea heart attack-a thi te, ‘stroke-in a thi’ kan tih te pawh hi primary healthcare that loh vang a ni a. Public Health lamah hian hawh u, in concentrate leh zual teh ang u. Thawktute kan thawkrim, kan ti tha; mahse, helamah hian fully-in in concentrate ta ila. ZMC te kan nei a, a ropui; ‘kan mamawh lo’ kan ti lo; kan mamawh lutuk. Damdawi-in tha pawh kan mamawh, mahse, public health lamah hian tun ai hian insawrbing deuh ila kan ram hi hriselna kawngah hian hma kan sawn zawk awm mang e, tih kha ka ngaihda a ni.

Demand No. 31 – Agriculture hi, dik tak chuan kan la luhchilh tak tak lo ni hian ka hria. Department pawimawh tak, kan economy min boost-up tu tura ngaih a nih laiin, a chhungril tak hi kan la luhchilh lova. Mahse, tun sorkar hi a tum a ruh a, kut-hnathawktute a ngaipawimawh a, hengte pawh hi la siamtha chho turah ngai ta ila. Sawng chhim lama Phura zawl saw la explore tur ala tam lutuk. Chuvang chuan, tuna Custom Hiring Centre atanga tractor inpek ang chi pawh hi, tute hi nge ni a thawktu; “*tute nge ti tak tak*” tia kan kalpui a hun tawhin ka hria. Chuvang chuan, agriculture-ah pawh hian hma kan sawn zel turah beisei ta ila.

Kum kal ta ngaihtuah chuan kumin kan budget estimate pawh a hniam hran lova. Chutiang chuan keimahni tharchhuah ngei hi a hmunah Supply Deptt. hian lei chat zel ta se, kan dinhmun pawh *khithah* kan nih theih a beiseiawm a ni.

Pu Speaker, Demand No. 37 - Cooperation Deptt. hi, kan hriat angin sorkar laipui hian a ngai pawimawh em em a, a changtu pawh Home Minister Pu Amit Shah ngat niin, ministry hranin a awm a ni. Hei hi kan economy ah pawh min boost up tak tak tur a ni a, kan state hian tun ai hian ngai pawimawh leh zual ila. Tin, tuna kan kal tum danah phei chuan, heng cooperation tel lo hian *hand-holding* te pawh hi a kal theih loh a ni. Chuvang chuan, helaia kan budget dah hi, member zahawm tak Pu Dawnga’n a rawn sawi tawh ang khan, a lungchhiatthlak ka ti a. Kum 10 kal ta aia kumina budget estimate a hniam zawk ta mai hi, ‘eng ngaihtuahna nge kan hman?’ tih lai hi.

Tin, Demand No. 47 - Irrigation & Water Resources Deptt hi; agriculture leh horticulture ah Mizoram chu ‘potential area’ kan ti a; sericulture te pawh lo ni se, hengte pawh hi Cooperation Department tel lo chuan awmzia a awm tak tak lo a ni. Chuvang chuan, waviina kan ram context ngaihtuah hian, *entirnan*: Phura saw zawl zau tak mai a ni a, thalah tui kan harsa a ni. Mahse, Palak Dil tui saw check-dam siam ila, rain-water harvesting ti ta ila, sawng lai zawng zawng chawm thei tur chu a ni. Chuvang chuan,

hetah pawh hian rilru neiin ke pen ta ila. Tunah pawh hian kan sorkar thar hian helamah hian rilru a pe viauin ka hria a, chak taka a kal pawh beisei ila.

Demand No. 34 – AH & Veterinary Deptt. hi kan lo enkawl tawh te a ni a, sawi tur tam tak a awm ang a. Mahse, pawimawih deuh nia ka hriat chu – Bawngnhnutea kan intodelh loh zia hi ka ngaihtuah a; kan unau Nepali ho hi awm lo se, bawngnhnute in tur hi kan va nei awm lo em ka ti a ni. Chuvang chuan, helamah hian in concentrate deuh ta ila. Thenzawl-ah sawn fodder hmun tha tak mai kan nei a, sawngah sawn a department ang anih loh pawhin, outsourcing ti ila, tute emaw mi-taima takin ti ta se; a chaw phurh man a hautak nasa mai si a, sawlai atanga hetah Selesih ah phur tur pawhin truck backload te chan a ngai thin a ni; a phurh man a to si a. Chutiang chuan lehlam atangin an la hleitheh bik si lova, sawtiang sawn kan dah ta tawp a. Dairying lama in concentrate hi a va han tul em.

Tin, vawk hri - African swine-fever kha a lo lut tawh a, a la awm reng a. Hengah pawh hian kan fimkhur loh chuan, engtik lai pawha flare-up thei reng a ni. Chumi piah lamah chuan, pawn lama tanga lakluh hi la khap zel teh ang u. Tin, Artui ah pawh hian kan intodelh lo viau a, helamah hian theitawp chhuah bawk ila. Chutiang chuan Ar-awpkeuna ZPDS ah khuan 20,000 - 1,00,000 tharchhuah theihna te pawh kan siam a, khung te khu hmang tangkai ila. Tin, Lungpuizawl-ah sawn 5000 awpkeu theiha tur a awm a, mahse tunah hian hman a ni lovin ka hria a. Chutiang chuan, Mampui-ah pawh a awm a, sawng te pawh saw theih tawpin hma la ta ila kan intodelh ngei ang, tih hi ka hmuh dan a ni. (**Hon. Speaker:** Minute khat a kal ta e.) Ka zo tep e.

Art & Culture ah hian, Pu Speaker, nichina Pu Ngunarawn sawi ang khan, *Hnam Impumkhatna* atan Art & Culture Deptt. hi i hmang teh ang u. Mizoram-ah hnam tenau tamtak kan awm a, Autonomous District Council pathum a awm a. Chumi piah lamah Paite, Hmar etc. te nen khan cultural meet hi Aizawl-ah emaw, Lunglei-ah emaw vawikhat han nei ila, kan zawngchhang ka ring a ni. *Impumkhatna* tawngkam chauhin kan sawi a; thiltih nena kan kalpui loh chuan inpumkhat hi har deuh a nia aw. Chuvang chuan, Cultural Exchange te hi nei thin ila kan inchhir ka ring lo. (Pu Speaker, Opposition Group Leader ka nihna angin minute khat chauh.)

DC&MA kha, kan MLA zahawm tak Pu Nguna khan lawmthu a rawn sawi a. Sawlai mi leh sa ka nihna angin wawiinah hian lawmthu, he sorkarah hian ka rawn sawi ve bawk a. Chumi piah lamah chuan, kan kalchhohna zel turah, sawi tawh ang khan, chhim lam a develop loh chuan, hmar lam eng ang pawhin develop mahse, Mizoram hi ‘*a develop*’ kan ti thei lovang. Chuvang chuan, development te pawh rualkhai deuh zawka a kal theih nan, a changtu minister fel tak kan nei bawk a; nakin kan kal chhoh zelna turah PMJVK te pawh DC&MA kutah a awm tawh a, heng enkawl tur hian project tam tak a awm dawn a, chungat chuan engineer tel lo chuan he department hi a kal thei

dawn lo a ni. Chuvang chuan, EE level engineer tal hi DC&MA ah hian kan dah a ngaiin ka hria a ni. Chumi tur chuan Pu Speaker, kan hotute hian hma la ngei se a thain ka hria.

A dang chu ka sawi hman tawh lovah ngai ila. Vawiina kan Minister zahawm tak tak pathumte demand hi tha ka ti a, pawmpui tlakah ka ngai a ni, Pu Speaker. Ka lawm e.

HON. SPEAKER : A lawmawm hle mai. Hunbi chu intuk lo ila, la ngaihthlak pawh kan la kham lovin ka hria. Tin, a present dan kha, Budget Discussion a ni a, rampum huapin a rawn ti a; bial chhung kha a luhchilh miah lo a ni a, a zahawm khawp mai. Aw le, tunah chuan Dampa Bialtu, Member zahawm tak Pu Lalrintluanga Sailo ilo sawm ang.

PU LALRINTLUANGA SAILO: Pu Speaker, ka lawm e, Demand ka sawi hmain Pu Speaker, i hriatthiamna rawn ngen ka duh a. Pawn lam atangin ka tu leh fate pawhin an rawn sawi a; House chhungah pawh min ngaimawh tawk an awm ka hlau a. Vawiinniah hian health lam te kan demand a ni bawk a, keima mimal chaklohna hriatthiamna ka ngen che u a; ka lo muthlu fo mai a. Ka natna ang hi vei ve ula chu, member-te hian min sawisel ka ring lova. December thla atang khan *sleep-apnea* ka vei a, zantin hi 9-5 oxygen nen ka nung a. Tin, *bell-palsy* ka nei a, ka hmai leh biang te ka thusawi pawhin a sawi a. Chutih rual chuan, *sinus* nasa takin min tuam a; tin, *prostrate* ka nei bawk a, ka mut lai pawhin mithiamte an awm a; zantin wawi 5-6 zun a ngai a. Tin, ka mitah lungte tam hle bawk a, chutiang chak lohna 5 chuan min tuam a vel a. House-a ka thuta ka chhuah fona chhan pawh hi, khalai kha a ni tih kha member te'n min hriatpui ka duh a ni. Chuvang chuan, Pu Speaker, i remtihain, zanin kan Minister zahawm tak pathumte demand pawh hi (nizan khan 10:15 pm ah kan zova, ka mut a buai vek mai a) ka sawi zoh chuan, zahawm viau mah ula ka hawsan mai che u a that ka ring a. Chutiang chu ka dinhmun a ni e.

Aw le Pu Speaker, Minister pathumte demand kan sawi turah pawh hian, ka thusawi speed te pawh hi a chak thei lova, nimin khan sawi rei ber ang khan min puang a, a rei khawp mai a. Amaherawhchu, ka bial bakah Dy. Speaker leh Speaker bialte ka'n kawp avang khan, minute 10 nei kha minute 30 nei turah ka inngai a; mahse, a tha vek e.

Ka ngaih pawimawh bera chu, Demand No. 19 - Local Administration hi a ni a. Hei, hian Mizoram thingtlang zawng zawng a huam vek mai a, member zahawm tak tak te'n an sawi tawh a. Kan administration kengkawhtu, thingtlangah chuan kan sorkar hnek hnaih ber te an ni a; tuam chak an ngaih rualin, sorkar hmasa lamina an lo kalpui tawh anga zahawm zawka rorelnain an neih theihna tur RDSA fund - house sakna leh repair-na tur te hi min sawi chhuah sak turin kan Minister zahawm tak kha kan ngen a.

A pahnihnaah chuan, Demand No. 47 - Irrigation hi tun hma chuan 'Minor Irrigation' tih niinm Agriculture hnuaiyah peng pakhatin a awm a. Kan sorkar kal ta ten tha takin an

enkawl a, engineering department-ah upgrade-in, directorate building tha tak nen Chief Engineer hovin an thu tawh a; hei hi hmasawna ropui tak a ni. Infrastructure lamah hian hma kan sawn hle a, a tak an operate-na tur laia hi khaw tinin kan eizawna kawngah te kan mamawh avangin, a enkawltu pawh hi a smart khawp mai a, Pu PC-a; ani kaihhraina hnuaiah hian hmalam thlirna thui tak kan beisei dawn a ni.

Tin, Demand No. 23 - Art & Culture ah hian, Chapchar Kut lawman hmun han sawn te kha kan ti a; ‘Chief Minister hi khuallianah kan hmang duh e’ ti mai sela. Chapchar Kut hi chu Lunglei-ah pawh kan hmangin ka hria a, hmun tinah hian. Chuvang chuan, *a insawn laia kha*, eng hi nge ni tih kha ka hrethiam lova. Chu ai maha ka ngaih pawimawh chu, kan hnam martyr-te thlan Luangmual-ah khuan a awm a. Sorkar hmasa khan uluk takin a lo kalpui thin a, sorkar sum ti hek lovin. Amaherawhchu, mimal emaw, party pakhat emawa enkawl a harsat tawh avangin, tun dinhmunah hian Art & Culture kutah an dahin ka hria a. Hei hi foreigners lo kalte pawhin an ngaihpawimawh em em a ni a; Nagaland kan kal pawhin chu tho chu a ni. Chuvang chuan, Art & Culture hian uluk takin enkawl sela. Tin, a tum ang ngeiin a enkawltu tur chowkidar te pawh dah ni sela; a ram a zau tawkin a hmun a nuam a, hei hi earning deptt. ah te pawh kan let thei hial lawm ni, tih te Pu Speaker, min ngaihtuah tir a. Kan senior member, kan veteran politician Pu Sawivunga ho hian lo ngaihtuah zui se ka duh khawp mai a.

A dawt lehah chuan, chumi relate deuh hleka sawi ka duh a. Pi Rinpuii department chan, Demand No. 43 – Tourism hi, kan hrilhfhiah dan tur ka rilrua ka ngaihtuah dan nen khan a inang lo hle a. Member zahawm tak tak thenkhat te khan, “chawhmeh kan ei ang kan ei chhung chuan, tourist hi kan attract lo ang” tih te kan han ngaihtuah a. Hnam puitling zawk chuan, hnam chi hrang hrang ei leh in te hi an ngaipawimawh a, an originality kha humhim sak an duh zawk thin a. Chuvang chuan, kei chuan ka ngaihpawimawh lai zawk chu, *Domestic Tourism* hi a ni a, hei hi chak takin kan kalpui thei niin ka hria a.

Chutih rual chuan, kan House Leader hi thil ngaihtuah nasa em em mi a ni a, a lo ngaihtuah tawh em ka hre lova. Nichin khan member zahawm tak tak te’n an sawi ang khan, tourist attract-na tur hmun hi kan ngah em em mai a. Ka bialah pawh Dampa Tiger Reserve zau tak, ‘*Untamed Sanctuary*’ kan nei a ni. Dan angin luh phal sela, miin research neih nan te an hmang thei a. Hei hi han popularize chho ila chuan, khawvelah hian hetiang natural thil hi a van tawh avangin tourist hi chu automatic-in kan ngah hle ka ring a. Sorkar hmasa ah pawh ka sawi tawh thin a, helai hi ka ngai pawimawh hle a. A hruaitu tur - guide fel tak pein, khungah te khuan tent (puan-in) nen te riak lut ila. In la kal ngai lo mai thei a; kei underground laiin ka kal tawh thin a. Amazon te kan han thlir a, an ramngaw leh an luipuite, tui a lo tlemin sangha a thi pup pup; mihringin an khawih si loh ang hi tam tak a awm a ni, khu laiah khuan. Kha kha, ‘ecological balance’ an tih ang chi, rannung in eitawn an nih avanga nungte kha an awm a ni; a hmuh a nuam em em mai a. Chuvang chuan, heng te hi kan Minister hian ngai pawimawh se; *dan leh*

dun lai kha chu ka hre lova, kan House Leader hian zau takin lo thlir pui se ka duh khawp mai. Khumi hmang khuan nasa takin tourist kan hip ka ring a ni.

Tin, Demand No. 29 - Social Welfare hi, nichina member zahawm tak Lawngtlai West Bialtu sawi ang khan, tunhma chuan he deptt. kal tlang hian MSDP – ‘Multi Sectoral Development Project’ hmangin Central lamah sum kan haichhuak thin a, project te siamin. Amaherawchu, central lam hian an rawn ti tawp ta a, PMJVK-in a thlak daih mai a, a guidelines te; ka bialah khuan kan tuar nasa em em a ni. 1st installment - sikul sak te, health sub centre sak te; la sak zawh si loh, a bunga sak te kan nei a ni. Kan contractor-te kha an mak khawp mai a, a bung te’n kan han sa thiam a, nasa takin kan buaipui a. Helam enkawltu Social Welfare kha department pahnihah kan then tawh bawk si a, khulam atang khan an rawn ti tawh bawk si a. Tiang khan, harsa takin kan awm a. A enkawltu Secretary te pawh ka hrilh thin a, nasa takin an bei a. Kha kha engnge a chanchin, kan minister hian min lo hriatpui se ka duh khawp mai. Second installment a la thlen loh avanga wawiinnia health sub-centre tha tak nei turte, school building tha tak nei turte, hall tha tak neiturte kha kan la implement lo a ni.

Tin, Pu Speaker, Demand No. 24 - Health & Family Welfare-ah hian, kan minister hi ka rin aiin a smart a. Amaherawhchu, ‘information diklo deuh a nei nge aw’ tih te erawh chu min ngaihtuah tir a. *Zawhna & Chhanna* ah khan, eng emaw mumal lo ang deuh hleka health clinic centre te dina, health workers leh helper-te dah ang khan a dawng a niin ka hria a. Hei hi ngaihtuahna mumal tak senga SEDP sum hmanga tih a ni a.

Keini aspirational district - Mamit ngat pheih khu chu, hnam chitin kan awm a. Khaw inthenawm hnai te pawh ni sela, hmeichhia raipuar te, khawhrana mi hnena (an ngaihtuahna ah khan) va in show ang deuha ngaiin, raipuar inentir kha an hreh thin. Khaw tin kan ngenna angin Sorkar khan min kalpui a, kan death rate pawh a san phah em em mai a. Chuvang chuan, ngaihtuahna rampum huapa an hmang lo anih pawhin, aspirational district hi chu heng Sorkar hmasa hmalaknain health clinic centre kan lo din tawh a, health-worker leh helper kan dahte tal hi chu special case-a min ngaihtuah kan duh khawp mai. *Aspirational* kan nihna kha a thu chauh ni lova min hriatpui ka duh a.

Tin, crore ₹1,000 ngawt mai Asian Development Bank atanga Sorkar hmasaa Minister chak tak Dr. R. Lalthangliana te, CEO Dr. Biakthansangi te nena June 2022-a an lo zuk tihfel deuha kha, nichinah House hriatah khan kan Minister khan a sawi a, “bawhzuia, June thla vela agreement sign kan beisei a ni” a tih kha a lawmawm khawp mai a. (**Hon. Speaker:** Minute a liam e.) Aw, Pu Speaker, point khat lek; ka tawng a muan kha.

Ka han sawi duh laia chu, hei hi MNF Ministry lo ding hmasaina healthcare scheme a lo duanchhuahnaah harsa taka a lo kalpui a implement-na tur a ni a. Hei hi min ngaihpawimawh sak a ni tih ka hriat hian lawmthu ka sawi a.

A tawp ber atana ka sawi duh chu, Pu Speaker, Demand No. 31 - Agriculture chungchang a ni a. Bial anga sawi kha i'n ti lo deuh tak na a, kei ka bial khu tunhma atangin agriculture potential kan nei tha a. Amaherawhchu, hmalak a awm ngai lo a nim UT atangin; mumal taka kalpui a awm lova. Hei, kan sawi diat diat a, kan Minister smart tak hian a bik takin Phulzau Society tan vawiinniah hian tractor min pe a, ka lawm khawp mai a. Hei hi Saithah-ah leilet hmun zau tak kan nei a, tui lakna tur tha tak kan nei bawk a. Chief Engineer kal hmasa ta, Irrigation enkawltu pawhin, "hei tluka tui lakna tha hi a awm tawh lo; Mizoram hi ka hrechiang" a tih khawp a ni a. Hengah hian lawmthu ka sawi pahin, hmalam pana agriculture-a kan intodelhna turin he budget demand hi ka thlawp takzet a.

Chutih rual chuan, kan Vety Minister-in a demand sawi dawna, polite tak maia artui min han pe kha, kan lawm khawp mai; a chin fo tlak a ni. Nimin lamah khan RD Minister-in silpauline emaw semna chang a hrelo hlauh erawh kha chu, kan vui ni lovin, tihdan phung kalh pawh ni chuang lovin, a tihtur kha a ti lutuk lo em aw, tih te chu min ngaihtuah tir a. Chuvang chuan, vawiinniah hian chaklo chung chungin, Pu Speaker, kan minister pathumte demand hi lungawi takin ka pawmpui a. He House zahawm takah hian, ka hawsan che u a nih pawhin, lo inlunguala, lo inpass-pui turin ka'n recommend a ni e. Ka lawm e.

HON. SPEAKER : Kha, taka na; kan Vety Minister kha, kan naute'n min lo hrilh lova; vawiinah ka hre chauh a. 'Artui plate hi minister-in a pe che em maw ni le' an ti a. "Khawi atangin nge?" ka ti a, "Vety lam a ni awm e" an ti a. (**Pu C. Lalsawivunga**: Kan Health Minister pawh khan min pe a nia.) (**Pu Lalrintluanga Sailo**: Aw, Health Minister pawh khan arawn pe bawk tak e. Vawiin chu lawmna tur a ni e, kan va lawm em, Pu Speaker.)

Kha kha ka sawi khek a ni a, kan Dampa Bialtu khan a sawi lova; 'Keini chu kan dawng bik a sin' tih kha ka han tum deuh a ni a. A lawmawm e.

Hei, zing lama kan sawi ang khan, kan luhkhawm leh chuan minister-te kan ko mai tawh dawn. Tikhan sawi tur kan awm tawh lovah kan ngai thei mai em? Opposition Leader-in sawi duh a nei em?

A tirah khan ka sawi a, 'Opposition Leader leh House Leader hi a hranpain kan ko dawn lova, an duh chuan an sawi thei tho a' te kha kan han ti deuh reuh a. Ban an phar loh kha chuan tihtawp ka lo tum deuh mai a. Amaherawhchu le, (**Pu Lalrintluanga Sailo**: Pu Speaker, tuna i sawi dan kha a polite khawp mai. "Sawi duh a nei em?" han tih laia kha chu, a tha khawpin ka hria.) Tunah Opposition Leader i sawm ang.

PU LALCHHANDAMA RALTE, OPP. LEADER: Pu Speaker, kan Minister pathumte demand kan sawi dawn a, department 10 a ni a. Kei pawh reilo thei ang ber

ka'n tum ang a. Lawmthu kha ka sawi ang ka ti a, amaherawhchu, kan zavai aiawhin kan Minister thilpek min petute chung a i sawi ang kha, keipawhin ka'n tawmpui mai ang a. Demand No. 19 - Local Administration-ah ka'n lut nghal mai ang a.

Pu Speaker, Sorkar kal liam ta MNF Ministry khan Village Council-te enkawl na Dan te kha kan han chai thin a, Cabinet-ah tum hnih arawn lut chho a; eng emaw han tihfel ngai lai leh department dangte nena thu leh hla inchuh awm palh theiah, "helai hi han tifel leh deuh teh u" tih kha kan nei a. Kan Village Council-te, an hun kal leh zel tur atana enkawl na dan tha tak neih a tul avangin, chu chu tuna kan ministry thar pawh hian inrawn bawhzui ka ring a. Helai hian dan felfai tak nen an in-govern hi a tul nia ka hriat avangin, khalai te kha ka han sawi duh a.

Tin, Village Council hi eng emaw chen atang khan an term hi kum 5 a rawn ni ta hi, tawngkama kan sawi leh hmun tam takah hian, 'kum 5 hi chu a rei deuh a ni' kan ti tlangpui a. Tunhma ami ang khan "kum 3 hian a kal leh thei em aw, Panchayati Raj tak tak ang khan kan kal chuang si lova" tih te hi a awm a. Hetah hian kan Sorkar hian ngaihtuahna a nei em? Kum 3-ah te hian kal leh ta ila, thingtlang lamah pawh kan mipuite hian a tawk an tih bakah, anmahni thlan tlin ngeite pawhin anmahni inchhungkhur an uap hleithe i baw si lo nen, rei an ti angreng fo mai a. Chuvang chuan, heng te hi dan an ennawn hunah pawh rawn belh tel theih se, tih kha ka han sawi duh a.

Tin, kan Sorkarin heng Village Council, LAD ho hnuaia Resource Mobilization Committee kan han siam te kha; tunah hian resource kan neihna tha angreng deuh mai, LAD Park te, Lalsavunga Park te, Brig. T. Sailo Park te, District Park te leh Lunglei District lama kan neihte atang hian sum leh pai te kan la lut thin a. Heng ang a hmunhma te pawh tlema han tuaihnum chuan sum leh pai tam zawk kan lakluhna tur atan tea hman theih a ni a; rin aiin tlawhtute pawh hi kan nei viau zel mai a. A bik takin Aizawl hnai, Lalsavunga Park phei chu an tam thei khawp mai a. Helai hi resource mobilize nan a thain ka hria a ni.

Demand No. 23 - Art & Culture hi, department pawimawh tak, kan hnam, kan nihna, kan ziarang te, kan culture te min vawnnun saka min vawnhim sak tu, thangthar lo kal zel tur thinlunga tuhtu anih avangin, a pawimawh ka ti khawp mai a. Helai hian pawh hian, (vawinah pawh kan sawi) Mizote kan festival pawimawh *Chapchar Kut* te pawh, Sorkar leh YMA te nen; a bik takin a department, Art & Culture te bul tumin ropui takin hmun hrang hrangah kan lawm thin a.

Chutih rual chuan, nikum lawkah khan Sorkarin mipui hrang hrangte rawtna leh NGO te, MKHC te nen pawh tang hova sawikhawmin, 'Chapchar Kut nilo, *Mim Kut* hi festival lian kan neih a ni a, I organise teh ang' tiin an rel a. Chu chu nikum atang khan kan hmang tan a, Chapchar Kut ang erawh hi chuan a lar lutuk lova. Kan hnam zahawmna atan pawh thil pawimawh leh, mite'n, "Eng festival nge in hnamin in neih?"

tih nikhua pawha kan sawi ve tur thin a nih avangin, kan Ministry thar pawh hian awmze nei zawka han tiha sorkar calendar-ah te pawh han chhinchhiah vea, zau zawka kan hman theihna tur kawng han zawn te pawh a tul hlein ka hria a ni.

Tin, kan naupang hote zingah kan hnam lamte zirtirtu tur instructor te an mamawh a. Art & Culture hian instructor hi an nei tlem telh telh mai a, hengah hian a department hian instructor tam zawk naupang thangtharte hnenah kan hnam, kan culture zirtirtu turte pawh ngaihtuahpui a tha ka ti a. Kan cultural dress-te pawh hi tunhma deuh kha chuan Art & Culture atang hian YMA leh pawl dangte hian subsidize-in an la thin a; heng te hi kan la nei em? Tin, darkhuang te pawh hi kan cultural item zinga thil pawimawh pakhat a ni a. Thingtlang bialtute kan ni a, Upa Pawl hian veng tinah hian darkhuang hi an mamawh a, chhiat ni ah hian an duh a. Darkhuang te pawh tunhma kha chuan subsidize-in a awm thin a, MLA ten kan mamawh thin khawp mai a. Heng te duh duha lei mai tur a awm lova, bazar-ah lei tur a tam fu tho thin si a. Heng te pawh hi kan Art & Culture Minister hian min lo chhinchhiah sak se; heng an budget tlemte chhungah pawh hian lo ngaihpawimawh tel a tulin ka hria a ni.

Demand No. 27 - District Council & Minority Affairs hi - hei, 6th Schedule hnuai a awm anni a, kan District Council te hi autonomy hrang nei an niah hian, kan House-ah pawh MNF kan sorkar lai leh tumah pawh a ni a; eng emaw District Council chungchang han sawi hian inbah kaih lek lekna a awm leh fo thin a. Helaiyah hian Constitution in thuneihna min pek ang chi te, kan subject neih chinah hian inzah tawn taka, inhrethiam taka kan kal fo hi a tulin ka hria a. Heng kawngah hian thawhhona tha kan neih hi tul ka ti a. Eng eng emaw district council area bika hman loh tur chin te pawh kan pass a. Chutihlai chuan, kan District Council lam te pawh hian State sorkar hnuai a awm tho kan nih zia kan hriata, heng sum leh pai chungchanga sorkarin min enkawl na kawngah strict zawka kal a ngaihna chin te a awm fo a, kan Autonomous Council hrang hrangte hian sorkar a inthlak pawhin an hnathawh lo ti chak zawkin, revenue expenditure sang lutuk avanga capital expenditure tur awm mumal lo awm thin hi State lam atang hian vilpui a ngai thin a ni. Hemi kawngah hian kan sorkar hi a inthlahrun ngaiin ka hre lova. Chutiang a nih loh chuan, thang leh thar lokal turah kan hnam rohlu tak Autonomous District kan neihchhun te hi kan ti pamhmai ang tih hlauhna ka nei fo a ni.

Demand No. 34 - Animal Husbandry & Veterinary hi Mizoram-in kan ei bel, sa thianghlim kan ei theihna turin kawng hrang hranga an thawhhlawk zia te kan hmu a. Kan demand a sang tak em avangin State dang atangin sa tam tak kan la lut thin a. A dik tak chuan, tam tak la la lut tho mah ila, kan tharchhuah pawh hi a tam tawh viau a ni. Kan department hmalakna pawh hi, hun hmasaa kan minister hluite pawh hei an thu hlawm a; an hunlai atanga an hmalakna pawh kha a tha hlawm khawpin ka hria a ni. Chungte chu kan sorkar pawh hian a rawn chhonzawm chho zel dawn a.

Nichina kan ngaihthlak tawh ang khan, sorkar anga ranvulh vak vak ang chi te ai kha chuan, mimal entrepreneur-te tih phur nana kan hand-holding policy te pawh hi hman a tulin ka hria a; a bik takin, vawk chaw a ni emaw, ar chaw a ni emaw, ran dang chaw te pawh hi subsidize-in mimal farm siam te hnenah tam zawk kan pek theihna tur te. Tin, an in sak tur emaw, pawh kan mithiamte kaltlanga an hmunhmaah te pawh clinic han neih sak ang chi te pawh hi uar zawkin kal ta ila. Chu chuan thianghlim zawk leh awmze nei zawk, sorkar sum sen tlemna ni si, production tam si hian a kal thei dawnin ka hria a, chutiang tur chuan ngaihtuahna kan hman a tha ka ti a.

Tin, ran hrang hrang, khawvel hmun hrang hrangah breed tha zawk leh hlawk zawk tur te pawh sorkarin a ngaihtuah zel ang a, chu chu kan mipuite hnenah tihpuna pek hi sorkar hian kan mawhah la ta ila. Keimahni ina farm siama vulh vak vak mai te hi *Sumthuni-nu* te awm palh theih avangin, khati zawng khan kal theih ni se.

Demand No. 31 - Agriculture hi, Mizoram economy hi kan sawidan a inang lova; ‘Agriculture-ah 60-70% a innghat’ tih te a awm a. Eng le khaw le, a *lion-share* chu agriculture-ah a innghat a; tin, agriculture base eizawng pawh kan tam ber a ni. Chumi avang chuan kan ngaihpawimawh ah a tang lo thei lova. Tuna kan sorkar thar pawh hian ngaihpawimawhin, priority sector-ah a dah hi lawmawm ka ti a. Chumi hnuaiiah chuan Sustainable Development & Reform Policy (SDRP) a siamah point no. 2 ah khan ram leilung hman tangkai dan tur - *Land capability classification* kha a rawn ziaak a. Chu chu tun budget-a kan pass hmasak turah hian kan sorkar thar hian khatiing kalpui tumin a ruahman em; eng tiangin nge hman tangkai a tum, tih leh, kha lehkhabu ah vek no. 3 ah khan Phai-zau, Zo-zau te nasa zawka develop tum a nih dan te, society base-a kal a tum dan te kha a rawn sawi a, a tha khawpin ka hria a. Khalai kha kan uar a tul tawh avangin, tun kan budget pass tur, kan demand-ah hian khalam hawi zawng khan min kalpui tan dawn em, tih te ngaihtuahnaah a awm a. Chumi tihlawhtlinna tura pawimawh em em chu, *Agriculture link road* hi a ni.

Thingtlang bialtuteah phei chuan hei hi kan mu tan a ni a. Kut-hnathawktute’n khawi lai zau emaw an va bawha thil pawimawh nghala chu, a approach road bawk kha a ni. Helai hi kan Finance Minister pawh hian agriculture lamah hian potential area bika link road laihna tur tam zawk kan pek hi kan economy thatna tur, kan GSDP thatna tur a ni. Chuvangin, chulaiiah chuan kan sorkar pawh hi a phalzau a tulin ka hria.

Kha kan lehkhabu atanga zawhna pakhat ka neih, Agriculture changtu ministerin min chhana tana kan duh chu – ‘Urban farming uar taka kalpui a ni ang’ tih kha a awm tel a. *Urban farming* kha eng lam hawi zawng nge ni, tih kha min ngaihtuah tir a; ‘khawpui chhungah eng farming nge kan tih ang’ tih lai kha. Mizoram chhung kan khawpui hrang hrangah farming kan kal dan tur kha, kan sorkar thar hian eng ang ruahmanna nge a neih? Chu chu kan SDRF-a inziak a nih avangin kan sawi a ni.

Tin, sorkar hmasa khan solar cold storage kha RKVY scheme hnuaiah hmun 12-ah dah turin ruahmanna a siam a. Kha kha kaltlangpui chhoh zel tum a ni em, tih te kha ka zawt duh bawk a. Tin, APMC - Agriculture Produce Marketing Committee Act te kha siam a ni a, khang hnuaiah khan agriculture product-te kan market kalpui dan tur te ruahman a ni a, kan Agriculture Minister chairman-na hnuaiah. Thil chin tur kan han tihte chin hlawhtlin a lo niha, a hman dan tur te, kha kha engtin nge kan kalpui dawn, tih te ka hre duh bawk a ni.

Demand No. 37 - Cooperation-ah hian tawite kan sawi duh chu - He department hi kan ministry thar hian tih pawimawh in tum viau dawn niin kan hria a. A chhan pawh, a lan danah engkim hi society base-in; kut-hnathawktute thlathar te pawh primary society base-in emaw, state level society base-in emaw tih ral hi kan tum deuh niin ka hria a. Helai hi a pawimawh a, tih chak a pawimawhin ka hria a. An budget lam erawh chu, a la tlem mah mah a; RE lamah kan Finance Minister hian Cooperation lam hi sorkarin lian zawka chet tir kan tum avangin, ngaihpawimawh a tha ang a. Develop countries-te an changkanna chu, society oriented-a kal thin an nihna hi a ni a. Hei hi kan kalpui dawn a nih chuan, hnathawh kawr kan hakna turah hian tihchak an tul mang e, tih kha ka'n sawi a ni.

Pu Speaker, Demand No. 47 - Irrigation & Water Resource, kan hriat angin kar hmasa lawkah khan anni hian tun Ministry thara bill hmasa ber an rawn pulut a. Tuihna humhalh leh tui kan neih ang chhun chhun, kan resource neih ang te hman tangkai dan tur leh, chumi kawnga thuneitu chu an ni ta a, an pawimawh khawp mai a. He department hi la lian tawh lovin, district zawng zawngah la inzar pharh lo mah se, kan hun lo kal leh zel tura sustainable development kan kalpuina tura a *key-post* chelhtu an nih dawn avangin, an ni hi tihchak a tulin ka hria a. Tunah hian anmahni hnuaiah hian kut-hnathawktute tanah solar tui pump scheme - PMKUSUM hnuaia unit 1700 sorkar hmasain kalpuia a tender tawh kha kut-hnathawktute a thlen theihna turin chak zawka hma lak zel kha a tulin ka hria a ni.

Pu Speaker, Demand No. 24 - Health & Family Welfare Deptt. ah hian tawitein. Mizoram hmasawna tak tak chu kan health dinhmun hi a ni a, chu chu mite'n an thlirna tur a ni a. A ram mipuite changkan leh changkan loh tehfung chu health sector-ah hian a ni a, ram lian kan nih avangin, helamah hian kan thang chho mek zel a. Than a pawimawh a, priority sector-ah pawh kan dah a tul a. Zoram Medical College kan neih te kan kal dan turah sum leh pai a hautak a; kan han buai a, 'central ah pe mai ang' tih te, 'Central-in special package kan pe dawn che u an ti' tih velah kan buai a. Tukin zinga kan health minister-in zawhna a chhanna khan min tihlawm a, phurrit deuh awm bawk mahse. Doctor zir chhuakte an bond sign avanga thingtlanga an kal ngei ngei ngai te kha, ZMC hi kan state ta a nihna khan an chungah thuneihna thui tak min ken tirin ka hria a. Chumi a nih lova, central hnuaia a lo nih chuan, thuneihna tak tak an chungah kan neih dawn tawh loh avangin, a lo zir chhuakte posting hard area-a awm tha duh lote

pawh kha kan control thei dawn ta lo a ni. Chuvang chuan, kha laite ZMC ropuina leh thatna kha kan hman tangkai a thain ka hria a ni.

Tin, emergency service hrang hrang kan neihna district hospital-ah a ni emaw, civil hospital ah a ni emaw, hengho ah hian bungrua tha zawk kan pek a thain ka hria a. State sorkar ber hian MRI khawl te pawh duh anga tha kan nei hlei thei lo; private ah kan kal kan kal mai pawh hi sorkar ang hi chuan hei hi ngaihtuah a ngaiin ka hria. Kan khawl neih CT-Scan chhe fo mai te leh private lam a tha reng zel mai te hi ngaihtuah tham a tlingin ka hria. Hengah hian state capital piah lamah Referral Hospital a ni emaw, district capital-ah pawh hian kan sum neih ang chhun chhun hi mipui hman tura kan chhawp chhuah tha ka ti a.

Tin, CHC, PHC leh Sub-Center ah te pawh hian first aid emaw, immediate medical kit emaw te hi mipuite hnenah man tlawm zawka pek theih hram hram dan zawn hi, he sorkar hian healthcare a ngaihpawimawh zia lantirna atan a tulin ka hria. Healthcare sum ADB nena kan tihfel tur te a lawmawm a; Cancer Specialty Hospital, Zemabawk-a kan han tan chho tur te pawh a ropui a, hei hi chak taka a kal ka duh tak zet a ni.

Demand No. 29 - Social Welfare pawh hi tihchak ngai a ni a. Ruihhlo leh harsatna hrang hrang, khup zawi leh tanpui ngai zawkte tanpuina kawnga hna an thawhna turah hian tihchak an ngai a. Vawiinniah mizo nula-tlangval Home ah an tam lutuk te hi, engtin nge kan tih reh ang; social evils hi engtin nge kan beih ho ang, tih hi ka rilruah a lian em em mai a. Helai hi sorkarin 'beihpuiah kan thlak dawn a; priority sector-ah kan dah' an tih hi; helaiah hian sum leh pai tam zawk nena kan thawh a tha ka ti a ni.

A tawpna atan chuan, Pu Speaker, Demand No. 43 - Tourism hi, ka'n sawi leh duh hram chu – Tourist chi hrang hrang, foreigner a ni emaw, domestic India lam atangin a ni emaw, local tourist te emaw pawh kan han nei a. Tourist Lodge department-in kan neih ve te hi tihchangtlun a tul khawpin ka hria a. Kan outsource te pawh hi department hian kan outsource hnuah hian engtin nge kan enzui, a khat tawh hian kan va tlawh thin em? Kan tourist lodge khawi khawiah emaw hian kan thleng thin a, rin ai chuan outsource tawh chung pawh hian guidelines mumal tak kan pek loh chuan, sum earn tho si hian, khualzinte tana thlenna tlak mang lo hian a awm a. Loh theih loh, duhthlan tur awm si lo hi a awm fo hi, kan ram hmel tur a nih avangin hemi kawngah hian department te an tan a tha ka ti a. Ministry hmasaah khan hotel te, restaurant te enkawlina tur dan te kan siam te pawh kha, enforce that a tul khawp mai. Hei hi tihchangkan hret hret a tul a; *Dan* hi tha tak tak siam mah ila, a enforce lam hi a pawimawh avangin, chulai chu ka'n sawi duh a ni.

Tourist Guide - tourist hrang hrang kan neiah hian, tourist guide mumal sorkar hriatpui ngei hi engzat nge kan neih? Kan nei tawhin ka hre lova. Chutiang chu kan neih loh

chuan, lo kal zel turah hei hi revenue earning atan pawh a tangkai tel theiin ka ring a, helam zawng pawh hian kan hawi a thain ka hre bawk a ni.

Pu Speaker, dar ka'n en a, ka rin aiin ka lo hmang rei tawh a. Nangin hun tha tak mai, tawngkam khatmah min rawn khak miah lovin hun min han pe a, ka lawm hle a. Vawiin niah hian department-te demand-ah duh angin kan lut hlei thei lova, amaherawhchu, minister-te in dawhkanah remchangah kan rawn kal ang a; bial chungchang pawh vawikhat mah kan sawi lo a ni. Ram tan, kan Speaker duhdan angin sawi a ngai miau si a. Chuvang chuan, kan la sawiho zel ang a.

Vawiina kan Minister pathumte demand hi, 'kan ram tan, kan hnam tan thil tha tak tak hnathawhna tur a ni' tih hriain, lungrual taka kan pass-pui tha ka ti a, ka rawn thlawp e. Ka lawm e.

HON. SPEAKER : A lawmawm e. Ram kan vei tlang khawp mai; mahni bial chu sawi loh, thunawi a awm lo e.

Aw le, kan House Leader in sawi duh a neih chuan kan sawm ang a, tichuan kan chawl dawn nia. Ilo sawm ang.

PU LALDUHOMA, HON. CHIEF MINISTER: Pu Speaker i kaihhruaina hnuaiyah hian kalphung thar tha tak tak kan chher chhuak zelin ka hria a. Tunhma lampang khan Opposition Group leader din tawh hnuah member dang te'n din an ching em em a. A dik chiah chuan, member dang ten an sawi zo tawh nge tawh lo tih hriat si loh laia ban lo phar kha kan inthlahrung thin a ni. Tichuan, phar an lo awm mang loh chuan, kan lo phar a; Speaker-in min han ko a, chumi hnuah ban an phar leh si a. Speaker khan vawi engemaw zat a hau thin a. Tunah erawh chuan chutiang ngai lovin, sawi tur zawng zawngin an sawi tawh hnuah, 'Opposition Leader-in sawi tur a nei em?' i han tih khan, a fel thlurh mai a. Member-te pawhin hria ila; ding duh mang si lova, opposition leader a din tawh hnua din leh kha a mawi lem lo a ni. Hei hi kan practice dan a ni lova, kha kha thil mawi tak niin ka hria a.

Tin, hemi tablet, kan hma ami hi term hmasa khan a hnawk kan ti a; engmah a inziak lova, question chiah a inziak a, a chhanna a tel bawk si lova; tangkaina kha a nei lova. Tunah erawhchuan answer te a lo tel a, Rules of Procedure te pawh hmehchhuah theihin in rawn dah thlap ta a a lawmawm ka ti a.

Tin, tun tum kan Session pawn lam min min comment dan tlangpui ka lo hriat ve chu - "Thlir in nuam; ram tan thil tha in sawi tlang; in inhniai buai lo; a quality a sang" an ti a, a lawmawm hle a. A bik takin i veilama mite hnenah lawmthu ka'n sawi duh a ni.

Tin, Demand Discussion ah hian dar 10:00 PM te kan pel a, a boring em em mai a; fiamthu thiamte hi kan mamawh a nia, hetiangah hian. Hei, tun tum hi Pu Speaker, kan la tvisual tlem zawk a, ‘*Pu Chairman*’ an tih che khan kan nui hak hak a; term hmasaah kha chuan ‘*Pu Chairman*’ mai an ti hlei nem; ‘*Aw Lalpa*’ te an ti a ni. Hlado chham te pawh kan awm a ni; kha daih kha a ni.

Hmanah khan inbingbilait te pawh an awm a, chutiang chu a ni a. Tin, thil chhiar sual te pawh hi a awm thin a, helaiah chauh pawh hian kan chhiar sual a ni lova, biak-inah te pawh hian an chhiar sual thin a. Kan kohhran ka ti ve tawh mai ang a, Zarkawt Kohhranah hian kan Upa, doctorate degree lai nei ngat, (a hming chu ka sawi em lo ang a) (**Hon. Speaker:** Ngawi teh, ka’n inpuang teh ang. Niminah leh, engtik kha nge ni aw, ‘Naktuk chawhnuah’ tiin ka sawi tlat mai, ka’n inpuang ang e.) ‘Nia, *chawhnu* ti a ang mang e aw’ kan ti thin che a.

Awle, chu Kohhran Upa chu KTP inkhawmpuiaah a chair a, a zipper kha a zip lo si a. Nu pakhatin, “I zipper i zip lo ve”, tih ziakin lehkha themin a han pe a. Ani chuan, “Tunah zaipawl kan ko tawh ang a; an hla sak tur chu, *I zipper i zip lo e* tih a ni e” a rawn ti a. (*Memberte an nuitlang a*). Khangte kha thil awm fo a ni a. Chuvang chuan, tvisual lovin tumah kan awm thei lo. “*Humour in Parliament*” hi a bu in an siam thin a, helaiah hian fiamthu thiamte kan awm chuan, official lam te hian nge, lo chhinchhiah tawh te hi awm sela, nakinah a bu te pawha chhuah ve te pawh kan duh ang a, chu chu a thain ka ring a ni.

Pu Speaker, kan ZMC society chungchangah hian a thawktute an thlaphang deuh anga sawi te a awm a. Hei, sawi ho kan tum a, anmahni nen pawh kan inhmudawn a. Engmah an tan thlaphanna tur awm zawngin kalpui kan tum reng reng lo; ‘thlamuang takin lo awm rawh se’, tih kha ka’n sawi duh a.

Tin, kan VC tena Finance Commission grant atanga pawisa an hmuh tur hi kan vei tlang a, ka sawifiah tawh a. 2021-22 2nd installment atang khan an dawng ta lo char char a ni. Tichuan, 2020-23 kumpui lingletin an dawng lova, 2023-24 ral turah hian cheng khatmah an la dawng bawh lova. Chu chu a zialo deuha kan hriat avangin, Mizoram Finance & Account Service ami kan officer-te pawh kan puih tir a, ‘pui teh u’, kan ti a. Dawng thuai thuai turin kan duh a, an chingfel thuai dawnin kan hria a. A intahtawlin an la dawng thuai turah kan ngai a ni.

Tin, ADC - Autonomous District Council ho budget, a bik takin ‘CADC a tlem lutuk’ tih kha hmanni khan kan sawi tawh a. Thu kan nei lo khawp mai a, sorkar hian. Finance Commission kan nei a; an niina an ruahman dan ang khan kan kal ringawt mai a ni.

Tin, Tourism-ah hian kam hnih khat han sawi duh ka neih chu, sawlai ‘Lodaw’ kan tia mi kha? *Castle of Beino* saw ka kal tawh a, a ropui hi ka ti khawp a. Sawtiang saw a

vang khawp ang, khawvel hmun dangah pawh hian. Saw mi tluka Tourist spot tha saw Mizoram-ah a awm thei chuangin ka ring lova. A approach road a zim em em a, a hmunah chawlh hahdamna tur a awm lova, ei tur pakhatmah a awm bawk lova. Hei hi a ngaih pawimawhawm ka ti a; kan Minister pawh hian lo chhinchhiah sela, ngaih pawimawhah neih hmasa ila. Saw saw chu tourist attraction lianah kan chhuah vat ka ring a. Ramhuai Lalpa hova Parliament thutkhawmna te a awm a nia; an speaker thutna te pawh a la awm vek a ni. Kei pawh ka han thu ve chhin a nia, tahchuan. DPR te pawh department lamin an rawn buatsaih theih chuan, min rawn pe ve ula, eng emaw tia remchanga hnawhluh dan te a awm theih chuan, lo nei ve phawt ila, saw saw ngai pawimawh ila a thain ka hria a.

Tin, hei, *5 Star* hotel din duha pui hi an tam a, aw kan la pawh lem lova, an rawn ti sup sup mai a. Hei pawh hi ngun deuh hleka ngaihtuah a ngaiin ka hria.

Tin, tourist lodge kan outsource ho hi kan Leader of Opposition-in a sawi ang khan, kan outsource hnu hian competition a awm ang a, biak te an nuam ang; department-in an enkawl hi chuan. Mikhual neilo tawp mahse, an hahdam a ni mai a. Outsource anih chuan tan an la ang chu kan ti a, kha kha a principle a ni. Mahse, outsource a nih hnu hian tunhmaa kan thlenna ngaiah ka thleng ve nual tawh a, min ngaihsak lo em em mai a Ppuanthuah te a bal em em mai a ni. Sumdawnnaa kan la hniam zia, hei hian a tichiang hlein ka hria. Khang a enkawltu private ho khan customer lo deal dan te, mi an thlen chakna tur zawnga beihna chang hi an la hre lo hle. Ka tawng an haw maithei; mahse, ka hmuh tawh chinah chuan, ka beisei an pha lo. Chuvang chuan, tang deuh se ka duh khawp mai.

Tin, *Martarte thlan* chungchang kha ngaihpawimawh awm ka ti a, martarte thlan leh zel pawh hi politic nen kan kalpui a. Martar thlan pahnih kan nei a, pakhat CTI-ah; hengte hi a fel lo a ni. Kan martarte thlana hming chuangte khu martar tak tak vek anni. A lemin an thi lo. Kan zah tur a ni a, kan chawimawi tur a ni. Chuvangin, a department neitute pawhin hei hi chu rawn mangnghilh lo sela. Tin, independent suala kan chetna mai kha a ni lova, tunhma atangin zalenna sualtu kan lo nei a. Khuangchera te, Ropuiliani te Andaman jail-a zuk tang hlumte; Andaman jail, *circular jail*-a an tan hlumna te kha ka zuk tlawh vek a, an tanna lai record te haichhuah kan tum a, min lo cooperate tha em em a. Amaherawhchu, Japanese hovin an awp lai khan an lo hal fai vek mai a, an record kha hmuh tur a awm lova. Khang ho zawng zawng kha kan martarte anni. Chuvang chuan, martarte hi tute nge an nih; lungphun lian tha zawk pawh a sirah khuanin, tunhma atanga lo martar tawhte nena chhunzawm theih tur khan la siam zel te pawh a tha awm e.

Tin, Chapchar Kut chungchangah hian tawite han sawi duh ka neih chu, review committee hi neih a tul hlein ka hria a. Hman remchang ila chuan, 'review committee hi koh tur a ni' ka ti a, kei pawhin review chak ka nei a ni. Thenkhat programme an neih

dawna inbuatsaih tha tawk lo lutuk leh khatia kan ngawi reng mai, hun khawhral tam lutuk ang te kha, thenkhat chu ka hmuh ngeiah music tumtu tur an zawng chawp a ni, koh annih tawh hnu khan; hengah hian mipui an zahawm.

Tin, kan hnam lamte pawh hi modify ve deuh chu a tha a ni vVawikhat Independence Day-ah Mizoram khan khuallam an rawn entir a. An lam fe tawh tih khan, Pi Indra Gandhi khan “When will they start - Engtikah nge an tan dawn?” tiin min zawt a ni; lamah khan a ngai mang lo a ni. Chuvang chuanin, heng kan lamte hi tlemin han modify ve ila emaw, monotonous deuh a ngai leh, a ngai ang chi emawa a hunchhung te hi reilo deuh tal sela; eng eng emaw hmasawna tur kan nei tamin ka hria a.

Tin, Mizoram khua leh tuite tumah kan inenhrang tur a ni lo ang; kan hnam lam theuh te, kan incheina leh kan culture te kan inggaihlut sak ang a; Chapchar Kut nikhuaah hianin tel kim te pawh a tha. Tun tumah khan nidanga la tel ngailo, kan ethnic group atangin rawn participate kan nei nual a ni a, tel tam zel kha kan duh ngawih ngawih a ni.

Tin, Budget chungchangah hian - Ni e, budget an lo nei ngai lova, Pu Speaker. Tun atang chuan Art & Culture-in, ‘Chapchar Kut tur budget hi rawn dah ziah rawh u’ kan ti ta a, tun hnuah chuan kan buai tawh lovang a. A tul chuan dah thathnem chhoh zelte pawh kan tum dawn nia.

A tawp bera kan sawi duh chu - tunlaiin missionary-te, kan thawnchhuak a; an culture kalh zawngin tumah kan che tawh lo. An inchei dan ngaiin, an musical instrument ngaiin kan ti. Mizoram chhung ngeiah pawh *Masihi Sanghati* te kan ti a, mizo ngei an mahni incheiin kan inchei a, kan biak-in ah kan zai a, vai khuangte nen. Chutiang chuan, mi culture kalha Pathian thu va hrilh hi, ‘a lo tih chi loh a ni’ tih kan hria a. Kohhran chanchin kan zir chuan China te, Japan te, Russia te, India ramah te ngei pawh kohhran ropui tak tak a ding tawh a ni. Engvangin nge a ral leh thin, kan tih chuan - Sap culture an introduce a, an culture nen a inmil loh avangin a survive theilo a ni. India ramah ngei pawh Sadhu Sundar Singh-a rawngbawlina a hlawhtling em em; amaherawhchu, Sap culture tel chi ang kha a survive theilo a ni. Chuvang chuan, an do tlat a ni. A sakhuaa kha an do a ni lova, a culture kha an do tel thin a ni. Chu chu, ‘a tih chi tawh loh’ tih kan hria a. Keimahni mizote ngei pawhin missionary kan tirchhuhah hian an culture hrulah kan bei ta zela. Chuti a nih chuan, missionary-te an lo luh laia kan culture kha heti tak maia rahbeh leh tih hniama lo awm ta hi, khami kha kan revive ve leh hi a sualna a awm miah lovin kei chuan ka hria a. Kan hnam hla thluk hian Pathian hla tha tak tak phuah theite hi awm sela, zu leh sa nena chawm lovin, zahawm takin, thinsung takin Pathian fak nan sa ila, kan hnuk a khawih ngei ka ring a ni.

Chapchar Kut-ah kan hnam zaiin an han zai a, thangthart’ en kan hnam zai an la hre ngailo, mahse, an su dup dup mai a ni. Kan rawltharte hnuk a khawih tlat a ni. Pasaltha

chanchin rawngbawl chung te, lehkha zir chung te'n an ngaithla a, ngaihnaawm an ti tlat. Khalai kha an hre pha reng renglo, mahse kan culture a bet a ni, hetah hian. Chutiang tinung zawnga kan kalchhoh zelte hi a pawimawhin ka hria a, kan hnam culture nena inmila Pathian kan fak chhoh zel te pawh hi a tha a. Seki te pawh hi kohhran thenkhatah chuan an la tum ngamlo a ni. Tingtang kan lakluhna ala reilo; khuang pawh kan hmelma-en chhung kha a rei lutuk; kan lakluhna a la reilo; Setana kan pe zel a. Tunah erawh chuan kohhranin kan chhuhsak mek ta zel a ni. Heng hi a nih avangin, kan Art & Culture Department te pawh hian kan tisa lam mai ni lovin, 'kan thlarau nun thleng hian kan culture hian inzawmna a nei a ni' tih hriaa hma an rawn sawn chhoh zel hi ka duhsak em em a ni.

Aw le, Pu Speaker, heng kan Minister-te demand hi vawiinah pawh lungrual takin kan pass ho leh dawn niin a lang a, a lawmawm khawp mai; lawmthu ka sawi e.

HON. SPEAKER : A lawmawm e. Tikhan kan chawl ang a, kan lutkhawm leh ang a. Kan Minister te'n an demand te an move tawh a, pass dil turin kan sawm dawn ang a. Tunah dar 5:48 PM vel a ni a, dar 6:30 PM ah kan lutkhawm leh dawn nia.

(Recess)

6:45 PM

HON. SPEAKER : Khai le, tunah chuan Minister zahawmtak Pu C. Lalsawivunga, a department demand kan sawihona te rawn wind up turin kan sawm ang a, a sawifiah ngai te rawn sawifiah nghal se la. Tin, a demand te House ah pass rawn dil nghal se la; i lo sawm ang u.

PU C. LALSAWIVUNGA, HON. MINISTER: Pu Speaker, ka lawm e. Vawiinniah ka Demand No. 19 - Local Administration Department te, Demand No. 27 – District Council & Minority Affairs te, Demand No. 23 – Art & Culture leh Demand No. 34 – Animal Husbandry & Veterinary demand te kan sawiho a. Ka lo chhinchhiah zel a; vawiinniah thahnemngai takin mi 20 chuangin ka demand te min rawn sawipui a, a lawmawm hle a ni. Tin, Demand rawn sawitute reng reng kha ngun taka ka lo ngaihlakin, a lawmawm ka ti a. Thahnemngaihna a nasa hle a, thahnemngai takin ram tan ngaihtuahna an rawn hmang a. Demand-ah pawh fuihna te, rawtna te, hmalam pan tura an thahnemngaihna te an rawn sawichhuak tlangpui a, a lawmawm hlein ka hria a. Chuvang chuan, Pu Speaker, windup-naah pawh hian ka rilruah chuan, 'a hranpa taka sawi teh chiam pawh hi a tul lem em maw ni' tih ka ngaihtuahna a. Kan zavaiin kan lungrual hlein ka hria a ni.

Tichuan, kan member zahawm tak tak ten an rawn sawi kha theih ang angin kan lo chhinchhiah a, ka rawn react vek lo a nih pawhin, kan la sawiho zel thei turah pawh

ngai ila a thain ka hria. Pu Speaker, zaninah lawmthu han sawi duh ka nei a. Hei, kum 30 active politics luhchilhin i dinglamah ka han thu ve a, kan hotute duhsaknain. Demand for Grants pharh ve thei a ka awm hi Pathian khawngaihna a ni a. He dinhmuna min hlangkaitu, Aizawl South-I bial mipuite chungah a bik takin lawmthu, he House zahawm tak kaltlang hian ka sawi a. Tin, reilote he hmun ka han thut chhungin, i veilama mite hnenah pawh hian lawmthu sawi ka duh a. Budget Session-ah thahnemngai takin ram tan an hriatna te, an finna te an rawn sawichhuak thin a, hei hi a hlu ka tiin, lawmthu ka sawi a.

Tin, kan hotute'n department 4 enkawl hna min han pek ve-ah hian kan officer-te, department 4 a thawktute zawng zawng chungah, zaninah hian lawmthu ka sawi lo thei lova. Min cooperate-na hi a tha em em a. Kan thawk hova, unau angin kan awm niin ka hria a. Engkim mai inpawh takin kan ti ho a, an thahnemngaihnaate a hlu ka ti a. Chuvangin, ka department chana officer zawng zawngte leh thawktu, a te ber atanga a lian ber thlengin lawmthu an chungah ka sawi bawk a ni.

Tichuan, Demand No. 19 - LAD ah hian han lut ta ila. Local Administration Department enkawlna tur sum ruahman hi lakh ₹20831.40 a ni a. Tichuan, kum kal mek 2023-2024 BE ai hian kum thar 2024-2025 BE ah hian lakh ₹2626.53-in a pung a. Hei hi a lawmawm hle in ka hria a, lawmthu ka sawi a. Tin, kan memberte pawhin thahnemngaih thilah thingtlang hmasawna leh thingtlang khua a awmte tihchangtlunna tur - step te, kalkawng siamthatna tur te, retaining wall te, side drain te thawhna tur atan, '*Minor Works*' ah pawisa a awm tlem deuh mang e' tih thanhnemngaihnaa an rawn sawi te pawh kha rilruin a hria a. Engpawhnisela, Pathianin min hruai ang a, hmasawn zawngin kan kal zel turah i beisei phawt mai teh ang.

Tin, 15th Finance Commission chungchang hi han tarlan tulin ka hria a. 15th Finance Commission Grant 2021-2022, 2nd installment release hmabak te ngaihvena nawr turin Secretary, LAD leh Dy. Director, Accounts LAD te ni 20.2.2024 khan Delhi-ah kan kal tir a, Delhi-ah Finance Ministry an zu dawr a. Tah chuan, a tul ang ang document te an hlan fel hnu ah, Ni 22 February, 2024 khan Ministry of Finance chuan 2021-22, 2nd installment crore ₹34.50, tied leh untied-a hman tur chu an rawn release fel a. Tin, hemi bakah hian crore ₹35.50, 1st installment 2022-2023 pawh hi kan naute hnenah hian rawn release leh nghal mai an tum thu an rawn hrilh tawh a, a lawmawm hlein ka hria. 2021-2022 pawisa hi an rawn release-na rei tawh mah sela, K-Deposit ah rei tak dah a nih avangin, VC-te account-ah hian transfer theih mai a ni lova. Amaherawhchu, chuti chung chuan finance atanga release a nih hnuah department pawhin theih tawp chhuaha hma lain, VC te account-ah thun fel a ni a. Central atanga 2nd installment an rawn release pawh hi, ni 9 chhungin tunah hian kan VC-te account-ah a lut hman vek a ni. Tah hian LAD-a kan Officer-te an thawhrim zia a langin ka hria a. Ni 9 chhunga VC-te account a an han dah lut vek hman hi, fakawm ka ti a, an chungah lawmthu ka sawi a ni.

Tin, VC Dan siam chungchang pawh kha kan ngaimawh tlang hle a, an rawn sawi chhuak nual mai a. VC - Village Council-te hi *local governance* tha taka kengkawhtu tur an nih avangin, thuam chaka, hna thawk thei tura siam a pawimawh em em a, India Sorkar pawhin hei hi ngai pawimawhin, theih tawp a chhuah zel a. India ram state dangah *Panchayati Raj* system hman a nih laiin, Mizoram, Meghalaya leh Nagaland-te hian traditional local bodies kan la nei a. PRI-ah chuan administration fel tak awmin, elected representative-te tha tichak turin thawktu nghet te pawh an nei vek a ni. Hetiang continuity hi Mizoram tan pawh a tul hle a, kan mamawh a ni. Village Council Secretary-te hi sorkar hnathawk nghet dah ni thei se, VC-te tha tih chakna kawngah thui takin kawngro a su dawn a ni. VC te inrelbawlna dan 1953 pawh siamthat turin tunah hian hmalakna a kal chho mek zel a ni tih hi, memberte thusawi ka han react ni se.

Tin, sawitu hrang hrangte sawi kha tihian ka han react dawn ang a. Pu Rinsanga rawn sawi, hemi budget *minor works* atanga village tana state sorkarin sum a pek thinte pawh a pe chhunzawm ve leh thei turah kan beisei a, minor works dah thin kha a ni a. Tin, VC House chungchangah pawh khan RGSA hnuaiyah 2025-2026 chhung hi chuan VC House la nei lote pawh neih tir vek hman beisei a ni a. Bukvannei a rawn sawi te pawh kha, hei tunah hian expenditure sanction pawh hmuh tawh a ni, tih kan hriattir ang e.

Tin, LAD park chungchang kha member tam takin an sawi bawh a. LAD park 11 kan neih hi, outsource a ni a, chu chu memberte kan inhriattir ni sela. Kan park outsourcing atang hian pawisa pawh State-ah kan chhunglut ve thei a. A tih phuisui te, tih changtlun zawng zawngte pawh agreement siam dan chuan, tender rawn chhangtu te kutah khan a awm a ni. Tin, heng baka park kan neihte pawh tih hmasawn ngai tam tak a awm thei ang a, chungte pawh chu a tah tawlin, a tul ang zelin kan lo en zui ang.

Tin, Pu Rohmingliana, Thorang Bialtu rawn zawhna, Lo - leipui leh huan hal zat record leh, enganga tangkaia hman nge an nih, tih chhinchhiah chungchang hi, Lawngtlai West Bialtu MLA zahawm tak Pu C. Ngunlianchunga pawh khan a zawt a, chhan lohvin a liam a. Sorkarin tul leh tha a ti a nih chuan, a concerned department te nen inrawnin, a kaihnawih department-te nen hma lak dan tur ngaihtuaha hma lak theih a ni. Amaherawhchu, hei hi thil la awm ngai miah lo a ni a; thingtlang lo nei mi kan ni a. Miin kum khat atana ram a vah zau zawng chhinchhiah hi thiltih harsa tak niin a lang a. Engzat nge buh leh thlai an china, engzat nge an thar, tih pawh hriat harsa tak a ni ngei ang. Mahse, sawrkarin tul a tih chuan, heng data nei tur hian hma a lak theih e. Khaw tinin a zau zawng te, engnge an china engnge an thar tih te, khatiang data kha kan lo la nei lo a ni. Hei hi tih theih chu ni se la thil tha tak tur te pawh a ni awm e.

Tin, Tuichawng Bialtu MLA zahawm tak Pu RM Chakma rawn sawi - 15th Finance Commission chungchangah kum 2021-2022, 2nd installment crore ₹34.50 release loh kha, an rawn release tawh a, VC account-ah dah luh vek a ni. Tin, 2022-2023 grant kan dawn hmabak pawh kha, dawng leh turin a chak thei ang bera hmalak a ni.

Tin Lunglei West Bialtu, MLA zahawm tak Pu T. Lalhlimpuia rawn sawi - post hnawhkhah chungchang khan, LAD ah hian JE post ruak a tam khawp mai a, post 13 ah mi 5 chiah kan nei a; Lunglei-ah hian tun dinhmunah JE kan dah thei lova, SA pakhat diploma kan nei a, hna tul avangin measurement power pawh pek a ni a; JE post 2 fill up phalna kan nei tawh a. Amaherawh chu, MSSSB kuta dah a nih laiin, an la hman ta lova. DLO Lunglei Office ah hian Field Inspector post 5 kan neihah hian, natna khirhkhah tawkte, 'hmun dang remchang zawka attached an awm' tih te min lo hriatpui sela. Buarpui tlang dunga Common Service Center chungchang pawh kha, Mizoram State E-Governance Society, ICT Department nen inrawn chungin remchang hmasa berah dah dan tur ngaihtuah tum a ni, tih kha Pu Hlimpuia ka chhanna a ni e.

Tin, Pu H. Ginzalala, Champhai North Bialtu rawn sawi streetlight chungchang kha, streetlight hi municipal area-ah chuan Municipal kutah a awm a, rural area ah chuan VC-te kutah a awm a. Hei hi Joint Electricity Regulatory Commission - Mizoram leh Manipur te remruatna a ni. Chuvangin, streetlight chungchang outsourcing ti tur chuan a kaihhnawih LAD led P&E Department ten an rel fel a ngai dawn a ni.

Tin, South Tuipui Bialtu, MLA zahawm tak Pu Jeje Lalpekhlua rawn sawi - Hnahtial Panchayat Resource Center sak mek chungchang kha, tunah hian DPRC sak hna hi 43% zawh tawh a ni a, sak hun tur bithliah hmaa sa zo turin theihtawpa hmalak mek zel a ni a. Hnahtial DC hovin monitoring committee chuan enpuin, tha taka sak zawh tum a ni. VC House la nei lo te'n VC House an neih theihna turin 'theihtawp chhuah reng a ni' tih kha ka chhanna a ni.

Tin, Mamit Bialtu MLA zahawm tak Pu H. Lalzirliana rawn sawi - Mamit khawpui hmar lama Vaisam khaw hmun hluiah park siam a ni a. Kum 2019, November Ni 19-a hawn a nih hnuin Covid avangin kum hnih chung lai mai hawn mumal a ni thei lova. LAD in outsourcing a kalpui hian, Vaisam Park enkawl tura chhangtu an awm lo a ni. Vaisam Park hi chei belh hlek ni sela chuan, tun aiin tlawhtu an tam theih beisei a ni. Tin, Brig. T. Sailo Park, Lengpui hi *Outsourcing of Park* hnuaiyah mimal enkawl tir a ni bawka, hmasawna pawh hmuh chhoh mek zel a ni.

Tin, Pu W. Chhuanawma, Tuichang Bialtu MLA zahawm takin a rawn sawi - Pi Runremsangi, District Programme Manager leh, Augustine Lallungmuana, Technical Assistant cum Data Entry Operator te hi RGSA Scheme hnuaiyah District Programme Management Unit, Khawzawl District-a thawktute anni a. Khawzawl-ah DLO office a la awm loh avangin, tun dinhmunah Khawzawl District bialtu chu Champhai DLO office-ah attached mek anni.

Pu K. Laldawngliana, Tuirial Bialtu MLA zahawm takin a rawn zawhna - Khamrang hi kumin RGSA fund atanga VC House sak tura ruahman leh, Nisapui te pawh kha nichina

kan chhanna zinga mi kha a ni e. Dampa Bialtu, MLA Pu Lalrintluanga Sailo pawhin kha tho kha arawn sawi a, kan chhanna kha a thumun vek a ni.

Pu V. Malsawmtluanga, Lunglei North Bialtu, rawn sawi - Mualthuam North RGSA Scheme hnuaiah Common Service Center arawn sawi kha, dah tawh a ni. Tin, Pu Lalchhandama Ralte, Leader of Opposition, Tuivawl Bialtu MLA zahawm takin arawn sawi kha a pawimawh khawp mai a. *The Lushai Hills District Village Council Act, 1953* hman lai mek hi vawi eng emaw zat amend a ni tawh a. Ministry of Panchayati Raj thurawn angin, VC term kum 3 atangin kum 5 ah pawhsei a ni a. Tin, hmeichhia tan 1/3 seat hauhsak a ni bawk a, an inthlanna pawh State Election Commission-in a buatsaih sak ta a. Heng Dan siamthat hi tualchhung rorelna tha neihna tur atan a la tawh loh avangin, VC Dan pumpui paihin, Dan thar - *The Mizoram Village Council Bill* buatsaih a ni a, tualchhung rorelna tha tak kan neihna turin VC Dan thar hi draft chhoh mek zel a ni.

LAD-in *Outsourcing of park* a kalpui danah hian, contractor-te hian kum 5 chhunga asset an siam tur te leh enkawl zuina (maintenance) an kalpui dan tur te fel taka inremsiampui a ni a. An intiam anga park te chei thar zel turin LAD chuan park enkawltute hi a nawr zui zel a ni.

Tin, *The Mizoram Village Council Bill* a thar hlaka buatsaihna hi a kal chho zel a, sorkar hmasa ten theihtawp chhuahin an lo buaipui a, sawrkar thar pawh hian heng Dan te hi tha taka a awm theihna turin hma lain, a umzui chho zel a. Helaiiah hian rawtna thar te pawh siam a ni dawn a. VC Secretary thlak hi a tam em em mai a, hei hi a tha lo hle a. VC Secretary te pawh hi LAD hnuaiah hlawh neia, a ngheta lak dan te he dan thar hian keng ta sela, tun laiah 15th Finance Commission te pawh hi anmahni kutah ti hian direct-in a kal a, portal-ah khung te a lo ngai ve thin a. Chuvang chuan, mithiam mamawh a ni a, khang atan te pawh khan rawtna siam mek a ni.

Tikhan, member te'n in rawn sawi kha a tlangpuaia chhang kimah inngai ta mai ila, hriatfiah loh leh hriat belh duh kan neih chuan office lamah kan la sawiho dawn nia.

PU LALCHHANDAMA RALTE, OPP. LEADER: Pu Speaker, tuna arawn sawi lawkah khan, 'kan VC Dan hlui kha kan han siamtha a, Panchayati Raj mil deuhin; kum 5 term a lo kalna' tih te kha i sawi deuh a. Panchayati Raj kha a pumpuiin kan la tak tak chuang si lova, 'kum 5 term, kum 3 dan thara duan' tih kha, a lo hriat chhunzawm theih ang em?

PU C. LALSAWIVUNGA, HON. MINISTER: Tuna kan Dan hman lai hi *Panchayati Raj* Mizoram te, Nagaland te leh Meghalaya te hian ka hman ve loh avangin, a ang thei tur ang bera central lamin an duh dan ang zul zuia siama hman chhoh a ni a.

Tih danglam dan a awm thei a nih chuan, Dan hremite leh kan mithiamte, kan hotute rawnawmte rawnin ngaihtuahna sen kan lo tum dawn nia.

Art & Culture-ah hian han lut leh ta ila. Art & Culture, Demand No. 23 hi, kum 2024-2025 chhunga hman tur sum ruahman zat kha crore ₹1459.20 a ni a. Nikuma kan sum crore ₹1409.63 aiin crore ₹49.57-in a tam a, kan lawm hle a ni. Tin, ka lo mangnghilh palh takin - kan House Leader khan min rawn hrilh tawh nain; a lawmawm em mai a, lawmthu ama chungah pawh sawi a tulin ka hria a. Chapchar kut kum tinin kan hmang a, budget-ah hian Chapchar Kut-a hman tur *budget head* dah a lo ni lova, token-in a awm thin a. Tichuan, committee kan han neih khan, kan Chief Minister zahawm tak hian, ‘budget-ah dah ni tawh sela’ tia a rawtna leh a thurawn angin, kuminah budget-ah a rawn lang ta a, hei hi hmasawwna thar lawmawm tak a ni a. Chuvang chuan, kan House Leader leh kan Finance Minister chungah lawm thu ka sawi a ni.

Art & Culture Department hi department te tak te ni mah ilangin, Mizo culture vawnhim leh tih hmasawn nan theih tawpa hma la reng kan ni a. Kan sum hmuh te pawh beitham deuhvin lang mahsela daih zai taka hman a ni thin a. Hmanniah pawh Chapchar Kut kan han hmang zo chiah a, NGO hrang hrangte, department hrang hrangte thawhhona a ropui hle mai a, mipuiin an hlut hle tih pawh a hriat a, thil lawmawm tak a ni. Kumin kan Chapchar Kut pawh kha budget-ah khan dah a la ni lova; amawherawhchu, finance lama kan hotute pawhin Chapchar Kut hlim taka kan hman theihna turin pawisa te min ngaihtuahpui a, chutiang chuan Chapchar Kut hlimawm tak kan hmang thei a, a lawmawm hle a ni.

Hetah pawh hian sawi tur tam tak a awm thei a, member zahawm tak tak te’n in rawn sawi kha ka lo chhinchhiah ve zel bawk a. Member te’n in rawn sawi kha a theih angin han react tum ta phawt ilangin.

Pu Rasik Mohan Chakma, Tuichawng Bialtu khan, - ‘Mizoram a awm hnam peng hrang hrang te Chapchar Kut-a lam tura sawm ve ni se’ tih rawtna kha a rawn siam a, a pawimawh khawp mai a. NGO hrang hrangte, Sorkar department hrang hrangte telna committee-a ngaihtuah thin a ni a, remchangah committee neih leh hunah te ka lo thlen dawn nia.

Pu T. Lalhlipua, Lunglei West Bialtu zahawm takin – ‘District hrang hranga Chapchar Kut hmanna sum cashless-a in pek tawh ni se’ a tih kha, kalphung lo awm mek danah chuan, a hmanna utilization certificate leh voucher an rawn thehluh hunah lo pek chhuah a ni thin a, advance-a pek a ni ngai lova. Engpawh nise, awlsam zawka tih dan kha a awm chuan lo ngaihtuah kan tum dawn nia.

Pu Lalmuanpuia Punte, Hrangturzo Bialtu MLA khan IMFA - Institute of Music & Fine Arts hnuaiia ‘Instructor post ruak hnawhkhah thuai ni se’, tia a sawi kha, tun dinhmunah

hian Dance Instructor post 2 leh Music Instructor post 4 a ruak mek a, heng post ruak 6 te hi hnawhkah tura hmalak mek a ni e.

Chapchar Kut pui taka Aizawl khawpui chauha hman thin chu, ‘district khawpui dangah a inchhawka hman ve ni se’ tia rawtna kha, Chapchar Kut hman dan tur chungchangah Chief Minister zahawm tak kaihhraina hnuaiah Organizing Committee-in a rel leh a ngaihtuah a nih thin avangin, Committee-in tha nia a hriat chuan, he rawtna hi kalpui theih turah beisei ila. A tul angin Committee-ah thlen kan lo tum dawn nia. Hei hi Pu V. Malsawmtluanga, Lunglei North Bialtu rawn rawtna kha a ni a, ani pawhin hei hi chhannaah min lo pawm sak sela a tha ang e.

Pu Jeje Lalpekhlua, South Tuipui Bialtu rawn tarlan ang khan, Art & Culture Department chuan kan theitawpin kan pipute hmun hlui vawn him leh enkawl hna hi a thawk a ni. Heng hmun hluite cheibawl nan hian sum eng emaw zat a ngaih thin avangin, tun hmalam 11th, 12th, 13th Finance Commission-ah te heritage conservation atan sum kan dawng thin a, 14th leh 15th Finance Commission-ah khan sum hi kan dawng ta lova. Tun 16th Finance Commission-ah erawh chuan beiseina sang tak kan nei a, kan sorkar hotute’n min hriatpui pawh ka han dil nghal a ni. Member zahawm tak takte’n kan bial chhunga pipute hmun hlui pawimawh tak tak an rawn tarlan takte pawh kha heng sum atang hian uluk taka enkawl theih kan beisei a ni.

Pu V. Malsawmtluanga, Lunglei North Bialtu khan Lunglei Museum staff indaihlohna leh mamawhna hriatsak tura a rawn sawi kha, kan department hotute nen kan lo enfiah dawn nia.

Lawngtlai West Bialtu zahawm tak, Pu C. Ngunlianchunga’n - Lai Kut - *Hlukhla*, Mara Kut - *Lyuva Khutla*, Chakma Kut – Biju te bakah Pang, Bru, Paihte leh Mizoram chhunga hnam hrang hrangte kut lawm nana sum dah leh project te siam ve tura a rawtna leh, cultural exchange programme buatsaih tura a ngenna te hi uluk taka ngaihtuah tur atan kan lo chhinchhiah ang e.

Nikum 2023-2024 chhung khan Social Welfare & Tribal Affairs Department kal tlingin sum eng emaw zat heng kut hrang hrangte hmanna atan hian Ministry of Tribal Affairs, Govt. of India atangin pek an lo ni tawh a ni.

Dr. K. Beichhua, Siaha Bialtu zahawm takin, Mizoram chhunga hnam hrang hrangte impumkhatna atana Cultural Meet Aizawl-ah emaw, Lunglei-ah emaw neih a rawtna kha, department hotute nen ngaihtuah ho turin kan lo chhinchhiah ang e.

Pu Lalrintluang Sailo, Dampa Bialtu khan martarte thlan Luangmual-a mi enkawl leh tih changtlun chungchang a rawn rawtna ang khan, sorkar hmasa hmalaknain Chowkidar tur IV Grade pakhat lak tawh a ni a. A hmun enkawlina tur sum hi budget-

ah dah a la ni lova, theihtawp chhuahin kan martarte, an ruang, an ruh awmna hmun hi ngaihpaawimawh ni se a duhawm hle a ni.

Pu Lalchhandama Ralte, Tuivawl Bialtu khan, cultural dress leh darkhuang te NGO-te hnenah subsidy rate-a la pek thin a nih leh nih loh a zawhna kha, 75% subsidized-a pek a la ni a. Kum 2023-2024 chhung hian subsidized items leinaah ₹1,73,5000/- kum kal mekah hian hman a ni a. Amaherawhchu, hemi atana sum hman tur hi duh khawp kan neih loh avangin, a mamawh zawng zawngte erawh chu subsidized pawh ni mahse, kan pe thei vek lo a ni. Kan budget thara salary head-ah hian sum thahnem tak dahsak kan ni a, he sum hi department-a post ruak 68 kan neih te dahkhah nan sorkarin hman min phalsak chuan, kan tangkaipui hlein kan beisei a ni.

Nikum 2023 khan Social Welfare-in Tribal Affairs atanga sum a hmuh hmangin, *Mim Kut* hi hman a lo ni tawh a, Art & Culture Department chhungah erawh he Kut hmanna tur hian ngaihtuahna sen a la ni ngai lo. Kan pipute kut zinga pawimawh tak ni mahse, kan sakhua nen intibuai lo zawnga kalpui a ngaih dawn avangin, uluk zawka ngaihtuahna sen hmasaka hmalakna fel tak ruahmanna neih a tha awm e. Tin, kan House Leader-in point a rawn sawite kha mumal takin kan officerte'n an lo chhinchhiah a, 'ziakin dah thlap a ni' tih kha tawite in kan sawi lang duh bawka a ni.

Tichuan, Art & Culture kha ka zo ti tih chu a ni mai a. Ka rawn khaikhawm tum danah chuan, kan zavaiin kan inlungrual a, duh tawka mai thain ka hria. Amaherawhchu Art & Culture Department hnuaiyah hian min hriatpui tura ka duh chu - kan office establishment hrang hrang hi min hriatpui atan ka han tarlang ang a –

Heng, Directorate te, Tribal Research Institute te, Mizoram State Museum te, Mizoram State Archive te, Mizoram State Library leh District Library te hi kan nei a, District Art & Culture Office Lunglei, Archaeology Wing leh Institute of Music & Fine Arts Wing te kan nei bawka a ni. Heng office hrang hrangte hi mawhphurhna hran leh a thawk tur pawhin mithiam bik neih ngaite a nih avangin, kan thuamchak zel pawh a pawimawh hle a ni.

Tin, ka sawi tak ang khan pi pu te sulhnu leh an hmun hlui humhalh hi a pawimawh em em a, ziakin thu inrochhiah hi kan nei lem lova. Amaherawhchu, an sulhnu heng thlan te leh thildang eng eng emaw pipute sulhnu chi hrang hrang tun lai hian research beitate hian an research tihna atan an hmang thin a. Tun hmang khang atan khan pawisa te pawh Finance Commission 11th ,12th ,13th ah te kan lo hmu a, 14th leh 15th Finance Commission ah kan hmu ta lova; hetah hian kan House Leader pawhin hei hi min chhinchhiah sak sela, theih tawp chhuahin hma min lakpui pawh ka beisei a ni.

Tin, helaiyah hian hmalak mekna kan neih te leh project thar eng eng emaw kan neih te hi han sawi lang ta ila - District Museum Lunglei hi zawh fel tep tawh a ni a. Tin, Aizawl

Institute of Music and Arts, Tuivamit hi chak taka kalpui mek a ni bawk a. Tin, project nghah mek 5 tunah hian kan nei bawk a. Tin, SASCI kan tih hnuaiah project 2 – ‘*Children & Adolescent Libraries and Digital Infrastructure in Mizoram*’ tih leh, ‘*Concept note on setting up of Cultural Heritage Centre at Vaphai*’ tih te hi tunah hian kan beisei mek a ni. Tin, Ministry of Minority Affairs Govt. of India atangin PMJVK scheme hnuaiah project eng emaw zat Art & Culture atang hian kan thehluat a, kan House Leader hnen atanga kan hriat tawh ang khan, Vanapa Hall sak thatna tur pawh crore 37 theh luh thlak a ni tawh a, tunah hian beiseina nen kan thlir mek a ni.

Keini Art & Culture hi chu Department lian lutuk kan ni lova, amaherawhchu kan thawhpui NGO te chungah hian lawmthu sawi lo thei lo kan ni thin a, theihtawp chhuahin min tawiawm thin a, vawiinniah hian he rorelna kal tlang hian an chungah lawmthu ka sawi a ni.

Tin, District Council & Minority, Demand No. 27 hnuaiah hian District Council & Minority Affairs hman tura sum ruahman hi a vaiin ₹6,12,17,14,000/- a ni a, kum kal ta 2023-24 ai khan kum thar 2024-25-a sum ruahman budget estimate punna hi lakh ₹11,640.85 lai a ni a, heng hi ADC pathumte inenkawlna tur GIA - General leh GIA - Salaries te a ni. Heng hi kan Leader leh Aizawl West-I Bialtu MLA hnen atang te pawhin, pawisa dah dan te pawh kan ngaithla tawh a. Kan State Own Tax atanga kan lakluh 42% hi vertical devolution atan hman nise tih a ni a. ADC pathumte hian 42% atang khan 90.71% hi an insem tur a ni dawn a. ADC-te hi Sorkar thar hi chuan kan duat hle a, an lawm viau pawh ka ring a; a biak takin Pu RM Chakma pawh a lawm ang ka ring a ni.

Tin, District Council & Minority Affairs Deptt. hi Secretariat chauh kan ni a, Directorate hran kan nei ve lova. India Constitution 6th Schedule-in a kaihhnawih chungchang zawng zawngte, Mizoram chhunga Autonomous District Council (ADC) kan neih pathum - Lai, Mara leh Chakma Autonomous District Council te bakah Minority Affairs kaihhnawih zawng zawngte kha DC&MA hian a enkawl a ni.

Tin, ADC te tan District Council & Minority Affairs hi Administrative Department a nihna angin, dan/act/rules an siam angte department-in lo examine-in, Minister leh Chief Minister-te kaltlangin Governor approval lak thin a ni a. An tan Budget Controlling Department a nih angin, ADC te hi 6th Schedule of the Constitution-in thuneihna a pek angin anmahnia inrelbawl an ni a. An hnenah hian State Sorkarin GIA angin fund a pe thin a ni.

Tin, Minority chungchang leh a kaihhnawih zawng zawngte bakah, *Prime Minister's New 15 Points Programme for the Welfare of Minorities* - Minorities ten Central Sorkar atangin funding department danga an pek, (allot) bik ni lo zawng zawng – PM VIKAS leh PMJVK an tihte hi Minority Affairs-ina a enkawl te an ni a. PMJVK hnuaiah hian

project 94 kum kal taah khan hmuh tawh a ni. Tin, heta tan hian 1st installment te pawh release a ni deuh vek tawh a ni. Tin, PMJVK hnuaia project approve kan neih te hi 1st installment theuh hmuh tawh a ni tih kha, ka rawn sawi tawh ang khan, 2nd installment erawh hi chu kan la hmu lova, hei hi beisei a ni a. Project-te hi thawh mek a la nih avangin, UC kan la nei thei lo a ni.

Tin, project atana kan Implementing Agency hi Sports & Youth Services Deptt. leh Information & Communication Technology Deptt. te anni a. Anni hian tender te chhuahin a buaipui tur zawng zawng kha an buaipui a ni tih, member te hriat atan ka han sawi duh a ni.

Tin, Pu C. Ngunlianchunga khan *Deed of Agreement* chungchang a rawn sawichhuak a. Ni e, NECS te nen khan Deed of Agreement kha siam a ni a. Amaherawhchu, anmahni an rawn in withdraw leh avangin, tunah chuan khang kha kan nei tawh rih lo. **(Pu C. Ngunlianchunga:** An va in withdraw hma ve). Ni e, kha kha a chhanna ni bawk selangin.

Tichuan, Vety lamah hian ... **(Pu C. Ngunlianchunga:** Pu Speaker, lawkin; PMJVK Scheme, District Council area a mite kha, District Council-ah khan in pe ve thei ang em le? Khatia Sports leh ICT Deptt-a pe ngawt lo khan, District Council area a mi chu District Council-te hnenah khan PMJVK kha pek ve ni se a va tha ve; a department neitute an nih angin maw le.) Ni e, tuna mi hi chu project kal lai a ni a, la khawih theih hi kan nei lo hrim hrim. A hun lo kal leh turah te chuan ngaihtuahna te kan hmang ho ang a, kan sawiho zel dawn nia.

Tin, AH & Vety lamah hian kan lut lehngal mai ang a. Pu Speaker, Demand No. 34 - AH & Vety Deptt. enkawl na tura sum ruahman hi a vaiin ₹70,10,78,000 (₹7010.78 lakhs) a ni a. Kum kal ta 2023-24 sum ruahman BE-a kumthar 2024-25-a sum ruahman BE punna hi lakh ₹99.08 a ni a, a lawmawm hle a ni. Tin, AH & Vety hi department pawimawh tak niin, department hnathawh hi hlawm lian tak pahniha then a ni a. Ran hriselna enkawl leh venhim; tin, mipuiten sa, artui leh bawngnute thianghlim leh hrisel ei leh in tur kan neih theih nana hmalak te, ran chi tha vawnhim leh siamchhuah te, ran vulh dan chungchanga hmasawn tura inzirtir te leh chhungkaw tam zawkin ran vulh leh a kaihhnawih hmanga eizawna an neih theih nana hmalak te a ni a.

Animal Husbandary & Veterinary Department hnuaia kan sorkar hnathawh leh hmalakna tlangpui tawitein ti hian rawn sawi ta ila. –

Ran chaw siamna lama hmalakna kha kan hrechiang a, kan discussion-ah pawh khan in rawn sawi deuh vek a. Animal Feed Plant, hei hi Ramrikawnah din a ni a, thum chak zel a ni a. Nitin quintal 100 chuang heta tang hian ran chaw siam chhuah a ni a. Tichuan, PIGFED te hnenah out-source a ni a, PIGFED hian hmun hrang hrang a an dawrah an

zuar chhuak thin a ni. Tin, Thenzawlah sawn Fodder Plant kan nei bawk a. Tin, Durtlang, Sihphir leh Lungdai lamah te pawh Fodder Plant hi kan nei bawk a. Heng te hi kan hmang tangkai em em a ni. Thenzawl hmunah pawh sawn hmun zau tak kan la nei a. Amaherawhchu, mumal tak leh awmze nei taka kan ram neih Fodder chin na a tana hmang tur chuan lei dawh kai phawt a ngai a. Heta tan hian ruahmanna te kalpui mek a ni a.

Tin, Agriculture Department te nen pawh kan thawhhona a tha a, a lawmawm khawp mai a. Durtlang, Lungdai, Nisapui, Thingdawl vela kan Fodder Plant chawmna tur, enkawlina tur lei tha te pawh Agriculture Department Minister ngei pawh hian, ‘theihtawp chhuahin tan kan la dawn nia’ min ti nghe nghe a. Chutiang chuan ke kan pen a. Hemi hi ka’n sawi kual duh deuhna chhan a awm a. Kum 2021-2022 ah khan Bawngpui hi 2600 Bawng vulhtu society hrang hrang ten an nei a. Amaherawhchu, 2023-2024 chhungah hian bawng hi 1500 velah a tla thla ta a ni. Chu chu eng nge ni a chhan kha kan department hotute nen ngun takin kan ngaihtuah a, kan zir a, a chhan ni awmte zawncchhuah tumin kan bei a. Bawng vultute bawng inah kan luh chilh ta a, an bawng inah kan kal chilh a, an dinhmun te kan hriatpui a ni. Ar a nih pawhin, Vawk a nih pawhin, Bawng a nih pawhin kut-hnathawktute’n an harsatna hi ran chaw (animal feed) a ni a. Chuvang chuan, chawpchilh takin bawng vultute pawh ‘engtin nge an harsatna kan sutkian theih ang’ tih ngaihtuahna a hmunah khan hman nghal a ni a. Chutah chuan, ‘Thenzawl-a kan Fodder Plant hi a ro in department motorin phurh sak ni se la. Amaherawhchu, Thenzawl leh kut hnathawktute ran in inkar phurhna diesel man erawh hi chu lo thawh ve se’ tih ngaihtuahna neih a ni a. Chutiang chuan ke kan han pen chho a, a lawmawm viau a. Bawng vulhtute an beidawng a, an bawng an hralh a. Kan han kal lai pawhin hralh an lo tum mek a; chutiang chuan beidawngin an awm a ni. Chuvangin, MULCO lam pawhin bawngghnute kan mamawh ang hi an duhthusam angin an hmu thei bik lova. Khatiang dinhmuna kan din avang khan, kawng awm thei ang ang kha kan han zawng tawp tawp a ni ta ber a. Chutiang chuan, kut-hnathawktute harsatna hi sutkian dan kawngte pawh kan zawng a.

Tin, ran chaw siamna bulpui ber vaimim (raw material) hi kan mamawh bawk a. Department pawhin ngaihtuahna nasa takin a seng a. *Hand-holding Policy* hnuaiiah scheme leh project te siamin kan theh lut a. Kan Chief Minister zahawm tak pawhin min lo approve sak tawh nghe nghe a. Ran chaw atana mamawh raw material – vaimim, bekang leh chhawhchhi kan ngah chuan Ramrikawn-a kan ran chaw siamna hmunah hian awmze nei zawkin ran chaw hi kan siam chhuah theih kan beisei a. Chutiang te chuan tunah hian ke kan pen chho dawn a ni a. Vaimim hi India ram atanga lak a ni tlangpui a. Amaherawhchu, vaimim lakluh hian duhthu a sam vak lo a, a nget te a tam em em a ni. Tin, Burma atangin kan lalut bawk a. Burma atanga kan lakluh erawh hi chu duhthu a sam a, a tha khawp mai; Mizoram chhunga tharchhuah phe chu tha tak a ni. Chuvang chuan, ZPM in *bana-kaih policy* a kalpui chhohnaah hian kut-hnathawktute heng hmanga kan indawmkanna tur a nih rualin, bana-kaih hmanga kan intodelhna tur

kawng zawhin ke kan pen mekna a ni, tih te vawiinniah hian Housein min hriatpui atan ka sawi a ni.

Tin, Artui ah hian kan intodelh lova. Artui-a kan intodelh theihna tur pawhin ruahmanna thui tak neih a ni chho tawh a. A theih chin chinah entrepreneur lam hawi zawngin hengah pawh hian ke pen beisei leh tum mek a ni a. Hetah hian a pawnga taka, ‘*chu chu*’ in tih chawt chawt lam ni lovin, ground survey kan nei mek a ni.

Kum 4-5, kum 10 dawn ar lo vulh tawh, mahse sum leh pai lama harsatna avang te, a chaw lama harsatna tawh avang tea hmasawn thei miah lo, mahse tuichilh tlat, ti tlat si ho hi puih kan tum a ni. Tin, vawk a nih pawhin, chutiang tho chu puih kan tum dan a ni. Chuvang chuan, ground survey kan nei a, kan neih chhunzawm leh dawn a. Vawk inah kan lut ang a, ar inah kan lut ang a, bawng inah kan lut ang a. Tin, sial pawh hmun hrang hrangah kan ramah hian vulh a ni a, heng se-vulhtute hnenah hian an Ssevulhna hmun hi luhchhuah kan tum a ni. Chutiang chuan kuthnathawktute harsatna hi a hmun ngeiah hriatpuaia, an mamawhte sorkarin tiha, a theih ang anga tanpui a tum a ni.

Vety-ina kan hmunhma neihte pawh tlawh hmabak kan ngah khawp mai a. Hatchery hmun kan neihte pawh improvement hmun thenkhatah chuan kal chhohpui mek zel a ni. Mampui hmun te pawh tunah hian open tender te a awm chho leh mek a. Chutiang chuan, kan hmun hma neihte tlawha, a hmunah rawn kal ka tum a ni.

Tin, Lengpui-ah khuan *Boar Semen Plant* - vawk chi tha inthlah pung tura buatsaihna hmun pawh tunah hian kalpui mek a ni a. Hetah hian kan RD Minister zahawm tak Pu Nitea chungah pawh vawiin niah hian lawmthu ka sawi duh a. ‘A, min puih a ngai a ni’ kan ti a; convergence kan kalpui dawn a, min rawn tihhlawhtlin sak a tum a, lawmthu ka’n sawi a.

Vawiin niah hian kan zinga ka sawi duh chu - project lian pui pui, pawisa tam tak tak sengin kan lo kalpui tawh thin a. Mahse, ‘engati nge a hlawhchham thin’ tih hi kan ngaihtuahnaah kan hman tlan a tulin ka hria. Kan Chief Minister-in, ‘project kan kalpui a nih chuan, a hlawhtling tur a ni’, a tih hi kan dinna a ni a. Chuvangin, kan project buatsaih reng reng hi cheng za project man a lo niha, thawh zawh a lo nih khan, cheng 100 project khan kumtin engzat nge pawisa a thawh chhuah ang; chumi hawi zawng chuan project kalpui tur a ni a. Chu chu kan Chief Minister min beisei dan leh min duh dan pawh a ni a. Chuvangin, department ang pawhin chutiang chuan ke kan pen chho dawn a, theih tawp chhuahin hma kan la chho dawn a ni.

Tichuan, member ten insawi helaia ka lo chhinchhiah hi ka rawn react a tul lem lo a nih chuan, a lawmawm a. Chutia nih chuan, ka department kha chu ka duh tawk thei ti tih mai ang a.

Tichuan Pu Speaker, heng ka demand –

<i>Demand No.</i>	<i>Purpose</i>	<i>Amount (in ₹)</i>
19	Local Administration	2,08,31,40,000.00
23	Art & Culture	14,59,20,000.00
27	District Council & Minority Affairs	6,12,17,14,000.00
34	Animal Husbandry & Veterinary	70,10,78,000.00
TOTAL		9,05,18,52,000.00

te hi, he House zahawm tak hian min pass-pui turin ka rawn ngen e. Ka lawm e.

HON. SPEAKER : Aw le, tunah chuan Minister zahawm tak Pu C. Lalsawivunga'n a demand –

<i>Demand No.</i>	<i>Purpose</i>	<i>Amount (in ₹)</i>
19	Local Administration	2,08,31,40,000.00
23	Art & Culture	14,59,20,000.00
27	District Council & Minority Affairs	6,12,17,14,000.00
34	Animal Husbandry & Veterinary	70,10,78,000.00
TOTAL		9,05,18,52,000.00

Te hi House-ah pass a rawn dil ta a. Rem ti apiangin, “rem ti” ti rawh u le. (**Memberte:** Remti) Remti lo kan awm anih chuan, “remti lo” ti ula. (*Remti lo an awm lova*)

A lawmawm e. Minister zahawmtak Pu C. Lalsawivunga Demand chu House-in lungrual takin a pass ta a ni. (**Pu C. Lalsawivunga, Minister:** Pu Speaker, ka lawm e.)

Le, tunah chuan Minister zahawm tak Pu PC Vanlalruata demand kan sawihona te wind up turin ka'n sawm ve leh ang a; sawifiah ngai a tih te han sawifiaha, a demand-te House-a pass rawn dil nghal turin ilo sawm ang.

PU PC. VANLALRUATA, HON. MINISTER: Pu Speaker, ka lawm e. Tun tumah hian ka Demand No. 31, 37, leh 47 – Agriculture, Co-operation leh Irrigation & Water Resources te pass ka rawn dil hmain, a tlangpui thua kan memberte'n an sawi te leh an sawi lohte pawh han tarlan ka'n tum dawn ang a. A hmasaberin Co-operation-ah kan tan ang a.

Co-operation hi department ropui tak kan ni lo nge; ni ah min ngai lo zawk nge ni, kan member mi pathumte chauh khan an rawn sawi lang a. He Ministry tharah hian Cooperation Department hi tihropui kan tum viau dawn a. Tin, central pawhin a ngaipawimawh viau dawn a. Prime Minister Pu Narendra Modi vision, “Prosperity through Co-operation” tih hi central ah kalpui a ni a. Chumi zulzui chuan July ni 6, 2021

khan, a hmaa Agriculture Ministry-a awm thin chu ministry tharah hlan kai a ni. Kan ram economic development hi Co-operation kaltlanga hmalak tum a ni a, hetah hian central policy a turu hle mai a. Minister ka'n nih ve chinah ka han luhchilh a, a hmaa ka lo tui sa ve bawk nen, ka tui zual a, ka tui tulh tulh dawnin ka hria. Tin, kan thawhpui turte, kan official-te pawh helama lo tui tawh annih avangin thawhpui an nuam dawn hlein ka hria a, ka phur hle mai a.

Kan ramah Society kan kalpuina a lo rei viau tawh na chu, development thui tak hi a awm thei lo thin a. Tunah hian State Level Co-operative Society Federation eng emaw zat chu kan nei ve a, amaherawhchu, heng kan neih zingah hian Apex Bank, Mizofed kan tih te leh tlema zawng te hi an nungtha a, a tam zawk hi chu tanpui ngai tak tak, mahnia intodelh thei lo te pawh an la ni a. Chuvang chuan, Cooperation kan kalpui danah hian hmalak a ngai nasa dawn hlein ka hmu a. Amherawhchu, chu chuan phurna nasa tak min siam sak a, kumin ah pawh hei kan membrete'n, 'budget pawh a pung lo; a hniam zawngin a kal zel' te an ti a, a ni bik lutuk lova. A chhan chu, a hmaa kan lo kalpui thin Cooperative Development Project Aspirational District Mamit-a implement ni thin kha kumtharah hian budget-ah dah tel a nih tawh loh avangin, a pung lo angin a lang a. Hei hi scheme kal lai tih tawp a nih avangin, a budget pangngaiah chuan a pung a ni.

Kan kalphung hrim hrimah hian ZPM chuan society chawisan hi a tum a ni a. Tunah pawh hian Mizoram khua a tam thei ang berah society din a, chumi kaltlang chuan hmasawna kalpui kan tum a ni. Sawhthing te, hmarcha te, aieng te, hmunphiah te a hralhna kan buaipui dawn kan ti a, kan member-puite pawh khan, 'engatinge pawisa in dah si hmunphiah in lei loh' te kha an ti a. 8th December-ah sorkar kan han la lut a ni a, a thla tam pawh a la vei lova, tunah hianin ruahmanna a kal mek chauh a ni.

Society khaw tinah kan din ang a, chung society chu kan thuam tha ang a, an nite nen heng agriculture market te pawh hi thawh ho dan kan dap dawn a. Chumi a nih avang chuan, thil hi duh ang rum ruma kalpui theih a ni lo, tunah hian model *by-law* te pawh chhut mek a ni a. Tiang chuan *Multipurpose Primary Agriculture Credit Society* ngelnghet tak khawtina din kan tum a. *Entirnan*: A thenin bawngvulh te an buaipui ang a, a thenin sawhthing te an lo ching ang a, chungte chu kha multi-purpose society kaltlangin sorkarin a vil dawn tawh a. Chuvang chuan, awmzeneia sustainable tura kalpui kan tum avangin, uluk lehzuala ruahmanna siam a ni dawn; hmanhmawh rum rum a har khawp mai, tih kha kan sawi hmasa duh a.

Tin, central hian tunah hian digitalization a kalpui mek a, software ah chuan 100% government grant min pe dawn a, thildangah pawh 90:10 state matching share pawh kalpui tum a ni. Sum eng emaw zat tunah hian kan dawng tawh a, a lawmawm hle a ni. Tiang chuan, sorkar tharin kalphung thara society tihchak a tum chu central pawhin an lo kalpui mek a lo ni a, a lawmawm lehzual hle mai a. Computerization kan kalpui theih

chuan mumal zawkin Aizawl atangte pawhin kan vil ang a, district headquarters atang te pawhin kan vil ang a; tiang chuan ruahmanna fel fai tak hi sorkarin siam chhunzawm a tum dawn a ni.

Amaherawhchu, thawktu hi kan indaih lo khawp mai a, tunah pawh sanction post 207 awmah hian 94 chauh kan nei a, kan memberte'n an rawn sawi ang khan, district tinah Cooperation Officer te pawh kha dah rum rum theih a la ni lova, ruahmanna a kal chho mek zel turah ngai ila. Kan la ropui vak lova; amaherawhchu, '*ropuiin kan lang ve ang*' tih ang deuh khan, nakinah chuan ropuiin kan lan ngei kan inbeisei a ni.

Kan member-te rawn sawiah khan han react vak tur a awm lova, Pu Dawngtea khan, 'Cooperative Council hi dina, kalpui a tha ang em' tih zawng deuh khan a rawn sawi a. Tun hmam Mizoram-ah Cooperative Development Council hi dina, a taka chantir an ti lo thin niin ka hria. Amaherawhchu, sorkar tharah chuan Cooperative Development Council hi din kan tum dawn a ni.

Tin, Lunglei West Bialtu, Member Pu T. Lalhlipua'n Cooperative office staff indaih lohna a rawn sawite pawh kha, nichina staff indaihlohna, headquarters-ah pawh kan indaih loh avang khan hmalak rum rum a har a, amaherawhchu, hmasawn zel kan tum dawn a ni.

Tin, South Tuipui Bialtu Pu Jeje Lalpekhlu'a'n – 'Hnahthial District-ah Cooperative Office a la awm lo' a tih kha, a dik a, tunah hian district pathumah hian kan la nei lova, khangte pawh kha sorkar tharin hmasawna thar a ngaih pawimawh avangin, Cooperation Department te tihlen a nih hunah chuan a tahtawlin hma kan sawn ve zel turah ngai ta ila. Tunah hian vanneihthlak deuhin, tun Thawhtan lo awm turah hian National Cooperation Development Corporation Sub-Office, kan Registrar Office ah sawn min rawn hawsak dawn hlah mai a, anni hi PACS te, Farmer Producers Organization te enkawltu deuh bik anni a, grant petu anni baw a; sub-office an rawn hawng dawn hlah mai a, kan tangkaipui ngei kan beisei a ni. Central policy kan kalpui tur te pawh han sawi a chakawm viau a, mahse ka duhtaw mai ang a.

A dawt lehah chuan, Irrigation Department budget chungchang kha ka'n tarlang leh ang a. Hei Agriculture leh Irrigation hi department khata awm thin an ni a, an indanna pawh a la rei lo a. Amaherawhchu, tunah hian mumal takin Chief Engineer hoin office ropui tak te nei ve tawhin kan awm ve tawh a. Chutih rual chuan district 4 ah chauh Division Office kan la nei thei a ni. Staff indaihlohna a lian hle a, Sub-Division erawh hi chu district 10 ah kan nei mek a. Tunah hian sanction post 227 kan nei mek a, chung zingah chuan post 126 chiah kan hnawhkhat thei a, a hrehawm khawp mai. Tunah hian 44.49% post hnawkhah loh a la ni a. Tun hnai ah khan kan Finance Minister, kan CM zahawm takin kan ngenna ngai pawimawhin Junior Grade MES post 3 lak phalna min han pe

hlauh mai a, kut kan beng dur dur a ni ber e. A department ang pawhin indaihlohna tam tak min phuhruk thei dawn niin kan hria a, kan lawm hle a ni.

Tun tum kan budget hi a tha tawk viauin kan hria a. Kum 2024-2025 a kan budget hi ₹1,03,18,23,000/- a ni a, nikum kan khumna hi 15.30% a ni a, a lawmawm hle a. Hnathawhna atana sum hman tur hi crore ₹88 lai kan nei thei a ni. Kan budget hi a tam lo hle na chungin, 103 atang khan crore ₹88.39 hi budget atanga chhutin 85.66 a ni. Hei hi hnathawhna tur atana capital head-a dah a ni a, hna eng emaw zat chu kan thawk thei dawn niin kan hria a, kan lawm viau a ni.

Tin, kan memberte hriat ve hrim hrima ka duh chu, Sawrkar kal mek ten central scheme hrang hrang a lo kalpui tawhah hian ‘Surface Minor Irrigation Scheme’ kan tih, PMKSY - *Har Khet Ko Pani* hnuaiyah irrigation project thawh mek 45 te thawh zawhna tur leh project thar 36 thawhna tur crore ₹40 (lakh 4,000) lai dah a ni a, project kal mek hi a ti hlawhtling ngei turah ka’n han beisei a ni. Tin, PMKSY - *Har Khet Ko Pani* scheme hnuaiyah tho hian Ground Water Irrigation Scheme atan hian project 13 thawh zawh tawh a ni a, project tam zawk thawhna turin crore ₹20 dah a ni bawk a ni (lakh ₹2000 a nih chu).

Tin, Flood Management Programme hnuaiyah hian tuilianin leilet zawlte a tihchhiat thin venna turin Anti-Erosion Scheme kalpuina turin lakh ₹50 dah a ni a. Hei bakah hian tunah hian project kallai mek tura beisei, Anti-Erosion Scheme 3 hi - Tuipui, Champhai, Tuiphai, North Vanlaiphai, Chite Lui leh Vairengte te tan DPR siam tawh a ni a, tunah hian bawhzui mek a ni. Ni 19-23 inkar khan Brahmaputra Board atangin Chief Engineer leh SE te an rawn kal a, a hmunah te pawh an rawn endik tawh a ni.

Tin, PM-KUSUM hi, nichin a memberte zawhna nen pawh khan a in relate tho avang khan kan tarlang ang a. Ministry of New & Renewable Energy hnuaiyah hian loneitute tan solar pump, tui pump khawl unit 1700 tihna tur tunah hian a hminsa kan nei a, State-matching share a ngaih avangin, NABARD kaltlangin state-in min tumsak a. Chungte chu tunah hian kalpui mek a ni a. Amaherawhchu, vawiin House memberte leh pawnlam atang pawha an hriat tul tih ka nei a. Unit 1700 hi tunah hian bultan mai theih a ni lova, Unit 200 atangin bul kan tan phawt dawn a ni. A chhan chu, a vendor tur kan inhmuzo mang lo a ni. Mizoram-ah chuan kan tui lak turte hi a inkar kik em em mai a, a then khutah lui mawngah leh, khua atanga hla deuh ngialah te pawh a ni. Chutianga pan vang vang a ngaih avang leh a hmun te a rem loh avangin, a vendor-te tan pawh hian han tih zung zung theih a ni dawn lova, chu chuan problem min siam a. Tunah pawh hian pilot project angin unit 200 velah tan phawt ila, kan ti a. Sorkar lam chu kan inpeih viau rualin, a ti hlawhtlingtu tur, a vendor-ten hma an lak zung zung theih loh avangin buaina kan nei a, mipui beisei pawh kan phak loh ka halu hle mai a. Amaherawhchu, theih ang tawk chuan bul tan chhoh kan tum a ni.

Tin, NABARD hnuaiah hian Rural Infrastructure Development Fund atangin irrigation project eng emaw zat zawh fel tawh a ni a, kan hmang tangkai viau a; thawh mek project eng emaw zat a awm bawk a. Heng bakah hian, Mamit Bialtu, Pu Zira rawn sawi tak ang khan, Tuidam Multipurpose Project, Mamit-ah khuan crore ₹29.40 sengin NABARD atangin sanction hmuh tawh a ni a (**Pu H. Lalzirliana**: Pu Speaker, ‘Tuidai’ a ni; ‘Tuidam’ nilovin.) Ka lo lam sual palh a ni, Pu Speaker; min lo hrethiam u la. Tunah hian peih fel thawkhat tawh niin, sanction tawh a ni a, rawlkhawlhain min nang a nih loh chuan, a rang lamin tender te pawh buaipui tura tih a ni.

Tin, ground-water irrigation project 4 atan cheng crore ₹6.05 NABARD sanction hmuh tawh bawk a ni. Irrigation & Water Resources lamah hian hmalak tur a tam hle mai a, tui kan neihte renchem leh daihzai taka hman a nih theih nan, fel taka chhinchhiah te a ngai a. Chutiang thawk tur chuan, Mizoram hmun hrang hrangah Real Time Data Acquisition System (RTDS) hi bun tawh a ni bawk a. Tuihu kal ral zat te leh lei hnawn dan te pawh englai pawha teh thin a ni a, satellite kal tlangin State Data Centre CE Office-ah khuan record pek reng a ni a, National Water Informatics Centre-ah thawn thlak leh thin a ni. Heng te pawh hi water resources lama kan hmalakna mek, pawimawh em em, la kal zel tur pawh a ni a.

Tin, Mizoram-in kum 2050 thlenga tui mamawh phu hruk nan Mizoram State Water Security Plan chu National In Chief of Ideology, Roorkee nen buatsaih mek a ni a. Heihi a pawimawh hle in ka hria a. Kum 2050 a lo kal hunah chuan keini, vawiin a helai House-a member tam tak te leh ngaithlatu tam tak te hi kan awm tawh lo maithei a. Thang lo thar lo kal zel tur te tan, kan water resources hi mumal taka enkawl a nih loh chuan nakinah thangtharten an la tuar dawn a, chuvang chuan vawiin niah hian sorkar kan inbuatsaih a pawimawh hle mai tih kha vawiin niah House-ah hian kan tarlang duh bawk a ni.

Pu Sawia khan darkar khat a hmang a, hman tlin loh deuh hlek ka tum ang a. Kan member-te, (kha, vei lama mite chu an va tlem tawh ve maw le) eng emaw han sawi lan nei te kha an awm a, an awm tawh loh deuh nual avangin kan react vak lo mai ang a. Pu Rasik Mohan Chakma, Tuichawng Bialtu khan, ‘potential basis scheme a kalpui theih ni se’ a tih kha - irrigation project hi command area basis-in potential area awm dana zirin, horticulture leh agriculture emaw, WRC area-a duan thin a ni tih kha kan hrilhfiah duh a. Tunah hian NABARD RIDF-29 hnuaiah hian hmun hrang hrangah hmalakna neih mek a ni a, ground-water irrigation project te pawh North Vanlaiphai-ah te khan an nei a nia; Bialtu, Pu Muanpuia khan lo hria se tha awm e.

Tin, Er. H. Lalzirliana, MLA-in Mamit District office chungchang a rawn sawi kha tawitein react ka duh deuh a. Mamit District hi Mizoram-ah WRC potential area ngah ber pawl a ni a. Chutichung chuan District Irrigation Office emaw Sub-Division Office emaw pawh a la nei lo hi a veiawm khawp mai a. Agriculture hlawhtlinna a tana

pawimawh tak Irrigation Department hian Mizoram District 11 awmah Division Office district 4-ah chauh kan nei ka tih tawh kha. Chuvang chuan, khawthlang Mamit-ah hian ‘tan kan lo la zel ang’ tih kha ka han tiam duh a. Pathian zarah engtik ni ah emaw chuan Division pawh kan la nei ngei turah ngai ang. Irrigation hi kan sawi tak ang khan, tun tum budget ah hian 15.30% laia a pung hi chu kan lawm hle a ni.

Pu Speaker, a tawp bera tan Agriculture Department chungchang ka han tarlang leh ang a. Kan budget hi punglo deuh te khan min ngaihsak a, mahse tunah hian a pung tha viau a nia; 19.35% vela pung angin kan chhut a, mahse kan chhut dan te a lo inang lo deuh hlek a; Sorkar tharah hian budget pung pawl tak niin ka hria a ni. Revenue Head ah hian lakh ₹12,614.12 a awm a, Capital Head ah hian lakh ₹7,703.84 a ni. Capital Head pawh hi a chhe hran lovah ka ngai. Tunah hian Agriculture hi sorkar thar flagship a nihna lai te pawh a awm a. A zawng zawng, a thlai ang zawng chuan ni lo mahse, Agriculture Department hi marketing atan nodal department ang deuh kan nih vangin, en kan hlawh hle dawnin ka hria a. Chuvang chuan, kan tan hle pawh a ngai dawn a. Tin, kan thawhpuite, agriculture lama mithiam kan official-te, sorkar tharah hian an phur hlein ka hria a, chungte chuan kei pawh hi min tiphur hle a ni.

Agriculture ka chang hi vannei ka inti hle a. Kan Chief Minister hi kum 25 lai mai a hnung ka lo zui ve tawh a; a hnungzui hian ka vakvai rei ve viau tawh a. Ka vahvai chhan ber pawh hi, ‘*Agriculture*’ a ni a, a hnung ka zui chhan pawh hi ‘*Agriculture*’ a ni. Kum 25 liam ta ah khan agriculture thlaithar lei chungchang hi kan hotupain a aupui thin a, a tha ka ti hle mai a. Chuvang chuan, ‘a policy hi zawm ve a ngai a ni’ tiin, a hnung ka’n zui a. Chu tih lai chuan, thlaithar leina tur budget-a dah hi kan aupui thin a; kan au kan au a, kan au zel a, kan sorkar thei bawk si lova. Kan au rei ve viau a ni. Zoram hmun hrang hrang fang kualin, ‘thlaithar leina tur budget-ah a dah theih e’ tiin kan au a; kan han inthlang a, kan tla leh thin a, tlemte chauh kan tling leh thin a. Mahse, kan beidawng duh chuang lo a. Chutiang chuan, kum 25 hnuah chuan kei pawh hi Agriculture minister hial ka lo ni ve thei ta hi, Pathian leh ka bial mipuite chungah pawh lawmthu ka han sawi duh a.

Chutiang chuan, kan lo vei tawh, kan hotupa pawhin a lo vei em em a nih avangin, Zoram-mipuiin sorkar thar pawh hi min thlirna a sang hle tih pawh hi vawiin ni-ah hian ka hria a, chuvang chuan, tan lak pawh a tul hle dawnin ka hria a. Tunah hian Ministry of Agriculture & Farmers Welfare Scheme hnuaiyah hian scheme tha tak tak kalpui mek a lo awm a, hun eng emaw chen kalpui tawhte an ni a. *Entirnan*: Bul kan tan chhoh mek - ‘*Digital Agriculture Mission*’ an ti a, he mi hnuaiyah hian agriculture farmer-te e-Governance Plan hmangin ruahmanna siam a ni a. Tunah hian kan buaipui mek a, kum 3 chhunga zawh tur a ni a. Hetiang central scheme a lo awm leh zel te hi vanneitlak kan ti hle mai a, department pawhin vannei kan inti a. He mi hnuaiyah hian hlawhtling taka kalpui theih a nih chuan, kan State chhunga kan farmer-te hi awmzeneiin data felfai tak hmangin enkawl an ni dawn a ni. Hetah hian Steering Committee leh Implementation

Committee te pawh din a ni tawh a, a project kalpuina tur atan hian ₹19,52,00,000/- lai mai tunah hian earmark - ruahmanna neih mek a ni.

‘Digital Agriculture chu engnge a tangkaina’ kan ti mai thei a; wawiina han sawi lan ka duh chu - loneitute data base siam hi a pawimawh hle a ni. Tunah hian bul kan tan mek a, official te nen ‘*know your farmers*’ tiin bul kan tan tha dawn a ni. Kan farmer-te hi kan hriatchian a ngai hle mai. Land records data base te, agriculture marketing system te pawh siam a ngai a, hemi hnuaiah hian. Digital platform te pawh kan siam ang a, soil data base te, loneitute tan data app te pawh kan siam ang a, land-resource inventory te pawh siam a ngai ang a, GIS technology te pawh he digital mission hian a keng tel dawn a ni.

Tunah hian kan rama intodelhna tura kan kalpui turah pawh hianin ‘National edible oil’ tih hi kalpui mek a ni a, tunah hian antam tel, be kang, nihawi, badam leh thildang dangah te pawh kalpui a ni a, hei hi sorkar thar hian nasa leh zuala kalpui a tum dawn a. Agriculture a kan problem ber chu marketing a ni a, kan sorkar thar hian hengah hian marketing-a umzui kan tum dawn a ni.

Tin, he mission hnuaiah hian, ‘tree borne oil’ an tih hi, tunah hian chengkek atangin bul an lo tan tawh a; mahse, keimah hi ka tui vak lova, ka tel ve hma atanga an lo tih a ni. Kei chuan Tung-chi hi ka support a; tunah hian kan official-te hnenah pawh, ‘Tung hi engtingge kan neih theih ang’ ka ti a. Serchhip-pa Tung nei te phone kual a, Tung ching dang dangte ka’n be kual baw k a. Kuminah a lo rah tha lo hlauh mai a, a chi tur mang hi kan hmu zo dawn lo a. Chuvang chuan, kan officer thenkhatte phai lamah ka tir a, Tung chi eng emaw zat lak luh kan tum a. Tung hi tunhmain kan lo ching tawh a, ‘ching rawh u’ an ti a; farmer-te hian thu kan awih thei viau a. Mahse, a market kan thlen phak si lo kha, kan buaina a ni. Tung pawh kum 20 chuang kal taah khan kan lo ching tawh a, a hralhna a awm chuang si lova; thehlei ten an tlan a, an tlan theih lohna hmunah pawh a ral mai mai a; a tawpah pheih chuan thlai dang hmunah kan vat a, thlai dang te kan ching leh a ni. Tunah hian Tung market te pawh a lo tha ta zel a, a market tha viau turin kan han chhut a, a thara kalpui leh chi ni te pawhin kan hria. Tunah hian AMFU te nen tangrualin hma kan la mek a. Kumthar lamah chuan Tung hi tun aia zau zawk te hian kalpui kan tum dawn a ni.

Tin, RKVY hi hman tangkai viau kan tum a, kan hmang tangkai tawh tho a, sorkar hmasaah te pawh; tangkai leh zuala hman kan tum a ni. Hemi hnuaiah hian *Vegetable supply chain* kalpui kan tum a. Covid lai khan kan han kalpui a, a tangkai viauin kan hria. Sorkar hian fel fai leh tangkai zawkin a kalpui theih ka ring a, ZPM policy-ah pawh heng te hi kan han telh a, sorkar thar hian kalpui kan tum dawn a ni. Ruahman ang chuan, RKVY-ah hian DPR-te kan han siam a, tunah hian Aizawl kawtchhuah hmunli velah hian *wholesale godown* a tan crore 20 allocation kan hmu a, DPR tura earmark a ni tawh a. RKVY hi DPR based anih avangin scheme dang dangah pawh hian kan

hmang tangkai dawn viau a ni. Kan Mizoram budget chhung atang chuan thil tam tak tih tum pawh ni ila, theih loh chin a awm avangin, central scheme hi nasa lehzuala haichhuah kan tum dawn a ni.

‘Sub-Mission Agriculture Mechanisation’ kan ti a, hemi hnuaiah hian central atanga allocation 2024-25-ah hian crore ₹20.31 lai kan hmu tawh a, hemi scheme hnuaiah hian kut-hnathawktute tan tractor leh thil dang dang - grass cutter etc. te kan sem thin a, sem leh tura buaipui mek a ni. 2024-2025 atan hian central scheme atang hian allocation hmuh kan nei nual tawh a, chungte chu kan tarlang ang a. -

- a) Agriculture extension (ATMA) - crore ₹9;
- b) Nation Food Security & Mission - crore ₹2.80;
- c) Sub-Mission on Seeds & Planting Materials (SMSP) - crore ₹2;
- d) National Mission on Edible Oil, (Oil-palm bikah) - crore ₹30.97;
- e) National Mission on Edible Oil, (Oil-seed bikah) - crore ₹8.70;
- f) Mission Organic Value Chain Development for North East Region - crore ₹33.50;
- g) RKVYD DPR based - crore ₹7.70;
- h) RKVY Plant based (Soil health and fertility) - crore ₹2.9;
- i) Rain-fed Area Development - crore ₹5.50;
- j) Sub Mission on Agricultural Mechanization - crore ₹12.3;
- k) Per drop, more drops - crore ₹27;
- l) Agro-Forestry - crore ₹2 crore;

Hengte hi allocation kan hmu tawh a ni.

Warehouse Infrastructure Fund atan hian NABARD chuan State tan loan a pe thin a. Tunah hian NABARD atangin crore ₹9.5 hmuh a ni a, crore ₹10 dah a ni. 9.5 hi NABARD atangin a ni a, 50 lakh hi state matching share a ni. NABARD atang vekin Rural Infrastructure Development (RID) fund atang hian agriculture link roads 46 siamna tur crore ₹30.75 hmuh tawh a ni a, tunah hian kalpui mek niin, tender thuai tum a ni.

FOCUS - ‘Fostering Climate Resilient Upland Farming System’ project hi January ni 25, 2018 atang khan kalpui a ni tawh a, March ni 31, 2024-ah hian a tawp tawh dawn a. District 6-ah hma lak a ni a, an kalpui tha viau a, State dangte ngaihtuah pawhin; min fak viau a ni. District zawng zawng erawh kan la tuam kim thei lo a, inchinfelna hun, extension period kan dil a, min phal sak tawh a. FOCUS 2.0 hi district 11-a kalpui turin Mizoram sorkar phalna/approval kan la leh tawh bawk a, concept note peih tawh chu Department of Economic Affairs, Ministry of Finance-ah thehluh tura buatsaih mek a ni a, kan thehltut thuai thei turah kan in ngai a ni. chuta tan chuan kumin budget-ah hian State sorkarin a lo doletna tur lakh ₹6320/- kan budget-ah hian dah tawh bawk a ni.

Achievement neih mai tur kan nei a. Indian Institute of Oil Palm Research leh Ministry of Agriculture bul tumin West Serzawl ah khuan kum 2015 (Pu Nguna te an awm tawh lova) Congress Ministry hunlai atanga ruahman tawh kha a ni a. ICAR scientists-ten an vil reng a, tah khuan oilpalm seed siamchhuah tum a ni a, 2025-2026 chung ngei hian seed siam chhuah beisei a ni. Kar lo kal mai turah pawh hian scientists-te'n an rawn tlawh dawn a, hmasawna ropui tak kan nei thei dawn a. Tum anga a kal tluan theih chuan, kum khatah oilpalm seed hi nuai 5 lai siamsak theih tura beisei a ni a, sorkarin pawhin revenue lakh ₹175/- vel hmu thei tura beisei a ni a A alawmawm dawn hle mai.

Sorkar thar hian policy fel tak kalpui tum a nei a, chung zingah chuan, 'collective farming' kan ti a, cluster approach hi kan ngai pawimawh hle dawn a, keimahni tawngkam chuan, 'zau-policy' kan ti a. Member zahawm tak Pu Chhantea khan a rawn zawt deuh a, react tur ka nei tho a. Mahse, han tih tel hram ka duh chu, phai-zau leh zo-zaua kalpui hi kan tum a ni. A chhan chu, kan hria angin agriculture hi sawrkar tinin develop kan tum vek a, amaherawhchu, farmer-te hi zau inang lo deuh deuhah hma an la thin a, agriculture link road te, irrigation te leh thil dang dangah han puih theih an ni thin lova, chu chuan harsatna tam tak a thlen thin a ni. Chu chu hriain kalphung thar sorkarah chuan zau, a tam thei ang ber develop kan tum a ni. Chu chu, '*phai-zau; zo-zau*' tih te kan vuah a. Kawng te kan laih sak ang a, irrigation te kan pe ang a, eng te pawh an mamawh dana zirin, thildang khawl mechanization tur ang te pawha puih kan tum dawn a ni. Chutiang chuan, mumal nei tak a sorkar thar hian agriculture leh horticulture hi kalpui kan tum a ni. Chumi atan chuan *zau-policy* ruahmanna fel fai tak nen kalpui kan tum dawn a ni.

Tin, agricultural marketing chungchang hi kan sawi tawh a, hun hmasa lamah khan, '*engatinge hmunphiah in lei loh; kut-hnathawktute in va ngaipawimawh lo ve; in sawi angin in va awm lo ve*' han tih mai te pawh kha kan tawng a, waviinniah hian han sawifiah deuh hlek a ngaiin ka hria a.

Agricultural marketing hi central sorkar pawhin a ngai pawimawh em em mai a. Tunah hian Central sawrkarin Agriculture Produce & Livestock Marketing Promotion of Facilitation Bill inang hi state tinah min barh luih a tum a ni. Tunah hian keini pawhin he ruahmanna hi kan siam mek a, Draft Bill, 2024 hi tunah hian kan peih deuh thaw tawh a, Cabinet lama la pharh turin kan la chhawpchhuak ang a. Agriculture Marketing Board din a lo ni dawn a, chu chu sorkar tharin kan intiamna te pawh a ni a. Amaherawhchu kan sorkar hi thla 2 deuh chauh a la nih avang hian, marketing kan ngaih pawimawh em em avang hian, 'sorkar thar hian, ruahmanna i siam teh ang' kan ti a. Tah chuan, *Operational Guidelines for Agriculture Market Assurance Fund* kan han duang rup rup a, chu chu Cabinet ah pawh pawmpui tawh, pass-pui pawh kan ni tawh a. Chumi hmang chuan hun eng emaw chen khailak chhung hian kan lo intiam ang te, kan lo sawi thin angin agriculture marketing hi luhchilh kan tum a ni. Amaherawhchu, tihngaihna thlawt a awm lo a. Kan Chief Minister-in a ngaih pawimawh em avangin

crore ₹110 kha min han pe phawt a; amaherawhchu, min han pe mahse, a hman dan tur kha helaiah sorkarin ruahmanna engmah kan la neih loh avangin, tihngaihna a awm chuang silova; kan umzui mek zel a ni. Hmunphiah te kha chu lei hman zia zang kan ni lo; tihngaihna a awm lo hrim hrim; a sorkar lam kha kan inpeih lo reng reng. Tin, pawisa lam kha, ‘nimin khan crore ₹110 finance lamin min pawmsak chiah a ni’ tih kha memberte ka’n hrilh duh bawk a ni.

Chutiang chuan, agriculture marketing hi sorkar thar hian a ngai pawimawh dawn hle mai a. Kum 37-a upa state lai kan lo ni tawh a. Kan sorkarin, ‘ching rawh u’ an ti a, kan farmer-te’n thuawih takin an ching ziah a, an taima em em a ni; pangbal leh thlai dangte, sawi tur a tam lutuk, kan hre chiang em em a ni. ‘Ching rawh u’ an ti a, kan ching mai a; amaherawhchu, a market lampang kha sorkarin a ngaihven tawh loh avangin, kut-hnatawktute he ramah hian an beidawng em em a; Tung te pawh, ‘*thing-anchhe dawng*’ an ti hial a ni. Kan thlaite hian hming an nei ngah viau tawh a nia.

Chuvangin, Sorkar thar hi chuan, *kut-hnathawktute beidawn tawh lohna ram* siam a tum avangin, kan lo aupui a. Vawiiniah hian agriculture kan han sawi te, horticulture kan tih te hi, production ringawt ngaihtuah tawh lovin, *market driven* - a market nena thlunzawm nghal turin hmalak kan tum a ni. Chuvang chuan, vawiinnia kut-hnathawktute tan ZPM chuan sawhthing, hmarcha, aieng, hmunphiah te ah, ‘hma kan la ang’ kan ti a. Amaherawhchu, kha kha chu party pakhat intiamna a nih avangin, tunah sorkarin notified crops kan puang dawn a, chutah chuan khang thlai kha Agriculture Market Assurance Fund hnuaiah hian kan notify dawn a, chu chu kan hmabak a ni. Sorkarin thlai te, a rate nen a notify ang a, ZPM lo intiam tawh ang ngeiin, tuna kan rate angah hi chuan *minimum support price* nen kalpui kan tum dawn a ni.

Chuvang chuan kut-hnathawktute ZPM Sorkar ah an phur hle mai a. Hmanniah ka bialah ka han kal a, “sawhthing in cho tawh em?” ka han ti a, an cho phal lova, a chi ah an dah deuh vek mai a, a ching thar turte pawhin a chi lei tur an nei mang lova. Chutiang khawp chuan ZPM Sorkarah hian kan kut-hnathawktute hi an phur em em a ni. Chuvang chuan, an phurna tihlawhtling ngei turin Sorkar pawhin hmalak kan tum dawn a, market assurance hi kan farmer-te kan pe dawn a ni; theihtawp kan chhuah ang.

Tin, chu mai a tawk lova, a *processing unit* nena kan umzui a ngai a ni. Tunah pawh hian hma kan la nghal char char a; hmarcha te, sawhthing te, ieng te pawh ‘processing kan kalpui ang’ tiin ngaihtuahna kan seng mek bawk a. Tiang chuan mithiam kan hriat phak ang tawk tawkte kan rawn a; eng emaw chen hi chu a processing unit nena dah a, hand-holding policy kan neih hnuaiah kan thalai - kan entrepreneur-te pawh kan hmanng tangkai hle turah kan ngai a. Mi tam tak tan eizawna thar te pawh he kan agricultre market atang hian hand- holding policy kaltlangin kan thalaite pawhin hna an hmu turah kan beisei a ni.

Chuvang chuan, kan rama thlaitharte minimum supports price kan pek theih chuan, kan kut-hnathawktute an hlim hle ang a, kan economy pawhin nasa takin hma a sawn dawn a ni. Economy hmasawn rualkhaina ber tur chu, agriculture hi a nih avangin, agriculture-ah hma kan sawn chuan, kan ram economy a thang hle turah kan ngai. Rate mumal tak nei sain kut-hnathawktute'n hna an thawk thei ang a, minimum support price hmangin Sorkar a lo tang bawk ang a, theihtawp chhuahin hma kan la dawn a ni.

Tin, kan sawi tawh ang khan, Chief Minister hian *crop insurance* hi a aupuina a rei tawh hle mai a. Ka hriat ve theih chinah chuan, kum 25 liam ta khan a lo au tawh a, keini pawhin kan sawi tawh thin a. Vawiiiniah hian *crop insurance* hi kan ramah hian kalpui ve ngei a tul a. Kan kut-hnathawktute thlaite hi chhiat theihna tam tak nei thlaite an ni a, rannung eng emaw kan hriatloh tak tak te'n an tichhe thei a. Chuvang chuan, kan farmer-te hi insurance policy hmanga kan tuamhlawm an ngai a. Sorkar thar chuan a budget-ah pawh, a bultan nan lakh ₹5 kan han dah phawt a, tunah hian *Agriculture Insurance Policy of India* te kan ko chho a; sensitization te pawh state level-in February ni 22 leh 23 khan kan lo nei tawh a ni. Agriculture insurance hi, 'thlai luman' tiin Mizo tawng chuan sawi ta mai ila, kan hotupa aupui thina kha Mizoram ah hian a hlawhtlinna hmuh ngei kan tum. Thlai zawng zawngah chuan bul kan la tan thei lo ang; amaherawhchu, thlai pahnih-khat ah te bul kan tan theih kan inbeisei a, chutiang chuan ruahmanna neih kan tum dawn a ni.

Tin, Brig. T. Sailo hunlai tawh khan chhim lampanga agriculture potential kan neihna saw an lo vei tawh thin hle mai a. Kan chief-minister a piangte hian buh leh bala intodelh pawh an lo aupui nasa a, vei pawh an vei a. A dik pawh a dik reng a, '*Zo-buh ngei ei*' tih te pawh kha a lar viau thin a nih kha.

Kan ramah hian agriculture land - leilet atana siam theih a bikin ram potential kan nei tha hle a, tunah hian hectare 74,644 kan neihah hian, hectare 15,964 vel hi chu hman tangkai tawh a ni a. a bak hi hman tangkailoh a la tam hle mai a. Chuvang chuan, sorkar thar hian, '*Look South Policy* neih a tul a nih hi' te ka'n ti deuh a; chhimlam te pawh kha kan han hawi deuh tan a. Chhim lampang MLA te vawiiiniah hian ka'n hrilh hre duh a - tunah hian Planning & Programme Implementation bul tumin Agriculture leh Irrigation Department te tangkawp in MIRSAC te nen *Remote sensing technology* hmangin chhim lampanga leilet siam theihna hmunte tunah hian zirchian mek a ni a. Kan tum ang chuan, chhim lampang saw kan hawi dawn a, kan ram neih thatna te a ni a. Sawlamah chuan mechanization nen, buha intodelh ngei thei turin hma lak pawh kan tum dawn a. Chamdur te, Betsuri te, Palak te lam hi sorkar thar chuan a hawi dawn a ni tih kha, vawiiiniah hian ka'n sawi tel duh a ni.

Pu Speaker, kan department hi ka tui a. Agriculture te, Irrigation & Water Resources te, Co-operation te hi, a mimal taka ka department tuina a nih avang pawhin sawi tur a tam hle mai a. Tin, kan thawhpuite, kan official-te thawhpui an nuam a, an beng a var a; tin,

an fit hle dawn te pawhin ka hria a. Vawiinniah hian kan member-te ngaih pawimawh tak tak kha han chhang dawn vek ila chuan, kan sawi tak chhunga mi kha a ni a; kan Opposition Leader erawh kha chu ka'n react ang a, ama mimal bikin. (Pu Ngun, i awmlh hlanin chhim lampang hawi policy kan siam ka lo sawi a nia aw.) Pu Chhantea sawi bik lai, nichin khan phai-zau leh zo-zau kha chu ka chhang tawh a; chhan loh pakhat kha, question ang deuh a nih avangin ka'n react lawk ang a; 'Urban farming sokarin eng tin nge kalpui a tum' tih lai kha.

Covid lai khan urban farming kha Aizawl ah kan kalpui a, a tha hle mai a. Maian te, antam te kan ching a, in chung sang hman tangkai loh te kha kan hmang tangkai a ni. Kha kha, a fuh viau mai a, chhungkaw tam takte kha anhnah-ah kan intodelh deuh thaw mai a ni. Aizawl-ah hian in lian tak tak te kan nei a, in chung zawl hman tangkai loh tam tak kan neih te hriain, kan policy duan lai khan he, *urban farming* hi ti tel kan ni a. Kan in chungah hian *rooftop farming* hi a tih theih vein kan hria a. Chuvang chuan, 'hei hi uar ila' tih kha kan *Sustainable Development & Reform Policy*-ah khan kan telh ve a ni. Tin, rooftop-ah hian lei hmang lova thlai chin - *hydroponic* hi a tih theih a, Japan anga ram nei tlemah te chuan an uar hle tawh mai a. Chuvang chuan, heng han kalpui te kha kan policy-a kan telh ve a ni.

Awle, sawi tur a tam hle mai a, ram hmasawna tura kalpui kan tum, kum tam tak; tu tih dan takah emaw, - *fa-lu hloh* deuh thaw khawpa kan lo vahvaihpui ve tawh a nih avangin, kan department chan te hi a tuiawm ka ti a. Chuvang chuan, sawi tur ka ngah a, sawi vek dawn ila chuan zan in hun hian min daih awm lo e. Agriculture te, Irrigation te, Co-operation te a nih avangin, kan Deptt. hi bial zawng zawng huap a ni tlat mai a. Chuvang chuan, inthlahrung lo ula, kan opposition lampang pawh kha; inthlahrung reng reng suh u. In bial hmasawna tur a nih chuan, theih tawp chhuahin tan kan la tlang dawn a ni.

Tin, Multipurpose Cooperative Society din tur kha, Opposition bialah pawh kan din vek dawn a ni. A chhan chu, State sorkar hian department pakhat mai ni lo - Agriculture te, Horticulture te, Soil te, Forest etc. te hmasawna tur kan kalpui reng rengah hian, khang ho kha kan hmang tangkai dawn a. Kan development leilawn tur a nih avangin, khalai kha Mizoram pumpui, khaw tinah a tam thei ang bera din kan duh a ni.

Awle, Pu Speaker, a hmawr ka bawh tawh mai ang a. Heng ka demand-te –

<i>Demand No.</i>	<i>Purpose</i>	<i>Amount (in ₹)</i>
31	Agriculture	2,03,17,96,000.00
37	Co-operation	15,16,74,000.00
47	Irrigation & Water Resources	1,03,18,23,000.00
TOTAL		3,21,52,93,000.00

a nihna dik taka hman a nih theihna tur leh, kan ram hmasawna tur atana tangkai taka hman a nih theihna turin, he House zahawm takah hian min pass-pui turin ka rawn ngen e.

HON. SPEAKER : A lawmawm e. Kan Agriculture Minister zahawm tak kha a phur a; a tui a, a cheng a. Mahse ‘tunge niang aw’, tih ka lo nei a – ‘*Kan Finance Minister leh CM Minister*’ a tih kha, ‘tunge ni ta ang aw’, ka ti a; ka la hre hlei thei lova. Nakinah banah min hrilh sela thain ka’n ring a.

Le, tunah chuan, Minister zahawm tak Pu PCVanlalruata’n a demand te –

<i>Demand No.</i>	<i>Purpose</i>	<i>Amount (in ₹)</i>
31	Agriculture	2,03,17,96,000.00
37	Co-operation	15,16,74,000.00
47	Irrigation & Water Resources	1,03,18,23,000.00
TOTAL		3,21,52,93,000.00

he House ah pass a rawn dil a. Remti apiangin, ‘rem ti’ ti rawh ule. (**Memberte** – Remti) Remti lo kan awm chuan, ‘rem ti lo’ ti ula. (*Remti lo an awm lo a.*) A lawmawm e.

Aw le, Minister zahawm tak Pu PC Vanlalruata demand chu, House-in lungrual takin a pass ta a ni (**Pu PC Vanlalruata, Minister:** Pu Speaker, ka lawm e).

Tunah chuan, Minister zahawm tak Pi Lalrinpuui, a demand kan sawihona te windup turin kan sawm ang a. Sawifiah ngai a tih te rawn sawifiahin, a demand-te House ah rawn pass dil nghal turin ilo sawm ang u.

PI LALRINPUUI, HON. MINISTER: Pu Speaker, ka lawm e. Hei, zan dar 8:30 a lo ni ta a. Ka department chan tourism kha mi 23 in an rawn sawi a, WCD mi 5 in an rawn sawi bawk a. ‘*Woman*’ a tel tawh hi chuan, mipa ho hi an sawi tui tawh lo thin a. Tichuan, Tribal Affairs chungchang kha mi 6 in an rawn sawi bawk a; Health Deptt. kha mi 15 in an rawn sawi a ni.

Tichuan, Pu Speaker, hei, tah hian ka inring vek mai a; han react vek pawh a chakawm a. Mahse, a rei dawn lutuk a, Pu Speaker, rem i tih chuan, ziakin ka pe thei a. Tin, windup speech ah hian a tel teuh dawn tho a; ka lo inbuatsaih tho na a. Nizan dar 2:30 khan ka speech tur hi ka zo ve chiah a. Chutiang chuan phok 18 a ni a, chu erawh chu in gaihthlak zawh vek chu Pu Speaker, ka ngen a ni.

Tichuan, a hmasa berah, Demand No. 43 - Tourism Deptt. hi han sawi dawn ta ila. Tunhma lamah kha chuan Tourism tihhmasawn nan hian infrastructure lamah hma lak a ni thin a. Hmun tamtakah tourist lodge te sak a niin, tourist destination hrang hrang

tihchangtlun nan DPR te siam a ni a. Central sorkarah thehluh a niin, tam tak chu thawh mekte pawh tunah hian a la awm a ni. Vawiinni ngeiah pawh hian *Prasad* hnuai project pakhat - “Development at Vangchhia” Champhai District ami chu, kan Prime Minister zahawm tak Pu Narendra Modi chuan virtual mode-in a hawng a; Tourism-a kan Director Pi Lalrodingi leh a hote pawh an han kal nghe nghe a ni. Tichuan, tourism sector tih changtlungna ah hian sorkar hmasate kha an fakawm em em a, an hmalakna te kha a tha a. Chuvang chuan, thil tha chhunzawm tlak chu kan chhunzawm zel ang a. Amaherawhchu, tourism sector tichangtlunga hmasawna kalpui tak tak tur chuan, kalphung-thar hi kan mamawh viauin ka hria a. Chumi tihlawhtling tura kan hma lak tumna hrang hrangte ka’n sawi ang a -

1. Tourism hlawhtlinna atana pawimawh ber chu, ‘mipuite’ kan ni. Chuvang chuan Tourism ah kalphung thar thlen turin community based-tourism a tak a kalpui kan tum a ni.
2. United Nations-in Sustainable Development Goal leh target a siamte behchhanin Tourism Department chuan hmasawna tluangtling leh rotling neih hi a tum hle a. Ka sawi duh chu, SDG goal hrang hrang tourism hmasawnnain a ken tel theih

Goal no. 1 - *No poverty*;

Goal no. 3 - *good health and wellbeing*;

Goal no. 5 - *Gender equality*;

Goal no. 6 - *clean-water and sanitation*;

Goal no. 7 - *Affordable and clean energy*;

Goal no. 8 - *Decent work & economic growth*

tih te hi, thingtlanga hmasawna ei leh bar kawnga awlsamna an neih theihna turin tourism development atanga thlen tir kan tum a ni. Tourism hmasawna hian kan tu leh fa, chhuan lo kal zel turte tan hmasawna tluantling - *thoroughly sustainable development* a nih theih nan leh tourism chu *inclusive and sustainable economic growth* a nih theih nan theih tawp chhuah a tum a ni.

3. Tourism village atan pilot phase tur khaw pali-panga thlanchhuaha, SWOT Alliances nena Tourism lama hma an sawn theihna tura hmalakpui kan tum a ni. Hei bakah hian village base, MLA tinte hnenah tourism village an bial theuha adopt turin ngenna ka rawn siam tawh kha in lo hmu theuh tawhin ka ring a. Tourism hi eizawna puitling, sum lakluhna tha tak siam kan tum a, nakum budget-ah pawh hian kan revenue target ah sorkar chuan lakh ₹350, Pu Speaker, min tuk a, chu pawh chu, ‘hlen ngei kan tum ang’ tih hi House kal tlangin ka rawn sawi duh a ni.
4. Tourist te’n Mizoram chung nuam ti taka an lo thlen theih nan tunah hian Airport-ah *Greeters* kan dah a, a chhan chu, “Welcome to Mizoram” an lo tih rikngawt pawh hian tourist tam tak chu an ngaih a ngam sa em em a; inner-line permit neih ngai te kan ni a, thenkhat tawng thiam mang lovin an lo vin deuh

khur khur phei chuan, lo kal nawn chakte, official-a lo kal chakte, an chhungkuaa lo kal leh chakte pawh an awm thin lova. Khangte kha hrerengin Airport-ah Greeter - “Welcome to Mizoram” tih kan dah tawh a ni.

5. Privatization outsourcing kalpui zel tum a ni a. Loss-making infrastructure kan neih te hi privatize zel dan ngaihtuah tha kan ti a.
6. Mizoram chhunga khawmpui lian neuh neuh kan neih a; nikum lawkah G-20 summit kan thlen tum pawha mikhual thlenna lama harsatna kan tawh te kha kan la hre theuh ang a. Chuvang chuan, Mizoram chhungah Five Star Hotel a awm ve theih ngeina tur hian hma kan la a, hei hi kan Chief Minister te nen pawh hian sawihona te kan la neih pawh a ngai dawn a ni.
7. khualzin tamzawh kan hipa, khualzin hote'n plan mumal taka Zoram an rawn tlawh theihna tur - *Event Calendar* kan siam tawh a, hemi hmang hian tour package te siamin, Mizoram chhung leh pawna tour operator-te nen tangkawpin a tam thei ang ber kan market ang a, sum huiluhna atan te kan hmang dawn a ni. *Entirnan*: Chapchar Kut te pawh hi Tourism nen kan thawh hoa convergent kan neih chuan, keini'n a market kan lo ti ang a, mi tamtak an lo lut thei dawn a ni.
8. *Guidelines for Home-Stay* kan neih mek chu tha zawkin kan siam leh mek a, kan policy kaihhnawih thil a nih avangin, (Pu Rintea kha rawn ka react nghal ni se) khami guideline uluk deuh zawkin, thingtlanga tourism lama tui mite tan eizawna ngialnghet tak a nih theihna turin hma kan la dawn a ni.
9. *Tourist-vehicle team* siam tuma hmalak mek a ni bawk a; taxi-fare te a to em em a, tourist hovin an sawisel ber chu, tourist vehicle team kan nei lo hi a ni a. Meghalaya-ah te khuan an nei a, a tha em em a, tlawm tak takin tourist hote'n an hmang a. Hemi scheme hi tunlai hian kan buaipui mek a. Tourism hi charge ka lak hnu hian vawithum kan meeting tawh a, officer tlema a lian deuh te nen sawihona vawi tam tak kan nei tawh a. Tiang chuan, he scheme hi kan buaipui mek a ni.
10. *Training on Capacity Building* chungchang hi a pawimawh zia kan hria a, hei hi kan party manifesto, ‘*hand-holding policy*’ te nen pawh a inzul viauin ka hria a; chutiang tur chuan kumthar atangin department te pawhin hma nasa lehzualin thingtlanga tourism potential kan neih khuate ah hmalak kan tum a. Hei bakah hian Airport-a police duty te tan basic communication skill te leh, Home Department nen tang tlanga training buatsaih kan tum bawk a ni.

Kum kal ta 2023-24 December thleng khan ‘domestic tourist’ kan tih ang chi Mizorama tlawhtu kan neih hi mi 1,52,413; foreign tourist hi mi 2503; an vaiin mi 1,54,916 kan nei tawh a ni. Tunah hian project kal lai kan nei teuh a, ka’n sawi puat puat ang a -

- a) Development of village base eco-tourism at Khamrang in Mizoram, NESID hnuaiyah kan nei a;
- b) Development of Mt. Mawma Ecological Park at Chakhei, hei pawh hi NEC ah kan nei a. Pathian zarah kan dam a nih chuan, March thla tawp lampang, April thla tir hian hei pawh hi a hawna neih kan tum a.
- c) Development of Beraw Tourist Resort, Aizawl, hei hi SASCI hnuaiyah kan nei bawk a.
- d) Upgradation of Rural Road in 02 District of Mizoram - Reiek, Samtlang leh Tlungvel-ah kan nei bawk a;
- e) Development of Infrastructure for Pilgrimage & Heritage Tourism in the State of Mizoram under Prasad Scheme te;
- f) PCC Road at Bawngkawn Farm Veng, Sairang Dinthar te;
- g) Laying of Golf Course Paver Block at Thenzawl;
- h) Upgradation of Chawngte Tourist Lodge, (hei hi member zahawm tak Robert Romawia zawhna kha ka chhanna ni nghal sela);
- i) Development of Convention Centre Scheme for Extension of Central Agencies for Tourism Infrastructure Development, tuna WAPCO in a thawh lai te a ni.

Chutiang chuan sawi tak ang khan toursim develop-na tur thil tam tak, ‘engnge a potential; eng nge khualzinte’n tlawh an duh’ tih te pawh kan nei a. Chutiang chuan detailed project te kan siam zel a ni. Pu Robert-a zawhna ka chhanna ni nghal sela, DPIIT in kan DPR thehluhte chu Unity Mall chungchangah min pawm sak a, crore ₹127 lai mai fund allocation min pe nghal a. Mahse, Ministry of Finance hnuaiyah Department of Expenditure-ah sanction turin a la tang mek a, a kal tluan thuai kan beisei a ni.

Hei hi Pu Ramthanmawia zawhna ka chhanna a ni bawk ang a; Swadesh Darshan 2.0 project hnuaiyah hian Aizawl leh Champhai destination thlan a ni a, Swadesh Darshan 2.0 hi central sector scheme a ni a, 100% central funding a ni. A project consultant pawh central government-in *Asis India Consulting Engineer Pvt. Ltd.* te a rawn thlang a, Project Manager-in Aizawlah thutchilhin, master plan hi Aizawl leh Champhai destination atan hian duan mek a ni.

Development of Widening at Saireptlang hi Ministry of DoNER hnuaiyah NESID OTRI atanga beisei niin, Planning & Programme Department-ah tunah hian kan thehltu tawh a. *Challenge-base destination under Swadesh Darshan 2.0* hi district hrang hranga DC - Chairman, Destination Management Committee te nen tang hovin, Ministry of Tourism-ah a hnuaiyah proposal te hi kan thehltu tawh bawk a ni. –

- a) *Integrated Development of Spiritual Tourism at Lunglei, in Lunglei District;*
- b) *Development of Village base eco-tourism at Lungdai in Kolasib District;*

- c) *Reliving the pass tourism and heritage works at Lungleng in Aizawl* (hei hi Pi Baryl Vanneihsangni ka chhanna ni nghal se).
- d) *Promotion of eco-tourism and Amrit Dharohar Ramsar Site at Palak Lake in Siah District;*
- e) *Provision of basic amenities in heritage site at Vangchhia* under PRASAD ah hian ah khualzinte tan basic amenities, ASI in a phal chinah siam tum a ni a, proposal hi Ministry of Tourism in a endik mek a ni.
- f) *Safety of Women Travellers under Nirbhaya Scheme* hi, hmeichhia khualzinte himna lam hawia tourism development proposal a ni a, Ministry of Tourism in min endiksak mek bawk a ni.

Tun tum budget ah hian kum hmasa RE 2023-2024 aia tourism budget pumpui tlakhniamna hi lakh ₹6.28 a ni a. Hei hi, Major Works-a budget dah thin, infrastructure assets hnuaia dah taka kan sum hman tur tlakhniam vang te, GIA salary atana sum kan dah tak loh vang te a ni ber a. Hetia kan ni chung hian, Nirbhaya Scheme hnuaia *Safety of Women Travellers* kalpuina atana state-matching share tur lakh ₹38 dah a ni a. Tin, NABARD project hna kalpuina tur atan lakh ₹133.61 ruahman a ni thei hi a lawmawm ka ti em em a, kan Finance Minister hnenah lawmthu ka sawi nghal a ni.

Tichuan, Social Welfare Department lam han sawizui leh ta ila. Social Welfare Department hi directorate pahnih - *Social Welfare & Tribal Affairs* leh *Women & Child Development* tea then darh a ni a. He department ah hian a huamzau khawp a. Nichinah pawh Pu Speaker, ka thiante hian an sawi an sawi tawh kha - Naupai lai atanga tar kun khup bilh thleng hian kan huam vek mai a, a nuam pawh ka ti hle mai.

Women & Child Development lam hi han sawi hmasa ta ila. Naupang enkawl na bakah, hmeichhiate chawikanna leh humhalhna programme hrang hrang kan neih mek te ka tarlang hmasa duh a. A tawng hi vai tawng deuh vek a nih avangin, in lo hrethiam mai dawn nia.

- 1) *Saksham Anganwadi* leh *Poshan 2.0* - Hei hi ‘Wadi’ tia kan sawi fo thin kha a ni a, nutrition semna programme a ni ber mai.
- 2) *Mission Vatsalya* - Naupang dikna chanvo humhalhna scheme a ni a. Anni hian Juvenile Justice Act hnuaiah hna an thawk a ni.
- 3) *Mission Shakti* - Hmeichhe chawikanna leh venhimna scheme a ni a, ‘*One Stop Centre*’ kan tih hi an enkawl langsar zual te chu a ni.
- 4) *Beti Bachao, Beti Padhao* (BBBP) - Hmeichhe naupang humhalha chawikanna programme a ni a, hei hi kan kalpui mek a.
- 5) *Samarth* - Women Empowerment hnuaiah ‘naupai lawmman’ kan tih thin kha a ni.

Tin, PMMVY scheme te kan nei a. He scheme bik hnuaia kan hlawhtlinna te hi han sawizau ta lawk ila –

He scheme hnuaiiah hian India ram puma state thawk tha ber *a-palina* kan ni mek a. North East ah phei chuan, Pu Speaker, *pakhatna* kan ni. Tin, Serchhip District hian a zawnin kum 2018 leh 2019 ah rampum huapa district ti tha ber lawmman a dawng bawk a ni. He hamthatna hi vawiinni thlengin naupai mi 36,207 in an dawng tawh a ni. Tin, hmeichhe rahbi tleute enkawla tanpuina hmun hi *Shakti Sadan* scheme hnuaiiah kan nei bawk a. Chubakah chuan, *Shakti Niwas* - Working Women Hostel a ni a, tunah hian Mizoram-ah pathum - Aizawl ah 2 (khum 100 awmna leh khum 30 awmna), Lunglei ah 1 (khum 30 awmna) te anni. Tin, scheme thar, *Paalna*, hei hi Creche a ni a. Tunah hian Anganwadi-cum-Creche 155 siamna tur approval kan nei a, hma lak mek niin, hmun hrang hrangah thawktu turte pawh lak mek a ni.

Hengte bakah hian hian hmeichhia leh naupangte tan a hnathawktu Board leh Commission hrang hrangte kan nei a. Chungte chu:-

- 1) Mizoram State Commission for Women;
- 2) Mizoram State Social Welfare Board;
- 3) Mizoram State Commission for Protection of Child Rights Act;
- 4) Mizoram State Council for Child Welfare te anni.

Chu bakah chuan hmeichhe humhimna dan hrang hrang: -

- 1) The Protection of Women from Domestic Violence Act, 2005;
 - 2) The Sexual Harassment of Women at Workplace (Prevention, Prohibition & Redressal) Act, 2013;
 - 3) Mizoram Prohibition of Child Marriage Rules, 2010;
- hengte pawh hi kenkawh mek an ni bawk.

Tichuan, Social Welfare & Tribal Affairs Department lam han leh ta ila. Pu Speaker, hetah hi chuan memberte pawhin kut ben hluah hluahna tur an neih ka ring a, lo insum lo se la. Kan ram hruaitu hmasate phurrit ni thin, tuna kan MLA-puite phurrit ni chho mek chhawk zangkhaina tura ruahmanna - *Mitthi-ruang phurhna* tur telna budget vawiinah he House zahawmtakah ka rawn pharh thei hi ka lawm hle mai a. Object Head 49-ORE atangin ruang phurhna kalpuina tur hian lakh ₹500 dah a ni. Tin, kan sawi lar em em - NSAP Scheme hnuaiia kan hmalakna, *tar-chawmna* tia kan hriat lar - old age pension te, widow pension leh

HON. SPEAKER : Ngawi teh aw, Pi Minister;, ka vei lampang te kha an thawm a ri ve miah lo mai a, ruang phurh tih velah khan. Ngaihtuahna sen nawn a ngai ang em aw, ka ti a.. (**Opposition Bench**: A rik rin viau kha..)

PI LALRINPUII, HON. MINISTER: Tin, *widow pension* leh *disabled pension* te pawh state-in a tum thin chu, cheng 100/- atangin cheng 1000/- theuhah tihpun a ni dawn a. (Pu Speaker, nangmah kaltlangin, Pu Beichhua'n hmanna a zawhna kha ka

chhanna ni nghal se.) Hemi atan hian Object Head 31, GIA General hnuaiiah *old age pension* atan lakh ₹325.56 te, *widow pension* atan lakh ₹277.20 leh, *disabled pension* atan lakh ₹8904 te kan budget-ah Finance Minister-in min han telh sak thei hi ka lawm em em mai a. Inthlan lai campaign-a kan hman, tun thla hnih-thum leka, thu tisaa a lo chang chho ta mai hi ka lawm hle a ni. (Kut in va beng uar lo ve, Pu Speaker).

Kan hriat theuh angin, ruihhloin kan ram a run mek a, kan thalai tam tak chu engmah ngaihtuah thei lo leh engmah ti thei lovin, ruihhlo bawiah an tang mek a, chhungkua a rum a; hnamin a tuar bawk a; ramin kan mangan pui mek a ni. Hemi avang hian, kan Chief Minister-in *100-days* programme-ah pawh hmalak hmasak berna turah a dah hial a ni. Hemi avang hian ka department chan - Social Welfare & Tribal Affairs Department hnuaiiah pawh hma la nghalin, kohhran hrang hranga hmeichhe huruaitute, hmeichhe NGO hrang hrang hruaitute leh Department Officials-te nen consultative meeting te kan nei a, inkhawmpui lianah te pawh awareness campaign kan nei chho nghal a ni.

Chutihruai chiah chuan, ruihhlo ngaite pualin, keimahni department bikah Object Head 31, GIA General hnuaiiah lakh ₹10 dah a ni bawk hi kan lawm hle a. Tin, kum danga kan la hmuh ngai loh, *Gender Budget* - hmeichhiate leh naupangte dinhmun chawikanna tura ruahmanna ka department chan ngeia siam a han ni te hi, min ti lawm zualtu a ni.

Tin, heng bakah hian hmalakna hrang hrang kan neihte, RITC - Residential Institution & Training Center for Tribal Youth, Durtlang-a kalpui mek te; State Social Welfare & Rehabilitation Center, Chanmari West-a kalpui mek te; Ainawn Veng-a State Senior Citizen's Home neih mek te; Mizoram Social Defence & Rehabilitation Board hnuaiiah ruihhlo-do kawnga inzirtirna, invenna leh enkawl na kawnga hmalakna te; tin, tunah hian Ainawn Veng-ah Rehabilitation Home for Persons Care of Mental Illness chu bul tan mek a ni bawk a.

Tin, chubakah chuan, Welfare of Handicap, Disability hnuaiiah - Disability Pension te, Stipend te, Educated Unemployed te, Handicap Students stipend te kan pek bakah, handicap person-te tan *Economic Rehabilitation Programme* te kan nei bawk a ni. Tin, chubakah chuan Article 275-ah (nichina Pu Dawngtea te leh mi dang dangte pawhinrawn sawi ang khan) fund awm te hmangin hmasawna hrang hrang hnathawh thin a ni a. 'Eklavya School' kan tih mai thin EMRS kan neih sa te enkawl leh neih belh zelna kawngah hmasawna kan neih belh zel pawh hi a lawmawm ka ti hle a ni.

A tawp berah chuan, Demand No. 24 - Health & Family Welfare Department chungchang han sawi ta ila.

Health & Family Welfare Deptt. ah hian Principal Secretary kaihhruaina hnuaiiah Administrative Department kan nei a. Tin, Prinicipal Director hnuaiiah directorate 4 - Directorate of Health Services, Directorate of Health & Medical Education, Directorate

of Ayush leh Directorate of Nursing te kan neih bakah, National Health Mission te, Zoram Medical College te, Mizoram Health Care Society te, Mizoram State AIDS Control Society te; tin, DHME hnuaiiah Mizoram Cancer Institute a awm bawk a. A vaiin establishment lian tak tak 10 an awm a nih chu. An zinga pakhat chauh pawh hi department pangngai tak tiat an ni a, an hma lakna tlangpui han sawi diat diat ila. Pu Speaker, a lo rei deuh a nih pawhin, he department hi chu a lian em a, dawhthei takin in lo ngaithla dawn nia; zawhna tam berna pawh a nih bawk kha.

Directorate of Health Services:

1. NABARD hnuaiiah IGF 29-ah crore ₹20 bakah, crore ₹5 hmangin heng hna te hi thawh tuma hmalak mek a ni a. Chungte chu - Tlabung sub-Division Hospital, PHE 2, Sub-Center 14 leh Quarter 8 te anni.
2. North Eastern Council, NEC atangin crore ₹13 hmangin Muallungthu-ah Central Medical House sakna tura hma lak tan a ni.
3. District thar pathum - Khawzawl, Saitual leh Hnahthial-ah Senior Chief Medical Officer Office building tur Mizoram Health System Strengthening Project, MHSSP atangin sak zawh tep a ni.
4. Directorate of Hospital and Medical Education, Civil Hospital, Aizawl leh Kulikawn Hospital-ah Biometric Attendance hman tan a ni a. Health & Family Welfare Department hnuaiiah office hrang hrang hnuaiiah pawh Biometric Attendance hmang turin inbuatsaih mek a ni a. Hei hi kan nagai pawimawh em em a. Chief Minister's *100-days* achievement a nih avangin, nichinah khan Pu Speaker ka lo sawi theihngihl hlah a; ka department chan dangah pawh khan *100-days* hi hman vek tum a ni.
5. Civil Hospital Aizawl-ah hian damlo zawng zawngte chu record kimchang (kum 10 chhung) an dah theihna turin kan digitized tawh bawk a. Hmanni lawkah khan ka va hawng a ni.
6. CCTV Camera 23, dual monitoring system chu damlote leh thawktute him zawk nan kan install bawk a ni.
7. Hospital Pharmacy chu damlo harsa zawk te'n damdawi tlawm taka an leina tur, ni 28.2.2024 atang lo khar reng tawh kha kan hawng thar leh a. A bikin Dialysis, Cardiology leh ICU patients ten an chhawr tangkai hle a ni. Tin, chubakah chuan, 'damdawi man tlawm' kan tih kha, rei tak a lo inhawng tawh lo a, (hotute hnen atanga ka hriat dan chuan, hnawk ti deuh pawl an lo awm a ni mai thei a) *Aushadhi* - Damdawi man tlawm dawr pawh hawn thar leh a ni.
8. Hospital website chu mipuite'n awlsam taka doctor duty hun te, Birth and Death Certificate dil nan leh scheme hrang hrangte hriatna atan kan kalpui a. Tunah hian website address hi *CHS.Mizoram.gov.in* tia hming thlak kan dil mek a ni.
9. OPD registration leh UPI payment leh SMS Lab. report te chu mipuite tana awlsam taka hman a nih theihna turin *trial run* kan nei mek bawk a ni.
10. Civil Hospital-ah hian hma kan sawn nasa em em a. Civil Hospital Aizawl ah hian kan policy a kan tih ang khan, counter thar kan siam belh a, Nu-naupai te,

kum-upa te tan tunah hian OPD thar kan siam baw a. Tunah hian counter paruk a awm ta a nih chu.

11. Mizoram-a a hmasa bera tan, Viral Load Machine - HIV natna hrik tam leh tam loh enna leh treatment response leh, drug resistance hriatna khawl chu Civil Hospital, Aizawl-ah bun a ni baw a ni.
12. NESIDS atangin 100-bedded District Hospital sakna tur leh equipment leina tur project crore ₹22 hmuh niin, hna pawh thawh mek a ni.
13. NESIDS atang bawkin Upgradation of Cardiology Department, Civil Hospital, Aizawl Project crore ₹12.42 hmuh a ni a, hna hi thawh mek a ni baw a ni.
14. NEC atangin ₹63,45,000/- hmangin Civil Hospital ah Dialysis Unit siam a ni a; civil work zawh tawh a ni a, GEM kaltlangin lei tura hmachhawp mek a ni.
15. Ministry of Health & Family Welfare atanga project kan hmuh, Trauma Center - Lunglei, Lawngtlai, Siaha, Kolasib, Champhai leh Serchhip te sak zawh tawh niin, Civil Hospital Aizawl-ah pawh sak mek a ni.
16. SASCI hnuiaia project - Construction of Laboratory Building at Civil Hospital, Aizawl lakh ₹396 chu State PWD thawh tura pek niin, hnathawh mek a ni.]
17. Power Grid Corporation atangin CSR fund crore ₹21, project, 100-bedded District Hospital Serchhip sakna tur chu hmuh niin, work order pawh pek fel a ni tawh a, hna pawh thawh tan tum mek a ni.
18. *Strengthening of Health Infrastructure for Comprehensive Response to Possible Outbreak of Covid 19 in Mizoram* hnuiaia sum hmuh hmangin Pukpui Lunglei ah oxygen generating plant - refilling station bun fel a ni tawh baw a. He mia thawk turte pawh hi kan ngaihtuah fel mek a ni.
19. District thar pathum atan District Hospital sakna tur NESIDS atangin fund hmuh a ni tawh a. Khawzawl leh Hnahthial District Hospital atan Contractor te thlan fel anni tawh a, Saitual District Hospital satu tur pawh buaipui mek a ni.
20. Kalphung-thar ah hi chuan Health Department lam pawhin nasa zawka Tertiary Sector lam kalpui kan duhna te hi hriain, kan Minister chak tak, UD&PA Department changtu, Pu K. Sapdanga chuan Aizawl Smart City Ltd. atangin Aizawl Civil Hospital atan MRI khawl min ngaihtuhsak mek a. Khawl procure tur hian tender te pawh chhuah mek niin kan lo hria a. Damlo tan a tangkai dawn em em a, mipuite aiawhin lawmthu ka sawi duh baw a ni.

Pu Speaker, i phalnain - mipakhat phei chuan MRI kan neih hi a duh lutuk a, a tawngtai ngat ngat thin a. Tukin zingah House-ah ka kal dawn tih a hriat pawh khan, 'MRI kharawn sawi chhuak rawh aw' a ti a. Chu chu, Pu Sapa'n minrawn pe ta a ni. Kan lawm hle mai.

21. Super Specialist sub-Cadre post hi post pahnih kan create thar a, Nephrology-ah hian post pakhat kan create a, kan fill baw a. Cardiology kha chu a la vacant a ni. Surgical Oncology-ah hian pakhat kan create a, filled a ni baw a.

22. Specialist doctor lak belh tura hmalak mek niin, MPSC pawhin advertisement te pawh a tichhuak tawh a, lak fel thuai kan beisei a ni. Orthopedic-ah 1, gyneacology-ah 1, ophthalmology-ah 1, radiology-ah 1, medicine-ah 1.

Ayushman Bharat -

1. Sub-Center 38 te chu, *Ayush Health & Wellness Centre*-ah hlankai an ni a. Sub-Centre 3 dawng pawh hlankai tuma hmalak mek a ni.
2. Kulikawn Hospital, Aizawl-ah 50-bedded, Ayush Hospital leh Keifang-ah 10-bedded Ayush Hospital sak tuma hmalak mek a ni.
3. Ayush Health & Wellness centre 16 te chuan NABH - 'Quality a tha a ni' tih hriatpuina accreditation an hmu thar a, India rampuma Ayush Health & Wellness centre zingah NABH accreditation hmu hmasa ber kan ni. (Kut ben hluah hluahna chi, hei pawh hi.)
4. Ayush Health & Wellness centre 38-ah *herbal garden* siam niin, State Medicinal Plants Board, Directorate of Ayush chuan Department of School Education nen tang kawpin school 52-ah *herbal garden* an din mek a ni. (Pu Speaker, vawiina Health Department atanga gift in dawn te pawh kha, *herbal* atanga siam a ni tih ka rawn sawi ve hrim hrim a ni e.)
5. Ayush sub-Cadre medical officer 5 kan la thar bawh a ni.

Mizoram Medical College:

1. Thawktu indaih lohna avangin ZMC-a thawktu turte lak belh anni a, Associate Professor 5, staff nurse 28, Medical Record Technician 2 te anni.
2. MBBS 1st Batch zirlai 95-te chuan internship an ti mek a, 2024 April ah an zo ang. Heng zinga zirlai 75 te hi Mizo an ni.
3. Project leh research hrang hrangte ZMC-ah hian kalpui mek a ni a.
4. NESIDS hnuaiyah residential hostel 2 - mipa leh hmeichhe tan crore ₹20 man chu sak mek a ni.
5. NEC hnuaiyah crore ₹6.7 crore man, 60-bedded, intern tan sak mek a ni bawh.
6. Department of Health research hnuaiyah crore ₹2 man Morbi-Rural Health Research Unit sak mek a ni.
7. Special package, Government of India atanga dawn tur first installment atan crore ₹9.89 college zirtirtute leh hnathawktu dangte rawihna atana hman tur Delhi ah DPR kan thehltu a ni.

Directorate of Nursing:

1. Directorate of Nursing hi, Ni 9.8.2023 (hman ni deuh lawk) khan siamthar niin, tunah hian Principal Director, Health & Family Welfare Department in charge a la a ni.
2. GNM School Champhai chu, Ni 18.8.2023 atang khan hawn tan a ni a. GNM Hostel sak chungchang a sum dinhmun chu hetiang hi a ni - Central Sector Scheme atangin lakh ₹150 hmuh a ni a, lakh ₹50 hi hostel sak nan PWD ah

transfer a ni a, lakh ₹100 erawh chu school mamawh leinan a hman a ni. School sakna tur daihlohna hi SASCI atangin lakh ₹390 hi hmuh beisei a nih laiin, first installemt chauh hmuh a nih chuan, lakh ₹190 chauh hman theih a ni ang a. Chutah chuan lakh ₹90 hi leiba awmsa, liability a nih tawh avangin, lakh ₹100 in a daih chin chiah sak belh a theih dawn a ni. Hei hi Pu Speaker, kan Finance Minister pawh hian khawngaitaka min lo hriatpui turin kan duh hle a ni.

3. CSS Development of Nursing Services atangin Nursing School, Lunglei chu Nursing College ah hlankaina tur project hmuh niin, college building sa turin State PWD-in hma a la mek a ni.
4. Tutor 20 leh Staff Nurse contract 50 lak an ni bawk.
5. Health & Family Welfare Govt. of India atanga project kan hmuh lakh ₹250 hmangin GNM Hostel Siaha chu zawh fel a ni a. Pu Speaker, hetah hian a school building hi chu, nimin lamah a la zawhloh dan kan sawi tawh te kan la hria ang a.
6. Ministry of Health & Family Welfare Govt. of India atanga project kan hmuh tho GNM Hostel Champhai chu State PWD te thawh tura hlan fel a ni.

Mizoram State Health Care Society:

Mizoram State Health Care Society ah pawh hian (kan thiante kha kut beng turin lo inring se ka duh hle mai) –

1. Mizoram State Health Care Scheme hnuaiia damlo te bill crore ₹14.99 chu January thla khan pekchhuah niin, tun dinhmuna crore ₹48.56 ba la awm pawh hi, bank-a pek chhuah mai theih turin cheque buaipui mek niin, kar thar lamah chuan damlote bill hi an account-ah theuh a luh hman kan beisei.
2. Healthcare scheme kan hman lai mek kalphungah hian siamthat ngai lai te awmin scheme kalphung her rem turin sorkarin hmalakna a kalpui mek a, mipui zawng zawng huapzo - Universal Health Coverage Scheme a nih theih nan hmalak mek a ni.
3. Healthcare hnuaiiah mipuite'n an chanvo dik tak an hmuh theihna turin hmalak a ni a. Food, Civil Supplies & Consumer Affairs Minister Pu B. Lalchhanzova te nen pawh Inter-Ministerial meeting te pawh kan nei tawh a; chak taka hma min lak sak nghalin, ration card siam thatnaah kalpui mek niin kan hria a, kan Minister chungah pawh hian lawmthu ka sawi nghal a ni.
4. Healthcare scheme huam zau zawka kalpui tum a nihnaah hian Central scheme kal mek AB-PMJAY nen huang khata suih fin a ni dawn a ni.
5. Healthcare scheme tihchangtlunna atana ministry hmasa ten hmalakna an lo kalpui tawh, Asian Development Bank atanga sorkarin loan lak tura ruahmanna a lo siam chu kan bawhzui zel a, June thlaah hian agreement sign turin kan inti a ni.

Mizoram State Cancer Institute (MSCI):

Mizoram State Cancer Institute (MSCI), Japan International Co-operation Agency (JAICA) hnuai crore ₹700 man Mizoram State Super Specialty Cancer and Research Centre dinna tur chu hmalak chhoh zel niin, tunah hian Project Management Consultant tur thlan mek a ni a, MSCI-a thawktu indaihlohzia kan hriain heng post-te hi create thar an ni a, sorkarah lak belh phalna kan buaipui mek a, chungte chu – Anesthesiologist - 1, Pediatric Care Physician - 1, Medicine Specialist - 1, Grade-II MHS GDMO - 2, Grade-I MHS Dental Surgeon - 1, Staff Nurse - 10, Laboratory Technician – 2 leh Group D - 6 te an ni.

National Health Mission:

1. NHM hnuai Reproductive and Child Health (RCH) programme chuan Population Foundation of India atangin lawmman pakhatna kan dawng a, hei hi tehna hrang hrang a teh a, North East zinga hriselna lama kan tih that avanga pek kan ni. Lawmman hi ni 18 December, 2023 New Delhi-ah sem niin pawisa fai cheng nuai 5 a keng a ni.
2. RCH portal-ah December 2023 thleng khan naupai 100 zelah 94% register niin, national level-ah NHM Mizoram kan ti tha ber bawk a ni, a lawmawm hle mai.
3. Kum 2025-a TB umbo tur a hmalakna kal zelah, a bik takah kum khat chung beihpui thlakna TB Elimination Accelerator initiative chu Mizoramah Central TB Division leh kan partner agencies-te nen tan mek a ni.

Health & Wellness Centre:

Sub Centre, Health & Wellness Centre hrang hrangah Health & Wellness Officer 272 lak tawh an ni a, tun hnaiah Health & Wellness Officer 30 lak thar an ni. Aspirational District-te, Aspirational Block te ngaih pawimawh zual an ni a. Pu Speaker, kan member Pu Lalzirliana bialte pawh kha ka tlawh thuai dawn a. Mizoram ah Aspirational Block pathum - Lungsan te, Ngopa te, Reiek te kan nei a, theihtawpin hma lak kan tum a ni.

1. Primary Health Centre pahnih - Aibawk PHC leh Thingsul PHC te chu PHC tha bik National Quality Assurance Standards (NQAS) certified thar an ni.
2. Malaria avanga damlohna leh thihna ti tlem turin damdawi chiah thosilen Mizoram district tinah sem mek a ni a, hmanni lawk khan ka va vailiam a ni, Pu Speaker.
3. Hriselna kawnga hmalak awlsam zawk nan Mizoram mipui zawng zawngte ABHA - *Unique Health Number* - Ayushman Bharat Health Account-ah number nei turin Ayushman Bharat Digital Mission kaltlanga chak taka hmalak mek a ni.
4. Pradhan Mantri Ayushman Bharat Health Infrastructure Mission, PMABHIM kan tih hnuaihan khan District Hospital 10-ah Laboratory changtlung tak, Integrated Public Laboratory dah tura hmalak niin, Siaha, Champhai leh

Hnahthial ah te hmalak tan an ni. Champhai District Hospital-ah, crore 1₹3 man Critical-care Block sak mek a ni bawk a ni.

5. 15th Finance Commission Health Grants hnuaiah hian heng hmun sarih - Chawngte, Cherhlun, Kawrthah, Thenzawl, Ngopa, Tuipang leh Vairengte-ah te hian Block Public Health Unit laboratory changtlung tak sak zawh a ni.
6. Urban Health and Wellness Centre hmun 17 ah din tawh a ni a, district hospital tinah dah vek anni.
7. Emergency Covid response plant hmangin Zoram Medical College ah 50-bedded critical care block sak tura buaipui mek a ni.

Mizoram Health System Strengthening Project MHSSP:

Mizoram Health System Strengthening Project MHSSP hei hi world bank tih te pawn lo hre ta mai ila. Hei hi world bank loan hmanga kal pui niin health system pui tura ruahman a ni a, district thar pathum - Khawzawl, Hnahthial leh Saitual ah te CMO building thar sak mek a ni a. District hospital Siaha, Lawngtlai, Champhai leh Lunglei ah te major repair leh renovation neih tura ruahman niin Siaha leh Lungleiah te hna thawh tan a ni MCon pawh ti phuisui turin hmalak tan tawh a ni. A dawt lehah chuan Mizoram State Health Care Society MHCSS office tur hi Directorate of Health Services building, Dinthar-ah hian an siam sak mek a ni. Tin, damdawiina thawk doctor leh nurse-te thiamna belhchhahna tur *clinical knowledge and skills improvement* online zirtirna buatsaih a ni a, practical sessions pawh neih thin a ni a. Doctor 448 leh nurse 1130 te'n he application hi an hmang tangkai hle a ni.

A tawp berah chuan CSR fund chungchang hi - Phailama company lian tak takte hian an CSR hman chhuahna kawngah health sector lam hi an rawn ngai pawimawh em em thin a, a lawmawm hle a ni. Tun hnai maiah pawh khan Sri Ramchandra Institute of Higher Education Polur, Chennai te nen thawk hovin CSR hmangin an doctor thiam tak takte Mizoram-ah an rawn tir a, cardio-camp an rawn nei a, mipuite zingah lungnatna nei ze ngai mi 128 lai mai an hmu chhuak a. Lung zeina senso hi a tam em em tih chu kan hre tlang vek a, damlo leh attendant pakhat hi Chennai an zuk thlenthlak chuan zaina senso zawng zawng leh an an lo haw lehna lawm tur air ticket kha an tum sak vek bawk a ni. Tunah hian ngaih pawimawh zual mi 20 an thlang chhuak a, chung zinga mi 16-te chuan Chennai an thleng thla tawh a, hlawhtling taka ze an nih ngei pawh ka beisei em em a ni.

Tin, Selco Foundation nen tangkawpin, CSR hmangin PHC leh sub-centre 236 laiah roof-top sorlar min rawn dahsak a, kumin kumtharah pawh hian PHC leh sub-centre dangah pawh install belh zel an rawn tuma kan lawm hle a ni.

Pu Speaker, Kulikawn-ah sawn khum 100 awm theihna tur NESIDS atangin fund kan dawng bawk a, chu pawh chu hma lak thuai tur a ni bawk a ni. Tin, Civil Hospital hi a

tawt tawh a, an footfall a sang em em a; Kulikawn-ah hian Annexe kan lo nei a nih chuan mipuite min chhawk zangkhai nasa em em dawn a ni.

Kha kha a tlangpua ka department-tea hmalakna, House zahawm taka ka rawn sawi theih te chu a ni a. Ka demand-te min enpui a, thahnem ngaitaka sawihona min neih pui avang hian, member zawng zawngte lawmthu ka hrilh a. Pu Speaker, official-a ka thawhpuite an fel em em a, lawmthu ka'n hrilh bawk a. Englai pawhin zan dar 12 ah pawh, pakhat phei chu nizanah dar 1 ah ka'n call deuh pawp a thil hriatchian duh ka nei si a; lo la ve leh mai bawk a. Khatiang khan min cooperate tha em em a, ka lawm tak zet zet a ni.

Pu Speaker, member te an thusawi chu ka react tawh lo ang a. Chuti a nih chuan, Demand pass dilna kha ka ti nghal dawn em, Pu Speaker? (**Hon. Speaker:** I Demand-te kha pass han dil nghal rawh le.) Pu Speaker, kum 2024-25 chhunga hman tur atan ka department chan hrang hrang Demand-te:

<i>Demand No.</i>	<i>Purpose</i>	<i>Amount (in ₹)</i>
24	Health & Family Welfare	8,39,53,60,000.00
29	Social Welfare	2,47,68,05,000.00
43	Tourism	13,92,80,000.00
TOTAL		11,01,14,45,000.00

he House zahawm tak hian min pass-pui turin ka rawn dil e. Ka lawm e.

HON. SPEAKER : A lawmawm e. Nichin khan Minister zahawm tak Pu PC Vanlalruata demand a belkhawm kha ka sawi sual em aw ka ti a. 'Cheng vaibelchhe 3,21, 52,23,000' tiin ka sawi em aw ka ti a. Kha kha a dik lova, 'cheng vaibelchhe 3,21,52,93,000' tih zawk tur a ni e. Sawisualah ngaihdam kan dil e.

Aw le, kan Health Minister khan Chalfilh biala ka sawmna kha a react lova, pass-pui ka ti duh emaw chu, te ka'n ti deuh neuh neuh a. Aw le, tunah chuan kan Minister zahawm tak Pi Lalrinpuii, heng a demand-te:

Demand No.	Purpose	Amount (in ₹)
24	Health & Family Welfare	8,39,53,60,000.00
29	Social Welfare	2,47,68,05,000.00
43	Tourism	13,92,80,000.00
TOTAL		11,01,14,45,000.00

House-ah pass a rawn dil ta a. Remti apiangin, 'remti' ti rawh ule. (**Members:** Remti). Remti lo kan awm chuan, 'Remti lo' ti ula. (*Remti lo an awm lova*) Aw le, rem kan ti tlang a, a lawmawm e. Lawmthu chu engtik lai pawhin a sawi theih e. Minister zahawm

tak Pi Lalrinpuii demand chu House in lungrual takin a pass ta a ni (**Pi Lalrinpuii, Minister:** Pu Speaker, ka lawm e.)

Pi Rinpuii, Social Welfare Minister zahawm tak khan, ‘Women empowerment sawi hian mipa an ning thin’ tih ang deuh khan a sawi a. Vawiinah khan rorelna sang ber kha hmeichhiain a kaihruai niin ka hria a. Ning raw sek sek, vawiin na na na chu; hmeichhe thuhnuaiiah mipate an awm kha maw. A ni lawm ni? Tin, tunhmain hmeichhiain an kaihruai fo lovin ka hria a, a vawikhatna a ni em aw? A vawikhatna a nih chuan, bungthar kan kai hi a lawmawm khawp mai.

Aw le, a light zawngin lo ngaihthla ta ila - Ngenna kan siam tawh a; “house-ah hi chuan third-person-in Speaker kaltlangin member-te hi in-address hram hram ang u” tih hi ka’n sawi thin a.

“*Pu Ngun, i awmlah hlanin chhim lam pawh kan lo tuam vek a nia aw*” tih kha kan ngaihthla a. Ani lah chuan, “A tha alawm” a ti mai a. Hmanni DC&MA chan Zawhna & Chhanna ah khan, “*Rawn pe ta se, enga tan nge i tih a?*” tih te kha a awm a. Pakhat lah khan, “*Eng a?*” a lo tizui a. Hawh u, ngaihtuahna i hmang tlang teh ang u.

Ni e, kei leh kan Dy. Speaker ten ngenna kan dawng a, vawiin chu. Vawiin khan Panel Chairman khan min kaihruai a, a dik zaih mai a. (**Dr. K. Beichhua:** Pu Speaker, vawiin khan floor lam atangin an hnawtchhuak tlat mai che a...) Chu chu ka han sawi mek a lawm; Panel of Chairman-in min kaihruai a, a hnip zaih mai a. “Panel of Chairmen hian min kaihruai hnem teh se; dik taka address kan chak a ni” tih a ni a. Chuvang chuan, Panel of Chairman hi kan hmu hnem deuh tawh mai thei a nia.

Aw le, vawiina kan business chu kan zo ta a. Naktuk, Ni 8.3.2024 (Zirtawpni) dar 10:30 AM-ah kan thukhawm leh dawn nia.

Sitting is adjourned. (9:10 PM)